

Liahona

Mga Pakigpulong sa Kinatibuk-ang Komperensya

Duha ka Bag-ong
Apostoles Gipaluyohan

Bag-ong mga General
Authority ug Mga
Opisyales sa General
Auxiliary Gipaluyohan

Pito ka Bag-ong mga
Templo Gipahibalo





*Presidente Russell M. Nelson (tunga) gipaluyohan isip ang ika-17 nga Presidente sa Simbahan atol sa ika-188 nga Tinuig nga Kinatibuk-ang Komperensya.
Ang iyang mga magtatambag sa Unang Kapangulohan mao sila si Presidente Dallin H. Oaks (wala) ug Presidente Henry B. Eyring.*

Ang Unang Kapangulohan

Sesyon sa Sabado sa Buntag

- 6 **Maligdong nga Katiguman**
Presidente Henry B. Eyring
- 9 **Bililhong mga Gasangikan sa Dios**
Presidente M. Russell Ballard
- 12 **Ako Anak ba sa Dios?**
Elder Brian K. Taylor
- 15 **Maingon nga si Kristo Nakapasaylo Kaninyo, nan Kinahanglan Kamo Usab Magapasaylo**
Elder Larry J. Echo Hawk
- 17 **Ang Kasingkasing sa usa ka Propeta**
Elder Gary E. Stevenson
- 21 **Kon Dili Kapitoan Ka Pito**
Elder Lynn G. Robbins
- 24 **Ang Propeta sa Dios**
Elder Neil L. Andersen

Sesyon sa Sabado sa Hapon

- 28 **Ang Pagpaluyo sa mga Opisyal sa Simbahan**
Presidente Dallin H. Oaks
- 29 **Report sa Church Auditing Department, 2017**
Kevin R. Jergensen

- 30 **Maaghub ug Mapaubsanon sa Kasingkasing**
Elder David A. Bednar
- 34 **Usa Nalang ka Adlaw**
Elder Taylor G. Godoy
- 36 **Young Women nga anaa sa Buhat**
Bonnie L. Oscarson
- 39 **Ang Makaluwas nga mga Ordinan-sa Magdala Kanato og Talagsaong Kahayag**
Elder Taniela B. Wakolo
- 42 **Pagtudlo diha sa Panimalay—usa ka Makalipay ug Sagrado nga Responsibilidad**
Devin G. Durrant
- 46 **Buhat sa Family History ug sa Templo: Pagsilyo ug Pagkaayo**
Elder Dale G. Renlund

Kinatibuk-ang Sesyon sa Priesthood

- 50 **Unsay Kinahanglang Masabtan sa Matag Naghupot sa Aaronic Priesthood**
Douglas D. Holmes
- 54 **Pasiuna nga mga Pakigpulong**
Presidente Russell M. Nelson
- 55 **Ang Korum sa mga Elder [Elders Quorum]**
Elder D. Todd Christofferson
- 58 **Tan-awa! Ang Harianon nga Kasundalohan**
Elder Ronald A. Rasband
- 61 **Dinasig nga Pagpangalagad**
Presidente Henry B. Eyring
- 65 **Ang mga Gahum sa Priesthood**
Presidente Dallin H. Oaks
- 68 **Ang Pagpangalagad uban sa Gahum ug Katungod sa Dios**
Presidente Russell M. Nelson

Sesyon sa Dominggo sa Buntag

- 75 **Dawata ang Balaang Espiritu isip Inyong Giya**
Elder Larry Y. Wilson
- 78 **Magkahiusa**
Reyna I. Aburto
- 81 **Tiunay nga Gugma: Ang Tinuod nga Timaan sa Matag Tinuod nga Disipulo ni Jesukristo**
Elder Massimo De Feo

- 83 **Ang Molahutay Hangtud sa Katapusan Maluwas**
Elder Claudio D. Zivic
- 86 **Ang Iyang Espiritu Magauban Kaninyo**
Presidente Henry B. Eyring
- 89 **Gagmay ug Yano nga mga Butang**
Presidente Dallin H. Oaks
- 93 **Pagpadayag alang sa Simbahan, Pagpadayag alang sa Atong mga Kinabuhi**
Presidente Russell M. Nelson

Sesyon sa Dominggo sa Hapon

- 97 **Si Kristo ang Ginoo Nabanhaw Karon**
Elder Gerrit W. Gong
- 98 **Ang mga Propeta Mamulong pinaagi sa Gahum sa Balaang Espiritu**
Elder Ulisses Soares
- 100 **Pangalagad**
Presidente Russell M. Nelson
- 101 **“Magpaduol ug Maglig-on Kanila”**
Elder Jeffrey R. Holland
- 104 **Pagpangalagad sama sa Gibuhat sa Manluluwas**
Jean B. Bingham
- 107 **Tan-awa, ania ra ang Tawo!**
Elder Dieter F. Uchtdorf
- 111 **Kining Tanan mahitungod sa mga Tawo**
Bishop Gérald Causse
- 114 **Pagpangandam sa Pagsugat sa Dios**
Elder Quentin L. Cook
- 118 **Magpadayon Tang Tanan**
Presidente Russell M. Nelson
- 72 **Mga General Authority ug Kinatibuk-ang mga Opisyaes sa Ang Simbahan ni Jesukristo sa mga Santos sa Ulahing mga Adlaw**
- 119 **Estatistikal nga Report, 2017**
- 120 **Indeks sa mga Istorya sa Komperensya**
- 121 **Mga Balita sa Simbahan**
- 137 **Dali, Sunod Kanako—Para sa Priesthood ug Relief Society**



Ang ika-188 nga Tinuig nga Kinatibuk-ang Komperensya

Sabado sa Buntag, Marso 31, 2018, Kinatibuk-ang Sesyon

Conducting: Presidente Henry B. Eyring. Pangbukas nga pag-ampo: Elder Mervyn B. Arnold. Panapos nga pag-ampo: Elder W. Mark Bassett. Musika gidalit sa Tabernacle Choir; Mack Wilberg ug Ryan Murphy, mga direktor; Andrew Unsworth ug Clay Christiansen, mga organista: “Sweet Is the Work,” *Hymns*, nu. 147; “We Thank Thee, O God, for a Prophet,” *Hymns*, nu. 19, arr. Wilberg; “We Listen to a Prophet’s Voice,” *Hymns*, nu. 22, arr. Murphy; “Press Forward, Saints,” *Hymns*, nu. 81; “Tell Me the Stories of Jesus,” *Children’s Songbook*, 57, arr. Murphy; “My Redeemer Lives,” *Hymns*, nu. 135, arr. Wilberg.

Sabado sa Hapon, Marso 31, 2018, Kinatibuk-ang Sesyon

Conducting: Presidente Dallin H. Oaks. Pangbukas nga pag-ampo: Elder Mark A. Bragg. Panapos nga pag-ampo: Elder Peter F. Meurs. Musika gidalit sa hiniusang choir gikan sa institutes of religion sa Salt Lake City, Utah; Marshall McDonald ug Richard Decker, mga direktor; Linda Margetts ug Bonnie Goodliffe, mga organista: “Come, Listen to a Prophet’s Voice,” *Hymns*, nu. 21, arr. Matthews ug Goodliffe; “Where Can I Turn for Peace?” *Hymns*, 129, arr. McDonald ug Parker; “Choose the Right,” *Hymns*, nu. 239; medley, arr. McDonald: “As Zion’s Youth in Latter Days,” *Hymns*, nu. 256, ug “The Iron Rod,” *Hymns*, nu. 274; “I’ll Go Where You Want Me to Go,” *Hymns*, nu. 270, arr. Wilberg.

Sabado sa Gabii, Marso 31, 2018, Kinatibuk-ang Sesyon sa Priesthood

Conducting: Presidente Henry B. Eyring. Pangbukas nga pag-ampo: M. Joseph Brough. Panapos nga pag-ampo: Elder K. Brett Nattress. Musika gidalit sa priesthood choir gikan sa Brigham Young University–Idaho; Randall Kempton, Paul Busselberg, ug David Lozano-Torres, mga direktor; Brian Mathias ug Andrew Unsworth, mga organista: “How Firm a Foundation,” *Hymns*, nu. 85, arr. Busselberg, gimantala sa Sharpe Music Press; “Father in Heaven,” *Hymns*, nu. 133, arr. Busselberg, gimantala sa Sharpe Music Press; “Praise to the Lord, the Almighty,” *Hymns*, nu. 72; “Rise Up, O Men of God,” *Hymns*, nu. 324.

Dominggo sa Buntag, Abril 1, 2018, Kinatibuk-ang Sesyon

Conducting: Presidente Russell M. Nelson. Pangbukas nga pag-ampo: Elder S. Mark Palmer. Panapos nga pag-ampo: Elder Joaquin E. Costa. Musika gidalit sa Tabernacle Choir; Mack Wilberg, direktor; Clay Christiansen ug Richard Elliott, mga organista: “On This Day of Joy and Gladness,” *Hymns*, nu. 64; “Christ the Lord Is Risen Today,” *Hymns*, nu. 200, arr. Wilberg; “He Sent His Son,” *Children’s Songbook*, 34–35, arr. Hoffheins; “Rejoice, the Lord Is King!” *Hymns*, nu. 66; “He Is Risen!” *Hymns*, nu. 199, arr. Wilberg, gimantala sa Oxford University Press.

Dominggo sa Hapon, Abril 1, 2018, Kinatibuk-ang Sesyon

Conducting: Presidente Dallin H. Oaks. Pangbukas nga pag-ampo: Elder Weatherford T. Clayton. Panapos nga pag-ampo: Elder Valeri V. Cordon. Musika gidalit sa Tabernacle Choir; Mack Wilberg ug Ryan Murphy, mga direktor; Richard Elliott ug Brian Mathias, mga organista: “Brightly Beams Our Father’s Mercy,” *Hymns*, nu. 335, arr. Murphy; “Dear to the Heart of the Shepherd,” *Hymns*, nu. 221, arr. Wilberg; “Redeemer of Israel,” *Hymns*, nu. 6; “Love One Another,” *Hymns*, nu. 308, arr. Wilberg;

“Let Us All Press On,” *Hymns*, nu. 243, arr. Elliott, gimantala sa Jackman.

Ang mga Pakigpulong sa Komperensya Anaa

Sa pag-access sa mga pakigpulong sa kinatibuk-ang komperensya diha sa Internet sa daghang mga pinulongan, bisitaha ang conference.lds.org ug pagpili og pinulongan. Ang mga pakigpulong anaa usab sa Gospel Library mobile app. Kasagaran sulod sa unom ka semana human sa kinatibuk-ang komperensya, ang Iningles nga mga video ug audio recording maanaa sa mga distribution center. Ang impormasyon sa kinatibuk-ang komperensya ma-access sa mga format para sa mga miyembro nga may kakulangan anaa sa disability.lds.org.

Anaa sa Hapin

Atubangan: Gilitratohan ni Leslie Nilsson. Sa luyo: Gilitratohan ni Cody Bell.

Litrato sa Komperensya

Mga litrato sa Siyudad sa Salt Lake gilitratohan nila ni Cody Bell, Janae Bingham, Mason Coberly, Randy Collier, Weston Colton, Alessandra DeAgostini, Ashlee Larson, Brian Nicholson, Leslie Nilsson, Matt Reier, Christina Smith, Dave Ward, ug Mark Weinberg.



Internasyonal nga magasin sa Ang Simbahan ni Jesukristo sa mga Santos sa Ulahing mga Adlaw nga giimprinta sa Cebuano

Ang Unang Kapanguluhan: Russell M. Nelson,
Dallin H. Oaks, Henry B. Eyring

Korum sa Napulog Duha ka mga Apostoles:

M. Russell Ballard, Jeffrey R. Holland, Dieter F. Uchtdorf, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, Dale G. Renlund, Gerrit W. Gong, Ulisses Soares

Editor: Hugo E. Martinez

Luyo-luyo sa mga Editors: Randall K. Bennett,
Carol F. McConkie

Mga Advisor: Brian K. Ashton, Bonnie H. Cordon, LeGrand R. Curtis Jr., Edward Dube, Sharon Eubank, Donald L. Hallstrom, Douglas D. Holmes, Erich W. Kopicshke

Tigdumalang Direktor: Richard I. Heaton

Direktor sa mga Magasin sa Simbahan: Allan R. Loyborg

Business Manager: Garff Cannon

Tigdumalang Editor: Adam C. Olson

Luyo-luyo so Tigdumalang Editor: Ryan Carr

Assistant sa Publikasyon: Francisca Olson

Team sa Pagsulat ug Pag-edit: Maryssa Dennis, David Dickson, David A. Edwards, Matthew D. Flitton, Lori Fuller, Garrett H. Garff, LaRene Porter Gaunt, Jon Ryan Jensen, Charlotte Larcabal, Michael R. Morris, Eric B. Murdock, Sally Johnson Odekkir, Joshua J. Perkey, Jan Pinborough, Richard M. Romney, Mindy Selu, Chakell Wardleigh, Marissa Widdison

Tigdumalang Direktor sa Art: J. Scott Knudsen

Direktor sa Art: Tadd R. Peterson

Team sa Pagdesinyo: Jeanette Andrews, Fay P. Andrus, Mandie Bentley, C. Kimball Bott, Thomas Child, David Green, Colleen Hincley, Eric P. Johnsen, Susan Lofgren, Scott M. Mooy, Emily Chieko Remington, Mark W. Robison, Brad Teare, K. Nicole Walkenhorst

Coordinator sa Intellectual Property: Collette Nebeker Aune

Tigdumala sa Produksyon: Jane Ann Peters

Team sa Produksyon: Ira Glen Adair, Kevin Banks, Julie Burdett, Thomas G. Cronin, Bryan W. Gygi, Ginny J. Nilson, Derek Richardson

Prepress: Joshua Dennis, Ammon Harris

Direktor sa Pag-imprinta: Steven T. Lewis

Direktor sa Pagpang-apud-apod: Troy K. Barker

Paghubad: Francisco M. dela Cruz

Ipadala ang subskripsyon, mga pangutana, ug mga taho ngadto sa Dateline Philippines sa Liahona, The Church of Jesus Christ of Latter-day Saints, Temple Drive, Greenmeadows Subdivision, Quezon City 1110, Metro Manila, Philippines o sa P. O. Box 1505, Ortigas Center, Emerald Avenue, Pasig 1600, Metro Manila, Philippines. Numero sa telepono 635-9183. Presyo sa subskripsyon sa Pilipinas, P48 matag tuig, P4.00 matag gula, gawas sa mga espesyal nga isyu.

Sa pag-subscribe ug pag-renew sa magasin, bistahi ang <http://store.lds.org>. Paliug ayaw kalimti sa pagbutang sa imong ward/branch sip address asa ipadala ang imong subskripsyon.

Kon dunay mga pangutana mahitungod sa subskripsyon paliug tawag sa Church's Global Service Center (GSC) sa 1800-8-680-3950 alang sa mga subscriber sa PLDT ug Smart o 1800-1-441-0687 alang sa mga subscriber sa Globe.

Isumiter ang mga manuskrito ug mga pangutana online sa liahona.lds.org; kon ipadala ngadto sa Liahona, Room 2420, 50 East North Temple Street, Salt Lake City, UT 84150-0024, USA; o i-e-mail sa: liahona@ldschurch.org

Liahona (usa ka termino sa Basahon ni Mormon nga nagpasabut nga "kompas o direktor") gimantala sa Albanian, Armenian, Bislama, Bulgarian, Cambodian, Cebuano, Chinese, Chinese (simplified), Croatian, Czech, Danish, Dutch, English, Estonian, Fijian, Finnish, French, German, Greek, Hungarian, Icelandic, Indonesian, Italian, Japanese, Kiribati, Korean, Latvian, Lithuanian, Malagasy, Marshallese, Mongolian, Norwegian, Polish, Portuguese, Romanian, Russian, Samoan, Slovenian, Spanish, Swahili, Swedish, Tagalog, Tahitian, Thai, Tongan, Ukrainian, Urdu, ug Vietnamese. (Ang kasagad magkalahi sa pinulongan.)

© 2018 sa Intellectual Reserve, Inc. Tanang mga katungod gigahin. Gigamit sa Ang Simbahan ni Jesukristo sa mga Santos sa Ulahing mga Adlaw nga may pagtugot. Gi-imprinta sa Tinipong Bansa sa Amerika. Gi-imprinta sa Pilipinas.

Copyright nga impormasyon: Gawas kon sa laing paagi gipasabut, ang mga indibidwal mahimong mokopya sa materyal gikan sa Liahona alang sa ilang personal, dili pangkomersyo nga paggamit (lakip sa mga calling sa Simbahan). Kini nga katungod mahimong kuhaon pag-usab sa bisan unsang panahon. Ang biswal nga material dili mahimong kopyahan kon kini adunay mga pagdili diha sa linya sa kredito sa maong artwork. Ang copyright nga mga pangutana kinahanglan ipadala ngadto sa Intellectual Property Office, 50 E. North Temple St., FL 13, Salt Lake City, UT 84150, USA; email: cor-intellectualproperty@ldschurch.org.

For Readers in the United States and Canada:

May 2018 Vol. 21 No. 5, LIAHONA (USPS 311-480) Cebuano (ISSN 1096-5114) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send all UAA to CFS (see DMM 507.1.5.2).

NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.



Indeks sa Mamumulong

Aburto, Reyna I., 78
Andersen, Neil L., 24
Ballard, M. Russell, 9
Bednar, David A., 30
Bingham, Jean B., 104
Caussé, Gérald, 111
Christofferson, D. Todd, 55
Cook, Quentin L., 114
De Feo, Massimo, 81
Durrant, Devin G., 42
Echo Hawk, Larry J., 15
Eyring, Henry B., 6, 61, 86
Godoy, Taylor G., 34
Gong, Gerrit W., 97
Holland, Jeffrey R., 101
Holmes, Douglas D., 50
Jergensen, Kevin R., 29
Nelson, Russell M., 54, 68, 93, 100, 118
Oaks, Dallin H., 28, 65, 89
Oscarson, Bonnie L., 36
Rasband, Ronald A., 58
Renlund, Dale G., 46
Robbins, Lynn G., 21
Soares, Ulisses, 98
Stevenson, Gary E., 17
Taylor, Brian K., 12
Uchtdorf, Dieter F., 107
Wakolo, Taniela B., 39
Wilson, Larry Y., 75
Zivic, Claudio D., 83

Indeks sa Hilisgutan

Aaronic Priesthood, 50
Anak, mga, 12, 42
Basahon ni Mormon, 12
Batan-ong mga Lalaki, 36
Buhat sa templo, 36, 46, 114, 118
Calling sa Simbahan, mga, 65, 93
Dios nga Amahan, 12, 78, 81
Dionsong kinaiya, 12, 30
Espiritu Santo, 75, 86, 93, 98
Family history, 36, 46, 114
Garbo, 30
Grasya, 21
Gugma, 54, 78, 81, 86, 100, 101, 104
Gugmang Putli, 61
Hingpit nga kalipay, 34
Home teaching, 100, 101
Hugot nga Pagtuo, 9, 24, 50, 86, 98, 118
Igpapahulay, 9
Jesukristo, 9, 12, 15, 21, 24, 30, 34, 39, 75, 78, 81, 83, 86, 89, 93, 97, 98, 104, 107, 111
Joseph Smith, 12, 39, 86, 93, 97
Kaaghup, 30
Kabatan-onan, 104
Kalamposan, 21
Kalisdanan, 107
Kamatayon, 107
Katakus, 65, 75
Kinatibuk-ang komperensya, 118
Korum sa Napulog Duha ka mga Apostoles, 17, 93
Korum sa priesthood, mga, 54, 55, 58, 61, 104
Ligdong nga katiguman, 6, 17, 24, 93
Melchizedek Priesthood, 55, 58, 65
Misyonaryo nga buhat, 114
Ordinansa, mga, 39, 46, 50, 97, 114, 118
Organisasyon sa Simbahan, 17, 58, 101

Pag-ampo, 42, 75, 78, 83, 86, 93
Paghinulsol, 21, 24, 50, 75, 83, 89, 107
Pagkaamahan, 65
Pagkaayo, 46
Pagkabanhaw, 89, 97, 107
Pagkadisipulo, 36, 81, 104, 107, 111, 118
Pagkainahan, 12
Pagkamapainubsanon, 30, 86
Pagkamasulundon, 24, 83, 86, 89
Pagkamatarung, 114
Paglahutay, 83
Pagpadayag, 75, 93
Pagpangandam, 114
Pagpasulod, 15, 21, 81
Pagsunoy sa Propeta, 17, 24, 58, 98
Pagtudlo, 17, 42, 50
Pagtuon sa kasulatan, 12, 42, 83
Pag-ula, 12, 15, 34, 39, 50, 81, 93, 97, 107
Pakigsaad, mga, 39, 83, 97, 111, 118
Pamilya, 42, 65
Panaghiusa, 58, 78, 114
Pangalagad, 54, 55, 58, 61, 68, 78, 86, 100, 101, 104, 111
Panimalay, 42, 111
Pasko sa Pagkabanhaw, 93, 97, 107
Plano sa kaluwasan, 34, 81
Priesthood, 65, 68, 100
Propeta, mga, 9, 17, 24, 30, 97, 98
Relief Society, 100, 104
Responsibilidad, 36, 114
Sakrament, 9, 21, 39, 83
Sakripisyo, 34
Serbisyo, 9, 36, 54, 55, 61, 65, 68, 78, 81, 101, 104
Templo, mga, 97
Unang Kapanguluhan, 17, 93
Visiting teaching, 100, 101
Young Women, 36, 100



Gihatagan og gibug-aton nga mga pagtulun-an gikan sa Ika-188 nga Tinuig nga Kinatibuk-ang Komperensya

Kini nga kinatibuk-ang komperensya makasaysayanon tungod sa daghang mga rason, lakip sa pag-usab sa mga korum sa Melchizedek Priesthood ug sa sinugdanan sa bag-ong panahon sa pagpangalagad. Apan tingali ang labing gipaabut mao ang atong indibidwal nga oportunidad sa pagpaluyo ni Presidente Russell M. Nelson isip ika-17 nga Presidente sa Ang Simbahan ni Jesukristo sa mga Santos sa Ulahing mga Adlaw.

Usa ka Maligdong nga Katiguman

Sa dihang miarug kita ug mipaluyo sa bag-o nga propeta ug Presidente, ang atong gipataas nga mga kamot wala maihap ni bisan kinsa nga tawhanong tighupot og rekord; kini gitiman-an sa langit isip usa ka pakig-saad uban sa Dios.

Sa tibuok komperensya, makita nato ang ebidensya nga kini mao ang Simbahan sa Manluluwas, gigiyahan Niya pinaagi sa Iyang mga sulugoon. Nakasaksi kita sa gidawat nga katungdanan sa usa ka buhi nga propeta kalabut sa matag usa kanato—wala magbarug taliwala nato ug sa Manluluwas apan nagbarug tupad nato ug nagtudlo sa agianan padulong sa Manluluwas. Nasinati nato ang oportunidad

sa pagdawat “og personal nga pagsaksi nga ang tawag ni Presidente Nelson gikan sa Dios” ug ang pag-angkla sa “atong kalag ngadto kang Ginoong Jesukristo [nga] maminaw niadtong Iyang gipadala.” (tan-awa sa Elder Neil L. Andersen sa pahina 26).

- Makakat-on kamo og dugang mahitungod ni Presidente Nelson sa 16-ka pahina nga espesyal nga gidugang nga anaa sa Mayo 2018 *Ensign* ug *Liahona*.

Pagpaluyo sa Bag-ong mga Lider

Agig dugang sa pagpaluyo ni Presidente Nelson, gipaluyuhan nato ang sobra sa 70 ka bag-ong mga lider.

- Pangitaa ang lista niadtong gipaluyuhan, lakip sa bag-ong mga Area Seventy, sa mga pahina 6–8, 28–29.
- Basaha ang mubo nga mga biography sa bag-ong mga lider sa pahina 121.

Mga Kausaban sa mga Korum ug Pagpangalagad

Bisan og nakita sa mga propeta, ang mga kausaban nga gipahibalo atol sa komperensya mao ang “mga ehemplo sa pagpadayag [gikan sa Dios] nga naggiya niining Simbahan sukad sa sinugdanan,” miingon si

Elder Jeffrey R. Holland (tan-awa sa pahina 101).


- Basaha ang mga instruksyon sa pag-usab sa mga korum gikan ni Presidente Nelson, Elder D. Todd Christofferson, ug Elder Ronald A. Rasband, sugod sa pahina 54.
- Basaha ang mga instruksyon sa pagpangalagad gikan ni Presidente Nelson, Elder Holland, ug Sister Jean B. Bingham, sugod sa pahina 100.
- Tan-awa ang dugang nga impormasyon mahitungod niini nga mga kausaban ug mga kapanguhaan sa intruksyon sa seksyon sa mga balita sa mga pahina 132–33.

Dugang nga mga Templo

Sa pamunto “ang among mensahe ngadto sa kalibutan” nga “gidapit namo ang tanang anak sa Dios sa duha ka habig sa tabil sa pagduol ngadto sa ilang Manluluwas, dawata ang mga panalangin sa balaan nga templo, pagbaton og molahutay nga kalipay, ug mahimong angayan sa kinabuhi dayon,” gipahibalo ni Presidente Nelson ang pito ka bag-ong mga templo.

- Susiha asa mahimutang ang pito ka bag-ong mga templo, sa pahina 133. ■





Ni Presidente Henry B. Eyring
Ikaduhang Magtatambag sa Unang Kapangulohan



Maligdong nga Katiguman

Mga kaigsoonan, si Presidente Nelson mihangyo nga ako ang modala sa buluhaton sa maligdong nga katiguman nga maoy hinungdan sa atong panagtigum karon.

Mao kini ang okasyon nga mahinungdanon alang sa mga miyembro sa Ang Simbahan ni Jesukristo sa mga Santos sa Ulahing mga Adlaw sa tibuok kalibutan.

Sukad niadtong Oktubre 10, 1880, sa dihang si John Taylor gipaluyohan nga mosunod ni Brigham Young isip propeta, manalagna, tigpadayag, ug Presidente sa Ang Simbahan ni Jesukristo sa mga Santos sa Ulahing mga Adlaw, sa kada usa niining mga okasyon gigahin isip usa ka pormal nga maligdong nga katiguman sa kahugpungan sa Simbahan aron sa pagpadayag sa tingog sa Simbahan.

Kita mobotar pinaagi sa mga korum ug mga grupo. Bisan asa man kamo, dapiton kamo sa pagtindog lang kon gihangyo ug mopakita sa inyong gipataas nga kamot kon kamo ba mopili sa pagpaluyo niadtong kansang mga pangalan ang ipresentar. Kinahanglan mobotar lamang kamo kon gihangyo sa pagtindog.

Ang mga General Authority nga gi-assign sa Tabernacle ug sa Assembly Hall sa Temple Square moobserbar sa

pagbotar diha niana nga mga pundok. Diha sa mga stake center, usa ka sakop sa stake presidency moobserbar sa pagbotar. Kon adunay mopakita og pagboto sa pagsupak, kadto nga mga indibidwal kinahanglan mokontak sa ilang mga presidente sa stake.

Mopadayon na kita. Usab, palihug manindog ug botar lamang kon gihangyo.

Among gihangyo ang mga sakop sa Unang Kapangulohan nga palihug sa pagtindog.





Gisugyot nga ang Unang Kapangulohan mopaluyo ni Russell Marion Nelson isip propeta, manalagna, ug tigpadayag ug Presidente sa Ang Simbahan ni Jesukristo sa mga Santos sa Ulahing mga Adlaw.

Kadtong anaa sa Unang Kapangulohan nga uyon, palihug ipakita kini.

Gisugyot nga ang Unang Kapangulohan mopaluyo ni Dallin Harris Oaks isip Unang Magtatambag ug si Henry Bennion Eyring isip Ikaduhang Magtatambag sa Unang Kapangulohan sa Simbahan.

Kadtong anaa sa Unang Kapangulohan nga uyon, mahimong mopakita niini.

Gisugyot nga ang Unang Kapangulohan mopaluyo ni Dallin Harris Oaks

isip Presidente sa Korum sa Napulog Duha ka mga Apostoles ug si Melvin Russell Ballard isip Akting Presidente sa Korum sa Napulog Duha ka mga Apostoles.

Ang mga sakop sa Unang Kapangulohan nga uyon mahimong mopakita niini.

Gisugyot nga ang Unang Kapangulohan mopaluyo sa mga sakop sa Korum sa Napulog Duha ka mga Apostoles: M. Russell Ballard, Jeffrey R. Holland, Dieter F. Uchtdorf, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, Dale G. Renlund, Gerrit Walter Gong, ug Ulisses Soares.

Ang mga sakop sa Unang Kapangulohan, palihug ipakita kini.

Gisugyot nga ang Unang Kapangulohan mopaluyo sa mga magtatambag sa Unang Kapangulohan ug sa Napulog Duha ka mga Apostoles isip mga propeta, manalagna, ug mga tigpadayag.

Ang mga sakop sa Unang Kapangulohan, palihug ipakita kini.

Ang Unang Kapangulohan karon manglingkod.

Atong dapiton si Elder Gong ug si Elder Soares sa pag-okupar sa ilang mga dapit sa Korum sa Napulog Duha.

Ang mga sakop sa Korum sa Napulog Duha ka mga Apostoles lang, lakip ni Elder Gong ug Elder Soares, palihug sa pagtindog.

Gisugyot nga ang Korum sa Napulog Duha ka mga Apostoles mopaluyo ni Russell Marion Nelson isip propeta,



manalagna, ug tigpadayag ug Presidente sa Ang Simbahan ni Jesukristo sa mga Santos sa Ulahing mga Adlaw; uban sa iyang mga magtatambag ug mga sakop sa Korum sa Napulog Duha ka mga Apostoles ingon nga sila gipresentar ug gibotuhan sa Unang Kapangulohan.

Ang mga sakop sa Unang Kapangulohan nga uyon, palihug ipakita kini.

Mahimo na kamong molingkod.

Among gihangyo ang mga General Authority Seventy ug ang mga sakop sa Presiding Bishopric nga palihug sa pagtindog.

Gisugyot nga ang tanang mga General Authority Seventy ug mga sakop sa Presiding Bishopric mopaluyo ni Russell Marion Nelson isip propeta, manalagna, ug tigpadayag ug Presidente sa Ang Simbahan ni Jesukristo sa mga Santos sa Ulahing mga Adlaw; uban sa iyang mga magtatambag ug mga sakop sa Korum sa Napulog Duha ka mga Apostoles ingon nga sila gipresentar ug gibotuhan sa Unang Kapangulohan.

Ang tanang mga General Authority Seventy ug mga sakop sa Presiding Bishopric nga uyon, palihug ipakita kini.

Mahimo na kamong molingkod.

Among gihangyo ang mosunod nga palihug sa pagtindog bisan asa kamo dapit sa kalibutan: ang tanang mga

Area Seventy, mga naorden nga patriyarka, mga high priest, ug mga elder.

Gisugyot nga si Russell Marion Nelson paluyohan isip propeta manalagna, ug tigpadayag ug Presidente sa Ang Simbahan ni Jesukristo sa mga Santos sa Ulahing mga adlaw, inubanan sa iyang mga magtatambag ug mga sakop sa Napulog Duha ka mga Apostoles ingon nga sila gipresentar ug gibotuhan sa Unang Kapangulohan.

Ang tanang uyon, palihug ipakita kini.

Si bisan kinsa nga supak mahimong mopakita niini.

Palihug manglingkod.

Ang tanang mga sakop sa Relief Society—nga mao ang, tanang mga babaye nga nag-edad og 18 ug pataas—palihug sa pagtindog.

Gisugyot nga si Russell Marion Nelson paluyohan isip propeta manalagna, ug tigpadayag ug Presidente sa Ang Simbahan ni Jesukristo sa mga Santos sa Ulahing mga adlaw, inubanan sa iyang mga magtatambag ug mga sakop sa Napulog Duha ka mga Apostoles ingon nga sila gipresentar ug gibotuhan sa Unang Kapangulohan.

Ang tanang uyon, palihug mopakita pinaagi sa pagpataas sa kamot.

Si bisan kinsa nga mosupak mahimong mopakita niini.

Mahimo na kamong molingkod.

Ang tanang naghupot lamang sa Aaronic Priesthood—nga mao ang, tanang naorden nga priest, mga teacher, ug mga deacon—palihug sa pagtindog.

Gisugyot nga si Russell Marion Nelson paluyohan isip propeta manalagna, ug tigpadayag ug Presidente sa Ang Simbahan ni Jesukristo sa mga Santos sa Ulahing mga adlaw, inubanan sa iyang mga magtatambag ug mga sakop sa Napulog Duha ka mga Apostoles ingon nga sila gipresentar ug gibotuhan sa Unang Kapangulohan.

Ang tanang uyon, palihug mopakita pinaagi sa pagpataas sa kamot.

Si bisan kinsa nga mosupak mahimong mopakita niini.

Mahimo na kamong molingkod.

Ang young women nga nag-edad og 12 hangtud sa 18 palihug sa pagtindog.

Gisugyot nga si Russell Marion Nelson paluyohan isip propeta manalagna, ug tigpadayag ug Presidente sa Ang Simbahan ni Jesukristo sa mga Santos sa Ulahing mga adlaw, inubanan sa iyang mga magtatambag ug mga sakop sa Napulog Duha ka mga Apostoles ingon nga sila gipresentar ug gibotuhan sa Unang Kapangulohan.

Ang tanang uyon, palihug mopakita pinaagi sa pagpataas sa kamot.

Si bisan kinsa nga mosupak mahimong mopakita niini.

Mahimo na kamong molingkod.

Karon among hangyoon nga ang tanang miyembro, sa bisan asang dapit, lakip sa tanan niadtong nanindog gani-na, nga palihug sa pagtindog.

Gisugyot nga si Russell Marion Nelson paluyohan isip propeta manalagna, ug tigpadayag ug Presidente sa Ang Simbahan ni Jesukristo sa mga Santos sa Ulahing mga adlaw, inubanan sa iyang mga magtatambag ug mga sakop sa Napulog Duha ka mga Apostoles ingon nga sila gipresentar ug gibotuhan sa Unang Kapangulohan.

Ang tanang uyon, palihug mopakita pinaagi sa pagpataas sa kamot.

Si bisan kinsa nga mosupak mahimong mopakita niini.

Mahimo na kamong molingkod.

Salamat, mga kaigsoonan, sa inyong gugma ug pagsuporta. ■



Ni Presidente M. Russell Ballard

Aking nga Presidente sa Korum sa Napulog Duha
ka mga Apostoles

Bililhong mga Gasa gikan sa Dios

*Ang kinabuhi mahimong mapuno sa pagtuo, kalipay, kamaya, paglaum,
ug gugma kon mopakita kita og gamayng matang sa tinuod nga pagtuo
diha ni Kristo.*

Mga kaigsoonan, bag-ohay lang kitang miapil sa maligdong nga katiguman, usa ka buluhaton nga masubay balik sa Biblia sa dihang ang karaang Israel nagpundok aron mobati sa presensya sa Ginoo ug mosaulog sa Iyang mga panalangin.¹ Kita adunay pribilehiyo nga magpuyo sa usa ka panahon nga kining karaang buluhaton gipahiuli pinaagi ni Propeta Joseph Smith.² Giawhag ko kamo sa pagrekord diha sa inyong personal nga journal kon unsay inyong gibati kalabut niining labing sagrado nga okasyon nga inyong naapilan.

Bag-ohay lang, nanamilit kita sa atong minahal nga higala ug propeta, si Presidente Thomas S. Monson. Bisan kon kitang tanan gimingaw kaniya, mapasalamaton kaayo kita nga ang Ginoo mitawag og bag-ong propeta, si Presidente Russell M. Nelson, aron sa pagdumala sa Iyang Simbahan. Sa hanay nga paagi nagsugod kita karon og bag-ong hugna sa kasaysayan sa atong Simbahan. Usa kini ka bililhong gasa gikan sa Dios.

Samtang ang matag usa kanato mipaluyo kang Presidente Nelson

pinaagi sa atong gipaisa nga mga kamot, nagbarug kita isip mga saksi sa atubangan sa Dios ug miila nga siya ang tukmang sumusunod ni Presidente Monson. Pinaagi sa gipaisa natong mga kamot, misaad kita nga mopatalinghug sa iyang tingog samtang nagdawat siya og direksyon gikan sa Ginoo.

Ang Ginoo nag-ingon:

“Ikaw maminaw ngadto sa tanan niya [nga nagpasabut sa Presidente sa Simbahan] nga mga pulong ug mga sugo diin siya mihatag nganha kanimo ingon nga siya nakadawat kanila . . . ;

“Kay ang iyang pulong ikaw makadawat, ingon og gikan sa akong kaugalingon nga ba-ba, sa tanan nga pagpailub ug hugot nga pagtuo.”³

Nakaila ko sa atong bag-ong propeta nga presidente sulod na sa 60 ka tuig. Nakaserbisyo ko uban kaniya diha sa Korum sa Napulog Duha sulod sa 33 ka tuig, ug usa ko ka saksi nga ang kamot sa Ginoo miandam kaniya aron mahimo natong pangulong apostol ug propeta sa pagdumala sa tanang mga yawe sa balaang priesthood dinhi sa yuta. Unta ang matag usa kanato hingpit nga mopaluyo kaniya ug sa iyang mga magtatambag ug mosunod sa ilang direksyon. Mainiton usab natong giabi-abi sila si Elder Gong ug Elder Soares isip mga sakop sa Korum sa Napulog Duha ka mga Apostoles.

Human sa Pagkabanhaw ni Jesus, usa ka panghitabo nga atong gisaulog niining mahimayaong tapus sa semana nga Pasko sa Pagkabanhaw [Easter], mipakita Siya ngadto sa Iyang mga disipulo ug miingon, “Ang kalinaw magauban kaninyo: *maingon nga gipadala ako sa Amahan, mao man usab igapadala ko kamo.*”⁴ Bantayi ang duha ka aksyon—gipadala sa Dios ang Iyang Anak. Ang Anak mipadala sa Iyang mga sulugoon—mortal nga kalalakin-an ug kababayan-an—aron sa pagtuman sa ilang buhat.

Dili kita angayang matingala nga masayud nga kadtong mga indibidwal nga gitawag sa paghimo sa buhat sa Ginoo dili hingpit sa tawhanong paagi. Mga istorya diha sa mga kasulatan nagdetalye sa mga panghitabo mahitungod





sa kalalakin-an ug kababayan-an nga gitawag sa Dios aron motuman og mahinungdanong buhat—buotan nga mga anak sa atong Langitnong Amahan nga gitawag nga moserbisyo diha sa ilang mga assignment sa Simbahan, naningkamot sa pagbuhat sa ilang labing maayo, apan wala pay usa kanila ang nahimong hingpit. Mao usab kini ngari kanato karon.

Kay tinuod man ang atong tawhanong mga kahuyang ug mga kasaypnan, unsaon man nato sa pagpadayon sa pagsuporta ug pagpaluyo sa usag usa? Magsugod kini sa pagtuo—tinuod, sinsero nga hugot nga pagtuo diha ni Ginoong Jesukristo. Ang hugot nga pagtuo diha sa Manluluwas mao ang unang baruganan sa doktrina ug ebanghelyo ni Kristo.

Pipila ka tuig na ang milabay mibisita ko sa Balaan nga Yuta. Samtang nagbiyahe mi nga nakaagi og tanom nga mustasa, ang direktor sa BYU Jerusalem Center nangutana kon nakakita na ba ko sukad og liso sa mustasa. Wala pa ko makakita mao nga mihunong mi. Gipakita niya nako ang mga liso gikan sa tanom nga mustasa. Labihan gayud kini ka gagmay.

Nahinumdom dayon ko sa mga pagtulun-an ni Jesus: “Kay sa pagkatinuod magaingon ako kaninyo, Nga kon may pagtuo kamo nga ingon og

liso sa mustasa, makaingon kamo niining bukid, Bumalhin ka gikan dinhi ngadto didto; ug kini mobalhin; ug walay magamakuli alang kaninyo.”⁵

Kon kita adunay pagtuo sama ka gamay sa liso sa mustasa, ang Ginoo makatabang kanato nga mabalhin ang kabukiran sa pagkasagmuyo ug pagduha-duha diha sa umaabut natong mga buluhaton samtang magserbisyo kita sa mga anak sa Dios, lakip na ang mga sakop sa pamilya, mga miyembro sa Simbahan, ug kadtong dili pa mga miyembro sa Simbahan.

Mga kaigsoonan, ang kinabuhi mahimong mapuno sa pagtuo, kalipay, kamaya, paglaum, ug gugma kon mopakita kita og gamayng matang sa tinuod nga pagtuo diha ni Kristo—bisan ang usa ka liso sa mustasa sa pagtuo.

Si Elder George A. Smith nahinumdom sa tambag nga gihatag ni Propeta Joseph Smith kaniya: “Siya miingon kanako nga ako kinahanglan dili gayud mawad-an og paglaum, bisan unsa nga matang sa kalisud nga mobilanggo kanako. Kon ako iunlod sa kinailadman sa Nova Scotia ug ang tanan nga mga Batoon nga Kabungturan ipatong-patong pagdat-og kanako, ako dili angay mawad-an og paglaum apan makigbisog, mogamit sa hugot nga pagtuo, ug dili kawad-an sa maayong paglaum ug ako kinahanglan

makalingkawas gikan niini nga tanan sa katapusan.”⁶

Kinahanglan natong hinumduman ang pamahayag ni Pablo: “Mahimo ko ang tanang butang pinaagi kang Kristo nga nagapalig-on kanako.”⁷ Ang pagkasayud niini laing bililhong gasa gikan sa Dios.

Agig dugang sa mga gasa nga ako nang nahisgutan, adunay daghan, daghan pa. Maghisgot ko karon og pipila lamang—ang gasa sa adlaw nga Igpapahulay, sa sakrament, pagserbisyo sa uban, ug ang dili hitupngan nga gasa gikan sa Dios sa atong Manluluwas.

Ang gahum sa adlaw nga Igpapahulay mao ang pagsinati diha sa simbahan ug sa panimalay sa kahimuot, sa kalipay, ug sa kainit sa pagbati sa Espiritu sa Ginoo nga walay bisan unsa nga pagkabalda.

Daghan kaayo ang mitugot sa ilang kaugalingon nga hapit na lang mogahin sa tibuok nilang kinabuhi diha sa internet gamit ang ilang mga smart device—ang mga screen nga magdan-ag sa ilang panagway sa adlaw ug gabii ug motaud sa ilang mga dunggan og mga earphone nga mobabag sa ligdong, hinagawhaw nga tingog sa Espiritu. Kon dili kita mangita og panahon sa pagtangtang sa mga electronic device, mahimong mawala kanato ang mga oportunidad nga makapaminaw sa Iyang tingog kinsa miingon, “Humilum kamo, ug ilhon ninyo nga ako mao ang Dios.”⁸ Karon, walay sayop sa pagpahimulos sa kalamboan sa teknolohiya nga dinasig sa Ginoo, apan kinahanglan gayud nga magmaalamon kita sa paggamit niini. Hinumdumi ang gasa sa adlaw nga Igpapahulay.

Ang panalangin sa pagdawat sa sakrament kinahanglang dili gayud mahimong naandan na lang o usa lamang ka butang nga atong buhaton diha sa sakrament miting. 70 minutos lamang kini sa tibuok semana sa dihang maka-hunong kita ug makakaplag og dugang nga kalinaw, kalipay, ug kamaya sa atong kinabuhi.

Ang pag-ambit sa sakrament ug pagbag-o sa atong mga pakigsaad usa nato ka timailhan ngadto sa Ginoo nga kanunay kita nga nahinumdom Kaniya.

Ang Iyang Pag-ula usa ka gasa uban sa pagkamabination gikan sa Dios.

Ang pribilehiyo sa pagserbisyo sa mga anak sa Langitnong Amahan usa ka oportunidad sa pagsunod sa ehemplo sa Iyang Hinigugmang Anak pinaagi sa pagserbisyo sa usag usa.

Ang ubang mga oportunidad sa pagserbisyo pormal—diha sa atong pamilya, sa atong mga calling sa Simbahan, ug sa atong pag-apil sa mga organisasyon sa pagserbisyo sa komunidad.

Ang mga miyembro sa Simbahan—kalalakin-an ug kababayan-an—kinahanglan nga dili magduha-duha, kon sila nagtinguha, sa pagdagan alang sa usa ka pampublikong katungdanan sa bisan unsang ang-ang sa panggobyer-no bisan asa sila nagpuyo. Ang atong mga tingog gikinahanglan karon ug importante diha sa atong mga eskwelahan, atong mga siyudad, ug atong mga nasud. Kon anaa ang demokrasya, ato kining katungdanan isip mga miyembro sa pagbotar sa halangdong kalalakin-an ug kababayan-an nga andam nga moserbisyo.

Daghang oportunidad nga moserbisyo dili pormal—walay assignment—ug moabut samtang motabang kita sa uban nga atong mahimamat dinhi sa biyahe sa kinabuhi. Hinumdumi nga si Jesus nagtudlo sa abogado nga kinahanglan natong higugmaon ang Dios ug ang atong silingan sama sa atong kaugalingon gamit ang Maayong Samarianhon isip ehemplo.⁹

Ang pagserbisyo mohatag og kahigayunan diin atong masabtan ang kinabuhi ug pangalagad ni Kristo. Mianhi Siya aron moserbisyo, sama sa gitudlo sa kasulatan, “maingon nga ang Anak sa tawo mianhi dili aron siya paga-alagaron kondili sa pag-alagad, ug sa paghalad sa iyang kinabuhi sa pagpakamatay ingon nga lukat alang sa daghan.”¹⁰

Mahimong nahatag ni Pedro ang labing maayo nga paghulagway sa mortal nga pangalagad sa Manluluwas sa lima ka pulong sa dihang gipasabut niya nga si Jesus, “[n]agpangadto-adtong sa paghimog mga kaayohan.”¹¹

Si Jesukristo mao ang atong pinakabililhon sa tanang gasa gikan sa Dios. Si Jesus miingon, “Ako mao ang dalan,

ang kamatuoran, ug ang kinabuhi: walay bisan kinsa nga makaadto sa Amahan, gawas kon pinaagi kanako.”¹²

Gipahayag ni Nephi ang kaimportante sa atong Manluluwas sa dihang siya namahayag, “Kami naghisgot kang Kristo, kami nalipay diha kang Kristo, kami nagsangyaw kang Kristo, kami nanagna kang Kristo, ug kami nagsulat sumala sa among mga panagna, nga ang among mga anak mahimo nga masayud sa unsa nga tinubdan sila mahimo nga mangita alang sa kapasayloan sa ilang mga sala.”¹³ Kinahanglan gayud nga himoon nato si Kristo nga sentro sa atong kinabuhi sa tanang panahon ug sa tanang dapit.

Kinahanglan natong hinumduman nga Iyang ngalan ang anaa sa atong mga dapit sa pagsimba; gibunyagan kita pinaagi sa Iyang ngalan; ug kita nakumpirmahan, naordinahan, na-endowed, ug na-sealed sa kaminyoon pinaagi sa Iyang ngalan. Moambit kita sa sakrament ug mosaad nga modala diha kanato sa Iyang ngalan—ug mahimong tinuod nga mga Kristiyano. Sa katapusan, gihangyo kita diha sa pagampo sa sakrament nga sa “kanunay mohinumdom kaniya.”¹⁴

Samtang mangandam kita alang sa Dominggo sa Pasko sa Pagkabanhaw ugma, atong hinumduman nga si Kristo ang labaw sa tanan. Siya ang matarung nga Maghuhukom, ang atong matinud-anong Manlalaban, bulahan nga Manunubos, maayong Magbalantay, gisaad nga Mesiyas, tinuod nga Higala, ug daghan pa gayud. Siya sa pagkatinuod usa ka bililhon kaayo nga gasa ngari kanato gikan sa atong Amahan.

Sa atong pagkadisipulo, mahimong aduna kitay mga panginahanglan, mga kabalaka, ug mga buluhaton. Hinoon, ang ubang mga kalihokan kinahanglang anaa gayud sa sentro sa atong pagkamiyembro sa Simbahan. “Busa,” ang Ginoo mimando, “pagmatinud-anon; barug diha sa buhatan nga Ako mitudlo nganha kanimong; *tabang* sa maluyahan, *ipataas* ang mga kamot sa nawad-an og paglaum, ug *lig-una* ang mga tuhod nga mahuyang.”¹⁵

Mao kini ang Simbahan nga naglihok! Mao kini ang lunsay nga

relihiyon! Mao kini ang ebanghelyo sa tinuod niining kahulugan samtang kita motabang, mopataas, ug molig-on niadtong anaa sa espirital ug temporal nga panginahanglan! Ang pagbuhat sa ingon nagkinahanglan nga mobisita kita kanila ug motabang kanila,¹⁶ nga ang ilang mga pagpamatuod sa hugot nga pagtuo diha sa Langitnong Amahan ug kang Jesukristo ug sa Iyang Pag-ula lig-on nga maestablisar diha sa ilang kasingkasing.

Hinaut nga ang Ginoo motabang ug mopanalangin kanato sa paghatag og bili sa daghan natong mahinungdanong gasa gikan sa Dios, lakip na ang atong pagkamiyembro sa Iyang gipahiuli nga Simbahan. Ako nag-ampo nga mapuno kita sa gugma alang sa tanang anak sa Langitnong Amahan ug makakita sa ilang mga panginahanglan ug andam nga motubag sa ilang mga pangutana ug mga kabalaka mahitungod sa ebanghelyo sa klaro ug mabinationong mga paagi nga makapalambo og panabut ug pagdayeg alang sa usag usa.

Mopamatuod ko nga si Jesukristo mao ang atong Manluluwas. Unsay itudlo ngari kanato atol niining kinatibuk-ang komperensya moabut kanato pinaagi sa inspirasyon gikan sa mga apostoles ug mga propeta, gikan sa mga General Authority, ug mga lider nga sister kinsa Kinatibuk-ang mga Opisyal sa Simbahan. Hinaut nga ang kalipay ug kalinaw sa Ginoo magauban sa usag usa mao ang akong pag-ampo sa pangalan ni Jesukristo, amen. ■

MUBO NGA MGA SULAT

1. Tan-awa sa *Encyclopedia of Mormonism* (1992), “Solemn Assemblies,” 3:1390–91.
2. Tan-awa sa Doktrina ug mga Pakigsaad 88:70.
3. Doktrina ug mga Pakigsaad 21:4–5.
4. Juan 20:21; emphasis gidugang.
5. Mateo 17:20.
6. George A. Smith, sa *Mga Pagtulun-an sa mga Presidente sa Simbahan: Joseph Smith* (2007), 282.
7. Mga Taga-Filipos 4:13.
8. Salmo 46:10.
9. Tan-awa sa Lucas 10:25–37.
10. Mateo 20:28.
11. Mga Buhat 10:38.
12. Juan 14:6.
13. 2 Nephi 25:26.
14. Doktrina ug mga Pakigsaad 20:77, 79.
15. Doktrina ug mga Pakigsaad 81:5; emphasis gidugang.
16. Tan-awa sa Santiago 1:27.



Ni Elder Brian K. Taylor
Sa Seventy

Ako Ba Anak sa Dios?

Sa unsang paagi ang matag usa kanato makasinati sa gahum sa panabut sa balaan natong pagkatawo? Magsugod kini sa tinguha sa pag-ila sa Dios, nga atong Amahan.

Bag-o lang mikuyog ko sa pinangga nakong mama sa among karang chapel nga hinimo sa bato. Nahimuot ko sa gagmayng mga tingog gikan sa samang lawak sa Primary nga akong gitambungan daghang dekada ang milabay, nilakaw ko sa likod ug nakabantay sa mga maamumahong mga lider nga mitudlo sa tema karong tuiga: “Ako Anak sa Dios.”¹ Nakapahiyom ko sa paghinumdom sa mapailubon ug mapinanggaong mga magtutudlo, kinsa atol sa among singing time kaniadto, kanunayng motan-aw nako—daw moingon nga kanang sipat nga bata sa tumoy sa bangko, “Siya anak ba *gyud* kaha sa

Dios? Ug kinsa kaha ang mipadala niya dinhi?”²

Akong dapiton kitang tanan sa pag-abli sa atong kasingkasing ngadto sa Espiritu Santo, kinsa “magapanghimatod uban sa atong espiritu nga kita mga anak sa Dios.”³

Ang mga pulong ni Presidente Boyd K. Packer yano ug bililhon: “Ikaw anak sa Dios. Siya ang Amahan sa imong espiritu. Sa espirituhanong paagi ikaw gipakatawo nga madungganon, anak sa Hari sa Langit. Ibutang kana nga kamatuoran sa imong hunahuna ug hupot niini. Bisan unsa ka daghan ang mga henerasyon sa imong mortal nga mga kagikanan, walay igsapayan

kon unsa nga kaliwat o katawhan ang imong gi-representar, ang talaan sa kaliwatan sa imong espiritu mahimong isulat sa usa lamang ka linya. Ikaw anak sa Dios!”⁴

“Kon ikaw . . . makakita sa atong Amahan,” mihulagway si Brigham Young, “makita nimo ang usa ka binuhat nga dugay na nimong gikaila, ug ikaw Iyang dawaton sa Iyang mga bukton, ug ikaw andam nga mopauraray sa iyang paggakos ug Kaniya mohalok.”⁵

Ang Dakong Gubat batok sa Balaang Pagkatawo

Nakat-unan ni Moises ang balaan niyang panulundon pinaagi sa atubang nga pagpakig-istorya sa Ginoo. Human niana nga kasinatian, “miabut si Satanas nga nanintal,” uban sa igmat, apan sa binagis nga tuyo sa pagtuis sa pagkatawo ni Moises, “nag-ingon: Moises, *anak sa tawo*, simba kanako. Ug . . . si Moises mitan-aw diha kang Satanas ug miingon: Kinsa ikaw? Tan-awa, Ako mao ang usa ka *anak sa Dios*.”⁶

Kining dako nga gubat batok sa balaang pagkatawo pintas nga miulbo isip nagkamaayong paagi ni Satanas sa pagguba sa atong gituohan ug kahibalo sa atong relasyon sa Dios. Maayo na lang, kay napanalanginan kita og tin-awng panabut sa atong tinuod nga pagkatawo gikan sa sinugdanan: “Ug miingon ang Dios, Buhaton nato ang tawo sumala sa atong dagway,”⁷ ug ang Iyang buhi nga mga propeta mipahayag, “Ang matag usa hinigugmang espiritu nga anak nga lalaki o babaye sa langitnong mga ginikanan, ug, sa ingon, ang matag usa adunay mga kinaiya sa pagkadios ug kalagmitan nga mahimong usa ka dios.”⁸

Ang pagkahibalo niini nga mga kamatuoran “uban sa kasiguroan”⁹ makatabang nga atong mabuntog ang mga pagsulay, mga kasamok, ug mga kasakit sa tanang matang.¹⁰ Dihang gipangutana, “Unsaon nato sa pagtabang kadtong nanglimbasug sa [personal nga hagit]?” usa ka Apostol sa Ginoo mitudlo, “Tudloi sila bahin sa ilang pagkatawo ug sa ilang katuyoan.”¹¹



“Ang Pinakagamhanang Kahibalo nga Akong Nabatunan”

Kini nga gamhanang mga kamatuoran nakausab sa kinabuhi sa akong higala nga si Jen,¹² kinsa sa pagkatinedyer maoy hinungdan sa grabing aksidente sa sakyanan. Bisan grabe ang iyang pisikal nga pag-antus, sakit kaayo ang iyang gibati kay namatay man ang laing driver. “Adunay nawad-an og mama, ug kadto akong sayop,” miingon siya. Si Jen, kinsa mga adlaw lang ang milabay mibarug ug mi-recite, “Kita mga anak nga babaye sa atong Langitnong Amahan, kinsa nahigugma kanato,”¹³ karon nangutana, “Unsaon *ako* Niya sa paghigugma?”

“Ang pisikal nga pag-antus milabay na,” miingon siya, “ambut lang kon maulian ba ko gikan sa mga emosyunal ug espiritwal nga mga samad.”

Aron makasugakod, giluum ra ni Jen ang iyang mga pagbati, nagpalayo, ug mibaliwala. Human sa usa ka tuig, dihang nakasulti na gyud siya bahin sa aksidente, usa ka dinasig nga tigtambag midapit kaniya nga isulat ang mga pulong “Ako Anak sa Dios” ug isulti kini 10 ka higayon kada adlaw.

“Sayon ra ang pagsulat sa mga pulong,” nahinumdom siya, “apan dili ko kini malitok. . . . Lisud gayud kaayo kadto, ug wala gyud ko motuo nga ang Dios ganahan nga ako Iyang anak. Motiku-ku ra ko ug mohilak.”

Paglabay sa pipila ka bulan, nakompleto ra gyud ni Jen ang tahas matag adlaw. “Akong gibu-bu ang tibuok nakong kalag,” miingon siya, “nangamuyo sa Dios. . . . Dayon nagsugod ko nga motuo sa mga pulong.” Kini nga pagtuo nagtugot nga ang Manluluwas nagsugod sa pag-ayo sa samaran nakong kalag. Ang Basahon ni Mormon nagdala og kahupayan ug kaisug sa Iyang Pag-ula.¹⁴

“Gibati ni Kristo ang akong mga kasakit, akong mga kasubo, akong mga sala,” mitapos si Jen. “Akong gibati ang tiunay nga gugma sa Dios ug wala na koy kasinatian nga ingon adto ka gamhanan! Ang kahibalo nga ako anak sa Dios maoy pinakagamhanang kahibalo nga akong nabatunan!”



Pagtinguha nga Makaila sa Dios, nga Atong Amahan

Mga kaigsoonan, sa unsang paagi ang matag usa kanato makasinati sa gahum sa panabut sa balaan natong pagkatawo? Magsugod kini sa tinguha sa pag-ila sa Dios, nga atong Amahan.¹⁵ Si Presidente Russell M. Nelson mipamatuod, “Adunay gamhanan kaayong mahitabo kon ang usa ka anak sa Dios magtinguha og dugang nga kahibalo bahin Kaniya ug sa Iyang Hinigugmang Anak.”¹⁶

Ang pagkat-on ug pagsunod sa Manluluwas makatabang aron makaila kita sa Amahan. “Ingon nga . . . tukma nga hulad sa iyang [Amahan],”¹⁷ mitudlo si Jesus, “Walay bisan unsa nga arang mabuhat sa Anak sa iyang kaugalingong kabubut-on, gawas lamang sa iyang makita nga ginabuhat sa Amahan.”¹⁸ Ang matag pulong ug buhat ni Kristo—nagbutyag sa tinuod nga kinaiyahan sa Dios ug sa atong relasyon Kaniya.¹⁹ Gitudlo ni Elder Jeffrey R. Holland nga, “Pinaagi sa dugo nga milugwa gikan sa matag lungag sa panit ug sa naghingutas nga litok sa pagtuaw, Siya ang gipangita ni Kristo kinsa mao kanunay ang Iyang gipangita—ang Iyang Amahan. ‘Abba,’ mituaw Siya, ‘Papa.’”²⁰

Sama sa matinguhaong pagpangita ni Jesus sa Iyang Amahan didto sa Getsemani, mao usab ang batan-ong si Joseph Smith, niadtong 1820, mainam-puong nangita sa Dios didto sa Sagra-dong Kakahoyan. Human mabasa ang

“Kon aduna man kaninyoy nakulangan og kaalam, papangayoa siya sa Dios,”²¹ miadto si Joseph sa pag-ampo.

“Ako miluhod,” misulat siya, “ug ‘misugod sa pagtugyan sa mga tinguha sa akong kasingkasing ngadto sa Dios. . . .”

“. . . Ako nakakita og usa ka dako nga gilis sa kahayag ibabaw gayud sa akong ulo. . . .”

“. . . Ako nakakita og duha ka Personahe, kansang kahayag ug himaya dili mahulagway, nagtindog ibabaw kanako diha sa kawanangan. Usa kanila misulti ngari kanako, nagtawag kanako sa akong ngalan ug miingon, nagtudlo ngadto sa lain—[Joseph,] *Kini mao ang Akong Hinigugmang Anak. Paminaw Kaniya!*”²²

Kon sundon nato ang mga ehemplo sa Manluluwas ug ni Propeta Joseph nga matinguhaong nangita sa Dios, masabtan nato sa tukma gayud nga paagi, sama sa gibuhat ni Jen, nga ang atong Amahan nakaila kanato ug kita Iyang mga anak.

Alang sa bag-ong mga inahan, kinsa sa kasagaran nabug-atan ug gisanapan samtang naningkamot sa pagpadako og “henerasyon nga makabatok sa sala,”²³ ayaw gayud ipakaubos ang inyong mahinungdanon nga tahas sa plano sa Dios. Sa makaluya nga mga gutlo—tingali samtang naggukod mo sa mga bata ug ang nanimahong sunog ninyong linung-ag nagpasabut nga ang mapinanggaon ninyong giandam nga

pagkaon karon sinunog na nga halad—hibaloi ibalaan sa Dios ang pinakalisud ninyong mga adlaw.²⁴ “Ayaw kahadlok; kay ania ako uban kanimo,”²⁵ malina-won Siyang misaad. Kami mopasidungog kaninyo sa inyong pagtuman sa gipangandoy ni Sister Joy D. Jones, sa pag-ingon, “Gikinahanglan nga masabantan sa atong mga anak ang ilang balaan nga pagkatawo.”²⁶

Akong dapiton ang matag usa kanato sa pagpangita sa Dios ug sa Iyang Hinigugmang Anak. “Walay laing dapit,” miingon si Presidente Nelson, “diin kana nga mga kamatuoran mas klaro ug gamhanan ang pagkatudlo kay sa diha sa Basahon ni Mormon.”²⁷ Ablihi ang mga pahina niini ug kat-uni nga ang Dios mibuhat sa “tanang butang alang sa [atong] kaayohan ug kalipay”;²⁸ nga Siya “manggiloy-on ug mabination, dili daling masuko, mainantuson ug puno sa kamaayo”;²⁹ ug ang “tanang managsama ngadto [Kaniya].”³⁰ Kon gibati ninyong nasakitan, nawala, nahadlok, nasagmuyo, nasubo, gigutom, o nawad-an sa paglaum tungod sa kalisud sa kinabuhi³¹—ablihi ang Basahon ni Mormon, ug inyong mahibaloan nga “Dili gayud kita biyaan sa [Dios]. Wala gayud Siya mibuhat niini, ug dili gayud Niya buhaton. Dili Siya makahimo niini. Dili Iyang kinaiya [ang pagbuhay sa ingon].”³²

Ang atong pagkaila sa Amahan makausab sa tanang, ilabi na sa atong kasingkasing, samtang ang Iyang maag-hup nga Espiritu momatuod sa atong tinuod nga pagkatawo ug talagsaong bili sa Iyang panan-aw.³³ Ang Dios magauban kanato sa pagsubay sa dalan sa pakigsaad kon pangitaon nato Siya pinaagi sa maninampuong pagpangamuyo, pagsiksik sa kasulatan ug masulundong pagpaningkamot.

Ang Kahalangdon sa Kinaiya sa Dios—Akong Saksi

Akong gipangga ang Dios sa akong mga ginikanan,³⁴ “Makagagahum nga Ginoong Dios,”³⁵ si kinsa mobakho uban kanato sa atong mga kasubo, mapailubong mopanton sa atong pagkadili matarung, ug magmaya kon kita magtinguha nga “mobiya sa tanang



[natong] mga sala aron makaila [Kaniya].”³⁶ Simbahon ko Siya, kinsa mao ang “amahan sa mga ilaro,”³⁷ ug kauban sa walay mga kauban. Uban sa pasalamat, mopamatuod ko nga nakaila ako sa Dios, akong Amahan, ug mosaksi sa pagkahingpit, mga hiyas, ug “kahalangdon sa Iyang kinaiya.”³⁸

Aron ang matag usa kanato hingpit nga makasabut ug moalima sa atong “dungganon nga katungod sa pagkatawo”³⁹ isip anak sa Dios pinaagi sa pagkaila Kaniya, “ang bugtong tinuod nga Dios, ug kang Jesukristo nga [Iyang] pinadala”⁴⁰ maoy bug-os nakong pag-ampo sa pangalan ni Jesukristo, amen. ■

MUBO NGA MGA SULAT

1. Tan-awa sa *2018 Outline alang sa Panahon sa Pakigbahin: Ako Anak sa Dios*, lds.org/manual/primary.
2. “Ako Anak sa Dios,” *Mga Himno ug mga Awit sa mga Bata*, nu. 58.
3. Mga Taga-Roma 8:16.
4. Boyd K. Packer, “To Young Women and Men,” *Ensign*, Mayo 1989, 54.
5. Brigham Young, “Discourse,” *Deseret News*, Okt. 1, 1856, 235.
6. Moises 1:12–13.
7. Genesis 1:26.
8. “Ang Pamilya: Usa ka Pamahayag ngadto sa Kalibutan,” *Liahona*, Mayo 2017, 145.
9. Mipahayag si Joseph Smith, “Mao kini ang unang baruganan sa ebanghelyo nga masayud sa katinuod sa kinaiya sa Dios” (gikan sa King Follett nga sermon,” Abr. 7, 1844; sa *History of the Church*, 6:305).
10. Tan-awa sa Alma 36:3, 27.
11. Russell M. Nelson, sa Tad R. Callister, “Our Identity and Our Destiny” (Brigham Young University devotional, Ago. 14, 2012), 1, speeches.byu.edu.
12. Ang pangalan giusab.
13. “Tema sa Young Women,” *Personal nga Kauswagan sa Young Women* (2009), 3, PersonalProgress.Lds.org.

14. Tan-awa sa 2 Nephi 2; 6–9; Mosiah 2–5; 14–16; Alma 7; 34; 39–42; Helaman 14; 3 Nephi 11; Moroni 7.
15. Mitudlo si Propeta Joseph Smith, “Kon ang mga tawo dili makasabut sa kinaiya sa Dios, sila wala makasabut sa ilang kaugalingon” (*Mga Pagtulun-an sa mga Presidente sa Simbahan: Joseph Smith* [2007], 46–47).
16. Russell M. Nelson, “Ang Basahon ni Mormon: Unsa kaha ang Imong Kinabuhi Kon wala Kini?” *Liahona*, Nob. 2017, 61.
17. Mga Hebreohanon 1:3.
18. Juan 5:19.
19. Tan-awa sa Jeffrey R. Holland, “Ang Kahalangdon sa Dios *Liahona*,” Nob. 2003, 70–73.
20. Jeffrey R. Holland, “The Hands of the Fathers,” *Liahona*, Hulyo 1999, 19.
21. Santiago 1:5.
22. Joseph Smith—Kasaysayan 1:15–17.
23. Russell M. Nelson, “Usa ka Hangyo ngadto sa Akong mga Sister,” *Liahona*, Nob. 2015, 97.
24. Tan-awa sa “Unsa Kalig-on ang Tukuranan,” *Mga Himno ug mga Awit sa mga Bata*, nu. 6.
25. Isaias 41:10.
26. Joy D. Jones, sa Marianne Holman Prescott, “2018 Primary Theme ‘I am a Child of God’ Teaches Children Their Divine Identity,” Church News nga seksyon sa LDS.org, Ene. 5, 2018, news.lds.org.
27. Russell M. Nelson, “Ang Basahon ni Mormon: Unsa kaha ang Imong Kinabuhi Kon wala Kini?” 61.
28. Helaman 12:2: tan-awa usab sa 2 Nephi 26:24.
29. *Lectures on Faith* (1985), 42.
30. 2 Nephi 26:33.
31. Ganahan ko sa makatandog nga sugilanon bahin sa karaang tawo nga pioneer kinsa, human sa iyang kasinatian sa pagtabok sa kapatagan, mipamatuod: “Nag-antus kami labaw sa bisan unsay inyong mahunahuna ug daghan ang nangamatay tungod kay walay kasilungan ug kagutom, apan nakadungog ba kamo og usa ka naluwas [survivor] niana nga grupo nga militok og pulong sa pagpangita’g sayop? *Walay bisan usa niana nga grupo ang nakitang mibiya sa Simbahan, tungod kay ang matag usa kanamo midangat sa bug-os nga kahibalo nga buhi ang Dios kay kami nakaila kaniya pinaagi sa among mga kalisdanan*” (sa David O. McKay, “Pioneer Women,” *Relief Society Magazine*, Ene. 1948, 8).
32. George Q. Cannon, “Remarks,” *Deseret Evening News*, Mar. 7, 1891, 4.
33. Tan-awa sa Doktrina ug mga Pakigsaad 18:10.
34. Tan-awa sa Mga Buhat 5:30; 22:14; “God of Our Fathers, Whose Almighty Hand,” *Hymns*, nu. 78.
35. Moises 1:3; see Pinadayag 15:3; 21:22–23; 3 Nephi 4:32; Doktrina ug mga Pakigsaad 109:77; 121:4.
36. Alma 22:18.
37. Salmo 68:5: tan-awa usab sa Santiago 1:27.
38. *Lectures on Faith* (1985), 42.
39. “Carry On,” *Hymns*, nu. 255.
40. Juan 17:3.



Ni Elder Larry J. Echo Hawk
Sa Seventy

Maingon nga si Kristo Nakapasaylo Kaninyo, nan Kinahanglan Kamo Usab Magapasaylo

Makadawat kitang tanan og dili matukib nga kalinaw ug pagpakigtambayayong sa atong Manluluwas samtang kita magkat-on sa dali nga pagpasaylo niadtong kinsa “nakalapas batok” kanato.

Apan sa pagkaadlaw na nga nahiuana sa semana, sayo sa kaadlawon, sila nangadto sa lubnganan, dinala ang mga pahumot nga ilang giandam.”

“Ug ilang nakita ang bato nga giligid na gikan sa lubnganan.”

“Apan sa pagsulod nila, ug wala silay nakaplagang lawas ni Ginoong Jesus.”

“Ug nahinabo nga, nangalibog sila tungod niini, tan-awa, tapad kanila dihay nanagtindog nga duha ka lalaki nga may bisti nga masilaw:”

“Ug sa nangalisang sila, ug nanagduko sa yuta, kanila miingon ang mga lalaki, Ngano nga ang buhi anha man ninyo pangitaa diha sa mga patay?”

“Wala Siya dinhi, kon dili nabanhaw.”¹

Ugma, ang Dominggo sa Pasko sa Pagkabanhaw, atong mahinumduman

ang espesyal nga paagi kon unsa ang nabuhat ni Jesukristo alang kanato: “Kay gihigugma gayud sa Dios ang kalibutan nga tungod niana gihatag niya ang iyang bugtong Anak, aron ang tanan nga mosalig kaniya dili malaglag, kon dili may kinabuhing dayon.”² Sa katapusan, mabanhaw kita sama Kaniya, aron mabuhi sa kahangturan.

Pinaagi sa milagro sa sagrado nga Pag-ula ni Jesukristo, makadawat usab kita sa gasa sa kapasayloan sa atong mga sala ug mga kasaypanan, kon atong dawaton ang kahigayunan ug responsibilidad sa paghinulsol. Ug pinaagi sa pagdawat sa gikinahanglan nga mga ordinansa, paghupot sa mga pakigsaad, ug pagtuman sa mga sugo, makaangkon kita og kinabuhing dayon ug kahimayaan.

Karon, gusto kong motutok sa pagpasaylo, usa ka importante ug bililhon

nga gasa nga gitanyag kanato gikan sa atong Manluluwas ug Manunubos, si Jesukristo.

Usa ka gabii niadtong Disyembre 1982, ang akong asawa si Terry, ug ako gipukaw sa usa ka tawag sa telepono sa among balay sa Pocatello, Idaho. Samtang akong gitubag ang telepono, pagbakho lang ang akong nadungog. Sa katapusan, ang naglisud og sulti nga tingog sa akong igsoong babaye miingon, “si Tommy patay na.”

Usa ka 20 anyos nga hubog nga drayber, mipadagan ug sobra 135 (85 ka milya) kilometro matag oras, nagdanghag nga mideretso sa stoplight sa kasigbit nga siyudad sa Denver, Colorado. Kusog kaayo siyang mibangga ngadto sa sakyanan nga gidrayban sa akong kinamanghurang igsoon, nga si Tommy, dihadiha dayon namatay siya ug ang iyang asawa, si Joan. Padulong na sila pauli sa ilang batang anak nga babaye nga tua sa balay human sa usa ka salosal sa Pasko [Christmas party].

Ang akong asawa ug ako milarga dayon ngadto sa Denver ug miadto sa punerarya. Nagpundok mi uban sa akong mga ginikanan ug mga igsoon ug nagbangutan sa pagkawala sa among gimahal nga si Tommy ug Joan. Namatay sila tungod sa walay hinungdang kriminal nga buhat. Dako kaayo ang among kasubo, ug ang akong kalagot sa batan-ong sad-an nag-anam ka grabe.

Si Tommy nagserbisyo isip abogado sa Departamento sa Hustisya sa Estados Unidos ug mahimong lig-on nga magdadapig sa proteksyon sa Native American nga mga yuta ug natural nga kapanguhaan sa umaabut nga mga katuigan.

Human milabay ang taas-taas nga panahon, usa ka bista sa korte ang gipahigayon aron sa pagsentensya sa batan-ong lalaki nga nakaplagang responsable sa pagpatay tungod sa ilegal nga pagdrayb og sakyanan. Sa ilang padayong kasubo ug kaguol, ang akong mga ginikanan ug kama-gulangang igsoong babaye, si Katy, mitambong sa bista. Ang mga ginikanan sa hubog nga drayber anaa usab didto, ug sa natapus na ang bista,

milingkod sila sa lingkuranan ug nanghilak. Ang akong mga ginikanan ug igsoong babaye naglingkod sa duol samtang ilang gitinguha ang pagpugong sa ilang kaugalingong gibati. Sa wala madugay, ang akong mga ginikanan ug igsoong babaye mibarug ug milakaw padulong sa mga ginikanan sa drayber ug mipaambit kanila og makahupay nga mga pulong ug kapasayloan. Ang mga lalaki naglamanuhay; ang mga babaye nagginunitay sa mga kamot; adunay tumang kasubo ug mga luha alang sa tanan ug sa pag-ila sa dakong pag-antus sa duha ka pamilya. Si Mama, Papa ug si Katy mipasiugda uban sa ilang hilum nga kalig-on ug kaisug ug gipakita sa among pamilya kon sama sa unsa ang pagpasaylo.

Kadtong pagtanyag sa pagpasaylo niadtong higayuna nakahimo sa akong kaugalingong kasingkasing nga mahumok ug mihatag og kahigayunan alang sa pagka-ayo. Sa kadugayan akong nakat-onan unsaon pagbaton og mapasayloon nga kasingkasing. Uban lamang sa tabang sa Prinsipe sa Kalinaw [Panagdait] natangtang ang akong gipas-an nga kasakit. Kanunay gayud akong mingawon ni Tommy ug Joan, apan ang pagpasaylo karon nagtugot kanako sa paghinumdum kanila uban sa walay pagpugong nga hingpit nga kalipay. Ug nahibalo ako nga magkauban pa kami pag-usab isip pamilya.

Wala ako magsugyot nga ibaliwala lang ang ilegal nga binuhatan. Nasayud gayud kita nga ang mga indibidwal gikinahanglang manubag sa ilang kriminal nga mga binuhatan ug mga kasaypanang sibil. Hinuon, nahibalo usab kita nga, isip mga anak nga lalaki ug mga anak nga babaye sa Dios, misunod kita sa mga pagtulun-an ni Jesukristo. Kinahanglang kitang mapasayloon bisan kon murag ang uban dili tingali angayan sa atong pagpasaylo.

Ang Manluluwas mitudlo:

“Kay kon mopasaylo kamo sa mga tawo sa ilang mga paglapas, pasaylo-on usab kamo sa inyong langitnong Amahan:

“Apan kon dili man kamo mopasaylo sa mga tawo sa ilang mga paglapas,

ang inyong Amahan dili usab mopasaylo sa inyong mga paglapas.”³

Makadawat kitang tanan og dili matukib nga kalinaw ug pagpakigtambayayong sa atong Manluluwas samtang kita magkat-on sa dali nga pagpasaylo niadtong kinsa “nakalapas batok” kanato. Kining pagpakigtambayayong magdala sa gahum sa Manluluwas nganhi sa atong mga kinabuhi sa dili masaypan, dili gayud mahikalimtan nga paagi.

Si Apostol Pablo mitambag:

“Nan, isul-ob ninyo, ingon nga sa Dios kamo mga pinili, . . . ang pagkamabination, pagkamapuangoron, pagkamapaubsanon, kaaghop ug paulub;

“Mag-inantusay ang usa sa usa, ug magpinasayloay ang usa sa usa . . . : *maingon nga si Kristo nakapasaylo kaninyo, nan kinahanglang kamo usab magapasaylo.*”⁴

Ang Ginoo Mismo mipahayag:

“Busa, Ako moingon nganha kaninyo, nga kamo kinahanglang gayud nga mopasaylo sa usag usa; kay siya nga dili mopasaylo sa iyang igsoon ang iyang mga kalapasan magpabilin nga gipanghimaraut sa atubangan sa Ginoo; kay magpabilin diha kaniya ang dakong sala.

“Ako, ang Ginoo, mopasaylo kinsa Ako mopasaylo, apan kamo gikinahanglang nga mopasaylo sa tanan nga mga tawo.”⁵

Ang mga pagtulun-an sa atong Manluluwas ug Manunubos, si Jesukristo, tataw kaayo; ang nakasala kinahanglang andam nga mopasaylo sa uban kon siya naglaum nga makabat-on og kapasayloan.⁶

Mga kaigsoonan aduna bay mga tawo sa atong kinabuhi nga nakapasakit kanato? Naghambin ba kita og daw sama sa hingpit nga gipakamatarung nga kayugot ug kasuko nga mga pagbati? Ato bang gitugutan ang garbo nga mopugong kanato sa pagpasaylo ug paghikalimot? Ako modapit natong tanan sa hingpit nga pagpasaylo ug tuguti nga ang pagkaalim mahitabo gikan sa kahiladman. Ug bisan kon ang pagpasaylo dili moabut karon, hibalo nga kon ato kining gitinguha ug maningkamot alang niini, moabut

kini—sama nga sa kadugayan miabut kini alang kanako human sa pagkamatay sa akong igsoong lalaki.

Palihug hinumdumi usab nga usa ka importanting elemento sa pagpasaylo naglakip sa pagpasaylo sa atong kaugalingon.

“Siya kinsa naghinulsol sa iyang mga sala,” ang Ginoo miingon, “ang mao gipasaylo, ug Ako, ang Ginoo, dili na mahinumdom kanila.”⁷

Mangamuyo ako kanatong tanan niining adlaw sa paghinumdum ug pag-sunod sa ehemplo ni Jesukristo. Diha sa krus sa Golgotha, sa Iyang kaskit, Siya misulti niining mga pulong: “Amahan, pasayloa sila; kay wala sila makasabut sa ilang ginabuhat.”⁸

Pinaagi sa pagbaton og mapasayloon nga espiritu ug sa pagbuhat niini, sama sa akong mga ginikanan ug kinamagulangan nga igsoong babaye, makadawat kita sa saad sa Manluluwas: “Kaninyo ibilin ko ang kalinaw; kaninyo ihatag ko ang akong kalinaw. Hatagan ko kamo niini dili sama sa hinatagan sa kalibutan. Kinahanglang dili magkaguol ang inyong kasingkasing, ni magtalaw.”⁹

Ako mopamatuod nga kining kalinaw moabut sa atong kinabuhi samtang magtuman kita sa mga pagtulun-an ni Jesukristo ug mosunod sa Iyang ehemplo pinaagi sa pagpasaylo sa uban. Samtang kita mopasaylo, ako mosaad nga ang Manluluwas molig-on kanato, ug ang Iyang gahum ug hingpit nga kalipay moabut sa atong kinabuhi.

Ang lubnganan walay sulod. Si Kristo buhi. Ako nakaila Kaniya. Nahigugma ako Kaniya. Mapasalamatan ako sa Iyang panalangin, nga mao ang makapalig-on nga gahum nga igo nga makaayo sa tanang mga butang. Sa sagradong pangalan ni Jesukristo, amen. ■

MUBO NGA MGA SULAT

1. Lucas 24:1–6.
2. Juan 3:16.
3. Mateo 6:14–15.
4. Mga Taga-Colosas 3:12–13.
5. Doktrina ug mga Pakigsaad 64:9–10.
6. Tan-awa sa James E. Talmage, *The Articles of Faith*, 12th ed. (1924), 110.
7. Doktrina ug mga Pakigsaad 58:42.
8. Lucas 23:34.
9. Juan 14:27.



Ni Elder Gary E. Stevenson
Sa Korum sa Napulog Duha ka mga Apostoles

Ang Kasingkasing sa usa ka Propeta

Mahimo kitang maglipay nga ang propeta sa Ginoo nahimutang na ug nga ang buhat sa Ginoo gihimo sa paagi nga balaanon Niyang gisugo.

Kinasingkasing akong nag-ampo nga ang Espiritu Santo magauban sa matag usa kanato karon niining langitnong higayon. Ang nasaksihan natong tanan hilabihan ka impresibo samtang ang ika-17 nga propeta niining dispensasyon gipaluyohan sa maligdong nga katiguman.

Samtang nagtinguha ko og giya aron masayud kon unsay pahisgutan sa

Ginoo kanako karon, nakahunahuna ko sa bag-o lang nga pakig-istorya uban sa bag-ong gitawag nga Unang Kapangulohan. Niini nga diskusyon, usa sa mga magtatambag mipaambit og mga pulong nga sama niini: “Manghinaut ko nga ang mga miyembro sa Simbahan makasabut sa gibug-aton sa nahitabo uban sa pagkatawag sa atong bag-ong propeta, si Presidente Russell M. Nelson, ug sa

kamahinungdanon ug kasagrado sa maligdong nga katiguman nga mahitabo sa kinatibuk-ang komperensya.” Dugang siya nga miobserbar, “10 na ka tuig, ug daghang tawo, ilabi na ang kabatan-onan sa Simbahan, dili makahinumdom o wala pa makasinati niini.”

Nakapahimo kini nako sa pagpamalandong sa akong mga kasinatian. Ang unang propeta nga akong mahinumdu-man mao si Presidente David O. McKay. 14 anyos ko sa dihang namatay siya. Nakahinumdom ko sa pagbati sa kami-ngaw nga resulta sa iyang pagkamatay, sa mga luha sa mga mata sa akong inahan, ug sa kasubo nga gibati sa among tibuok pamilya. Nahinumdom ko kon sa unsang paagi ang mga pulong nga “Palihug panalangini si Presidente David O. McKay” natural nakong nasulti sa akong mga pag-ampo nga kon wala ko magbantay, bisan human sa iyang pagkamatay, mogamit gihapon ko niad-to nga mga pulong. Nagduda ko kon ang akong kasingkasing ug hunahuna makabaton ba og samang pagbati ug kombiksyon alang sa mga propeta nga mosunod kaniya. Apan hapit sama sa mga ginikanan nga nagpangga sa matag usa sa ilang mga anak, nakakaplag ko og gugma, koneksyon, ug pagpamatu-od ni Presidente Joseph Fielding Smith, kinsa misunod ni Presidente McKay, ug sa matag propeta human niana: Harold B. Lee, Spencer W. Kimball, Ezra Taft Benson, Howard W. Hunter, Gordon B. Hinckley, Thomas S. Monson, ug karon si Presidente Russell M. Nelson. Hingpit nakong gipaluyohan ang matag propeta uban sa pagpataas sa kamot—ug nabayaw nga kasingkasing.

Sa pagtaliwan sa matag usa sa atong gimahal nga mga propeta, natural lang nga mobati og kasubo ug kamingaw. Apan ang atong kaguol mapagaan sa kalipay ug paglaum nga moabut sam-tang mosinati kita sa usa sa dagkong mga panalangin sa Pagpahiuli: ang pagtawag ug pagpaluyo sa buhi nga propeta dinhi sa yuta.

Niana nga katuyoan, mamulong ko kalabut niining balaang proseso sama sa naobserbahan sa milabay nga 90 ka adlaw. Ako kining ihulagway sa upat





Enero 14. Nianang buntag sa Igpapahulay, nag-abut ang Korum sa Napulog Duha diha sa ibabaw nga lawak sa Templo sa Salt Lake sa diwa sa pagpupasa ug pag-ampo, ubos sa direksyon sa pagdumala ni Presidente Russell M. Nelson, ang senior nga Apostol ug Presidente sa Korum sa Napulog Duha.

Pagtawag og Bag-o nga Propeta

Niini nga sagrado ug halandumon nga miting, nagsunod sa maayong pagka-establisar nga sundanan sa panaghiusa ug panag-uyon, ang mga Kaigsoonan naglingkod base sa seniority diha sa semicircle nga 13 ka lingkuranan ug miisa sa ilang mga kamot una aron sa pagpaluyo sa pag-organisar sa Unang Kapangulohan ug dayon aron sa pagpaluyo ni Presidente Russell Marion Nelson isip Presidente sa Ang Simbahan ni Jesukristo sa mga Santos sa Ulahing mga Adlaw. Kini nga pagpaluyo gisundan sa pagtapok sa Korum sa Napulog Duha diha sa usa ka sirkulo ug sa pagbutang sa mga kamot ibabaw sa ulo ni Presidente Nelson aron sa pag-orden ug pag-set apart kaniya, diin ang sunod nga labing senior nga Apostol maoy namulong.

Si Presidente Nelson dayon mihingalan sa iyang mga magtatambag, si Presidente Dallin Harris Oaks, si Presidente Henry Bennion Eyring, uban ni Presidente Oaks isip Presidente sa Korum sa Napulog Duha ka mga Apostoles ug si Presidente Melvin Russell Ballard isip ang Akting nga Presidente sa Korum sa Napulog Duha ka mga Apostoles. Human sa susama nga mga boto sa pagpaluyo, ang matag usa niini nga mga Kaigsoonan gi-set apart ni Presidente Nelson ngadto sa ilang tagsa-tagsa ka katungdanan. Usa kini ka sagrado kaayo nga kasinatian, nga adunay pagbu-bu sa Espiritu. Mohatag ko ninyo sa akong hingpit nga pagsaksi nga ang kabubut-on sa Ginoo, nga maoy kinasingkasing natong giampo, gipakita sa gamhanang paagi sa mga kalihokan ug mga panghitabo nianang adlaw.

Tungod sa pagka-orden ni Presidente Nelson ug pag-organisar pag-usab sa Unang Kapangulohan, ang apostolic interregnum natapos, ug ang bag-ong

ka bahin: una, ang pagkamatay sa atong propeta ug ang pagkawagtang sa Unang Kapangulohan; ikaduha, ang yugto sa panahon nga nagpaabut sa pag-organisar pag-usab sa bag-ong Unang Kapangulohan; ikatulo, ang pagtawag og bag-ong propeta; ug ikapat, ang pagpaluyo sa bag-ong propeta ug sa Unang Kapangulohan sa maligdong nga katiguman.

Ang Pagkamatay sa Propeta

Niadtong Enero 2, 2018, namatay ang atong pinalanggang propeta nga si Thomas S. Monson. Kanunay siya nga adunay luna sa atong kasingkasing. Mihalad si Presidente Henry B. Eyring og mga sentimento sa pagkamatay ni Presidente Monson nga hingpit nga naghulagway sa atong mga pagbati: “Ang timaan sa iyang kinabuhi, sama sa Manluluwas, mao ang iyang indibidwal nga pagpakabana nga motabang sa mga kabus, sa masakiton—gani sa tanang indibidwal—sa tibuok kalibutan.”¹

Si Presidente Spencer W. Kimball mipasabut:

“Samtang mosalup ang usa ka bitoon sa kapunaw-punawan, dunay laing bitoon nga makita, ug ang kamatayon momugna og kinabuhi.

“Walay katapusan ang buhat sa Ginoo. Bisan og ang pinakaimpluwensyal nga lider mamatay, walay bisan usa

ka higayon nga ang Simbahan walay pangulo, salamat sa mabinatong Tighatag kinsa mihimo nga magpadayon ug makanunayon ang iyang gingharian. Sama nga nahitabo na kini . . . kaniadto niini nga dispensasyon, ang katawhan matinahurong mosira og lubnganan, mopahid sa ilang mga luha, ug moatubang sa umaabut.”²

Ang Apostolic Interregnum

Ang yugto sa panahon tali sa pagkamatay sa usa ka propeta ug sa pag-organisar pag-usab sa Unang Kapangulohan maoy gitawag nga “apostolic interregnum.” Niining panahona, ang Korum sa Napulog Duha, ubos sa pagpangulo sa presidente sa korum, naghiusa sa paghupot sa mga yawe aron mapahigayon ang pagpangulo sa Simbahan. Si Presidente Joseph F. Smith mitudlo, “Sa kanunay adunay usa ka pangulo sa Simbahan, ug kon ang Kapangulohan sa Simbahan matangtang tungod sa kamatayon o sa laing hinungdan, nan ang sunod nga pangulo sa Simbahan mao ang Napulog Duha ka mga Apostoles, hangtud nga ang usa ka kapangulohan ma-organisar pag-usab.”³

Ang labing bag-o nga panahon sa interregnum nagsugod sa dihang si Presidente Monson namatay niadtong Enero 2 ug natapos human sa 12 ka adlaw nianang pagka-Dominggo,

naestablisar nga Unang Kapangulohan misugod sa paglihok nga, sa talagsaong paagi, walay bisan usa ka segundo nga pagkabalda sa pagdumala sa gingharian sa Ginoo dinhi sa yuta.

Maligdong nga Katiguman

Karong buntaga, kining balaang proseso gitapos sumala sa mando sa kasulatan nga gilatid diha sa Doktrina ug mga Pakigsaad: “Kay ang tanan nga mga butang kinahanglan gayud himoon sa kahusay, ug pinaagi sa pag-uyon sa tanan diha sa simbahan, pinaagi sa pag-ampo sa hugot nga pagtuo,”⁴ ug ang “tulo ka Tigdumala nga Halangdon nga mga Pari, . . . gituboy pinaagi sa pagsalig, hugot nga pagtuo, ug pag-ampo sa simbahan, nahimo nga usa ka korum sa Kapangulohan sa Simbahan.”⁵

Si Elder David B. Haight mihulagway og usa ka kanhi panghitabo sa unsay atong giapilan karon:

“Mga saksi kita ug partisipante sa pinakasagradong okasyon—usa ka maligdong nga katiguman nga aksyunan ang langitnong mga butang. Sama sa karaang kapanahunan, dunay gihimong daghan nga pagpuasa ug pag-ampo nga gihalad sa mga Santos sa tibuok kalibutan aron madawat nila ang pagbu-bu sa Espiritu sa Ginoo, nga makita kaayo . . . niini nga okasyon karong buntaga.

“Ang maligdong nga katiguman, sigun sa gipasabut sa ngalan, nagpasabut og usa ka sagrado, mabuot, ug talahuron nga okasyon diin ang mga Santos magkatigum ubos sa direksyon sa Unang Kapangulohan.”⁶

Mga kaigsoonan, mahimo kitang maglipay—gani mosinggit og “Hosanna!”—nga ang tigpama-ba sa Ginoo, usa ka propeta sa Dios, nahimutang na ug nga ang Ginoo nalipay nga ang Iyang buhat gihimo sa paagi nga balaanon Niyang gisugo.

Presidente Russell M. Nelson

Kining balaanong gi-orden nga proseso moresulta ngadto sa laing balaanong gitawag nga propeta. Sama nga si Presidente Monson usa sa labing talagsaon nga mga lumulupyo

nga nabuhi dinhi sa yuta, mao usab si Presidente Nelson. Hilabihan siya nga giandam ug piho nga gitudloan sa Ginoo aron mogiya kanato niini nga panahon. Dako nga panalangin nga ang pinalangga nga si Presidente Russell M. Nelson nahimo karon nga atong mahigugmaon ug mapahinungurong propeta—ang ika-17 nga Presidente sa Simbahan niining katapusan nga dispensasyon.

Si Presidente Nelson tinuod gayud nga talagsaon nga tawo. Akong pribilehiyo nga makaalagad diha sa Korum sa Napulog Duha uban kaniya isip akong presidente sa korum sa sobra lang og duha ka tuig. Nakabiyahae ako uban kaniya ug nahingangha sa iyang kalag-sik, tungod kay kinahanglang abtik ka nga molihok aron makagukod sa iyang kapasas! Sa kinatibuk-an nakabisita siya og 133 ka mga nasud sa iyang tibuok kinabuhi.

Ang iyang tabang alang sa tanan, bata ug tigulang. Morag nakaila siya sa tanan ug dunay gasa nga makahinumdom sa mga ngalan. Ang tanan nga nakaila niya mibati nga sila maoy iyang paborito. Ug mao usab kini sa matag usa kanato—tungod sa iyang tiunay nga gugma ug pagpakabana alang sa tanan.

Ang akong dakong pakig-uban ni Presidente Nelson anaa sa eklesyastikal nga mga tahas, apan napamilyar usab ako sa propesyonal nga kinabuhi ni Presidente Nelson sa wala pa siya

tawaga isip General Authority. Sama sa nahibaloan sa daghan ninyo, si Presidente Nelson usa ka surgeon [doktor nga moopera] sa kasingkasing nga inila sa tibuok kalibutan ug, sayo sa iyang medikal nga propesyon, usa ka pioneer developer sa heart-lung machine. Apil siya sa research team nga misuporta sa pinakaunang open-heart surgery sa usa ka tawo, niadtong 1951, gamit ang heart-lung bypass. Si Presidente Nelson miopera sa kasingkasing ni Presidente Spencer W. Kimball sa wala pa mahimong propeta si Presidente Kimball.

Makapainter, sama nga ang tawag ni Presidente Nelson ngadto sa Napulog Duha 34 ka tuig na ang milabay mitapos og *propesyonal nga medikal nga panrabaho* sa paglig-on ug pagayo og mga kasingkasing, misugod kini sa *pagpangalagad isip usa ka Apostol* nga gipahinungod sa paglig-on ug pagayo sa mga kasingkasing sa dili maihap nga katawhan sa tibuok kalibutan, diin ang matag usa nabayaw ug naayo pinaagi sa iyang mga pulong ug mga buhat sa kaalam, serbisyo, ug gugma.

Usa ka Kristohanong Kasingkasing

Kon maghunahuna ko og Kristohanong kasingkasing diha sa inadlaw-adlaw nga buhat, si Presidente Nelson ang akong makita. Wala pa ko maka-sugat og tawo nga nagpakita niini nga kinaiya sa mas taas nga lebel kay sa iyang gibuhat. Talagsaon nga pagtudlo kanako nga maanaa sa posisyon nga



personal nga makaobserbar sa mga pagpakita sa Kristohanong kasingkasing ni Presidente Nelson.

Mga semana human sa akong tawag ngadto sa Napulog Duha niadtong Oktubre 2015, duna koy oportunidad nga makadawat og direktang kasayuran mahitungod sa propesyonal nga kinabuhi ni Presidente Nelson kainadto. Gidapit ko sa pagtambong sa usa ka kalihokan diin gipasidunggan siya isip pioneer sa pag-opera og kasingkasing. Sa dihang misulod ko sa dapit, nahingangha ko sa kadaghan sa mga propesyonal nga mitahud ug mipasidungog sa buhat nga nahimo ni Presidente Nelson daghang tuig na ang milabay isip medikal nga doktor ug surgeon.

Nianang gabhiona daghan nga mga propesyonal ang mibarug ug mipahayag sa ilang pagtahud ug pagdayeg sa nabantug nga kontribusyon ni Presidente Nelson diha sa iyang medikal nga buhat. Bisan pa sa kaimpresibo sa matag usa sa mga tigpresenta sa paghulagway sa nagkalain-laing kalampusan ni Presidente Nelson, mas nadani ako sa akong pakig-istorya sa tawo nga naglingkod sa akong tupad. Wala siya makaila kon kinsa ko, apan nailhan niya si Presidente Nelson isip Dr. Nelson, direktor sa thoracic surgery residency program sa usa ka medikal nga eskwelahan niadtong 1955.

Kini nga tawo kanhi estudyante ni Presidente Nelson. Mipaambit siya og daghang panumduman. Labing maka-painterang ang iyang paghulagway sa estilo sa pagtudlo ni Presidente Nelson, diin, miingon siya, naila pag-ayo si Presidente Nelson. Mipasabut siya nga kadaghanan sa mga pagtudlo sa mga heart surgery resident gipahigayon sa operahanan. Didto, ang mga resident [doktor nga nagbansay] miobserbar ug mipahigayon sa pag-opera ubos sa pagdumala sa magtutudlo, isip laboratoryo nga klasehanan. Mipaambit siya nga ang kahintang sa operahanan ubos sa ubang magtutudlo nga surgeon samok, magkompetinsyahay, puno sa tensyon, ug gani paunhanay sa kaugalingon. Kining tawhana mihulagway niini nga lisud nga kahintang, usahay gani maka-paubos. Isip resulta, ang mga resident



surgeon mibati pa gani nga ang ilang pagpanrabaho kanunay nga nameligro.

Iya dayong gipasabut ang talagsaon nga kahintang sa operahanan ni Presidente Nelson. Malinawon, kalma, ug halangdon kini. Ang mga resident gitahud og maayo. Hinoon, human sa demonstrasyon sa usa ka pamaagi, si Dr. Nelson nagkinahanglan sa labing taas nga sumbanan sa panrabaho gikan sa matag usa sa mga resident. Dugang nga mihulagway kining tawhana kon sa unsang paagi ang labing maayo nga mga resulta sa pasyente ug ang labing maayo nga mga surgeon nagagikan sa operahanan ni Dr. Nelson.

Wala kini makasurpresa kanako. Kini ang akong personal nga naobserbahan ug mipanalangin gayud kanako diha sa Korum sa Napulog Duha. Gibati nako nga daw, sa usa ka pagsabut, usa ako sa iyang “mga resident nga gibansay.”

Si Presidente Nelson adunay talagsaong paagi sa pagtudlo sa uban ug sa paghatag og koreksyon sa usa ka positibo, matinahuron, ug makapadasig nga paagi. Siya ang representasyon sa Kristohanon nga kasingkasing ug usa ka ehemplo kanatong tanan. Gikan kaniya atong makat-unan nga sa bisan unsang kahintang nga maanaa kita, ang atong pamatasan ug kasingkasing mahimong mahisubay sa mga baruganan sa ebanghelyo ni Jesukristo.

Dako karon natong panalangin nga mopaluyo sa atong propeta, si Presidente Russell M. Nelson. Sa tibuok niyang kinabuhi, gipalambo niya ang iyang daghan nga mga tahas isip estudyante, amahan, propesor, bana, doktor, lider sa priesthood, apohan, ug Apostol. Gituman niya kini nga mga tahas kaniadto—ug padayong nagbuhat niini—uban sa kasingkasing sa usa ka propeta.

Mga kaisoonan, ang atong nasak-sihan ug naapilan karon, usa ka maligdong nga katiguman, mosangput sa akong pagsaksi nga si Presidente Russell M. Nelson mao ang buhi nga tigpama-ba sa Ginoo alang sa tanang katawhan. Idugang usab nako ang akong pagpamatuod mahitungod sa Dios nga Amahan, ni Jesukristo, ug sa Iyang tahas isip atong Manluluwas ug Manunubos. Sa pangalan ni Jesukristo, amen. ■

MUBO NGA MGA SULAT

1. Henry B. Eyring, sa Marianne Holman Prescott, “Apostles Share Thoughts about President Thomas S. Monson on Social Media,” Church News nga seksyon sa LDS.org, Ene. 12, 2018, news.lds.org.
2. Spencer W. Kimball, sa Conference Report, Abr. 1970, 118.
3. *Mga Pagtulun-an sa mga Presidente sa Simbahan: Joseph F. Smith* (1998), 274.
4. Doktrina ug mga Pakigsaad 28:13.
5. Doktrina ug mga Pakigsaad 107:22.
6. David B. Haight, “Solemn Assemblies,” *Ensign*, Nob. 1994, 14.



Ni Elder Lynn G. Robbins
Sa Kapangulohan sa Seventy

Kon Dili Kapitoan Ka Pito

Taliwala sa kinabuhi nga puno sa mga babag ug pagkadili hingpit, mapasalamaton kitang tanan sa mga ikaduhang higayon.

Ang mga sayop kabahin gayud sa kinabuhi. Ang pagkat-on sa pagpatukar sa piano dili imposible nga makahimo og liboan ka mga sayop—tingali minilyon ka higayon. Sa pagkat-on og laing pinulongan, ang tawo kinahanglan moatubang sa kaulawan nga makahimo og liboan ka sayop—tingali minilyon. Bisan ang labing bantugang mga atleta sa kalibutan dili makahunong pagbuhat og sayop.

Ang “kalampusan,” ginaingon nga, “dili nga walay kapakyasan, apan gikan sa pagkapakyas ngadto sa pagkapakyas nga wala mawala ang kadasig.”¹

Sa iyang naimbento nga bombilya, si Thomas Edison miingon, “Wala ko mapakyas og 1,000 ka higayon. Ang bombilya usa ka naimbento nga dunay 1,000 ka mga lakang.”² Si Charles F. Kettering mitawag sa kapakyasan nga “mga poste ngadto sa dalan sa kalampusan.”³ Hinaut, nga sa matag sayop nga atong mahimo mahimong usa ka leksyon sa kaalam, himuon ang mga babag nga tikanganan ngadto sa kalampusan.

Ang walay pagduhaduha ni Nephi nakatabang niya nga mopadayon gikan

sa mga kapakyasan ngadto sa pag-angkon sa tumbaga nga mga palid. Milungtad og 10 ka mga pagsulay sa wala pa magmalampuson si Moises sa paglayas gikan sa Ehipto uban sa mga Israelites.

Tingali kita matingala—kon sila si Nephi ug Moises gisugo sa Ginoo, ngano nga ang Ginoo wala man motabang kanila nga magmalampuson sa ilang unang pagsulay? Nganong mitugot

Siya kanila—ug ngano nga mitugot siya kanato—nga dunay daghang mga kalisud ug mga problema ug pakyas sa atong pagsulay nga magmalampuson? Sa daghang importante nga mga tubag niana nga pangutana, ania ang pipila:

- Una, ang Ginoo nasayud nga “kining tanan nga mga butang makahatag [kanato] og kasinatian, ug alang sa [atong] kaayohan.”⁴
- Ikaduha, sa pagtugot kanato nga “motilaw sa kapait, aron [kita] masayud sa paghatag og bili sa maayo.”⁵
- Ikatulo, sa pagmatuod nga “ang gubat iya sa Ginoo,”⁶ ug pinaagi lamang sa Iyang grasya nga kita makatuman sa Iyang buhat ug mahimong sama Kaniya.⁷
- Ikaupat, sa pagtabang nato nga makapalambo ug makaangkon og Kristohanong mga hiyas nga dili maangkon gawas kon pinaagi sa katugbang⁸ ug “diha sa hudno sa kasakit.”⁹

Mao nga, taliwala sa daghang mga babag ug pagkadili hingpit, kitang tanan mapasalamaton sa ikaduhang kahigayunan.

Niadtong 1970, isip usa ka bag-ong freshman sa BYU, mi-enrol ko sa usa ka sinugdanan nga kurso sa kaimportante sa physics nga gitudlo ni Jae Ballif, usa ka bantugang propesor. Pagkahuman sa matag unit sa kurso,



mohatag siya og eksam. Kon ang usa ka estudyante makadawat og C ug gusto og mas maayo nga grado, si Propesor Ballif motugot sa estudyante nga mokuha sa giusab nga eksam sa sama nga materyal. Kon ang estudyante makadawat og B sa ikaduhang pagsulay ug sa gihapon wala matagbaw, makakuha siya sa test sa ikatulong higayon ug sa ikaupat, ug sa sunod pa. Pinaagi sa pagtugot nako sa daghang mga higayon, gitabangan ko niya nga molampus ug sa katapusan makakuha og A sa iyang klase.

Siya talagsaon nga maalamon nga professor kinsa modasig iyang mga estudyante sa pagpadayon sa pagsulay—sa pagkonsiderar sa kapakyasan isip tigtudlo, dili usa ka trahedyo, ug nga dili mahadlok sa kapakyasan apan sa pagkat-on gikan niini.

Karong bag-o gitawgan nako kining bantugang tawo 47 ka tuig human sa pagkuha sa iyang kurso sa physics. Gipangutana nako siya ngano nga andam siya nga motugot sa mga estudyante og walay kinutuban nga pagsulay aron motaas ang ilang grado. Ang iyang tubag: “Gusto ko nga anaa sa samang dapit sa mga estudyante.”



Samtang kita nagpasalamat sa ikaduhang higayon human sa mga sayop, o mga kapakyasan sa hunahuna, matingala kita sa grasya sa Manluluwas sa paghatag nato og ikaduhang higayon sa pagbuntog sa sala, o kapakyasan sa kasingkasing.

Walay usa nga mas nagtinguha sa atong kalampusan kay sa Manluluwas. Mitugot Siya nato sa pagkuha ug pagbalik-balik og kuha sa Iyang mga eksamin. Aron mahimong sama Kaniya magkinahanglan og dili maihap nga *ikaduhang kahigayunan* sa atong inadlaw-adlaw nga mga pakigbisog sa kinaianhon nga tawo, sama sa pagkontrol sa mga gana, pagkat-on og pailub ug pagpasaylo, pagbuntog sa pagkatapulan, ug paglikay sa mga sala sa wala pagbuhat, sa paghingalan lang og pipila. Kon ang pagkasayop tawhanon, pila pa ka mga pagkapakyas ang atong mahimo hangtud ang atong pagkakinaiyanhon dili na tawhanon apan balaan? Liboan? Siguro minilyon.

Ang pagkahibalo nga ang higpit ug pig-ot nga dalan adunay daghang mga pagsulay ug nga ang mga kapakyasan inadlaw nga panghitabo alang nato, Manluluwas walay katapusang presyo aron sa paghatag nato og daghang kahigayunan kutob sa mahimo aron malampusong kitang makapasar sa atong mortal nga pagsulay. Ang oposisyon nga Iyang gitugot sa kasagaran ingon og dili mabuntog ug ingon og dili madala, apan wala kita Niya biyai nga walay paglaum.

Aron sa paghimo sa atong paglaum nga makanunayon samtang mag-atubang kita og mga pagsulay sa kinabuhi, ang grasya sa Manluluwas andam ug anaa kanunay. Ang iyang grasya usa ka “balaan nga paagi sa tabang o kalig-on, . . . usa ka makaabag nga gahum nga nagtugot sa mga lalaki ug mga babaye nga makaangkon og kinabuhing dayon ug kahimayaan *human* sila makahimo sa ilang labing maayo nga kaugalingong mga paningkamot.”¹⁰ Ang Iyang grasya ug ang Iyang mahigugmaong mata ania kanato sa atong tibuok panaw samtang Siya modasig, mopagaan sa mga salagubangon, molig-on, moluwas, manalipod,

moayo, ug “motabang sa iyang katawhan,” bisan og sila og madagma diha sa higpit ug pig-ot nga dalan.¹¹

Ang paghinulsol anaa kanunay nga gasa sa Dios ug makahimo nato sa pag-agi gikan sa kapakyasan ngadto sa kapakyasan nga dili mawala ang bisan unsa nga kadasig. Ang paghinulsol dili Iyang alternatibo nga plano sa higayon nga kita mapakyas. Ang paghinulsol *mao* ang Iyang plano, nakahibalo nga kita makasala. Mao kini ang ebanghelyo sa paghinulsol, ug sama sa naobserbahan ni Presidente Russell M. Nelson, kini mao ang “tibuok kinabuhi nga kurikulum.”¹²

Niining tibuok kinabuhi nga kurikulum sa paghinulsol, ang sakrament mao ang gitudlo nga paagi sa Ginoo sa paghatag og padayon nga paggamit sa Iyang kapasayloan. Kon kita moambit uban sa masulub-on nga kasingkasing ug usa ka mahinulsulon nga espiritu, motanyag Siya kanato og senimana nga kapasayloan samtang mouswag kita gikan sa kapakyasan ngadto sa laing kapakyasan subay sa dalan sa pakigsaad. Kay “bisan pa sa ilang mga sala, ang akong kasingkasing napuno sa kapuangod ngadto kanila.”¹³

Apan makapila kaha Siya mopasaylo kanato? Unsa ka taas ang Iyang pagkamainantuson? Sa usa ka okasyon si Pedro nangutana sa Manluluwas “Ginoo, hangtud ba makapila makasala ang akong igsoon batok kanako, ug pasayloon ko siya? Makapito ba?”¹⁴

Sa walay duha-duha, si Pedro nagtuo nga ang *pito* dako na kaayo nga numero sa paghatag og gibug-aton sa kabuang sa pagpasaylo og daghang higayon ug nga ang pagkamabination kinahanglang adunay kinutuban. Agig tubag, ang Manluluwas misulti gayud ni Pedro nga dili mag-ihap—sa dili pag-establisar og kinutuban sa pagpasaylo.

“Si Jesus mitubag kaniya, Wala ako mag-ingon kanimo nga makapito, kondili kapitoan ka pito.”¹⁵

Klaro kaayo nga, ang Manluluwas wala mag-establisar og pinakataas nga kinutuban nga 490. Kana matandi sa pag-ingon nga ang pag-ambit sa sakrament adunay kinutuban nga 490, ug dayon sa ika-491 nga higayon ang



langitnong awditor motabang sa paghusay ug moingon, “Pasayloa ko ang imong kard sa paghinulsol na-expire na—gikan karon ug sa unahan, maginusara ka na.”

Ang Ginoo migamit sa math nga kapitoan pil-on og kapito isip usa ka simbolo sa Iyang walay kinutuban nga Pag-ula, ang Iyang walay utlanan nga gugma, ug ang Iyang walay katapusan nga grasya. Oo, ug ingon sa *kanunay* nga ang akong mga katawhan maghinulsol Ako mopasaylo kanila sa ilang mga kalapasan batok kanako.”¹⁶

Kana wala magpasabut nga ang sakrament nahimong lisensya sa pagpakasala. Mao kana ang usa sa rason nga gilakip sa Ginoo nga kini nga mga pulong sa basahon ni Moroni: “Apan ingon sa kanunay nga sila maghinulsol ug mangayo og kapasayloan, *uban sa tinuod nga katuyoan*, sila pasayloon.”¹⁷

Ang tinuod nga katuyoan nagpasabut *uban sa tinuod nga paningkamot* ug tinuod nga kausaban. Ang “kausaban” mao ang importante nga pulong nga gigamit sa Giya ngadto sa mga Kasulatan sa paghatag og kahulugan sa *paghinulsol*: “Usa ka pag-usab sa hunahuna ug sa kasingkasing nga magdala og lab-as kinaiya ngadto sa Dios, sa kaugalingon, ug sa kinabuhi sa kinatibuk-an.”¹⁸ Kanang matanga sa

kausaban moresulta sa espirituhanong *pagtubo*. Ang atong kalampusan, dili *mopadulong* gikan sa kapakyasan ngadto sa kapakyasan, apan *magtubo* gikan sa kapakyasan ngadto sa kapakyasan nga walay pagkawala sa bisan unsa nga kadasig.

Kabahin sa *kausaban*, ikonsiderar kining yano nga panabut: “Ang mga butang nga dili mausab magpabilin nga pareha ra.” Kining dayag nga kamatuoran wala magpasabut sa paginsulto sa inyong salabutan apan mao ang talagsaon nga kaalam ni Presidente Boyd K. Packer, kinsa midugang, “Ug kon kita mahuman sa pag-usab—*human na kita*.”¹⁹

Tungod kay kita dili gusto nga *mahuman* hangtud nga kita mahimong sama sa atong Manluluwas,²⁰ kinahanglan kitang mopadayon nga mobarug matag higayon nga kita madagma, uban sa tinguha nga magpadayon sa pagtubo ug pag-uswag bisan pa sa atong mga kahuyang. Sa atong kahuyang, Siya mihatag og kasiguroan kanato, “Ang akong grasya igo alang kanimo, kay ang akong gahum ginahingpit diha sa kahuyang.”²¹

Ang pagtan-aw lamang sa kinatibuk-an o tsart sa kalamboan nga kita makakita sa atong pisikal nga paglambo. Sa samang paagi, ang atong espirituhanong

pagtubo sa kasagaran dili mamatikdan gawas sa paagi sa paghinumdom sa unsay nahitabo sa nangaging panahon. Maalamon ang regular nga paghunahuna sa atong kaugalingon sa nangagi kay nianang paagiha sa atong mahibaloan ang kauswagan ug makadasig nato nga kinahanglan gayud mopadayon sa unahan uban ang pagkamakanunayon kang Kristo, magbaton sa usa ka hingpit nga kahayag sa paglaum.”²²

Mapasalamaton ko sa mahigugma-ong kaayo, pailub, ug pagkamainantuson sa Langitnong mga Ginikanan ug sa Manluluwas, kinsa mihatag nato og dili maihap nga ikaduhang kahigayunan sa atong panaw balik ngadto sa ilang presensya. Sa ngalan ni Jesukristo, amen. ■

MUBO NGA MGA SULAT

1. Kini nga kinutlo gipahinungod ngadto sa lain-laing mga tagsulat, lakip nila ni Abraham Lincoln ug Winston Churchill.
2. Thomas Edison, sa Zorian Rotenberg, “To Succeed, You Must Fail, and Fail More,” Nob, 13, 2013, insightsquared.com.
3. Charles F. Kettering, sa Thomas Alvin Boyd, *Charles F. Kettering: A Biography* (1957), 40. Kini nga kinutlo gipanag-ya usab ni C. S. Lewis.
4. Doktrina ug mga Pakigsaad 122:7. Bisan ang Manluluwas “nakakat-on . . . sa pagkamasinugtanon pinaagi sa mga butang nga Iyang giantus” (Mga Hebreohanon 5:8). Samtang kini nga mga kasulatan nagpasabut sa kalisdanan ug pag-antus tungod sa atong kahimtang o dili maayo nga mga kondisyon, ang mga sayop nga atong mahimo alang usab sa atong kaayohan kon magkat-on kita gikan niini.
5. Moises 6:55.
6. 1 Samuel 17:47; tan-awa usab sa 1 Nephi 3:29.
7. Tan-awa sa Jacob 4:7.
8. Tan-awa sa 2 Nephi 2:11.
9. Isaias 48:10; 1 Nephi 20:10.
10. Ang Giya ngadto sa mga Kasulatan, “Grasya”; emphasis gidugang.
11. Alma 7:12.
12. Russell M. Nelson, sa Dallin H. Oaks ug Neil L. Andersen, Repentance” (pakigpulong nga gihatag diha sa seminar alang sa bag-ong mga presidente sa mision, Hunyo 26, 2015), 11.
13. Doktrina ug mga Pakigsaad 101:9.
14. Mateo 18:21.
15. Mateo 18:22.
16. Mosiah 26:30; emphasis gidugang.
17. Moroni 6:8; emphasis gidugang.
18. Giya ngadto sa mga Kasulatan, “Hinulsol, Paghinulsol,” scriptures.lds.org.
19. Boyd K. Packer, komperensya sa Kingsland Georgia Stake, Ago, 1997.
20. Tan-awa sa 3 Nephi 27:27.
21. 2 Mga Taga-Corinto 12:9; tan-awa usab sa Ether 12:27.
22. 2 Nephi 31:20.



Ni Elder Neil L. Andersen
Sa Korum sa Napulog Duha ka mga Apostoles

Ang Propeta sa Dios

Ang propeta dili tigpataliwala ninyo ug sa Manluluwas. Hinoon, mobarug siya tupad ninyo ug motudlo sa dalan paingon sa Manluluwas.

Idugang nako ang akong pag-abi-abi nila ni Elder Gerrit Gong ug Elder Ulisses Soares ngadto sa dili hitupngan nga panag-igsoonay sa Korum sa Napulog Duha.

Sa atong pagpaluyo ni Presidente Russell M. Nelson isip propeta sa Ginoo ug Presidente sa Ang Simbahan ni Jesukristo sa mga Santos sa Ulahing mga Adlaw, kabahin na kita sa usa ka balaanong gimando nga maligdong nga katiguman—maligdong tungod kay ang mga panghitabo sa miaging usa ka oras gipaabut na sa kalangitan sukad sa wala pa ang kalibutan. Si Ginoong Jesukristo, kinsa nagdumala sa Iyang buhat, mipresentar karon pinaagi ni Presidente Eyring sa Iyang propeta, sa Iyang dinihogan nga lider, ngari kanato, ang Iyang katawhan sa pakigsaad, nga nagtugot kanato nga mopakita diha sa kadaghanan sa atong kaandam nga mopaluyo kaniya ug mosunod sa iyang tambag.

Niadtong minilyon nga mga miyembro nga wala nato makauban dinhi sa Conference Center, gusto nakong mahibaloan ninyo nga ang Espiritu sa Ginoo niini nga building atol sa pagpaluyo ni Presidente Nelson mao gayud kon unsa ang inyong gilauman—puno sa gahum sa espiritu. Ang gimando sa langit kanato nga panagtigum dili

lamang niini nga Conference Center apan sa tibuok kalibutan—sa mga chapel sa Asia, Africa, ug North America; sa mga panimalay sa Central ug South America ug Europa; sa giatupan nga mga hawanan diha sa Pasipiko ug sa mga isla sa kadagatan. Kini nga panagtigum anaa sa bisan asang bahin sa kalibutan nga maanaa kamo, bisan kon ang inyong koneksyon mao lamang ang audio sa inyong smartphone. Ang gipataas natong mga kamot wala giihap sa atong mga bishop, apan sigurado nga gihinumduman kini sa langit, sama sa atong pakigsaad ngadto sa Dios, ug ang atong aksyon girekord diha sa basahon sa kinabuhi.

Nagpili ang Ginoo og Iyang Propeta

Ang pagpili sa usa ka propeta gihimo Mismo sa Ginoo. Walay pagpangampanya, walay mga debate, walay pagtinguha alang sa posisyon, walay pagsupak, kawalay pagsalig, kalibug, o kagubot. Ako usab mopamatuod nga ang gahum sa langit nagauban kanamo didto sa taas nga lawak sa templo samtang mainampuon kaming nagliyok kang Presidente Nelson ug mibati sa dili ikalimud nga pagtugot sa Ginoo diha kaniya.

Ang pagkapili ni Presidente Nelson nga moserbisyo isip propeta sa Dios gihimo sa dugay nang panahon. Ang mga pulong sa Ginoo ngadto ni Jeremias magamit ngadto ni Presidente Nelson: “Sa wala pa ikaw buhata nako diha sa tiyan naila ko na ikaw; ug sa wala pa ikaw mogula sa tagoangkan gibaalaan ko na ikaw, gitudlo ko ikaw nga manalagna alang sa mga nasud.”¹ Tulo lamang ka tuig ang milabay, si Elder Nelson, sa edad nga 90, mao ang ikapat sa seniority, nga dunay duha sa tulo ka senior nga mga Apostoles nga mas bata pa kay kaniya. Ang Ginoo, kinsa maoy nagkontrolar sa kinabuhi ug sa kamatayon, mipili sa Iyang propeta. Si Presidente Nelson, sa edad nga 93, anaa sa talagsaong kahimsug. Nanghinaut kita nga makauban nato siya sa laing dekada o duha, apan sa pagkaron naningkamot mi nga agnihon siya nga mopalayo lang una sa mga ski slope.

Samtang gipaluyohan nato ang propeta isip dinihogan sa Ginoo, klaruhon nato nga ang Dios lamang ang atong gisimba, ang atong Langitnong



Carcassonne, France



Si Presidente Nelson uban sa iyang ika-118 nga apo sa tuhod.

Amahan, ug ang Iyang balaang Anak. Pinaagi kini sa mga maayo nga buhat, kalooy, ug grasya sa atong Manluluwas, nga si Jesukristo, nga usa ka adlaw makasulod na usab kita sa Ilang presensya.²

Nganong Mosunod man Kita sa Propeta

Apan si Jesus nagtudlo usab og importante nga kamatuoran mahitungod sa mga sulugoon nga Iyang gipadala kanato. “Ang magadawat kaninyo,” miingon Siya, “magadawat kanako, ug ang magadawat kanako magadawat sa nagpadala kanako.”³

Ang labing importante nga tahas sa propeta sa Ginoo mao ang pagtudlo kanato bahin sa Manluluwas ug ang paggiya kanato ngadto Kaniya.

Adunay daghang lohikal nga mga rason nga mosunod kang Presidente Russell M. Nelson. Bisan kadtong dili sakop sa atong tinuohan motawag kaniya nga maantigo gayud. Usa siya ka medikal doktor sa edad nga 22, usa ka tinahud nga tig-opera sa kasingkasing, ug inila nga pioneer sa kalamboan sa open-heart surgery.

Ang kadaghanan miila sa iyang kaalam ug paghukom: siyam ka dekada nga nagkat-on mahitungod sa kinabuhi ug kamatayon, nagpakabuhi nga walay kahakog, naghigugma ug nagtudlo sa mga anak sa Dios sa matag dapit

sa kalibutan, ug ang makapahamtong nga mga kasinatian sa pagbaton og 10 ka anak, 57 ka apo, ug 118 ka apo sa tuhod (kining katapusang numero kanunayng mausab; usa ka apo sa tuhod ang natawo niining lang milabayng Miyerkules).

Kadtong mas nakaila kaniya mosulti bahin ni Presidente Nelson nga miatubang sa mga kalisdanan sa kinabuhi uban sa hugot nga pagtuo ug kaisug. Sa dihang ang kanser mikutlo sa kinabuhi sa iyang 37 anyos nga anak nga babaye, nga si Emily, nga mibiya sa mahigugmaong bana ug lima ka gagmayng anak, nakadungog ko niya nga miingon, “Ako ang iyang amahan, usa ka medikal doktor, ug usa ka Apostol ni Ginoong Jesukristo, apan kinahanglan kong moyuko sa akong ulo ug moi-la, ‘Dili akong pagbuot apan ang imong pagbuot maoy matuman.’”⁴

Ang Magbalantay sa Tore

Bisan kon gidayeg nato kining tanang halangdon nga mga kinaiya, nganong sundon man nato si Presidente Nelson? Nganong sundon man nato ang propeta? Tungod kay gitawag siya ni Ginoong Jesukristo ug misangon kaniya isip ang Iyang magbalantay sa tore.

Ang Carcassonne usa ka talagsaong siyudad nga giparilan didto sa France nga nagbarug sukad pa sa tunga-tungang kapanahunan. Tag-as nga mga

tore ang nagbuntaog nga gipanalipdan niining mga paril, gitukod alang sa mga magbalantay nga magbarug niadtong mga tore sa adlaw ug gabii, nga kanunayng magtan-aw sa unahan alang sa kaaway. Kon makakita ang magbalantay og kaaway nga nagsingabut, ang iyang tingog sa pagpasidaan manalipod sa katawhan sa Carcassonne gikan sa talia-but nga kakuyaw nga wala nila makita.

Ang propeta usa ka magbalantay sa tore, nga manalipod kanato gikan sa espiritwal nga mga kakuyaw nga mahimong dili nato makita.

Ang Ginoo namulong ngadto ni Ezequiel, “Gibutang ko ikaw nga usa ka magbalantay alang sa balay sa Israel; tungod niini patalinghugi ang pulong [gikan] sa akong ba-ba, ug ihatag kanila ang pasidaan gikan kanako.”⁵

Kanunay kitang maghisgot sa atong panginahanglan nga mosunod sa propeta, apan ikonsiderar ang bug-at nga palas-anon nga gibutang sa Ginoo diha sa Iyang propeta: “Kon ikaw dili mosulti sa pagpasidaan sa tawong dautan . . . , [ug] kanang tawo nga dautan . . . mamatay gayud diha sa iyang kasalanan; . . . ang iyang dugo panilngon ko diha sa imong kamot.”⁶

Usa ka Mas Dakong Personal nga Pagsaksi

Atong gihangup si Presidente Nelson sama sa ato untag paghangup kang Pedro o Moises kon nabuhi pa kita





sa ilang panahon. Gisultihan sa Dios si Moises, “Ako magauban sa imong ba-ba, ug magatudlo kanimo kong unsa ang imong igasulti.”⁷ Maminaw kita sa propeta sa Ginoo uban sa hugot nga pagtuo nga ang iyang mga pulong “gikan sa kaugalingon nga ba-ba [sa Ginoo].”⁸

Usa ba kini ka pagtuo nga wala hunahunaa? Dili, dili kini mao. Matag usa kanato adunay espiritwal nga pagsaksi bahin sa katinuod sa Pagpahiuli sa ebanghelyo ni Jesukristo. Pinaagi sa atong kaugalingong kabubut-on ug pagpili, gipataas nato ang atong kamot karong buntaga, nga namahayag sa atong tinguha nga mopaluyo sa propeta sa Ginoo pinaagi sa atong “pagsalig, hugot nga pagtuo, ug [mgal pag-ampo]”⁹ ug sa pagsunod sa iyang tambag. Kita adunay pribilehiyo isip mga Santos sa Ulahing mga Adlaw nga makadawat og personal nga pagsaksi nga ang tawag ni Presidente Nelson gikan sa Dios. Samtang ang akong asawa, si Kathy, personal nga nakaila ni Presidente Nelson sulod sa dul-an sa tulo ka dekada ug walay kwestion mahitungod sa iyang balaang katungdanan, sa pag-set apart kaniya,

nagsugod siya sa pagbasa sa tanan niyang mga pakigpulong sa kinatibukang komperensya sa miaging 34 ka tuig, nga nag-ampo alang sa mas lawom nga kasiguroan sa iyang propetikang tahas. Mosaad ko kaninyo nga kining mas dakong pagsaksi moabut kaninyo samtang mapainubsanon ug takus kamong magtinguha niini.

Nganong andam man kaayo kitang mosunod sa tingog sa atong propeta? Alang niadtong makugihong nagtinguha og kinabuhing dayon, ang tingog sa propeta nagdala og espiritwal nga kaluwasan sa gubot kaayo nga panahon.

Nagpuyo kita sa usa ka planeta nga daghang tingog ang nanawagan. Ang internet, ang atong mga smartphone, ang atong labihan ka daghang kapilian nga mga kalingawan nga ang tanan gustong mokuha sa atong pagtagad ug moimpluwensya kanato, nanghinaut nga mopalit kita sa ilang mga produkto ug mopahiangay sa ilang mga sumbanan.

Ang daw walay katapusang impormasyon ug opinyon mopahinumdom kanato sa mga pasidaan sa kasulatan bahin sa “igatuya-tuya

ug igaliyok-liyok,”¹⁰ “ginahandos sa hangin,”¹¹ ug naimpluwensya sa “lipat-lipat” niadtong kinsa “batid sa pagmug-nag kasaypanan.”¹²

Ang pag-angkla sa atong kalag ngadto kang Ginoong Jesukristo nagkinahanglan nga maminaw niadtong Iyang gipadala. Ang pagsunod sa propeta niining gubot nga kalibutan susama sa giputos sa usa ka kompartable, init nga habul sa usa ka labihan ka tugnaw nga adlaw.

Nagpuyo kita sa usa ka kalibutan nga puno sa pangatarungan, debate, argumento, lohika, ug pagpasabut. Ang mangutana og, “Ngano man?” positibo sa daghan kaayong aspeto sa atong kinabuhi, motugot sa gahum sa atong salabutan sa paggiya og daghang kapilian ug mga desisyon nga atong atubangon matag adlaw.

Apan ang tingog sa Ginoo kasagaran moabut nga walay pagpasabut.¹³ Dugay na kaayo sa wala pa ang academics magtuon sa epekto sa pagkadili matinud-anon [infidelity] ngadto sa misalig nga mga kapikas ug mga anak, ang Ginoo namahayag, “Dili ka magpanapaw.”¹⁴ Gawas sa pagsalig sa kaugalingong salabutan lamang, atong hatagan og bili ang gasa sa Espiritu Santo.

Ayaw Katingala

Ang tingog sa propeta, samtang mabinatong gipamulong, kasagaran mahimong usa ka tingog nga manawagan kanato nga mag-usab, nga maghinulsol, ug mobalik ngadto sa Ginoo. Kon ang pagkorehir gikinahanglan, dili nato langayon. Ug ayaw kaalarma kon ang tingog sa propeta bahin sa pagpasidaan mosupak sa popular nga mga opinyon sa atong panahon. Ang pagbiay-biay sa nasuko nga mga dili tumutuo kanunayng isalibay sa higayon nga magsugod na sa pagsulti ang propeta. Samtang magpaubos kamo sa pagsunod sa tambag sa propeta sa Ginoo, mosaad ko kaninyo og dugang nga panalangin sa kaluwasan ug kalinaw.

Ayaw katingala kon usahay ang inyong personal nga mga panglantaw dili kanunay nga mahiangay sa mga

pagtulun-an sa propeta sa Ginoo. Mga gutlo kini sa pagkat-on, sa pagpaubos, kon moluhod kita aron mag-ampo. Matinud-anon kitang magpadayon, nga mosalig sa Dios, nga nasayud nga moabut ang panahon nga makadawat kita og dugang nga espirital nga katinawan gikan sa atong Langitnong Amahan. Usa ka propeta ang mihulagway sa dili ikatandi nga gasa sa Manluluwas isip “ang kabubut-on sa Anak ingon nga gituhop ngadto sa kabubut-on sa Amahan.”¹⁵ Ang pagtugyan sa atong kabubut-on ngadto sa kabubut-on sa Dios, sa tinuod, dili man gayud pagtugyan apan ang sinugdanan sa usa ka mahimayaong kadaugan.

Ang uban masobrahan sa pag-analisar sa mga pulong sa propeta, manlimbasug sa pagtino kon unsa ang iyang propetikanhong tingog ug unsa ang iyang personal nga opinyon.

Niadtong 1982, duha ka tuig sa wala pa matawag isip General Authority, si Brother Russell M. Nelson miingon: “Wala gyud ko mangutana sa akong kaugalingon, ‘Kanus-a man mamulong ang propeta isip usa ka propeta ug kanus-a man siya mamulong nga dili usa ka propeta?’ Ang akong kinaiya mao, ‘Unsaon man nako aron mas mahisama kaniya?’” Midugang siya, “Ang akong [pilosopiya mao] ang paghunong sa pagkwestyon kon ang pamahayag sa propeta doktrina ba o dili ug mag-focus lang sa pagsunod niini.”¹⁶ Mao kini kon giunsa sa usa ka mapaubsanon ug espirital nga tawo pagpili nga mohan-ay sa iyang kinabuhi. Karon, 36 ka tuig ang milabay, siya na ang propeta sa Ginoo.

Ang Paglambo sa Imong Pagtuo sa Manluluwas

Sa akong personal nga kinabuhi, akong nabantayan nga samtang mainampuon kong nagtuon sa mga pulong sa propeta sa Dios ug sa mainampingon, uban sa pagpailub, sa espirital nga paagi mipahiangay sa akong kabubut-on ngadto sa iyang dinasig nga mga pagtulun-an, ang akong pagtuo diha ni Ginoong Jesukristo kanunay nga milambo.¹⁷ Kon mopili kita sa pagbaliwala sa

iyang tambag ug motino nga mas nasa-yud kita, ang atong pagtuo mag-antus ug ang atong mahangturong panglantaw dili na klaro. Mosaad ko kaninyo nga kon magpabilin mo nga determinado sa pagsunod sa propeta, ang inyong pagtuo sa Manluluwas molambo.

Miingon ang Manluluwas, “Ang tanan nga mga propeta . . . nagpamatuod kanako.”¹⁸

Ang propeta dili tigpataliwala ninyo ug sa Manluluwas. Hinoon, mobarug siya tupad ninyo ug motudlo sa dalan paingon sa Manluluwas. Ang labing mahinungdanon nga responsibilidad ug labing bililhon nga gasa sa propeta ngari kanato mao ang iyang tinuod nga pagsaksi, ang iyang sigurado nga kahibalo, nga si Jesus mao ang Kristo. Sama ni Pedro sa karaan, ang atong propeta namahayag, “[Siya] mao ang Kristo, ang Anak sa Dios nga buhi.”¹⁹

Sa umaabut nga adlaw, nga magtana og balik sa atong pagkamortal, magmaya kita nga nakalakaw kita dinhi sa yuta sa panahon sa usa ka buhi nga propeta. Nianang adlaw, ako nag-ampo nga kita makahimo sa pag-ingon:

Kita naminaw kaniya.

Kita mituo kaniya.

Kita nagtuon sa iyang mga pulong uban sa pagpailub ug hugot nga pagtuo.

Kita nag-ampo alang kaniya.

Kita nagbarug uban kaniya.

Kita mapaubsanon nga misunod kaniya.

Kita nahigugma kaniya.

Akong ibilin ang akong maligdong nga pagsaksi nga si Jesus mao ang Kristo, ang atong Manluluwas ug Manunubos, ug nga si Presidente Russell M. Nelson mao ang Iyang dinihugan nga propeta dinhi sa yuta. Sa pangalan ni Jesukristo, amen. ■

MUBO NGA MGA SULAT

1. Jeremias 1:5.
2. Tan-awa sa 2 Nephi 2:8.
3. Mateo 10:40.
4. Personal nga paghandum; tan-awa usab sa Spencer J. Condie, *Russell M. Nelson: Father, Surgeon, Apostle* (2003), 235.
5. Ezequiel 33:7.
6. Ezequiel 33:8.
7. Exodo 4:12.
8. Doktrina ug mga Pakigsaad 21:5.
9. Doktrina ug mga Pakigsaad 107:22.


10. Mga Taga-Efeso 4:14.
11. Santiago 1:6.
12. Mga Taga-Efeso 4:14.
13. Miingon makausa si Presidente Dallin H. Oaks:

“Sa usa ka interbyu niadtong 1988. . . akong gipasabut ang akong panglantaw kalabut sa mga pagsulay sa paghatag og mortal nga mga rason alang sa balaanong pagpadayag:

“Kon basahon ninyo ang mga kasulatan uban niining pangutana sa hunahuna, ‘Nganong nagsugo ang Ginoo niini o nganong nagsugo man Siya niana,’ inyong masuta nga wala kaabut sa usa diha sa gatusan ka mga sugo nga adunay rason nga nahatag. Dili kana ang sumbanan sa Ginoo nga mohatag og mga rason. Kita [nga mga mortal] makabutang og mga rason sa pagpadayag. Makabutang kita og mga rason sa mga sugo. Kon mobuhat kita niini, dili kita suportado sa doktrina. Ang pipila ka mga tawo magbutang og mga rason sa [pinadayag] . . . , ug moresulta gayud sa sayop. Adunay leksyon niana. . . . Nakahukom ko kaniadto nga magbaton ko og pagtuo diha sa sugo ug wala koy pagtuo sa mga rason nga gisugyot alang niini.’ . . .

“ . . . Ang kinatibuk-ang hugpong sa mga rason para nako ingon og wala kinahanglana nga pagrisgo. . . . Dili nato buhaton ang sayop nga nahimo sa una, . . . sa pagsulay og butang og mga rason ngadto sa pinadayag. Ang mga rason nahimo na hinoon nga hinimo-himo sa tawo sa hilabihan gayud. Ang mga pagpadayag mao ang atong gipaluyohan isip ang kabubut-on sa Ginoo ug anaa diha nahimutang ang kasiguroan” (*Life’s Lessons Learned* [2011], 68–69).

14. Exodo 20:14.
15. Mosiah 15:7.
16. Russell M. Nelson, sa Lane Johnson, “Russell M. Nelson: A Study in Obedience,” *Tambuli*, Ene. 1983, 26.
17. Si Presidente Henry B. Eyring miingon: “Laing sayop nga ideya mao ang pagtuo nga ang pagpili nga modawat o dili sa tambag sa mga propeta susama ra sa pagdesisyon kon modawat ba sa maayong tambag ug makaangkon sa mga benepisyo niini o magpabilin kon asa kita. Apan ang pagpili nga dili modawat sa propetikanhong tambag nag-usab sa mismong dapit nga atong gibarugan. Nahimo kining mas makuyaw. Ang kapakyas sa pagsunod sa propetikanhong tambag makapahuyang sa atong gahum sa pagdawat sa dinasig nga tambag sa umaabut. Ang labing maayong panahon nga mohukom sa pagtabang ni Noe sa pagbuhat sa arka mao ang unang higayon nga siya mihangyo. Matag higayon nga siya mihangyo human niana, matag kapakyas sa pagsanonong makapaminus sa pagkasensitibo sa Espiritu. Ug mao nga matag higayon nga ang iyang hangyo nga mora og binuang, hangtud miabut ang ulan. Ug dayon ulahi na kaayo kini” (“Finding Safety in Counsel,” *Ensign*, Mayo 1997, 25).
18. 3 Nephi 20:24.
19. Mateo 16:16; tan-awa usab sa Juan 6:69.



Gipresentar ni Presidente Dallin H. Oaks
Unang Magtatambag sa Unang Kapangulohan

Ang Pagpaluyo sa mga Opisyal sa Simbahan

Atong ipahibalo nga ang Estatistikal Report nga sagad i-presentar niining sesyon sa kinatibuk-ang komperensya sa Abril imantala na karon sa LDS.org pagkahuman gayud niining sesyon ug malakip sa mga isyu sa komperensya sa mga magasin sa Simbahan.

Ako na karong i-presentar ang pipila sa mga kausaban sa pagpangulo

sa Simbahan ug sa mga Area Seventy sa Simbahan alang pagpaluyo nga boto, pagkahuman si Brother Kevin R. Jergensen, ang managing Director sa Church Auditing Department, mobasa sa report sa pag-audit.

Gihatagan sa ilang mga tawag sa pagserbisyo isip bag-ong mga sakop sa Korum sa Napulog Duha ka mga

Apostoles, gisugyot nga atong i-release sila si Elder Gerrit W. Gong ug si Ulisses Soares sa pagserbisyo isip mga sakop sa Kapangulohan sa Seventy.

Agig dugang, gipadangat ang mga pag-release ngadto ni Elder Craig C. Christensen, Lynn G. Robbis, ug Juan A. Uceda sa ilang pagserbisyo isip mga sakop sa Kapangulohan sa Seventy, sugod Agosto 1, 2018.

Tanang gustong mopadayag og pasalamat niining mga Kaigsoonan sa ilang pagserbisyo, palihug ipakita kini.

Gisugyot nga atong i-release ang mosunod gikan sa ilang pagserbisyo isip mga Area Seventy: Steven R. Bangerter, Matthew L. Carpenter, Mathias Held, David P. Homer, Kyle S. McKay, R. Scott Runia, ug Juan Pablo Villar.

Kadtong gustong moapil kanamo sa pagpasalamat niining mga Kaigsoonan sa ilang kaandam nga moserbisyo, buhata kini sa pagpataas sa kamot.

Gisugyot nga atong i-release, inubanan sa kinasingkasing nga pasalamat sila si Sister Bonnie L. Oscarson, Carol F. McConkie, ug si Neill F. Marriott isip Kinatibuk-ang Kapangulohan sa Young Women. Ipadangat



usab nato ang mga pag-release ngadto sa mga sakop sa Young Women general board, kinsa maayo kaayong nakaserbisyo.

Ang tanang gustong moapil kanamo sa pagpasalamat niining mga sister sa ilang talagsaong pagserbisyo ug debosyon, palihug ipakita kini.

Gisugyot nga atong i-release si Sister Bonnie H. Cordon sa pagserbisyo isip Unang Magtatambag sa Kinatibuk-ang Kapangulohan sa Primary.

Kadtong kinsa gustong mopadayag og pasalamat palihug ipakita kini pinaagi sa pagpataas sa kamot.

Gisugyot nga atong paluyohan ang mosunod nga moserbisyo isip mga sakop sa Kapangulohan sa Seventy, sugdan karon dayon: Elder Carl B. Cook ug si Robert C. Gay.

Ang mosunod moserbisyo usab isip mga sakop sa Kapangulohan sa Seventy, magsugod sa Agosto 1, 2018: sila si Elder Terence M. Vinson, José A. Teixeira, ug Carlos A. Godoy.

Kadtong uyon, palihug ipakita kini.

Kadtong supak, kon aduna.

Gisugyot nga atong paluyohan ang mosunod isip bag-ong mga General Authority Seventy: Steven R. Bangertter, Matthew L. Carpenter, Jack N. Gerard, Mathias Held, David P. Homer, Kyle S. McKay, Juan Pablo Villar, ug Takashi Wada.

Ang tanang uyon, palihug ipakita kini.

Kadtong supak, sa samang paagi.

Gisugyot nga atong paluyohan ang mosunod isip bag-ong mga Area Seventy: Richard K. Ahadjie, Alberto A. Álvarez, Duane D. Bell, Glenn Burgess, Víctor R. Calderón, Ariel E. Chaparro, Daniel Córdova, John N. Craig, Michael Cziesla, William H. Davis, Richard J. DeVries, Kylar G. Dominguez, Sean Douglas, Michael A. Dunn, Kenneth J. Firmage, Edgar Flores, Silvio Flores, Saulo G. Franco, C. Alberto Genaro, Mark A. Gilmour, Sergio A. Gómez, Roberto Gonzalez, Virgilio Gonzalez, Spencer R. Griffin, Matthew S. Harding, David J. Harris, Kevin J. Hathaway, Richard Holzapfel, Eustache Ilunga, Okechukwu I. Imo, Peter M. Johnson, Michael D. Jones,

Pungwe S. Kongolo, G. Kenneth Lee, Aretmio C. Maligon, Edgar A. Mantilla, Lincoln P. Martins, Clement M. Matswagothata, Carl R. Maurer, Daniel S. Mehr II, Glen D. Mella, Isaac K. Morrison, Yutaka Nagatomo, Allistair B. Odgers, R. Jeffrey Parker, Victor P. Patrick, Denis E. Pineda, Henrique S. Simplicio, Jeffrey H. Singer, Michael L. Staheli, Djarot Subiantoro, Jeffrey K. Wetzell, Michael S. Wilstead, Helmut Wondra, ug David L. Wright.

Ang tanang uyon, palihug ipakita kini.

Kadtong supak, kon aduna.

Gisugyot nga atong paluyohan si Bonnie H. Cordon nga moserbisyo isip Kinatibuk-ang Presidente sa Young Women, uban ni Michelle Lynn Craig isip Unang Magtatambag ug si Rebecca Lynn Craven isip Ikaduhang Magtatambag.

Kadtong uyon ipakita kini.

Si bisan kinsa nga supak sa samang paagi ipakita.

Report sa Church Auditing Department, 2017

Gipresentar ni Kevin R. Jergensen

Tigdumalang Direktor, Church Auditing Department

Ngadto sa Unang Kapangulohan sa Ang Simbahan ni Jesukristo sa mga Santos sa Ulahing mga Adlaw

Minahal nga mga Kaigsoonan: Sumala sa gisulti sa pagpadayag diha sa seksyon 120 sa Doktrina ug mga Pakigsaad, ang Konseho sa Paggasto sa Ikapulo—gilangkuban sa Unang Kapangulohan, sa Korum sa Napulog Duha ka mga Apostoles, ug sa Presiding Bishopric—nagtugot sa paggasto sa mga pundo sa Simbahan. Ang mga departamento sa Simbahan moapud-apod sa mga pundo nga pinasubay sa giaprubahan nga mga badyet, mga polisiya ug mga pamaagi sa Simbahan.

Ang Church Auditing, nga gilangkuban sa mga propesyonal nga dunay mga kredensyal ug independente sa tanang mga departamento sa Simbahan, dunay responsibilidad sa pagpahigayon og mga audit aron sa paghatag og resonable nga kasiguroan kabahin sa mga amot nga nadawat, mga galastuhan nga nahimo, ug sa pagbantay sa mga kabtangan sa Simbahan.

Base sa mga pag-audit nga gihimo, ang Church Auditing nagtuo nga, sa tanang importanting detalye, ang mga amot nga nadawat, mga paggasto nga gihimo, ug mga kabtangan sa Simbahan alang sa tuig 2017 narekord ug nadumala sumala sa giaprubahan nga mga badyet, mga polisiya, ug mga pamaagi sa accounting sa Simbahan. Ang Simbahan nagsunod sa mga pagtulun-an nga gitudlo ngadto sa mga miyembro niini nga magpuyo sumala sa badyet, molikay sa utang, ug magtigum alang sa panahon sa panginahanglan.

Matinahurong gisumiter,
Church Auditing Department
Kevin R. Jergensen
Tigdumalang Direktor ■

Gisugyot nga atong paluyohan si Lisa Rene Harkness nga moserbisyo isip Unang Magtatambag sa Kinatibuk-ang Kapangulohan sa Primary.

Kadtong uyon ipakita kini.

Kadtong supak, kon aduna.

Gisugyot nga atong paluyohan ang ubang mga General Authority, mga Area Seventy, ug Kinatibuk-ang mga Kapangulohan sa Auxiliary ingon nga naglangkob karon.

Ang tanang uyon, palihug ipakita kini.

Kadtong supak, kon aduna.

Presidente Nelson, ang pagbotar narekord. Gidapit namo kadtong misupak sa bisan hain sa gisugyot sa pagkontak sa ilang mga presidente sa stake.

Uban sa pagpaluyo nga bag-o lang nahitabo, karon kita adunay 116 nga mga General Authority. Hapit 40 porsyento kanila natawo sa gawas sa Estados Unidos—sa Germany, Brazil, Mexico, New Zealand, Scotland, Canada, South Korea, Guatemala, Argentina, Italy, Zimbabwe, Uruguay, Peru, South Africa, American Samoa, England, Puerto Rico, Australia, Venezuela, Kenya, Philippines, Portugal, Fiji, China, Japan, Chile, Colombia, ug France.

Mga kaigsoonan, salamat sa inyong padayon nga hugot nga pagtuo ug mga pag-ampo alang sa mga lider sa Simbahan.

Amo na karon dapiton ang bag-ong mga General Authority Seventy, ang bag-ong Kinatibuk-ang Kapangulohan sa Young Women, ug si Sister Harkness sa Kinatibuk-ang Kapangulohan sa Primary molingkod sa atubangan. ■



Ni Elder David A. Bednar

Sa Korum sa Napulog Duha ka mga Apostoles

Maaghup ug Mapaubsanon sa Kasingkasing

Ang kaaghup usa ka mahinungdanong kinaiya sa Manunubos ug mailhan pinaagi sa matarung nga pagtubag, andam sa pagkamanunoton, ug lig-on sa pagpugong sa kaugalingon.

Nagmaya ko sa sagradong oportunidad sa pagpaluyo sa atong mga lider sa Simbahan, ug kinasingkasing nakong gi-welcome si Elder Gong ug Elder Soares sa Korum sa Napulog Duha ka mga Apostoles. Ang pangalagad niining matinud-anong kalalakin-an makapanalagin sa mga indibidwal ug sa mga pamilya sa tibuok kalibutan, ug naghinamhinam ko nga moserbisyo ug makakat-on gikan kanila.

Nag-ampo ako nga ang Espiritu Santo motudlo ug molamdag kanato samtang kita magdungan og kat-on mahitungod sa importanting aspeto sa balaanong kinaiya sa Manluluwas¹ nga kinahanglang paningkamutan nga masunod sa matag usa kanato.

Mohatag ako og pipila ka mga panig-ingnan nga mopakita niining Kristohanong hiyas sa dili pa ilhon ang piho nga kinaiya sa ulahing bahin sa akong mensahe. Palihug paminaw pagayo sa matag panig-ingnan ug atong ikonsiderar ang posible nga mga tubag sa mga pangutana nga akong ihatag.

Unang Panig-ingnan. Ang Batan-ong Lalaki nga Adunahan ug si Amulek

Sa Bag-ong Tugon, atong makat-unan ang mahitungod sa batan-ong lalaki nga adunahan kinsa nangutana ni Jesus, “Magtutudlo, unsa bay maa-yong buhaton ko aron makapanag-iya ako sa kinabuhing dayon?”² Ang Manluluwas unang mipahimangno kaniya sa paghupot sa mga sugo. Sunod ang



Agalon mihatag sa batan-ong lalaki og dugang nga kinahanglanon nga haum sa iyang piho nga mga panginahanglan ug kahimtang.

“Kaniya mitubag si Jesus nga nag-ingon, Kon buot ikaw mamahingpit, lumakaw ka, ibaligya ang imong kabtangan, ug ang halin ihatag sa mga kabus, ug makabaton kag bahandi didto sa langit: ug unya umanhi ka ug sumunod kanako.

“Ug sa pagkadungog niini sa batan-ong lalaki, siya mipahawa nga masulub-on: kay daghan man gud siyag katigayunan.”³

Itandi ang tubag sa batan-ong lalaki nga adunahan ngadto sa kasinatian ni Amulek, sama sa gihulagway sa Basahon ni Mormon. Si Amulek usa ka kugihan ug mauswagon nga tawo nga adunay daghang kaliwatan ug kahigalaan.⁴ Gihulagway niya ang iyang kaugalingon isip usa ka tawo nga gitawag sa makadaghan nga higayon apan wala mopatalinghug, usa ka tawo nga nasayud mahitungod sa mga butang nga iya sa Dios apan wala magpakasayud.⁵ Usa ka maayo gayud nga tawo, si Amulek nabalda sa kalibutanon nga mga kabalaka sama sa adunahan nga batan-ong lalaki nga gihulagway sa Bag-ong Tugon.

Bisan pa man nga kaniadto mipatig-a sa iyang kasingkasing, si Amulek mipatalinghug sa tingog sa anghel, midawat ni propeta Alma sa iyang panimalay, ug mipakaon kaniya. Espirituhanong nahigmata siya sa dihang si Alma mibisita ug natawag sa pagsangyaw sa ebanghelyo. Si Amulek dayon mibiya “sa tanan niya nga bulawan, ug pilak, ug iyang mahalon nga mga butang . . . alang sa pulong sa Dios, [ug] gisalikway niadto kinsa kanhiay iyang mga kahigalaan ug usab sa iyang amahan ug mga kaliwatan;”⁶

Unsa sa inyong hunahuna ang kalaingan tali sa mga reaksyon sa batan-ong lalaki nga adunahan ug ni Amulek?

Ikaduhang Panig-ingnan. Si Pahoran

Atol sa makapagun-ob nga panahon sa gubat nga gihulagway sa Basahon ni Mormon, usa ka pagsinulatay ang nahitabo tali ni Moroni, ang kapitan sa



mga sundalong Nephite, ug ni Pahoran, ang labawng maghuhukom ug gobernador sa yuta. Si Moroni, kansang mga sundalo nag-antus tungod sa kulang nga suporta gikan sa gobyerno, misulat kang Pahoran “pinaagi sa panghimaraut”⁷ ug miakusar kaniya ug sa iyang kauban nga mga lider nga walay paghunahuna, tapulan, pagpasagad, ug gani mga traydor.⁸

Si Pahoran dali untang maglagot ni Moroni ug sa iyang sayop nga mga pasangil, apan wala niya buhata. Masi-nabtanon siyang mitubag ug mihulagway sa usa ka rebelyon batok sa gobyerno nga wala masayri ni Moroni. Ug dayon namahayag si Pahoran:

“Tan-awa, ako moingon nganha kanimo, Moroni, nga ako wala magma-ya sa inyong dako nga mga kasakit, oo, kini nakapaguol sa akong kalag. . . .

“ . . . Sa imong epistola ikaw misaway kanako, apan kini walay sapayan; ako wala masuko, apan nagmaya diha sa pagkamapasayloon sa imong kasingkasing.”⁹

Unsa kahay hinungdan nga mapa-ilubon kaayo ang tubag ni Pahoran ngadto sa mga pasangil ni Moroni?

Ikatulong Panig-ingnan. Si Presidente Russell M. Nelson ug si Presidente Henry B. Eyring

Sa kinatibuk-ang komperensya unom ka bulan ang milabay, si Presidente Russell M. Nelson mihulagway sa iyang tubag sa pag-awhag ni Presidente Thomas S. Monson sa pagtuon,

pagpamalandong, ug paggamit sa mga kamatuoran nga anaa sa Basahon ni Mormon. Miingon siya: “Naningkamot ko sa pagsunod sa iyang tambag. Lakip sa ubang mga butang, naglista ko kon unsa ang Basahon ni Mormon, unsa ang *gipamatud-an*, unsa ang *gisupak*, unsa ang *gituman*, unsa ang *gipatinaw*, ug unsa ang *gipadayag* niini. Ang pagsusi sa Basahon ni Mormon sa ingon niana nga paagi makapahinuktok ug makapadasig nga buhat! Morekomendar ko niini sa matag usa ninyo.”¹⁰

Si Presidente Henry B. Eyring usab mipasabut sa kaimportante sa hangyo ni Presidente Monson sa iyang kinabuhari. Siya miingon:

“Akong gibasa ang Basahon ni Mormon matag adlaw sulod sa sobra sa 50 ka tuig. Mao nga resonable tingali nga maghunahuna ko nga ang mga pulong ni Presidente Monson alang sa laing tawo. Apan, sama sa daghan kaninyo, akong nabati ang pagdasig sa propeta ug ang iyang saad nagdapit kanako sa paghimo og mas dakong paningkamot. . . .

“Ang malipayong resulta alang kanako, ug sa kadaghanan ninyo, mao ang unsay gisaad sa propeta.”¹¹

Unsa kaha ang gipasabut sa diha-diha ug kinasingkasing nga mga reaksyon niining duha ka mga lider sa Simbahan sa Ginoo sa pagdapit ni Presidente Monson?

Wala ko mosugyot nga ang lig-on nga espirituhanong mga reaksyon nila ni Amulek, Pahoran, Presidente Nelson



ug Presidente Eyring resulta sa usa lamang ka Kristohanong hiyas. Sa pagkatinuod, daghang susamang mga kinaiya ug kasinatian ang nagdala ngadto sa espirituhanong kahingkod nga makita sa mga kinabuhi niining upat ka halangdong mga sulugoon. Apan ang Manluluwas ug ang Iyang mga propeta mihatag og gibug-aton sa usa ka mahinungdanong hiyas nga kitang tanan kinahanglang mas makasabut ug maningkamot nga malakip sa atong kinabuhi.

Kaaghup

Palihug bantayi ang mga kinaiya nga gigamit sa Ginoo sa paghulagway sa Iyang Kaugalingon sa mosunod nga mga kasulatan: “Isangon ninyo ang akong yugo diha kaninyo, ug pagtuon kamo gikan kanako; kay ako *maaghup ug mapaubsanon sa kasingkasing*; ug makakaplag kamog pahulay alang sa inyong mga kalag.”¹²

Sa pagtudlo niini, ang Manluluwas mipili nga mohatag og gibug-aton sa kaaghup gikan sa tanang mga kinaiya ug hiyas nga mahimo Niyang pilion.

Ang samang sumbanan makita diha sa pagpadayag nga nadawat ni Propeta Joseph Smith niadtong 1829. Ang Ginoo mipahayag, “Pagkat-on kanako, ug paminaw sa akong mga pulong; *lakaw diha sa kaaghup sa akong Espiritu*, ug ikaw makabaton og kalinaw ngari kanako.”¹³

Ang kaaghup usa ka mahinungdanong kinaiya sa Manunubos ug mailhan pinaagi sa matarung nga pagtubag,

andam sa pagkamanunoton, ug lig-on sa pagpugong sa kaugalingon. Kini nga hiyas makatabang kanato nga hingpit nga mas makasabut sa mga reaksyon nila ni Amulek, Pahoran, Presidente Nelson, ug Presidente Eyring.

Sama pananglit, silang Presidente Nelson ug Presidente Eyring matarung ug abtik nga mitubag sa pag-awhag ni Presidente Monson sa pagbasa ug pagtuon sa Basahon ni Mormon. Bisan og ang duha nagserbisyo sa importante ug dayag kaayo nga mga posisyon sa Simbahan ug subsub nga nagtuon sa mga kasulatan sa daghang mga dekada, wala sila magpakita og pagduhaduha sa ilang mga reaksyon o mibati og sobra ka importante.

Si Amulek andam nga miuyon sa kabubut-on sa Dios, midawat sa tawag sa pagsangyaw sa ebanghelyo, ug mibiya sa iyang haruhay nga kinabuhi ug mga relasyon sa pamilya ug higala. Ug si Pahoran napanalanginan og panabut ug lig-on nga pagpugong sa kaugalingon sa pag-aksyon imbis mobuhat og reaksyon samtang iyang gipasabut ngadto ni Moroni ang mga hagit nga miabut tungod sa rebelyon batok sa gobyerno.

Ang Kristohanong hiyas sa kaaghup kasagaran masaypan sa pagsabut sa atong moderno nga kalibutan. Ang kaaghup usa ka kalig-on, dili kahuyang; aktibo, dili walay timik; maisugon, dili mahadlukon; kontrolado, dili nanghinubra; ligdong, dili magpalabaw sa kaugalingon; ug matinahuron, dili bastos. Ang maaghup nga tawo dili dali

nga masuko, magpakaaron-ingnon, o hamburgero ug daling moila sa mga kalampusan sa uban.

Samtang ang *pagkamapainubsanon* kasagaran nagpasabut og pagsalig diha sa Dios ug kanunay nga nagkinahanglan sa Iyang giya ug suporta, usa ka ilhanan nga kinaiya sa *kaaghup* mao ang usa ka piho nga espirituhanong kaandam sa pagkat-on gikan sa Espiritu Santo ug sa mga tawo nga daw dili kaayo makamao, hanas, o edukado, kinsa tingali wala maghupot og importante nga mga posisyon, o kinsa makita nga daw dili dako ang matampo. Hinumdumi giunsa ni Naaman, ang kapitan sa kasundalohan sa hari sa Siria, pagbuntog sa iyang garbo ug maaghup nga midawat sa tambag sa iyang sulugoon sa pagtuman kang Eliseo ang propeta ug manghugas og kapito ka higayon sa suba sa Jordan.¹⁴ Ang kaaghup mao ang nag-unang proteksyon gikan sa pagkabuta sa garbo nga kasagaran mahitabotungod sa pagkainila, posisyon, gahum, katigayunan, ug pasidungog.

Ang kaaghup—usa ka Kristohanon nga Hiyas ug usa ka Espirituhanon nga Gasa

Ang kaaghup usa ka hiyas nga mapalambo pinaagi sa tinguha, sa matarung nga paggamit sa moral nga kabubut-on, ug sa pagtinguha kanunay nga magbaton sa kapasayloan sa atong mga sala.¹⁵ Usa usab kini ka espirituhanon nga gasa nga angayan natong tinguhaon.¹⁶ Hinoon, kinahanglan natong hinumduman, ang mga katuyoan nga gihatag kini nga panalangin, mao ang kaayohan ug mapangalagaran ang mga anak sa Dios.¹⁷

Samtang mopaduol kita ug mosunod sa Manluluwas, kita mag-anamanam ug sa hinay-hinay mahimong mas mahisama Kaniya. Gihatagan kita og gahum sa Espiritu nga disiplinado nga magpugong sa atong kaugalingon ug usa ka lig-on ug kalma nga kinaiya. Mao nga, mahimo gayud kitang maaghup isip mga disipulo sa Agalon ug dili lang nagpakamaaghup kunohay.

“Si Moises gitudloan sa tanang kaalam sa mga Ehiptohanon, ug siya makagagahum sa iyang mga pulong ug mga buhat.”¹⁸ Apan siya “mapainubsanon

kaayo, labaw kay sa tanang mga tawo ibabaw sa yuta.”¹⁹ Ang iyang kaalam ug kahanas makahimo unta kaniya nga mapasigarbuhon. Hinuon, ang hiyas ug espirituhanon nga gasa sa kaaghub nga siya gipanalanginan mipakunhod sa pagkamapahitas-on sa iyang kinabuhi ug mipalambo ni Moises isip instrumento sa pagbuhat sa mga katuyoan sa Dios.

Ang Agalon isip Panig-ingnan sa Kaaghub

Ang labing talagsaon ug makahuluganon nga mga panig-ingnan sa kaaghub makita sa kinabuhi sa Manluluwas Mismo.

Ang Bantugang Manunubos, kinsa “nakasinati sa tanang mga butang”²⁰ ug nag-antus, nagkadugo, ug namatay “aron *magahinlo* kanato gikan sa tanang pagkadili makatarunganon,”²¹ mabination nga *mihugas* sa abugon nga tiil sa Iyang mga disipulo.²² Ang sama nga kaaghub usa ka talagsaong timaan nga kinaiya sa Ginoo isip sulugoon ug lider.

Si Jesus naghatag ug hingpit nga panig-ingnan sa matarung nga pagtubag ug andam nga pagdawat samtang Siya nag-antus sa grabe nga kasakit didto sa Getsemani.

“Ug sa paghiabut niya sa dapit, siya miingon [sa Iyang mga disipulo], Pag-ampo kamo aron dili kamo mahidalin-as ngadto sa panulay.

“Ug siya . . . miluhod, ug nag-ampo, “Nga nag-ingon, Amahan, kon buot ka, kuhaa kining kopa gikan kanako: hinoon, dili ang akong pagbuot maoy matuman, kondili ang imo.”²³

Ang kaaghub sa Manluluwas niining mahangturong kamahinungdanon ug grabe kasakit nga kasinatian nagpakita alang sa matag usa kanato sa kaimportante sa pagbutang sa kaalam sa Dios ibabaw sa atong kaugalingon nga kaalam.

Ang pagkamakanunayon sa pagkaandam nga madawat sa Ginoo ug lig-on nga pagpugong sa kaugalingon parehong makapadasig ug mapuslanon alang kanatong tanan. Samtang usa ka grupo sa mga gwardiya sa templo ug mga kasundalohang Romano miabut sa Getsemani aron pagsakmit ug

pagdakop ni Jesus, si Pedro mihulbot sa iyang espada ug miputol sa tuo nga dunggan sa sulugoon sa labawng sacerdote [high priest].²⁴ Ang Manluluwas dayon mihikap sa dunggan sa sulugood ug miayo kaniya.²⁵ Palihug timan-i nga Siya mitabang ug mipanalangin sa hayan modakop Kaniya gamit ang samang langitnong gahum nga makapugong unta sa pagdakop ug paglansang Kaniya sa krus.

Hunahunaa usab kon giunsa ang Agalon sa pagpasangil ug panghimara-ut atubangan ni Pilato aron ilansang sa krus.²⁶ Si Jesus namahayag sa dihang Siya giluiban, “Nagahunahuna ka ba nga dili ako makapangayo sa akong Amahan, ug nga dili siya makapadala karon dayon og mga manulonda nga kapin sa napulog duha ka mga legion?”²⁷ Bisan pa niana ang “Maghuhukom sa Kahangturan sa buhi ug sa mga patay”²⁸ sa sukwahi nga paagi gihukman atubangan sa usa ka temporaryo nga politikanhong tinudlo. “Ug [si Jesus] walay gitubag kaniya; tungod niana ang gobernador nahibulong og dako.”²⁹ Ang kaaghub sa Manluluwas gipakita sa Iyang disiplinado nga pagtubag, lig-on nga pagpugong sa kaugalingon, ug dili buot mogamit sa Iyang walay kinutubang gahum alang sa personal nga kaayohan.

Saad ug Pagpamatuod

Si Mormon miila sa kaaghub isip ang pundasyon diin gikan ang tanang espirituhanon nga mga kapasidad ug gasa.

“Busa, kon ang usa ka tawo adunay hugot nga pagtuo siya kinahanglan nga magbaton og paglaum; kay kon wala ang hugot nga pagtuo wala usab ang paglaum.

“Ug usab, ako mosulti nganha kaninyo nga siya dili makabaton sa hugot nga pagtuo ug paglaum, gawas nga siya magmaaghub, ug magmapainubsanon sa kasingkasing.

“Kon mao, ang iyang hugot nga pagtuo ug paglaum kawang, kay walay madawat sa atubangan sa Dios, gawas sa maaghub ug mapainubsanon nga kasingkasing; ug kon ang tawo magmaaghub ug magmapainubsanon sa kasingkasing, ug mokumpisal pinaagi

sa gahum sa Espiritu Santo nga si Jesus mao ang Kristo, siya kinahanglan gayud adunay gugma nga putli; kay kon siya walay gugma nga putli, siya walay kapuslanan; busa siya kinahanglan gayud nga makabaton og gugma nga putli.”³⁰

Ang Manluluwas namahayag, “Bulahan ang mga maaghub: kay sila makapanag-iy sa yuta.”³¹ Ang kaaghub usa ka mahinungdanong aspeto sa diosnong kinaiya ug madawat ug mapalambo sa atong kinabuhi tungod ug pinaagi sa Pag-ula sa Manluluwas.

Mopamatuod ko nga si Jesukristo mao ang atong nabanhaw ug buhi nga Manunubos. Ug ako mosaad nga Siya mogiya, mopanalipod, ug moligon kanato samtang kita naglakaw sa kaaghub sa Iyang Espiritu. Ako mopahayag sa akong sigurado nga pagsaksi niining mga kamatuoran ug mga saad sa sagrado nga pangalan ni Ginoong Jesukristo, amen. ■

MUBO NGA MGA SULAT

1. Tan-awa sa 2 Pedro 1:4.
2. Mateo 19:16.
3. Mateo 19:21–22.
4. Tan-awa sa Alma 10:4.
5. Tan-awa sa Alma 10:5–6.
6. Alma 15:16.
7. Alma 60:2.
8. Tan-awa sa Alma 60:5–33.
9. Alma 61:2, 9.
10. Russell M. Nelson, “Ang Basahon ni Mormon: Unsa kaha ang Imong Kinabuhi Kon wala Kini?” *Liahona*, Nob. 2017, 61.
11. Henry B. Eyring, “Ayaw Kahadlok sa Pagbuhat og Maayo,” *Liahona*, Nob. 2017, 100.
12. Mateo 11:29; emphasis gidugang.
13. Doktrina ug mga Pakigsaad 19:23; emphasis gidugang.
14. Tan-awa sa 2 Mga Hari 5:1–17.
15. Tan-awa sa Mosiah 4:12, 26; Moroni 8:25–26.
16. Tan-awa sa Doktrina ug mga Pakigsaad 46:8.
17. Tan-awa sa Doktrina ug mga Pakigsaad 46:8–9, 26.
18. Mga Buhat 7:22.
19. Numeros 12:3.
20. Doktrina ug mga Pakigsaad 88:6.
21. 1 Juan 1:9; emphasis gidugang.
22. Tan-awa sa Juan 13:4–5.
23. Lucas 22:40–42.
24. Tan-awa sa Juan 18:10.
25. Tan-awa sa Lucas 22:51.
26. Tan-awa sa Mateo 27:2, 11–26.
27. Mateo 26:53.
28. Moroni 10:34.
29. Mateo 27:14.
30. Moroni 7:42–44.
31. Mateo 5:5.



Ni Elder Taylor G. Godoy
Sa Seventy

Usa Nalang ka Adlaw

Kitang tanan adunay “karon” aron magpakabuhi, ug ang mga paagi nga mahimong malampuson ang atong adlaw mao ang kaandam sa pagsakripisyo.

Pipila ka tuig ang milabay, ang akong mga higala nakabaton og matahum nga bata nga gihingan-lan og Brigham. Human siya natawo, si Brigham gi-diagnose nga dunay talagsa-ong kondisyon nga gitawag og Hunter syndrome, makaguol nga nagpasabut nga si Brigham adunay mubo lang nga kinabuhi. Usa ka adlaw samtang si Brigham ug ang iyang pamilya mibisita sa nataran sa templo, militok si Brigham og pihong mga pulong; kaduha siya miingon, “Usa nalang ka adlaw.” Pagkasunod adlaw, namatay si Brigham.

Miduaw ko sa lubnganan ni Brigham sa pipila ka higayon, ug sa matag higayon, mamalandong ko sa mga pulong “usa nalang ka adlaw.” Naghunahuna ko unsay kahulugan niini, unsa kahay epekto niini sa akong kinabuhi nga makahibalo nga naa koy usa nalang ka adlaw para mabuhi. Unsaon kaha nako pagtratar ang akong asawa, ang akong mga anak, ug ang uban? Unsa kaha ako ka mapailubon ug kabuotan? Unsaon kaha nako pag-atiman ang akong lawas? Unsa kaha ako katim-os mag-ampo ug mosiksik sa kasulatan? Naghunahuna ko nga, sa usa ka paagi o sa lain kitang tanan adunay panahon nga maamgohan ang “usa nalang ka adlaw”—usa ka pagkaamgo

nga kinahanglan maalamon kitang mogamit sa atong panahon.

Sa Daang Tugon atong mabasa ang estorya ni Ezechias, hari sa Judah. Ang propetang si Isaias mipahibalo ni Ezechias nga ang iyang kinabuhi naghinapos na. Sa dihang nadungog niya ang mga pulong sa propeta, misugod si Ezechias sa pag-ampo, nangamuyo, ug mihilak og maayo. Nianang higayona, ang Dios midugang og 15 ka tuig sa kinabuhi ni Ezechias. (Tan-awa sa Isaias 38:1–5.)

Kon kitay sultihan nga hamubo nalang ang atong kinabuhi, mahimong mangamuyo usab kita nga dungagan ang mga adlaw sa kinabuhi tungod sa mga butang nga angayang nabuhat o gibuhay sa lahi nga paagi.

Bisan unsa pa kataas sa panahon nga ang Ginoo, sa Iyang kaalam, motino sa pagganti sa matag usa nato, sa usa ka butang kita makasiguro: kitang tanan adunay “karon” aron magpakabuhi, ug ang mga paagi nga mahimong malampuson ang atong adlaw mao ang kaandam sa pagsakripisyo.

Ang Ginoo miingon, “Tan-awa, karon kini gitawag *karong adlaw* hangtud sa pag-anhi sa Anak sa Tawo, *ug sa pagkatinuod kini mao ang adlaw sa sakripisyo*” (D&P 64:23; emphasis gidugang).

Ang pulong *sakripisyo* naggikan sa latin nga mga pulong *sacer*, nga nangahulogan og “sagrado,” ug *facere*, nga nangahulogan og “paghimo,”—sa lain pagkasulti maghimo og sagradong mga butang, sa pagpasidungog kanila.

“Ang pag-antus [sacrifice] magdala’g panalangin” (“Praise to the Man,” *Hymns*, nu. 27).

Sa unsang mga paagi ang pagsakripisyo mohimo sa atong mga adlaw nga makahuluganon ug bulahan?

Una, ang personal nga pagsakripisyo mopalig-on kanato ug mohatag og bili sa mga butang nga atong gisakripisuhan.

Pipila ka tuig ang milabay sa puasa sa Domingo, usa ka tigulang nga sister miduol sa pulpito aron mopaambit sa iyang pagpamatuod. Nagpuyo siya sa siyudad nga gitawag og Iquitos, nga anaa sa Peruvian Amazon. Misulti siya namo nga sukad sa iyang pagbunyag, kanunay siya nga dunay tumong nga makadawat og mga ordinansa sa templo didto sa Lima, Peru. Matinud-anon siyang mibayad og ikapulo ug nagtigum sa gamay niyang kinitaan sulod sa katugan.

Ang iyang kalipay sa pag-adto sa templo ug sa pagdawat sa sagradong mga ordinansa didto gipadayag sa ingon niining pagkasulti: “Karon maka-ingon ko nga andam na gayud ako nga molabang sa tabil. Ako na ang pinakamalipayon nga babaye sa kalibutan; nakatigum ko og kwarta, wala lang mo masayud kon unsa kadugay, aron makabisita sa templo, ug human sa pito ka adlaw diha sa suba ug 18 ka oras sa bus, sa katapusan didto na ako sa balay sa Ginoo. Sa pagbiya nianang balaan nga dapit, miingon ko sa akong kaugalingon, human sa tanang pagsakripisyo nga gikinahanglan aron ako makaadto sa templo, dili nako itugot ang bisan unsang butang nga mopasipala sa matag pakigsaad nga akong gihimo; mausik lang kini. Usa kini ka seryuso kaayo nga pasalig!”

Nakat-on ko gikan niining pinangga nga sister nga ang personal nga pagsakripisyo usa ka bililhon kaayo nga pwersa nga makapadasig sa atong mga desisyon ug sa atong mga

determinasyon. Ang personal nga pag-sakripisyo makapadasig sa atong mga lihoc, atong mga pasalig ug atong mga pakigsaad ug mohatag og kahulogan sa sagradong mga butang.

Ikaduha, ang mga sakripisyo nga atong gihimo para sa uban, ug ang gihimo sa uban para nato, moresulta sa mga panalangin para sa tanan.

Sa estudyante pa ako sa dental school, dili makapadasig ang dagan sa ekonomiya. Ang pagsaka sa presyo sa pamaliton mipaus-os sa bili sa kwarta kada adlaw.

Nakahinumdom ko sa tuig sa dihang nagpa-enroll na unta ko sa klase nga magtudlo sa pag-opera; gikinahanglan nga hitsas ko sa tanang ekipo sa pag-opera sa dili pa mo-enroll niana nga semester. Ang akong mga ginikanan nagtigum sa gikinahanglan nga pundo. Apan usa ka gabii adunay dakong panghitabo. Nanglakaw kami aron sa pagpamalit og ekipo, nahibaloan na lang nga ang kantidad sa kwarta nga natigum sa akong mga ginikanan sa pagpamalit sa tanang ekipo karon igo nalang ikapalit og usa ka parisan sa mga surgical tweezer—ug wala nay lain. Namauli mi nga walay nadala ug inubanan sa kaguol nga naghunahuna nga wala na ang usa ka semester sa kolehiyo. Sa kalit lang, hinoon, ang akong mama miingon, “Taylor, ubani ko manggawas kita.”

Miadto mi sa downtown, diin dunay daghang dapit nga makapalit ug makabaligya og alahas. Pag-abut namo sa usa ka tindahan, mikuha ang akong mama sa iyang pitaka nga usa ka gamayng blue velvet nga bag nga dunay sulod nga bulawan nga pulseras nga dunay inskripsyon nga mabasa, “Sa akong pinangga nga anak gikan sa imong amahan.” Pulseras kadto nga gihatag sa akong lolo ngadto niya sa usa sa iyang mga adlawng natawhan. Dayon, akong nakita, nga iya kining gibaligya.

Sa pagdawat niya sa kwarta, miingon siya nako, “kon dunay usa ka butang nga masiguro nako, mao kini nga ikaw mahimong usa ka dentista. Lakaw ug palita ang tanang ekipo nga imong gikinahanglan.” Karon, mahunahuna ba ninyo kon unsa ko nga



matang sa estudyante sukad niadtong higayuna? Gusto kong mahimong kina-maayohan ug motapos sa akong mga pagtuon sa dili madugay tungod kay nakahibalo ko sa kataas sa kantidad sa sakripisyo nga iyang gihimo.

Nakat-onan nako nga ang mga sakripisyo sa atong mga minahal alang kanato mohupay kanato sama sa bugnaw nga tubig taliwala sa desyerto. Ang maong sakripisyo makahatag og paglaum ug kadasig.

Ikatulo, ang bisan unsang sakripisyo nga atong gihimo gamay ra kon itandi sa sakripisyo sa Anak sa Dios.

Unsa may bili sa gibahandi nga bula-wang pulseras kon itandi ngadto sa sakripisyo sa pinaka Anak sa Dios? Unsaon nato nga makapasidungog nianang walay kinutuban nga pagsakripisyo? Matag adlaw makahinumdom kita nga kita adunay usa nalang ka adlaw nga mabuhi ug magmatinud-anon. Si Amulek mitudlo, “Oo, ako buot nga kamo moduol ug dili magpatig-a sa inyong mga kasingkasing; kay tan-awa, karon mao ang takna ug adlaw sa inyong kalu-wasan; ug busa, kon kamo maghinulsol ug dili na magpatig-a sa inyong mga kasingkasing, diha-diha ang mahinung-danon nga laraw sa katubanan mapadangat nganha kaninyo” (Alma 34:31). Sa laing pagkasulti, kon kita mohalad og sakripisyo ngadto sa Ginoo nga usa ka masulub-on nga kasingkasing ug usa ka mahinulsulon nga espiritu, diha-diha dayon ang mga panalangin sa dakong plano sa kalipay makita diha sa atong mga kinabuhi.

Ang plano sa katubanan posible salamat sa pagsakripisyo ni Jesukristo. Sa Iyang paghulagway Mismo, ang pagsakripisyo “nakapahimo sa akong kaugalingon, gani ang Dios, ang labing halangdon sa tanan sa pagkurog tungod sa kasakit, ug sa pag-agas sa dugo sa matag lungag sa panit, ug sa pag-antus sa lawas ug sa espiritu—ug buot nga Ako unta dili moinom sa mapait nga kopa, ug mobiya” (D&P 19:18).

Ug tungod kini niining sakripisyo, human sa mosunod nga proseso sa sinsero nga paghinulsol, nga mobati kita nga ang kabug-at sa palas-anon sa atong mga kasaypanan ug kasal-anan makuha. Sa pagkatinuod, ang kahasol, kaulaw, kasakit, kaguol, ug ang ubos nga pagtan-aw sa atong kaugalingon mapulihan og tin-aw nga konsensya, kamaya, kalipay ug paglaum.

Sa samang higayon, samtang kita mopasidungog ug mopasalamat sa Iyang sakripisyo, makadawat kita og dako kaayong tinguha nga mahimong mas maayong mga anak sa Dios, aron magpalayo sa sala, ug motuman sa pakigsaad sa paagi nga wala pa mabuhat sukad.

Dayon, sama ni Enos human nadawat ang kapasayloan sa iyang mga sala, mabati nato ang tinguha sa pagsakripisyo sa atong kaugalingon ug magtinguha sa kaayuhan sa atong mga kaigsoonan (tan-awa sa Enos 1:9). Ug mahimo kitang mas andam sa matag “usa nalang ka adlaw” sa pagsunod sa imbitasyon nga gihatag ni Presidente

Howard W. Hunter ngari kanato sa iyang pag-ingon: “Husaya ang panagbangi. Pangitaa ang nakalimtan nga higala. Isalikway ang pagduda ug hulipi kini og pagsalig. . . . Hatag og malumo nga tubag. Awhaga ang kabatan-onan. Ipakita ang inyong kamatinud-anon pinaagi sa pulong ug sa buhat. Tumana ang gisaad. Ayaw paghambin og pagdumot. Pasayloa ang kaaway. Pangayo og pasaylo. Paningkamot nga makasabut. Susiha ang inyong gipangayo sa uban. Hunahunaa una ang laing tawo. Magmabination. Magmalumo. Katawa pa og gamay. Ipahayag ang inyong pasalamat. Timbayaha ang usa ka estranghero. Lipaya ang kasingkasing sa usa ka bata. . . . Isulti ang inyong gugma ug dayon balika kini pagsulti” (*Mga Pagtulun-an sa mga Presidente sa Simbahan: Howard W. Hunter* [2015], 37; gipahiangay gikan sa “What We Think Christmas Is,” *McCall’s*, Dis. 1959, 82–83).

Hinaut atong pun-on ang atong mga adlaw nianang pagbati ug kaligon nga gihatag kanato nianang personal nga sakripisyo ug sa sakripisyo nga atong gihimo o nadawat gikan sa nahatag sa uban ngari kanato. Ug sa espesyal nga paagi, hinaut atong matagamtam ang kalinaw ug pagmaya nga gitanyag ngari kanato sa sakripisyo sa Bugtong Anak; oo, kanang kalinaw nga nahisgutan sa dihang atong gibasa nga si Adan napukan aron ang mga tawo mahimo, ug ang mga tawo naingon—kamo naingon—nga kamo makabaton og hingpit nga kalipay (tan-awa sa 2 Nephi 2:25). Kana nga kalipay mao ang tinuod nga kalipay nga bugtong ang pagsakripisyo lang ug ang Pag-ula sa Manluluwas nga si Jesukristo ang makahatag.

Mao kini akong pag-ampo nga kita mosunod Kaniya, nga kita motuo Kaniya, nga kita mohigugma Kaniya, ug nga kita mobati sa gugma nga gipakita pinaagi sa Iyang pagsakripisyo sa matag higayon nga makaangkon kita og oportunidad nga mabuhi sa usa nalang ka adlaw. Sa ngalan ni Jesukristo, amen. ■



Ni Bonnie L. Oscarson

Bag-ohay lang Gi-release isip Kinatibuk-ang Presidente sa Young Women

Young Women nga anaa sa Buhat

Matag batan-ong babaye sa Simbahan kinahanglan nga mobati og bili, makaangkon og mga oportunidad sa pagserbisyo, ug mobati nga siya adunay mapuslanon nga natampo niining buhat.

Usa ka tuig ang milabay, sa kompetensya sa kinatibuk-ang sesyon sa priesthood, si Bishop Gérald Caussé namulong ngadto sa kalalakian sa Simbahan nga naghulagway kon sa unsang paagi ang mga tighupot sa Aaronic ug Melchizedek Priesthood dili magkabalug diha sa paghimo sa buhat sa kaluwasan.¹ Kana nga mensahe nahimong usa ka dakong panalangin sa pagtabang sa batan-ong mga lalaki kinsa naghupot sa Aaronic Priesthood nga makita ang bahin sa ilang tahas sa pagtukod sa gingharian sa Dios dinhi sa yuta. Ang ilang hiniusang pagserbisyo nagpalig-on sa Simbahan ug nagdala og mas lawom nga pagkakabig ug pasalig diha sa mga kasingkasing sa atong batan-ong mga lalaki samtang ilang nakita ang bili sa ilang kontribusyon ug kon unsa katalagsaon niini nga buhat.

Karon ganahan ko nga idugang ang akong pakigpulong niana nga mensahe samtang mag-istorya ko kon sa unsang paagi ang kababayen-an sa Simbahan kinsa managsamang gikinahanglan usab ug importante sa pagtuman sa buhat sa Ginoo diha sa ilang mga pamilya ug sa Iyang Simbahan.

Sama ni Bishop Caussé, nagpu-yo ko sa usa ka gamayng branch sa Simbahan sa tin-edyer pa ako, ug sa kanunay gihangyo ko sa pagtuman sa akong mga assignment ug mga calling nga unta buhaton sa mga hamtong. Pananglitan, kami nga naa sa programa sa kabatan-onan kanunayng maoy manguna sa pagtabang sa pag-organisar ug paghimo sa among mga kalihokan ug sa espesyal nga mga kahimoan. Magsulat kami og mga drama-drama, naghimo og usa ka



singing group nga molingaw sa mga kalihokan sa branch, ug hingpit nga mga partisipante sa kada miting. Natawag ko nga mahimong lider sa musika sa branch ug mangulo sa pagkanta sa mga miting sa sakrament matag semana. Nindot kadto nga kasinatian para sa usa ka 16 anyos nga mobarug sa atubangan sa tanan diha sa branch kada Domingo ug mangulo kanila sa pag-awit sa mga himno. Akong gibati nga gikinahanglan ug nasayud nga ako adunay ikatampo. Ang mga tawo misalig kanako nga maanaa didto, ug ganahan ko nga mobati nga mapuslanon. Kana nga kasinatian nakatabang nga makaugmad sa akong pagpamatuod ni Jesukristo, ug sama sa nahimo niini alang ni Bishop Caussé, nakahatag kini og pundasyon sa akong kinabuhi sa ebanghelyo sa pagserbisyo.

Ang matag miyembro kinahanglan nga masayud kon unsa sila ka kinahanglanon. Ang matag tawo adunay importanting butang nga ikatampo ug adunay talagsaong mga talento ug abilidad nga makatabang sa pagpadayon niining importante nga buhat. Ang atong batan-ong kalalakin-an adunay katungdanan sa Aaronic Priesthood nga gihulagway sa Doktrina ug mga Pakigsaad nga kanunayng makita. Mahimong dili kaayo kini maklaro sa batan-ong mga babaye sa Simbahan, sa ilang mga ginikanan, ug sa ilang mga lider nga, gikan sa panahon nga sila nabunyagan, ang batan-ong mga babaye adunay pakigsaad nga mga responsibilidad sa “pagbangutan uban niadto nga nagbangutan; oo, ug sa paghupay niadto nga nagkinahanglan sa kahupayan, ug mobarug ingon nga mga saksi sa Dios sa tanan nga mga panahon ug diha sa tanan nga mga butang, ug diha sa tanan nga mga dapit nga [sila] mahimo nga maanaa, bisan hangtud sa kamatayon.”² Ang batan-ong mga babaye adunay oportunidad sa pagtuman niini nga mga responsibilidad sa ilang mga ward ug mga branch ug kon sila nagserbisyo sa kapangulohan sa klase, sa mga konseho sa kabatan-onan, ug sa ubang mga calling. Matag batan-ong babaye sa Simbahan kinahanglan nga mobati og bili, makaangkon og mga

oportunidad sa pagserbisyo, ug mobati nga siya adunay mapuslanon nga natampo niining buhat.

Sa *Handbook 2*, atong mahibaloan nga ang buhat sa kaluwasan sulod sa atong ward naglakip sa “misyonaryong buhat sa mga miyembro, retensyon sa kinabig, pagpaaktibo sa dili kaayo aktibo nga mga miyembro, buhat sa templo ug family history, ug pagtudlo sa ebanghelyo.”³ Kini nga buhat gidumala sa atong matinud-anong mga bishop, kinsa naghupot sa yawe sa priesthood sa ilang ward. Sulod sa daghang katugan karon, ang atong kapangulohan nangutana, “Hain man niining mga dapit nga nahisgutan nga *wala* kinahanglana nga maapil ang atong batan-ong kababayen-an?” Ang tubag mao nga sila adunay butang nga ikatampo sa *tanang* aspeto niini nga buhat.

Pananglitan, bag-ohay lang nakong nahimamat ang pipila ka batan-ong kababayen-an sa Las Vegas area nga gitawag sa pagserbisyo isip mga ward temple ug family history consultant. Puno sila sa kadasig nga makatudlo ug makatabang sa mga miyembro sa ilang ward nga makakaplag sa ilang mga katigulangan. Sila adunay bililhong kahanas sa computer, nakakat-on unsaon sa paggamit sa FamilySearch, ug naghinam-hinam nga mopakigbahin niana nga kahibalo ngadto sa uban. Maklaro nga sila adunay mga pagpamatuod ug salabutan sa kaimportante sa pagpangita sa mga pangalan sa atong patay na nga mga katigulangan aron ang mahinungdanong makaluwas nga mga ordinansa mapahigayon alang kanila sulod sa templo.

Pipila ka bulan ang milabay, aduna koy oportunidad sa pagtesting sa usa ka ideya uban sa duha ka 14 anyos nga batan-ong mga babaye. Nakakuha ko og kopya sa duha ka aktwal nga mga agenda sa ward council ug mihatag ni Emma ug Maggie sa matag kopya. Mihangyo ko nila sa pagbasa sa mga agenda ug tan-awon kon aduna bay mga action item gikan sa mga ward council nga mahimo silang makaserbisyo. Nakita ni Emma nga adunay bag-ong pamilya nga nibalhin sa ward, ug miingon siya nga makatabang siya nila sa pagpamalhin



ug mopahimutang. Nagtuo siya nga mahimo niyang mahigala ang mga anak diha sa pamilya ug ilibut sila sa bag-o nilang eskwelahan. Nakita niya nga dunay umaabut nga panihapon sa ward ug mibati nga dunay daghang lain-laing paagi nga makadalit siya sa iyang mga pagserbisyo.

Nakita ni Maggie nga dihay pipila ka tigulang nga mga tawo sa ward kinsa nagkinahanglan og mga pagbisita ug sa pag-fellowship. Miingon siya nga ganahan siya nga mobisita ug makatabang ngadto niining talagsaong tigulang nga mga miyembro. Gibati usab niya nga siya makatabang sa pagtudlo sa mga miyembro sa ward kon unsaon sa paghimo ug paggamit sa mga social media account. Sa tinuoray walay usa ka butang diha sa mga agenda nga kadtong duha ka batan-ong mga babaye *dili* makatabang!

Kadto bang anaa sa ward council, o naghupot sa bisan unsang calling sa ward, nagtan-aw sa batan-ong mga babaye isip bililhong kapanguhaan sa pagtubag sa daghang panginahanglan sa atong mga ward? Kasagaran adunay taas nga listahan sa mga sitwasyon nga nagkinahanglan og tawo nga makaserbisyo, ug kanunay lang kitang maghuhuhuna sa mga hamtong sa ward nga maoy motubag niadtong mga panginahanglan. Sama nga ang atong mga tighupot sa Aaronic Priesthood gidapit sa paghago uban sa ilang mga amahan ug sa ubang kalalakin-an sa Melchizedek Priesthood, ang atong batan-ong



mga babaye mahimong tawagon aron makaserbisyo ug makaalagad sa mga panginahanglan sa mga miyembro sa ward kauban sa ilang mga inahan o sa ubang maayong mga sister. Angayan sila, matinguhaon, ug andam sa paghimo og mas daghan pa kay sa magsimba lang sa Dominggo!

Samtang magkonsiderar kita sa mga katungdanan nga atong gilauman nga huptan sa atong batan-ong mga babaye sa umaabot nga adlaw, tingali makapanutana kita sa atong kaugalingon kon unsang matang sa kasinatian ang atong ikahatag nila karon nga makatabang sa ilang pagpangandam nga mahimong mga misyonaryo, mga eskolar sa ebanghelyo, mga lider sa mga auxiliary sa Simbahan, mga worker sa templo, mga asawa, mga inahan, mga tigtudlo, mga ehemplo, ug mga higala. Makasugod gayud sila karon sa pagpuno sa daghan nga mga tahas. Ang kabatan-onan kanunayng gihangyo sa pagtabang sa pagtudlo og mga leksyon sa Dominggo sa ilang mga klase. Anaa na karon ang mga oportunidad sa atong batan-ong mga babaye sa pagserbisyo sa templo nga nakompleto na sa mga ordinance worker o mga boluntaryo kon sila motabong sa templo uban sa ilang grupo sa kabatan-onan sa pagpahigayon og bunyag alang sa mga patay. Ang atong mga batang babaye sa Primary karon gidapit na sa pagtabong sa mga miting sa Temple ug Priesthood Preparation, diin makatabang nila nga makasabut nga importante usab sila nga mga partisipante sa buhat nga gisugo sa

priesthood. Makat-on sila nga ang mga lalaki, mga babaye, kabatan-onan ug mga bata mao ang tanan nga mga tigdatwat sa mga panalangin sa priesthood ug ang tanan makakuha og aktibong bahin sa pag-abante sa buhat sa Ginoo.

Mga bishop, nasayud kami nga ang inyong mga katungdanan kasagaran bug-at, apan sama sa usa sa inyong pinakaprayoridad mao ang pagdumala sa korum sa Aaronic Priesthood, gipasabut sa *Handbook 2* nga “ang bishop ug ang iyang mga magtatambag mosangkap og priesthood nga pagpangulo alang sa organisasyon sa Young Women. Sila mobantay ug molig-on sa indibidwal nga batan-ong mga babaye, makigtambayayong sa mga ginikanan ug mga lider sa Young Women niini nga paningkamot.” Nag-ingon usab kini nga, “ang bishop ug ang iyang mga magtatambag regular nga moapil sa mga miting sa Young Women, sa pagserbisyo, ug sa mga kalihokan.”⁴ Mapasalamaton kami sa mga bishop nga mogahin og panahon sa pagbisita sa klase sa Young Women ug kinsa naghatag og oportunidad sa batan-ong mga babaye sa ilang ward nga mas labaw pa kay sa mga tumatan-aw sa buhat. Salamat sa pagsiguro nga ang inyong batan-ong mga babaye adunay bili nga mga partisipante sa pagtubag sa panginahanglan sa mga miyembro sa ward! Kini nga mga oportunidad sa pagserbisyo sa makahuluganong paagi mopanalangin nila og labaw pa kay sa mga kalihokan nga nagpalingaw lang kanila.

Kaninyo, batan-ong mga babaye sa Simbahan, ang inyong mga tuig sa pagka tin-edyer mahimong busy ug kasagaran lisud. Nakamatikod kami nga mas daghan kaninyo ang nanglimbasug sa problema sa bili sa kaugalingon, kabalaka, grabe nga kaluya, ug tingali bisan sa depresyon. Ang paghunahuna og una sa uban, imbis mabalaka sa inyong kaugalingong mga problema, mahimong dili makasulbad sa tanan niining mga isyu, apan ang pagserbisyo kasagaran mopagaan sa inyong palasanon ug mohimo sa inyong mga hagit nga ingon og dili kaayo lisud. Usa sa pinakamaayong paagi sa pagpalambo sa mga pagbati sa bili sa kaugalingon

mao ang pagpakita, pinaagi sa atong pagpakabana og pagserbisyo sa uban, nga kita adunay dakong bili nga ikatampo.⁵ Awhagon ko kamo batan-ong nga babaye sa pagboluntaryo og patrabahoa kanang mga kamot kon makakita kamo og mga panginahanglan sa inyong palibut. Sa inyong pagtuman sa mga responsibilidad sa pakigsaad og pag-apil sa pagtukod sa gingharian sa Dios, ang mga panalangin moabut sa inyong kinabuhi og inyong madiskobrehan ang lawom og malungtarong kalipay sa pagkadisipulo.

Mga kaisogon, ang atong batan-ong mga babaye mga talagsaon. Sila adunay mga talento, walay kinutuban nga mga kahinam og kusog, ug sila manggiloy-on og mapinanggaon. Sila *gustong* moserbisyo. Nagkinahanglan silang masayud nga bililhon sila og mahinungdanon sa buhat sa kaluwasan. Sama nga ang batan-ong mga lalaki giandam diha sa Aaronic Priesthood alang sa mas mahinungdanong pagserbisyo kon sila ma-advance na sa Melchizedek Priesthood, ang atong batan-ong mga babaye nag-andam nga mahimong mga sakop sa pinakadakong organisasyon sa mga babaye dinhi sa yuta—ang Relief Society. Kining mga matahum, lig-on, matinudanon nga batan-ong mga babaye og batan-ong mga lalaki nangandam nga mahimong mga asawa og mga bana, og mga inahan og mga amahan kinsa mopasanay og mga pamilya nga takus sa celestial nga gingharian sa Dios.

Ako mopamatuod nga ang buhat sa atong Langitnong Amahan mao ang pagpahinabo sa imortalidad og kinabuhing dayon sa Iyang mga anak.⁶ Ang atong bililhong batan-ong mga babaye adunay importanting papel sa pagtabang sa pagtuman niining mahinungdanong buhat. Sa ngalan ni Jesukristo, amen. ■

MUBO NGA MGA SULAT

1. Tan-awa sa Gérald Caussé, “Andama ang Agianan,” *Liahona*, Mayo 2017, 75–78.
2. Mosiah 18:9.
3. *Handbook 2: Administering the Church* (2010), pahina 22.
4. *Handbook 2*, 10.3.1.
5. Tan-awa sa Mateo 10:39.
6. Tan-awa sa Moises 1:39.



Ni Elder Taniela B. Wakolo
Sa Seventy

Ang Makaluwas nga mga Ordinansa Magdala Kanato og Talagsaong Kahayag

Ang pag-apil sa mga ordinansa ug pagtahud sa kaubang mga pakigsaad magdala kaninyo og talagsaong kahayag ug proteksyon niining padayong nagkangitngit nga kalibutan.

Mga kaigsoonan, nagmaya ako uban ninyo sa ebanghelyo, o sa doktrina ni Kristo.

Usa ka higala kausa nangutana ni Elder Neil L. Andersen, nga nianang higayuna sakop pa sa Seventy, kon unsay bation nga mamulong atubangan sa 21,000 ka mga tawo sa Conference Center. Mitubag si Elder Andersen, “Dili ang 21,000 ka mga tawo ang maka-nerbyus nimo; kondili ang 15 ka Kaigsoonan sa imong luyo.” Nahimuot ko nianang higayuna, apan gibati ko kini karon. Ako gayung gimahal ug gipaluyohan kining 15 ka tawo isip mga propeta, manalagna, ug tigpadayag.

Miingon ang Ginoo kang Abraham nga pinaagi sa iyang binhi ug sa priesthood, ang tanang pamilya sa yuta mapanalanginan “uban sa mga panalangin sa Ebanghelyo, . . . gani sa kinabuhi nga dayon” (Abraham 2:11; tan-awa usab sa mga bersikulo 2–10).

Kining gisaad nga mga panalangin sa ebanghelyo ug sa priesthood gibalik na sa yuta, ug dayon, niadtong 1842, gipangalagad ni Propeta Joseph Smith ang endowment ngadto sa limitado rang mga lalaki ug babaye. Si Mercy

Fielding Thompson usa kanila. Ang Propeta miingon ngadto kaniya, “Kini [ang endowment] maoy modala kani-mo pagawas sa kangitngit ngadto sa talagsaon nga kahayag.”¹

Karon gusto kong mag-focus sa makaluwas nga mga ordinansa, nga maoy magdala og talagsaong kahayag nganha kaninyo ug kanako.

Mga Ordinansa ug mga Pakigsaad

Diha sa *Matinud-anon sa Tinuhoan* atong mabasa: “Ang ordinansa sagrado, pormal nga buhat nga gipahigayon pinaagi sa katungod sa priesthood. [Ang] mga ordinansa [nga] gikinahanglan sa atong kahimayaan . . . gitawag og makaluwas nga mga ordinansa. Naglakip kini sa bunyag, pagkumpirma, ordinasyon ngadto sa Melchizedek Priesthood (alang sa kalalakin-an), endowment sa templo, ug sealing sa kaminyoon.”²

Mitudlo si Elder David A. Bednar nga, “Ang mga ordinansa sa kaluwasan ug kahimayaan nga gipangalagad sa gipahiuli nga Simbahan sa Ginoo . . . naglangkob sa awtorisadong mga paagi diin ang mga panalangin ug gahum sa langit modagayday sa tinagsa natong kinabuhi.”³

Sama sa dunay atubangan ug likod nga sinsilyo, ang tanang makaluwas nga ordinansa giubanan og mga pakigsaad sa Dios. Gisaaran kita sa Dios og mga panalangin kon matinud-anon kitang motahud niana nga mga pakigsaad.



Si propeta Amulek mipahayag, “Kini . . . ang panahon . . . sa pagpangandam sa pagsugat sa Dios” (Alma 34:32). Unsaon nato sa pag-andam? Pinaagi sa takus nga pagdawat sa mga ordinansa. Kita kinahanglan usab, sigun sa gisulti ni Presidente Russell M. Nelson, “pabilin diha sa dalan sa pakigsaad.” Mipadayon si Presidente Nelson, “Ang inyong pasalig nga mosunod sa Manluluwas pinaagi sa paghimo og mga pakigsaad uban Kaniya ug dayon sa pagtuman niadto nga mga pakigsaad moabli sa pultahan ngadto sa tanang espirituhanong mga panalangin ug pribilehiyo nga mahimong maanaa sa mga lalaki, babaye, ug mga bata bisan asa.”⁴

Si John ug Bonnie Newman, sama sa daghan kaninyo, nakadawat sa espirituhanong mga panalangin nga gisaad ni Presidente Nelson. Usa ka Dominggo, human sa pagsimba kauban sa iyang tulo ka gagmayng anak, gisultihan ni Bonnie si John, kinsa dili miyembro sa Simbahan, “Dili ko makahimo niini nga ako ra. Kinahanglang modesisyon ka nga mokuyog og simba namo o magpili ka og simbahan diin magkakuyog kita og simba, apan kinahanglan nga ang mga bata mahibalo nga ang ilang papa nahigugma usab sa Dios.” Sa pagkasunod Dominggo ug sa tanang misunod nga Dominggo, wala lang misimba si John; nagserbisyo usab siya nga mag-piano alang sa daghang ward, branch, ug sa mga Primary sulod sa katuigan. May pribilehiyo ko nga mahimamat si John niadtong Abril 2015, ug niana nga paghimamat, among nahisgutan nga ang pinakamaayong paagi nga ikapakita niya ang iyang gugma kang Bonnie mao ang pagdala niya sa templo, apan dili kana mahitabo gawas kon mabunyagan siya.

Human nagsimba og 39 ka tuig sa Ang Simbahan ni Jesukristo sa mga Santos sa Ulahing mga Adlaw, nabunyagan si John niadtong 2015. Paglabay sa usa ka tuig, si John ug Bonnie na-sealed sa Memphis Tennessee Temple, 20 ka tuig human nakadawat si Bonnie sa kaugalingon niyang endowment. Ang 47-anyos niyang anak, si Robert, miingon, “Si papa sa tinuod, sanag kaayong tan-awon

sukad nadawat niya ang priesthood.” Midugang si Bonnie, “Kanunay nga malipayon ug sadya nga tawo si John, apan ang pagkadawat sa mga ordinansa ug pagtahud sa iyang mga pakigsaad mipalambo sa iyang kabuotan.”

Ang Pag-ula ni Kristo ug Iyang Ehempla

Daghang tuig nang milabay, si Presidente Boyd K. Packer mipasidaan, “Ang maayong pamatasan kon wala ang mga ordinansa sa ebanghelyo dili gayud makatubos o makahimaya sa tawo.”⁵ Gani, dili lang mga ordinansa ug pakigsaad ang atong gikinahanglan aron makabalik kita sa atong Amahan, apan nagkinahanglan usab kita sa Iyang Anak, nga si Jesukristo, ug sa Iyang Pag-ula.

Mitudlo si Haring Benjamin nga pinaagi lamang sa ngalan ni Kristo moabut ang kaluwasan ngadto sa mga anak sa tawo (tan-awa sa Mosiah 3:17; tan-awa usab sa Mga Artikulo sa Hugot nga Pagtuo 1:3).

Pinaagi sa Iyang Pag-ula, gitubos kita ni Jesukristo gikan sa sangputanan sa Pagkapukan ni Adan ug mihimong posible sa atong paghinulsol ug sa moabut nga kahimayaan. Pinaagi sa Iyang kinabuhi, mipakita Siya kanato og ehempla aron madawat nato ang makaluwas nga mga ordinansa, diin “ang gahum sa pagka-diosnon gipakita” (D&P 84:20).

Human nadawat sa Manluluwas ang ordinansa sa bunyag sa “pagtuman sa tanan nga pagkamatarung” (tan-awa sa 2 Nephi 31:5–6), gitintal Siya ni Satanas. Sa samang paagi, ang atong

mga tintasyon wala pa matapos human sa bunyag o sa pag-seal, apan ang pagdawat sa sagradong mga ordinansa ug pagtahud sa kaubang mga pakigsaad mopuno kanato og talagsaong kahayag ug maghatag kanato og kalig-on sa pagbatok ug pagbuntog sa mga tintasyon.

Pasidaan

Nanagna si Isaias nga sa katapusang mga adlaw, “ang yuta usab nahugawan . . . tungod kay . . . gipasipalahan ang kabalaoran” (Isaias 24:5; tan-awa usab sa D&P 1:15).

Ang susamang pasidaan, nga gipadayag kang Propeta Joseph Smith, mao nga ang pipila “nagpaduol [sa Ginoo] uban sa ilang mga ngabil, . . . sila nagtudlo og mga doktrina nga mga sugo sa mga tawo, nga may hulagway sa pagkadiosnon, apan sila nanghimakak sa gahum niana” (Joseph Smith—Kasaysayan 1:19).

Mipasidaan usab si Pablo nga daghan ang “nagabaton sa dagway sa tinuohan apan nagapanghimakak sa gahum niini: likayi kining maong mga tawhana” (2 Timoteo 3:5). Akong subli-on, likayi kining mga tawhana.

Ang daghang babag ug mga tintasyon sa kinabuhi mao ang “lobo nga manunukob” (Mateo 7:15). Ang tinuod nga magbalantay maoy mag-andam, mopanalipud, ug mopasidaan sa karnero ug sa panon kon magsingabut na kining mga lobo (tan-awa sa Juan 10:11–12). Isip tig-abag nga mga magbalantay nga nagtinguha sa pagsundog sa hingpit nga kinabuhi sa Maayong Magbalantay, dili ba mga magbalantay





kita sa kaugalingon natong kalag ug ngadto sa uban? Pinaagi sa tambag sa mga propeta, mga manalagna, ug mga tigpadayag nga bag-o lang natong gipaluyohan, ug sa gahum ug gasa sa Espiritu Santo, makita nato ang nagsingabut nga mga lobo kon magbantay ug andam kita. Sa pagkumpara, kon mga magbalantay kita nga kulang sa pagpakabana sa kaugalingon natong kalag ug sa kalag sa uban, lagmit nga dunay dautang mahitabo. Ang kaku- lang sa pagpakabana mosangput sa kadaot. Modapit ko nga kitang tanan magmatinud-anon nga magbalantay.

Kasinatian ug Pagpamatuod

Ang sakrament usa ka ordinansa nga magtabang aron magpabilin kita sa dalan, ug ang takus nga pag-ambit maoy ebidensya nga nagtuman kita sa mga pakigsaad sa tanang ordinansa. Pipila ka tuig ang milabay, samtang ang akong asawa, si Anita, ug ako nagserbisyo sa Arkansas Little Rock Mission, miuban ko sa duha ka batan-ong misionaryo sa ilang pagtudlo. Atol sa lek- syon, ang buotang igsoon nga among gitudloan miingon, “Nakaadto na ko sa inyong simbahan; nganong mokaon pa man mo og pan ug moinom og tubig

kada Dominggo? Sa among simbahan, kaduha ra namo kini buhaton kada tuig, atol sa Pasko sa Pagkabanhaw ug sa Pasko sa Pagkatawo, ug makahulu- ganon kaayo kini.”

Among gipaambit kaniya nga kita gisugo nga “[mag]tigom kanunay sa pag-ambit sa pan ug tubig” (Moro- ni 6:6; tan-awa usab sa D&P 20:75). Gibasa namo og kusog ang Mateo 26 ug ang 3 Nephi 18. Mitubag siya nga wala gihapon niya makita ang panginahanglan.

Dayon gihisgutan namo ang mosu- nod nga pagkumpara: “Hunahunaa nga naapil ka sa grabing aksidente sa sakyanan. Naangol ka og nakuyapan. Dunay miduol dayon, kay nakakita nga nakuyapan ka, ug mitawag sa emer- gency number, 911. Gitabangan ka ug naulian sa panimuot.”

Nangutana mi niini nga brother, “Dihang nakita na nimo ang imong palibut, unsa kaha ang imong ipangutana?”

Miingon siya, “Gusto kong masayud giunsa nako pag-abut didto ug kinsay nakakita nako. Pasalamatan nako siya matag adlaw tungod kay iyang giluwag ang akong kinabuhi.”

Gipaambit namo niining buotan nga

brother kon giunsa pagluwas sa Manluluwas ang atong kinabuhi ug ang atong panginahanglan sa pagpa- salamat Kaniya matag adlaw, matag adlaw, matag adlaw!

Dayon nangutana kami, “Kay nahi- balo nga Siya mihatag sa Iyang kina- buhi alang kanimo ug kanako, unsa ka kanunay ikaw gustong mokaon ug moinom sa tubig isip mga simbolo sa Iyang lawas ug dugo?”

Miingon siya, “Nakasabut na ko, nakasabut na ko. Apan usa pa ka butang. Dili kaayo sadya ang inyong simbahan sama sa amoa.”

Kadto among gitubag, “Unsa kahay imong buhaton kon ang Manluluwas nga si Jesukristo mosulod niana nga pultahan?”

Miingon siya, “Diha dayon, moluhod ko.”

Nangutana mi, “Dili ba mao kanay imong bation inig sulod nimo sa mga chapel sa mga Santos sa Ula- hing mga Adlaw—pagtahud alang sa Manluluwas?”

Miingon siya, “Nakasabut na ko, nakasabut na ko, nakasabut na ko!”

Mipakita siya sa simbahan nianang Dominggo sa Pagkabanhaw ug pada- yong mibalik-balik.

Akong gidapit ang matag usa kanato sa pagpangutana sa kaugalingon, “Unsa nga mga ordinansa, lakip sa sakrament, ang angay nakong madawat, ug unsa nga mga pakigsaad ang angay nakong himoon, tumanon, ug tauron?” Mosa- ad ko nga ang pag-apil sa mga ordi- nansa ug pagtahud sa kaubang mga pakigsaad magdala kaninyo og talag- saong kahayag ug proteksyon niining padayong nagkangitngit nga kalibutan. Sa pangalan ni Jesukristo, amen. ■

MUBO NGA MGA SULAT

1. *Mga Pagtulun-an sa mga Presidente sa Simbahan: Joseph Smith* (2007), 502.
2. *Matinud-anon sa Timuhoan: Usa ka Pakisayran sa Ebanghelyo* (2004), 116; tan-awa usab sa *Handbook 2: Administering the Church* (2010), 2.1.2.
3. David A. Bednar, “Kanunay nga Magbaton og Kapasayloan sa Inyong mga Sala,” *Liahona*, Mayo 2016, 60.
4. Russell M. Nelson, “Samtang Dungan Kita nga Magpadayon sa Unahan,” *Liahona*, Abr. 2018, 7.
5. Boyd K. Packer, “The Only True Church,” *Ensign*, Nob. 1985, 82.



Ni Devin G. Durrant
Unang Magtatambag sa Kinatibuk-ang
Kapangulohan sa Sunday School

Pagtudlo diha sa Panimalay—usa ka Makalipay ug Sagrado nga Responsibilidad

Nangamuyo ko og tabang sa langit samtang maningkamot kita nga mahimong Kristohanon nga mga magtutudlo sa atong mga panimalay.

Ang akong minahal nga asawa, si Julie, ug ako mipadako og unom ka bililhong mga anak, ug bag-ohay lang nga kami na lang duha ang nahabilin sa balay. Gimingaw kaayo ko sa among mga anak nga anaa kanunay sa among balay. Gimingaw ko nga makat-on gikan kanila ug motudlo kanila.

Karon akong itumong ang akong pakigpulong ngadto sa tanang ginikanan ug sa tanan nga nagtinguha nga mahimong mga ginikanan. Daghan ninyo ang nagpadako na karon og mga anak. Alang sa uban, kana nga panahon tingali hapit na moabut. Ug alang sa uban pa, ang pagkaginikanan tingali umaabut nga panalangin. Nag-ampo ko nga makaamgo kitang tanan nga usa ka makalipay ug sagrado nga responsibilidad ang pagtudlo og anak.¹

Isip mga ginikanan, atong ipaila sa atong mga anak ang Langitnong

Amahan ug ang Iyang Anak, si Jesu-kristo. Tabangan nato ang atong mga anak sa pagsulti sa ilang unang pag-ampo. Motanyag kita og giya ug suporta samtang mosulod sila sa dalan

sa pakigsaad² pinaagi sa bunyag. Motudlo kita kanila sa pagsunod sa mga sugo sa Dios. Mo-edukar kita kanila mahitungod sa Iyang plano alang sa Iyang mga anak, ug motabang kita kanila sa pag-ila sa mga paghunghong sa Espiritu Santo. Mosaysay kita kanila sa mga istorya sa karaang mga propeta ug moawhag kanila sa pagsunod sa buhing mga propeta. Mag-ampo kita alang sa ilang mga kalampusan ug mag-antus uban kanila panahon sa ilang mga pagsulay. Mopamatuod kita sa atong mga anak sa mga panalangin sa templo, ug maningkamot sa pag-andam kanila sa pagserbisyo og full-time nga mga misyon. Motanyag kita og mahigugmaong tambag samtang ang atong mga anak mahimo mismo nga mga ginikanan. Apan—bisan pa niana—dili gayud kita mohunong isip ilang mga ginikanan. Dili gayud kita mohunong isip ilang mga magtutudlo. Dili gayud kita makalingkawas niining mahangturon nga mga calling.

Karon atong hunahunaon ang pipila sa talagsaon natong mga oportunidad sa pagtudlo sa atong mga anak diha sa atong mga panimalay.

Pagtudlo diha sa Family Home Evening

Atong sugdan sa family home evening, nga maoy taas kaayo og prayoridad diha sa puno sa pagtuo nga panimalay nga akong gidak-an. Dili ko makahinumdom og piho nga mga leksyon nga gitudlo sa family home



evening, apan nahinumdom ko nga wala gayud kami makapalta og usa ka semana.³ Nasayud ko kon unsay importante ngadto sa akong mga ginikanan.⁴

Nakahinumdom ko sa usa sa akong paborito nga mga kalihokan sa family home evening. Modapit si Papa og usa sa iyang mga anak nga mokuha sa “Ang Pagsulay.” Mohatag siya sa bata og nagsunod-sunod nga mga instruksyon sama sa, “Una, adto sa kusina ug ablihi ug isirado ang ref. Dayon dagan ngadto sa akong kwarto ug pagkuha og usa ka parisian nga medyas gikan sa akong kabinet. Dayon balik ngari nako, lukso og katulo, ug dayon sulti, ‘Papa, nahimo nako!’”

Ganahan ko kon ako nang turno. Gusto nakong mabuhat nga saktogayud ang matag lakang, ug gihambin nako ang higayon nga makasulti ko og, “Papa, nahimo nako!” Nakatabang kini nga kalihokan sa pag-ugmad sa akong pagsalig ug nakapasayon sa dili mahimutang nga bata sa paghatag og pagtagad kon si Mama o Papa motudlo og baruganan sa ebanghelyo.

Si Presidente Gordon B. Hinckley mitambag: “Kon kamo adunay pagduda mahitungod sa hiyas sa family home evening, sulayi kini. Pundoka ang inyong mga anak libut kaninyo, tudloi sila, pagpamatuod ngadto kanila, pagbasa og dungan sa mga kasulatan ug pag-uban og kalingaw.”⁵

Kanunay nga adunay oposisyon sa pagpahigayon og family home evening.⁶ Bisan pa, dapiton ko kamo sa pagpangita og paagi nga malikayan ang mga babag ug himoa nga usa ka prayoridad ang family home evening—ug siguroa nga makalingaw kini nga kasinatian.

Pagtudlo diha sa Pag-ampo sa Pamilya

Ang pag-ampo sa pamilya usa ka laing maayo nga oportunidad sa pagtudlo.

Ganahan ko kon giunsa pagtudlo si Presidente N. Eldon Tanner sa iyang amahan atol sa pag-ampo sa pamilya. Si Presidente Tanner miingon niini:

“Nakahinumdom ko usa ka gabii sa dihang nangluhod mi sa pag-ampo isip pamilya, misulti ang akong amahan sa



Ginoo, “Si Eldon dunay gibuhat karon nga dili unta niya angayng buhaton; nagmagul-anon siya, ug kon imo siyang pasayloon, dili na siya mousab sa pagbuhat niini.’

“Nakapadeterminado kana kanako nga dili na mobuhat niini—mas labaw pa kay sa mahimo sa pagbunal.”⁷

Isip batang lalaki, usahay masuko ko sa daw nanubra nga mga pag-ampo sa pamilya, naghunahuna sa akong kaugalingon, “Dili ba bag-o lang ta nga nag-ampo pipila ka minuto ang milabay?” Karon, isip usa ka ginikanan, nasayud ko nga dili gayud mahimong manobra ang atong pag-ampo isip usa ka pamilya.⁸

Kanunay akong nakadayeg kon giunsa pagpaila sa Langitnong Amahan si Jesukristo isip Iyang Hinigugmang Anak.⁹ Ganahan kong mag-ampo alang sa akong mga anak nga isulti ang ilang ngalan samtang maminaw sila nako nga ipahayag ngadto sa Langitnong Amahan kon unsa sila nako kamahal. Daw walay mas maayo pang panahon sa pagpahayag og gugma sa atong mga anak kay sa diha sa pag-ampo uban nila o pagpanalangin kanila. Kon ang pamilya magpundok diha sa mapainubsanong pag-ampo, ang gamhanan ug mahang-turong mga leksyon matudlo.

Pagtudlo kon Gikinahanglan

Ang pagtudlo sa usa ka ginikanan susama sa usa ka doktor nga on-call

[tawagon kon gikinahanglan]. Kinahanglang andam kita kanunay sa pagtudlo sa atong mga anak tungod kay wala kita masayud kon kanus-a moabut ang oportunidad.

Sama kita sa Manluluwas, kansang pagpanudlo kasagaran “wala mahitabo sa usa ka sinagoga apan diha sa dili pormal, inadlaw nga mga sitwasyon—samtang nagkaon uban sa Iyang mga disipulo, nagkuha og tubig sa atabay, o naglakaw agi sa usa ka kahoy nga igira.”¹⁰

Mga tuig na ang milabay, ang akong inahan mipaambit nga ang iyang duha sa labing maayong pakig-istorya kabahin sa ebanghelyo uban sa akong magulang, si Matt, mao ang kausa samtang namilo siya sa mga linabhan ug sa laing higayon samtang nagdrayb kaniya padulong sa dentista. Usa sa daghang mga butang nga nakadayeg ko sa akong inahan mao ang iyang kaandam sa pagtudlo sa iyang mga anak.

Ang iyang pagtudlo isip ginikanan wala gayud matapos. Samtang nagserbisyo ko isip bishop, ang akong mama, 78 anyos na niadto, miingon nako nga kinahanglan kong magpatupi. Nasayud siya nga kinahanglan ko nga mahimong ehemplo, ug wala siya magpanuko sa pagsulti kanako niini. Gimahal ko ikaw, Mama!

Isip usa ka amahan, nadasig ko sa personal nga pagtuon ug pagpamalandong sa mga kasulatan aron

makatubag kon ang akong mga anak o apo mopresentar og oportunidad sa gikinahanglan nga pagtudlo.¹¹ “Ang pipila sa labing maayo nga mga higayon sa pagtudlo magsugod sa usa ka pangutana o kabalaka diha sa kasingkasing sa usa ka sakop sa [pamilya].”¹² Naminaw ba kita niadto nga mga higayon?¹³

Ganahan ko sa pagdapit ni Apostol Pedro: “Kinahanglan nga andam kamo kanunay sa pagtubag kang bisan kinsa nga mangutana sa hinungdan sa paglaum nga anaa kaninyo.”¹⁴

Sa dihang tin-edyer pa ko, ang akong papa ug ako nalingaw sa paghagit sa usag usa kon si kinsa ang pinakakusog mokupot. Pisliton namo ang kamot sa usag usa sa pinakakusog namong mahimo sa paningkamot nga moping-it ang usa sa kasakit. Daw dili na kaayo ni makalingaw karon, apan lingaw kaayo kini niadtong panahona. Human sa usa sa ingon nga panagsangka, mitan-aw si Papa sa akong mga mata ug miingon, “aduna kay kusgan nga mga kamot, anak. Manghinaut ko nga kanunayng lig-on ang imong mga kamot nga dili mohikap og batan-ong babaye sa dili angay nga paagi.” Gidapit dayon niya ako nga magpabiling limpyo sa moral nga paagi ug sa pagtabang sa uban nga mobuhat sa ingon.

Si Elder Douglas L. Callister mipaambit niini mahitungod sa iyang amahan: “Samtang nagbiyahe padulong sa balay gikan sa trabaho usa ka adlaw si Papa kalit lang nga misulti, ‘Mibayad ko sa akong ikapulo karon. Misulat ko og “salamat” diha sa tseke alang sa ikapulo. Mapasalamaton kaayo ko sa Ginoo tungod sa pagpanalangin sa atong pamilya.’”

Si Elder Callister dayon mihatag niini nga pasidungog sa iyang amahan-magtutudlo: “Pareho niyang gitudlo ang mga buhat ug mga kinaiya sa pagkamasulundon.”¹⁵

Maalamon para nako nga pangutanon ang atong kaugalingon og panagsa, “Unsay akong itudlo, o unsay akong gitudlo, sa akong mga anak pinaagi sa akong mga buhat ug mga kinaiya sa pagkamasulundon?”

Pagtudlo diha sa Pagtuon sa Pamilya sa Kasulatan

Ang pagtuon sa pamilya sa kasulatan usa ka nindot nga dapit alang sa pagtudlo sa doktrina diha sa panimalay.

Si Presidente Russell M. Nelson miingon, “Dili lamang nga ang mga ginikanan mokupot diha sa pulong sa Ginoo, apan aduna silay balaang sugo sa pagtudlo niini ngadto sa ilang mga anak.”¹⁶

Samtang si Julie ug ako nagpadako sa among mga anak, naningkamot mi nga magmakanunayon ug mamugnaon. Usa ka tuig, nakahukom mi nga ang tibuk pamilya mobasa sa Kinatsila nga Basahon ni Mormon. Mao ba kana nganong gitawag sa Ginoo ang matag usa sa among mga anak kinsa miserbisyo og full-time nga misyon ngadto sa misyon nga Kinatsila ang pinulongan? *Es posible [Posible kini].*

Natandog ko pag-ayo sa dihang si Brother Brian K. Ashton mipaambit nako nga siya ug ang iyang amahan dungan nga mibasa sa matag pahina sa Basahon ni Mormon panahon sa iyang senior nga tuig sa high school. Gimahal ni Brother Ashton ang mga kasulatan. Nahisulat kini sa iyang hunahuna ug sa iyang kasingkasing. Gitanom sa iyang amahan kana nga liso sa dihang si Brother Ashton tin-edyer pa, ug kana nga liso¹⁷ mitubo ngadto sa usa ka lawom nga pagkagamot nga kahoy sa kamatuoran. Gibuhat usab kini ni Brother Ashton sa iyang mas dagko nga mga anak.¹⁸ Ang iyang otso anyos nga anak nga lalaki bag-o lang nangutana niya, “Papa, kanus-a man ko makabasa sa Basahon ni Mormon uban nimo?”

Pagtudlo pinaagi sa Ehemplo

Sa katapusan, ang atong labing impluwensyal nga pagtudlo isip ginikanan mao ang atong ehemplo. Gitambagan kita nga “alang sa mga magtotoo, pagkinabuhi ingon nga panig-ingnan, sa sinultihan, ug sa paggawi, sa gugma, sa pagtuo, sa kaputli.”¹⁹

Panahon sa bag-o nga pagbiyahe, si Julie ug ako mitambong sa simbahan ug nakita kini nga bersikulo nga gigamit. Usa ka batan-ong lalaki, hapit na

mobiya alang sa iyang misyon, namulong sa miting sa sakrament.

Miingon siya, “Kamong tanan naghunahuna nga ang akong papa maayo nga tawo sa simbahan, apan . . .” Mihunong siya kadiyot, ug matinguhaon akong naghunahuna kon unsay sunod niyang isulti. Mipadayon siya ug miingon, “Mas maayo siya nga tawo sa panimalay.”

Nagpasalamat ko niining batan-ong lalaki pagkahuman alang sa makadasig nga pasidungog nga iyang gihatag sa iyang amahan. Dayon akong nasayran nga ang iyang amahan mao ang bishop sa ward. Bisin tuod kini nga bishop matinud-anong nag-alagad sa iyang ward, ang iyang anak mibati nga ang iyang labing maayong buhat gihimo diha sa panimalay.²⁰

Mitambag si Elder D. Todd Christofferson: “Daghan kita og mga oportunidad sa pagtudlo sa . . . nagtubo nga henerasyon, ug kinahanglang ipahinungod nato ang atong labing maayong panghunahuna ug paningkamot nga hingpit kining mapahimuslan. Labaw sa tanan, kinahanglang padayon kitang moawhag ug motabang sa mga ginikanan nga mahimong mas maayo ug mas makanunayon nga mga magtutudlo . . . ilabi na pinaagi sa ehemplo.”²¹

Sa ingon niana nagtudlo ang Manluluwas.²²

Sa miaging tuig, samtang nagbakasyon uban sa among duha ka kinamanghurang mga anak, misugyot si Julie nga maghimo mi og proxy nga mga bunyag diha sa mga templo sa St. George ug San Diego. Nagbagutbut ko—sa akong kaugalingon—naghunahuna, “Magtambungan mi og templo sa amoa, ug karon nagbakasyon mi. Nganong dili man magbuhat og pangbakasyon nga kalihokan?” Human sa mga bunyag, gusto ni Julie nga mokuha og mga litrato gawas sa templo. Hilum kong nagbagutbut—pagusab. Makatag-an mo unsay nahitabo sunod:nanguha mi og mga litrato.

Gusto ni Julie nga adunay handumanan ang among mga anak kon giunsa namo pagtabang ang among mga katigulangan, ug ako usab. Wala kami magkinahanglan og pormal

nga leksyon sa kaimportante sa mga templo. Nagsunod kami niini—salamat sa usa ka inahan kinsa nahigugma sa templo ug gusto sa iyang mga anak nga moambit niana nga gugma.

Samtang ang mga ginikanan mopangga sa usag usa ug mohalad og matarung nga mga ehemplo, ang mga anak mapanalanginan sa kahangturan.

Panapos

Alang ninyong tanan nga naning-kamot sa paghimo sa pinakamaayo aron sa pagtudlo diha sa inyong mga panimalay, hinaut makakaplag kamo og kalinaw ug kalipay sa inyong mga paningkamot. Ug kon gibati ninyo nga kinahanglan pa ninyong molambo o nagkinahanglan og mas dakong pagpa-ngandam, palihug pagmapainubsanong motubag samtang ang Espiritu modasig kaninyo ug ipasalig ang inyong kaugalingon sa paglihok.²³

Si Elder L. Tom Perry miingon, “Ang kahimsug sa bisan unsa nga katilingban, ang kalipay sa iyang mga katawhan, ilang kalampusan, ug ilang kalinaw kining tanan managsamang naggagikan sa pagtudlo sa mga anak diha sa panimalay.”²⁴

Oo, ang salag sa akong panimalay walay sulod karon, apan mahimo gihapon akong tawagon, andam ug naghinam-hinam sa pagpangita og dugang nga bililhong mga oportunidad sa pagtudlo sa akong hamtong na nga mga anak, ilang mga anak, ug sa umaabut nga adlaw, manghinaut ko, sa akong mga apo sa tuhod.

Nangamuyo ko og tabang sa langit samtang maningkamot kita nga mahimong Kristohanon nga mga magtutudlo sa atong mga panimalay. Sa pangalan ni Jesukristo, amen. ■

MUBO NGA MGA SULAT

1. Tan-awa sa Doktrina ug mga Pakigsaad 68:25; 93:40.

Si Elder L. Tom Perry mitudlo: “Ang impluwensya sa kaaway labihan ang pagkuyanap ug siya miatake, misulay sa pagbungkag sa pinakapundasyon sa atong katilingban, gani ang pamilya. Ang mga ginikanan kinahanglan nga hugot nga mohukom nga ang pagtudlo diha sa panimalay usa ka labing sagrado ug importante nga responsibilidad” (“Mga Inahan Nagtudlo sa mga Anak diha sa Panimalay,” *Liahona*, Mayo 2010, 30).

Ang Unang Kapangulohan ug ang Korum sa Napulog Duha ka mga Apostoles mitudlo: “Ang bana ug asawa adunay ligdong nga kapangakohan sa paghigugma ug pag-amuma sa usag usa ug alang sa ilang mga anak. ‘Ang mga kabataan mao ang panulundon sa Ginoo’ (Salmo 127:3). Ang mga ginikanan adunay sagrado nga katungdanan sa pag-amuma sa ilang mga anak sa paghigugma ug pagkamatarung, sa pagsangkap alang sa ilang pisikal ug espirituhanon nga mga panginahanglan, ug sa pagtudlo kanila sa paghigugma ug pag-alagad sa usag usa, pagsunod sa mga sugo sa Dios, ug kinsa mosunod sa mga balaod sa ilang nasud bisan asa sila magpuyo. Mga bana ug mga asawa—mga inahan ug mga amahan—adunay tulubagon sa atubangan sa Dios sa pagtuman niini nga mga kapangakohan.” (“Ang Pamilya: Usa ka Pamahayag ngadto sa Kalibutan,” *Liahona*, Mayo 2017, 145).

2. Tan-awa sa Russell M. Nelson, “Samtang Dungan Kita nga Magpadayon,” *Liahona*, Abr. 2018, 7.
3. Si Elder David A. Bednar miingon: “Kon kamo karon makapangutana pa unta sa mga hamtong na namong mga anak nga lalaki kon unsay ilang nahinumduman kabahin sa pamilya nga pag-ampo, pagtuon sa kasulatan, ug sa family home evening, nagtuo kong kahibalo ko unsaon nila sa pagtubag. Sila ingon og dili gayud makasulti sa usa ka piho nga pag-ampo o piho nga higayon sa pagtuon sa kasulatan o sa usa ka makahuluganon kaayo nga leksyon sa family home evening nga nahimong usa ka panahon sa ilang pagkat-on alang sa ilang espirituhanong kalambuan. Ang ilang ikasulti nga ilang nahinumduman mao nga isip usa ka pamilya kami makanunayon gayud” (“Labaw nga Makugihon ug Mabuhaton diha sa Panimalay,” *Liahona*, Nob. 2009, 19).
4. Tan-awa sa “Home Can Be a Heaven on Earth,” *Hymns*, nu. 298.
5. *Mga Pagtulun-an sa mga Presidente*

sa Simbahan: Gordon B. Hinckley (2016), 198.

6. Tan-awa sa 2 Nephi 2:11.
7. N. Eldon Tanner, “Never Be Ashamed of the Gospel of Christ,” *Ensign*, Feb. 1980, 4.
8. Tan-awa sa 3 Nephi 18:21.
9. Tan-awa sa Mateo 3:16–17; 3 Nephi 11:6–8; Doktrina ug mga Pakigsaad 18:34–36; Joseph Smith—Kasaysayan 1:17.
10. “Pahimusli ang mga Higayon sa Diha-diha Dayon nga Pagtudlo,” *Pagtudlo sumala sa Pamaagi sa Manluluwas* (2016), 16. *Ang Pagtudlo sumala sa Pamaagi sa Manluluwas* naglakip og lain-laing mga impormasyon ug mga himan alang sa pagtudlo diha sa panimalay.
11. Tan-awa sa Doktrina ug mga Pakigsaad 11:21; 84:85.
12. *Pagtudlo sumala sa Pamaagi sa Manluluwas*, 16.
13. Tan-awa sa “Paminaw,” *Isangyaw ang Akong Ebanghelyo: Usa ka Giya sa Misyonaryo nga Pangalagad* (2004), 225–26.
14. 1 Pedro 3:15.
15. Douglas L. Callister, “Most Influential Teacher—Emeritus Seventy Pays Tribute to Father,” Ago. 29, 2016, news.lds.org.
16. Russell M. Nelson, “Set in Order Thy House,” *Liahona*, Ene. 2002, 81.
17. Tan-awa sa Alma 32:28–43.
18. Si Sister Melinda Ashton maoy mopuli kon ang iyang bana, si Brother Ashton, mobiyathe gawas sa lungsod.
19. 1 Timoteo 4:12; tan-awa usab sa Alma 17:11.
20. Si Bishop Jeffrey L. Stewart nagserbisyo sa Southgate Second Ward sa St. George, Utah. Si Samuel, iyang anak, nagserbisyo na karon sa Colombia Medellin Mission.
21. D. Todd Christofferson, “Strengthening the Faith and Long-Term Conversion of the Rising Generation,” general conference leadership meeting, Sept. 2017.
22. Tan-awa sa 3 Nephi 27:21, 27.
23. Tan-awa sa Doktrina ug mga Pakigsaad 43:8–9.
24. L. Tom Perry, “Mga Inahan Nagtudlo sa mga Anak diha sa Panimalay,” 30.





Ni Elder Dale G. Renlund

Sa Korum sa Napulog Duha ka mga Apostoles

Buhat sa Family History ug sa Templo: Pagsilyo ug Pagkaayo

Kon tigumon nato ang atong mga family history ug moadto sa templo para sa atong katigulangan, tumanon sa Dios ang daghan niining gisaad nga mga panalangin sa mga buhi ug sa patay na.

Ang mga relasyon sa pamilya mahimong maoy pinakamagan-tihon ug gani mahagitong mga kasinatian nga atong masinati. Daghan kanato dunay mga kasungian sa atong pamilya. Kana nga kasungian nahitabo tali sa duha ka bayani sa Pagpahiuli sa Simbahan ni Jesukristo niining ulahing mga adlaw. Ang managsoong Parley ug Orson Pratt, unang mga kinabig, ug naorden nga mga Apostoles. Ang matag usa nag-atubang og pagsulay sa pagtuo apan milahutay uban sa lig-ong pagpamatuod. Sila misakripisyo ug nakatampo og dako alang sa kamatuoran.

Atol sa kapanahunan sa Nauvoo, nagkasungi sila, nagkainitay, sa usa ka dayag nga panagbangi niadtong 1846. Grabe ug milungtad og dugay ang panagsungi. Si Parley ang miuna og sulat aron masulbad ang panagsungi, apan wala motubag si Orson. Napulan na si Parley, mibati nga dili na gyud mosulat pag-usab, gawas kon mosulat si Orson.¹

Human sa pipila ka tuig, Marso 1853, nahibaloan ni Orson ang usa ka proyekto sa pagmantala og libro bahin sa kaliwatan ni William Pratt, ang nag-unang Amerikanong katigulangan sa managsoon. Nagsugod og bakho si Orson “sama sa gamayng bata” dihang gitan-aw niya ang koleksyon sa bahan-di nga family history. Nahumok ang iyang kasingkasing, ug gitino niyang itul-id ang relasyon sa iyang igsoon.

Misulat si Orson kang Parley, “Karon mahal kong igsoon, walay bisan usa sa tanang kaliwat sa atong Katigulangan, Lieut[enant] William Pratt, ang may dako kaayong interes sa pagsiksik sa iyang kaliwatan sama kanato.” Si Orson ang unang nakasabut nga ang mga Santos sa Ulahing Adlaw may obligasyon sa pagsiksik ug pagtigom sa kasaysayan sa pamilya aron atong mapahigayon ang proxy nga mga ordinansa sa patay na natong katigulangan. Ang iyang sulat mipadayon: “Nasayud kita nga ang Dios sa atong mga amahan may impluwensya niini. . . . Mangayo ko’g pasaylo nga wala ko mobalos pagsulat nimo. . . . Unta imo kong pasayloon.”² Bisan sa dili matarug nilang pagpamatuod, ang gugma nila sa ilang katingulangan maoy hinungdan sa dali nga pagkaayo sa panagsungi, miayo sa kahapdos, ug nangita ug mihatag og pasaylo.³

Kon sugoon kita sa Dios og usa ka butang, sa kasagaran daghan Siya og tuyo sa paghimo niini. Ang buhat sa family history ug sa templo dili lang para sa mga patay apan mopanalangin usab sa mga buhi. Para kang Orson ug Parley, nagkauli ang ilang kasingkasing. Ang buhat sa family history ug sa templo naghatag og gahum sa pagkaayo sa angay nga ayuhon.

Isip mga miyembro sa Simbahan, gihatagan kita’g balaang responsibilidad sa pagsiksik sa atong katigulangan ug pagtigom sa mga kasaysayan sa pamilya. Mas labaw kini kay sa giawhag nga kalingawan, tungod kay ang mga ordinansa sa kaluwasan



gikinahanglan sa tanang anak sa Dios.⁴ Kita ang mangita sa kaugalingon natong katigulangan kinsa namatay nga wala makadawat sa mga ordinansa sa kaluwasan. Ang mga ordinansa para sa mga patay atong mahimo pinaagi sa pag-proxy sa mga templo, ug ang atong katigulangan ray mopili kon dawaton ba nila ang mga ordinansa.⁵ Giawhag usab kita nga tabangan ang mga miyembro sa ward ug stake sa ngalan sa mga sakop sa ilang pamilya. Makatingala gayud, nga pinaagi sa buhat sa family history ug sa templo, makatabang kita og luwas sa mga patay.

Apan, kon moapil kita karon sa buhat sa family history ug sa templo, sarang usab kitang makadawat sa “makaayo” nga mga panalangin nga gisaad sa mga propeta ug mga apostoles.⁶ Makatingala usab kaayo kini nga mga panalangin tungod sa gilapdon, pagkapiho, ug sa sangputanan sa mortalidad. Kining taas nga lista naglakip niini nga mga panalangin:

- Dugang nga panabut bahin sa Manluluwas ug sa Iyang maulaon nga sakripisyo;
- Dugang nga impluwensya sa Espiritu Santo⁷ aron mobati sa kalig-on ug direksyon sa kaugalingon natong kinabuhi;
- Dugang nga pagtuo, aron ang pagkakabig ngadto sa Manluluwas magkalawom ug magpadayon;
- Dugang nga abilidad ug kadasig sa pagkat-on ug paghinulso⁸ tungod sa panabut kon si kinsa kita, diin kita gikan, ug mas tin-aw nga panan-awon kon asa kita padulong;
- Dugang nga makahapsay, makabalalan, ug makapakalma nga impluwensya sa atong kasingkasing;
- Dugang nga kalipay tungod sa paglambo sa abilidad nga mobati sa gugma sa Ginoo;
- Dugang nga mga panalangin sa pamilya, bisan unsa pay atong kasamtangan, nangagi, o umaabut nga sitwasyon bisan unsa kadili hingpit sa atong family tree;
- Dugang nga gugma ug pasalamat para sa mga katigulangan ug buhing



- mga paryente, aron dili na kita mobati nga nag-inusara;
- Dugang nga gahum sa pag-ila sa butang nga nagkinahanglan og pagkaayo ug, uban sa tabang as Ginoo, makaserbisyo sa uban;
 - Dugang nga proteksyon gikan sa mga tintasyon ug sa nagkagrabing impluwensya sa kaaway; ug
 - Dugang nga tabang sa pag-ayo sa samok, guba, o mabalak-ong kasingkasing ug pag-ayo sa samaran.⁹

Kon nag-ampo ka bisan asa niini nga mga panalangin, apil sa buhat sa family history ug sa templo. Sa inyong pagbuhat niini, tubagon ang inyong mga pagampo. Kon gihimo ang mga ordinansa para sa mga patay na, ang mga anak sa Dios dinhi sa yuta mamaayo. Dili ikatingala nga si Presidente Russell M. Nelson, sa una niyang mensahe isip Presidente sa Simbahan mipahayag, “Ang inyong pagsimba sa templo ug pagserbisyo didto para sa inyong katigulangan mopanalangin kaninyo og dugang nga personal nga pagpadayag ug kalinaw ug molig-on sa inyong pasalig nga magpabilin sa dalan sa pakigsaad.”¹⁰

Nakita usab daan sa usa sa unang propeta ang mga panalangin para sa

mga buhi ug sa patay na.¹¹ Ang langitnong mensahero mipakita og pananawon kang Ezequiel bahin sa templo nga may katubigan nga minggula niini. Gisultihan si Ezequiel:

“Kini nga katubigan minggula . . . ug molugsong ngadto sa Arabah; ug mopanaw ngadto sa [patay] nga dagat . . . , [ug] ang iyang mga tubig mamaayo.

“Ug mahitabo, nga ang tagsatagsa ka buhing binuhat nga magapanon, mabuhi ang tagsatagsa ka dapit diin didto ang suba makadangat: . . . ug ang tubig sa dagat mamaayo, ug mabuhi ang tanang butang diin makadangat ang suba.”¹²

Duha ka kalidad sa tubig ang importanting hinumduman. Una, bisan ang gamayng sapa walay mga sanga, nahimo kining dako kaayong suba, milapad ug milawom kutob sa giabut niini. Susama sa nahitabo sa mga panalangin nga midagayday sa templo samtang gisilyo ang mga tawo isip mga pamilya. Makahuluganong paglambo paatras ug paabante nahitabo lahus sa mga henerasyon samtang gihimo ang mga ordinansa sa pagsilyo nga nagsumpay sa mga pamilya.

Ikaduha, ang suba mibag-o sa tanan nga gitandog niini. Ang mga panalangin



sa templo usab may talagsaong kapasidad nga moayo. Ang mga panalangin sa templo moayo sa mga kasingkasing ug kinabuhi ug sa pamilya.

Akong ihulagway. Niadtong 1999, ang batan-on nga si Todd nakuyapan tungod sa naputol nga ugat sa iyang utok. Bisan si Todd ug ang iyang pamilya mga miyembro sa Simbahan, dili kaayo sila aktibo, ug walay nakasinati sa mga panalangin sa templo. Sa katapusang gabii sa wala pa mamatay si Todd, ang iyang mama, si Betty milingkod sa tupad nga mihapuhap sa iyang kamot ug miingon, “Todd, kon mobiya man gyud ka, mosaad ko nga himoon gyud nako ang buhat sa templo para nimo.” Pagkaugma, gideklarar nga namatay si Todd. Ang kasingkasing ni Todd gitaod sa mga doktor ngadto sa akong pasyente, usa ka talagsaong tawo nga si Rod.

Pipila ka bulan human sa pagtaod, nailhan na ni Rod ang pamilya sa donor sa kasingkasing ug nasugod sa pagkontak kanila. Mga duha ka tuig ang milabay, si Betty, mama ni Todd,

midapit ni Rod nga motabong sa una niyang pag-adto sa templo. Didto nagkita si Rod ug Betty sa unang higayon sulod sa celestial room sa St. George, Utah Temple.

Milabay ang panahon, ang papa ni Todd—bana ni Bety—namatay. Paglabay sa pipila ka tuig, gidapit ni Betty si Rod nga morepresentar sa patay na niyang anak sa pagdawat sa mga ordinansa sa templo. Malipayon kining gihimo ni Rod, ug gihimo ang pag-proxy sulod sa sealing room sa Templo sa St. George, Utah. Si Betty gisilyo ngadto sa iyang bana, nagluhod atbang sa altar ang iyang apo nga nagsilbing proxy. Dayon, uban sa nagdagayday nga luha, milingi siya ni Rod aron paapilon sila sa altar. Miluhod si Rod tupad niya, isip proxy sa iyang anak, nga si Todd, kansang kasingkasing nagpitik gihapon sa dughan ni Rod. Ang donor sa kasingkasing ni Rod, si Todd, nasilyo dayon sa iyang mga gini-kanan alang sa kahangturan. Natuman sa mama ni Todd ang saad nga iyang gihimo sa himasyon niyang anak mga tuig nang milabay.

Apan wala pa mahuman ang istorya didto. Kinse ka tuig human mataod ang iyang kasingkasing, kaslunon na si Rod sa Templo sa Provo Utah ug mihangyo nga ako ang mosilyo. Sa adlaw sa kasal, nagkita mi ni Rod ug sa talagsaon niyang pangasaw-unon, nga si Kim sa kwarto atbang sa sealing room, diin ang ilang pamilya ug kinasuorang mga higala naghulat. Human sa daklit nga pakig-istorya kang Rod ug Kim, nangutana ko kon may mga pangutana sila.

Miingon si Rod, “Duna. Ang pamilya sa akong donor nia karon ug ganahang makigkita nimo.”

Wa ko makatuo sa iyang gisulti ug miingon, “Nia sila dinhi? Karon?”

Mitubag si Rod, “Oo.”

Mitikang ko sa pikas kilid ug akong gipagawas sa sealing room ang pamilya. Si Betty, ang iyang anak nga babaye, ug ang iyang umagad miapil kanamo. Gigakos ni Rod si Betty sa pagtimbaya, nagpasalamat sa pag-adto, ug iya kong gipaila kaniya. Miingon si Rod, “Betty, si Elder Renlund. Siya ang doktor nga nag-atiman sa kasingkasing sa imong anak sulod sa daghang katugigan.” Mitabok siya sa kwarto ug migakos kanako. Ug sa misunod nga pipila ka minutos, adunay mga paggakos ug mga luha sa kalipay sa palibut.

Human nga naulian na kaming tanan, nangadto kami sa sealing room, diin si Rod ug Kim gisilyo alang sa karon ug kahangturan. Si Rod, Kim, Betty, ug ako makapamatuod nga duol ra kaayo ang langit, nga dunay nakig-uban kanamo niadtong adlaw kadtong mitabok na kaniadto sa tabil sa mortalidad.

Ang Dios, sa Iyang walay sukod nga kapasidad, mosilyo ug moayo sa mga indibidwal ug mga pamilya bisan sa trahedy, pagkamatay, ug kalisdanan. Usahay atong ikumpara ang atong mga pagbati nga nasinati sulod sa mga templo nga nakalantaw og kadiyot sa langit.¹³ Niadtong adlaw sa Templo sa Provo Utah, kini nga pamahayag ni C. S. Lewis naghatag kanako og kaanindot: “[Ang mga mortal] moingon bahin sa ubang temporal nga pag-antus, ‘walay kalipayng moabut ang pweding ibayad

niini,' wala mahibalo nga ang Langit, kon maabut na, pulihan ang kasakit og himaya. . . . Ang mga Bulahan moingon, 'Wala pa gayud kami makapuyo bisan asa gawas sa Langit.'"¹⁴

Ang Dios molig-on, motabang, ug mobulig kanato;¹⁵ ug Iyang ibalaan ngari kanato ang dako kaayo natong kasakit.¹⁶ Kon tigumon nato ang atong mga family history ug moadto sa templo para sa atong katigulangan, tumanon sa Dios ang daghan niining gisaad nga panalangin sa mga buhi ug patay na. Sa samang paagi, panalanginan kita kon tabangan nato nga ang uban sa atong ward ug stake mohimo sa parehong butang. Ang mga miyembro nga nagpuyo layo sa templo makadawat usab og mga panalangin pinaagi sa pag-apil sa buhat sa family history, magkolekta og mga ngalan sa ilang katigulangan alang sa mga ordinansa nga himoon sa templo.

Hinoon, mipahimangno si Presidente Nelson: "Mahimo kitang madasig sa tibuok adlaw sa mga kasinatian sa uban mahitungod sa templo ug family history. Apan kinahanglan gayud nga mobuhat kita aron masinati sa kaugalingon ang hingpit nga kalipay." Iyang gipadayon: "Dapiton ko kamo nga ikonsiderar sa mainampuong paagi unsa nga matang sa halad—labing siguro usa ka halad sa panahon—ang inyong mahimo aron mas daghan [ang mabuhat] sa family history ug sa templo."¹⁷ Kon dawaton ninyo ang pagdapit ni Presidente Nelson, inyong



makaplagan, mapundok, ug makonektar ang inyong pamilya. Dugang pang, mga panalangin modagayday kaninyo ug sa inyong pamilya sama sa suba nga giingon ni Ezequiel. Mamaayo kamo sa mga butang nga nagkinahanglang mamaayo.

Si Orson ug Parley Pratt nakasinati sa pagkaayo ug sa mga epekto sa pagsilyo sa buhat sa family history ug sa templo sayo niini nga dispensasyon. Si Betty, ang iyang pamilya, ug si Rod nakasinati niini. Kamo usab. Pinaagi sa Iyang matubsanong sakripisyo, gihalad ni Jesukristo kining mga panalangin para sa tanan, alang sa mga patay ug sa buhi. Tungod niini nga mga panalangin, atong makita nga kita, sa pasumbingay nga paagi, "Wala pa gayud makapuyo bisan asa gawas sa . . . Langit."¹⁸ Mopamatuod ko sa pangalan ni Jesukristo, amen. ■

MUBO NGA MGA SULAT

1. Tan-awa sa Parley P. Pratt to Orson Pratt, Mayo 25, 1853, Orson Pratt Family Collection, Church History Library, Salt Lake City; sa Terryl L. Givens and Matthew J. Grow, *Parley P. Pratt: The Apostle Paul of Mormonism* (2011), 319.
2. Orson Pratt ngadto ni Parley P. Pratt, Mar. 10, 1853, Parley P. Pratt Collection, Church History Library, Salt Lake City; sa Givens and Grow, *Parley P. Pratt*, 319.
3. Mabantayan nga, si Orson Pratt wala lang motabang sa pagmantala sa basahon sa mga kaliwatan ni William Pratt, apan pipila ka tuig human niadto, sa tuig 1870, siya ug ang iyang pamilya mipahigayon og 2,600 nga mga pagbunyang alang sa mga patay alang sa mga indibidwal nga naa sa basahon sa Endowment House sa Salt Lake City (tan-awa sa Breck England, *The Life and Thought of Orson Pratt* [1985], 247).
4. Tan-awa sa Joseph Smith, *History of the Church*, 6:312–13.
5. Tan-awa sa "Names Submitted for Temple Ordinances," sulat sa Unang Kapangulohan, Feb. 29, 2012. Ang mga katigulangan kansang mga ngalan isumiter alang sa proxy nga mga ordinansa sa templo kinahanglang kaliwat sa nagsumiter. Walay eksepsyon, kinahanglang dili mosumiter ang mga miyembro sa Simbahan og mga ngalan gikan sa bisan asa nga dili awtorisadong grupo, sama sa mga artista ug mga biktima sa Jewish Holocaust.
6. Tan-awa sa Dallin H. Oaks, "In Wisdom and Order," *Tambuli*, Dis 1989, 18–23; D. Todd Christofferson, "The Redemption of the Dead and the Testimony of Jesus," *Liahona*, Ene. 2001, 10–13; Boyd K. Packer, "Your Family History: Getting Started," *Liahona*, Ago. 2003, 12–17; Thomas S.

- Monson, "Makanunayon nga mga Kamatuoran sa Nagkausab nga Panahon," *Liahona*, Mayo 2005, 19–22; Henry B. Eyring, "Mga Kasingkasing Nagkahiusa sa Pagkabugkos," *Liahona*, Mayo 2005, 77–80; M. Russell Ballard, "Hugot nga Pagtuo, Pamilya, mga Kamatuoran, ug mga Bunga," *Liahona*, Nob. 2007, 25–27; Russell M. Nelson, "Kaluwasan ug Kahimayaan," *Liahona*, Mayo 2008, 7–10; Russell M. Nelson, "Mga kaliwatan Nasumpay sa Gugma," *Liahona*, Mayo 2010, 91–94; David A. Bednar, "Ang mga Kasingkasing sa mga Anak Mobati," *Liahona*, Nob. 2011, 24–27; Richard G. Scott, "Ang Hingpit nga Kalipay sa Pagtubos sa mga Patay," *Liahona*, Nob. 2012, 93–95; Quentin L. Cook, "Mga Gamut ug mga Sanga," *Liahona*, Mayo 2014, 44–48; Thomas S. Monson, "Pagpadali sa Buluhaton," *Liahona*, Hunyo 2014, 4–5; Henry B. Eyring, "Ang Saad sa Pagpabalik sa mga Kasingkasing," *Liahona*, Hulyo 2014, 4–5; David A. Bednar, "Misyonaryo, Family History, ug Buhat sa Templo," *Liahona*, Okt. 2014, 14–19; Neil L. Andersen, "Akong mga Adlaw' Kabahin sa mga Templo ug sa Teknolohiya," *Liahona*, Feb. 2015, 26–33; Neil L. Andersen, "Sharing the Temple Challenge," Family Discovery Day, Feb. 2015, LDS.org; Quentin L. Cook, "Ang Hingpit nga Kalipay sa Buhat sa Family History," *Liahona*, Feb. 2016, 23–27; Gary E. Stevenson, "Asa ang mga Yawe ug Awtoridad sa Priesthood?" *Liahona*, Mayo 2016, 29–32; Dieter F. Uchtdorf, "Agig Pagdayeg Niadtong Miluwasa *Liahona*," Mayo 2016, 77–80; Quentin L. Cook, "Hunahunaa ang Inyong Kaugalingon nga anaa sa Templo," *Liahona*, Mayo 2016, 97–101; Dale G. Renlund, Ruth L. Renlund, ug Ashley R. Renlund, "Family History ug mga Panalangin sa Templo," *Liahona*, Feb. 2017, 34–39; Dallin H. Oaks ug Kristen M. Oaks, "Connected to Eternal Families," Family Discovery Day, Mar. 2018, LDS.org.
7. Tan-awa sa Doktrina ug mga Pakigsaad 109:15.
 8. Tan-awa sa Doktrina ug mga Pakigsaad 109:21.
 9. Tan-awa sa Boyd K. Packer, "Balm of Gilead," *Ensign*, Nob. 1987, 16–18; Jeremias 8:22; 51:8.
 10. Russell M. Nelson, "Samtang Dungan Kita nga Magpadayon sa Unahan," *Liahona*, Abr. 2018, 7.
 11. Tan-awa sa Ezequiel 40–47; Bible Dictionary, "Ezequiel."
 12. Ezequiel 47:8–9.
 13. Tan-awa sa Spencer W. Kimball, "Glimpses of Heaven," *Ensign*, Dis. 1971, 36–37.
 14. C. S. Lewis, *The Great Divorce: A Dream* (2001), 69.
 15. Tan-awa sa Isaias 41:10.
 16. Tan-awa sa "Unsa Kalig-on ang Tukuranan," *Mga Himno ug mga Awit sa mga Bata*, nu. 6.
 17. Russell M. Nelson ug Wendy W. Nelson, "Ablihi ang Langit pinaagi sa Buhat sa Templo ug Family History," *Liahona*, Okt. 2017, 19.
 18. Lewis, *The Great Divorce*, 69.



Ni Douglas D. Holmes
Unang Magtatambag sa Kinatibuk-ang
Kapangulohan sa Young Men

Unsay Kinahanglang Masabtan sa Matag Naghupot sa Aaronic Priesthood

Ang inyong ordinasyon sa Aaronic Priesthood mahinungdanon sa pagtabang sa mga anak sa Dios nga makadawat sa maulaong gahum ni Kristo.

Mga kaisogon, usa kini ka pribilehiyo nga makauban kamo niining makasaysayanong komperensya. Sa dihang bag-o pa ko nga mission president, naghinam-hinam ko nga modawat sa among unang grupo sa bag-ong mga misyonaryo. Pipila sa among mas eksperyensyado nga mga misyonaryo nangandam alang sa mubo nga miting uban kanila. Nakabantay ko nga naghan-ay sila og mga lingkuranan sa mga bata sa usa ka semicircle.

“Para unsa man nang gagmayng mga lingkuranan?” Nangutana ko.

Ang mga misyonaryo, nga medyo naulaw og gamay, miingon, “Para sa bag-ong mga misyonaryo.”

Nagtuog ko nga ang atong pagtan-aw sa uban makaapekto og dako sa ilang panglantaw kon si kinsa sila ug unsay ilang mahimo.¹ Ang among bag-ong mga misyonaryo nanglingkod sa mga

lingkuranan para sa mga hamtong nianang adlaw.

Usahay, nahadlok ko, sa mapasumbingayong paagi atong gihatagan ang atong mga batan-ong lalaki sa Aaronic Priesthood og mga lingkuranan para sa mga bata nga kalingkuran imbis nga motabang kanila nga makakita nga

ang Dios mihatag kanila og sagradong pagsalig ug mahinungdanong buhat nga himoon.

Si Presidente Thomas S. Monson mitambag kanato nga ang mga batan-ong lalaki kinahanglang makasabut “kon unsay gipasabut . . . sa mahimong mga tighupot sa priesthood sa Dios. Kinahanglan silang magiyahan ngadto sa usa ka espiritwal nga kasayuran bahin sa kasagrado sa ilang gi-orden nga calling.”²

Karon nag-ampo ko nga ang Espiritu Santo mogiya kanato ngadto sa mas dakong panabut bahin sa gahum ug kasagrado sa Aaronic Priesthood ug modasig kanato nga mag-focus nga mas makugihon sa atong mga katungdanan sa priesthood. Ang akong mensahe alang sa tanang mga naghupot sa Aaronic Priesthood, lakip na niadtong naghupot sa Melchizedek Priesthood.

Si Elder Dale G. Renlund nagtudlo nga ang katuyoan sa priesthood mao ang paghatag sa mga anak sa Dios pag-access ngadto sa maulaong gahum ni Jesukristo.³ Aron makadawat sa maulaong gahum ni Kristo sa atong kinabuhi, kinahanglan gayud kita nga motuo Kaniya, maghinulsol sa atong mga sala, mohimo ug motuman sa mga pakigsaad pinaagi sa mga ordinansa, ug modawat sa Espiritu Santo.⁴ Dili kini mga baruganan nga kausa lamang kita malambigit; hinoon, magtambayayong kini, moabag ug mougmad sa usag usa sa mapadayunon nga proseso sa pataas nga pag-uswag sa “[pag]duol ngadto kang Kristo, ug paghingpit diha kaniya.”⁵



Nan, unsa man ang tahas sa Aaronic Priesthood diha niini? Sa unsang paagi man kini makatabang kanato nga maka-access sa maulaong gahum ni Kristo? Nagtuo ko nga ang tubag anaa sa mga yawe sa Aaronic Priesthood—ang mga yawe sa pagpangalagad sa mga anghel ug sa ebanghelyo sa pagpangandam.⁶

Ang Pagpangalagad sa mga Anghel

Sugdan nato sa usa ka aspeto sa pagpangalagad sa mga anghel. Sa dili pa makabaton ang mga anak sa Dios og hugot nga pagtuo kang Jesukristo, kina-hanglan silang masayud bahin Kaniya ug matudloan sa Iyang ebanghelyo. Sama sa giingon ni Apostol Pablo:

“Unsaon man nila sa pagtuo kaniya nga wala gayud nila hindunggi? ug unsaon man nila sa pagkadungog kon walay magwawali?

“Ug unsaon man sa mga tawo sa pagpakawali, gawas kon sila pinadala? . . .

“Busa ang pagtuo magaabut gikan sa madungog, ug ang madungog magaabut pinaagi sa pulong sa Dios.”⁷

Gikan sa sinugdanan sa panahon, ang Dios “nagpadala og mga anghel aron pagpangalagad ngadto sa mga katawhan, aron ikapahibalo . . . ang pag-anhi ni Kristo.”⁸ Ang mga anghel mga langitnong nilalang nga nagdala sa mensahe sa Dios.⁹ Sa parehong Hebreohanon ug Gresyanhon, ang gigikanan nga pulong sa *anghel* kay “mensahero.”¹⁰

Sa sama gayung paagi nga ang mga anghel awtorisado nga mga mensahero nga gipadala sa Dios aron mopahayag sa Iyang pulong ug sa ingon mag-ugmad og pagtuo, kita kinsa naghupot sa Aaronic Priesthood naordinahan nga “magtudlo, ug magdapat sa tanan sa pagduol ngadto kang Kristo.”¹¹ Ang pagsangyaw sa ebanghelyo usa ka katungdanan sa priesthood. Ug ang gahum nga may kalabutan niini nga katungdanan dili lamang alang sa mga propeta o alang lamang sa mga misyonaryo. Alang kini kaninyo!¹²

Nan unsaon man nato sa pagbaton niining gahum? Sa unsang paagi nga ang usa ka 12 anyos nga deacon—o



bisan kinsa kanato—makadala og hugot nga pagtuo ni Kristo ngadto sa kasing-kasing sa mga anak sa Dios? Magsugod kita pinaagi sa paghatag og bili sa Iyang pulong aron ang gahum niini maanaa sa sulod kanato.¹³ Misaad Siya nga kon atong buhaton, mabatunan nato “ang gahum sa Dios ngadto sa pagkabig sa mga tawo.”¹⁴ Mahimo kining usa ka oportunidad sa pagtudlo diha sa miting sa korum o mobisita sa panimalay sa usa ka miyembro. Mahimong usa kini ka butang nga dili kaayo pormal, sama sa pakig-istorya sa usa ka higala o sakop sa pamilya. Sa bisan unsa niining mga kahimtang, kon nangandam kita, makatudlo kita sa ebanghelyo sa paagi sa pagtudlo sa mga anghel: pinaagi sa gahum sa Espiritu Santo.¹⁵

Bag-ohay lang nakong nadungog si Jacob, usa ka naghupot sa Aaronic Priesthood didto sa Papua New Guinea, nga nagpamatuod bahin sa gahum sa Basahon ni Mormon ug sa unsang paagi kini nakatabang kaniya nga makabatok sa dautan ug mosunod sa Espiritu. Ang iyang mga pulong naka-palambo sa akong pagtuo ug sa pagtuo sa uban. Ang akong pagtuo milambo usab samtang nakadungog ko sa mga naghupot sa Aaronic Priesthood nga nagtudlo ug nagpamatuod diha sa ilang mga miting sa korum.

Mga batan-ong lalaki, awtorisado kamo nga mga mensahero. Pinaagi sa

inyong mga pulong ug mga aksyon, makadala kamo og hugot nga pagtuo ni Kristo ngadto sa kasingkasing sa mga anak sa Dios.¹⁶ Sama sa giingon ni Presidente Russell M. Nelson, “Ngadto kanila mahimo kamong tigpangalagad nga anghel.”¹⁷

Ang Ebanghelyo sa Pagpangandam

Ang napalambo nga pagtuo diha ni Kristo kanunayng moresulta sa usa ka tinguha nga mag-usab o maghinulsol.¹⁸ Busa makatarunganon lang nga ang yawe sa pagpangalagad sa mga anghel pagaubanan sa yawe sa ebanghelyo sa pagpangandam, “ang ebanghelyo sa paghinulsol ug sa bunyag, ug sa kapa-sayloan sa mga sala.”¹⁹

Samtang magtuon kamo sa inyong mga katungdanan sa Aaronic Priesthood, makakita kamo og klaro nga mando sa pagdapat sa uban nga maghinulsol ug molambo.²⁰ Wala kana magpasabut nga magbarug kita sa daplin sa dalan nga magsinggit, “Paghinulsol kamo!” Kasagaran, nagpasabut kini nga maghinulsol *kita*, mopasaylo kita, ug samtang mangalagad kita sa uban, gitanyag nato ang paglaum ug kalinaw nga dala sa paghinulsol—tungod kay nakasinati kita niini mismo.

Nakauban nako ang mga naghupot sa Aaronic Priesthood samtang nagbisita sila og isig ka sakop sa korum. Nasaksihan nako nga ang



Ang mga priest nga mibunyag sa pamilyang Mbuelongo sa Sydney, Australia, nakasabut unsay kahulugan sa “ingon nga sinugo ni Jesukristo.”

ilang pag-atiman nakapahumok sa kasingkasing ug nakatabang sa ilang mga kaigsoonan nga mobati sa gugma sa Dios. Nakadungog ko og usa ka batan-ong lalaki nga mipamatuod sa iyang mga kaedad bahin sa gahum sa paghinulsol. Sa pagbuhat niya sa ingon, ang mga kasingkasing nahumok, ang mga pasalig nahimo, ug ang gahum ni Kristo sa pag-ayo nabati.

Si Presidente Gordon B. Hinckley nagtudlo: “Usa ka butang ang maghinulsol. Lain usab ang mapasaylo sa atong mga sala. Ang gahum aron mahitabo kini makita diha sa Aaronic Priesthood.”²¹ Ang mga ordinansa sa Aaronic Priesthood nga bunyag ug sakrament mosaksi ug mokompleto sa atong paghinulsol alang sa kapasayloan sa sala.²² Si Presidente Dallin H. Oaks mipasabut niining paagiha: “Gisugo kita nga maghinulsol sa atong mga sala ug moduol sa Ginoo uban sa masulubon nga kasingkasing ug mahinulsulon nga espiritu ug moambit sa sakrament. . . . Kon bag-uon nato ang atong mga pakigsaad sa bunyag niining paagiha, ang Ginoo mobag-o sa epekto sa paglimpyo sa atong bunyag.”²³

Mga kaigsoonan, usa kini ka sagradong pribilehiyo nga modumala sa mga ordinansa nga makadala og kapasayloan sa mga sala ngadto sa mahinulsulon nga kasingkasing pinaagi

sa maulaong gahum sa Manluluwas.²⁴

Bag-ohay lang gisultihan ko bahin sa usa ka priest nga nanlimbasug sa pagpahayag sa iyang kaugalingon nga mipanalangin sa sakrament sa unang higayon. Samtang gibuhay niya kini, usa ka gamhanang espiritu ang miabut kaniya ug sa kongregasyon. Sa ulahing bahin sa miting, mihatag siya og yano apan klaro nga pagpamatuod bahin sa gahum sa Dios nga iyang gibati atol niana nga ordinansa.

Didto sa Sydney, Australia, upat ka sakop sa korum sa mga priest ang mibunyag sa pamilyang Mbuelongo. Ang inahan sa usa niining mga priest misaysay kanako kon sa unsang paagi nga kining kasinatian nakaapekto gayud sa iyang anak. Kining mga priest nakasabut kon unsay gipasabut sa “sinugo ni Jesukristo.”²⁵

Sama sa inyong nasayran, ang mga priest mahimo na karong modumala sa pagpahigayon sa mga bunyag pinaagi sa proxy diha sa templo. Ang akong 17 anyos nga anak nga lalaki bag-ohay lang nga mibunyag kanako alang sa pipila sa among mga katigulangan. Pareho kaming mibati og dakong pasalamat alang sa Aaronic Priesthood ug sa pribilehiyo sa paglihok alang sa kaluwasan sa mga anak sa Dios.

Mga batan-ong lalaki, samtang makugihon kamong nalambigit sa

inyong mga katungdanan sa priesthood, miapil kamo sa Dios diha sa Iyang buhat nga mao “ang pagpahinabo sa pagka-imortal ug sa kinabuhi nga dayon sa tawo.”²⁶ Ang mga kasinatian sama niini mopalambo sa inyong tinguha ug moandam kaninyo sa pagtudlo og paghinulsol ug pagbunyag sa mga kinabig isip mga misyonaryo. Moandam usab kini kaninyo alang sa tibuk kinabuhi nga pagserbisyo diha sa Melchizedek Priesthood.

Si Juan Bautista, Ang Atong Ehempro

Mga naghupot sa Aaronic Priesthood, kita adunay pribilehiyo ug katungdanan sa pagbuhat nga mahimong isigka mga sulugoon ni Juan Bautista. Gipadala si Juan isip usa ka awtorisado nga mensahero aron mosaksi kang Kristo ug modapit sa tanan nga maghinulsol ug magpabunyag—nga mao ang, iyang gigamit ang mga yawe sa Aaronic Priesthood nga atong gihisgutan. Nianang higayuna miingon si Juan, “Ako nagabautismo kaninyo sa tubig tungod sa paghinulsol: apan siya nga nagapaulahi kanako labi pang gamhanan kay kanako . . . : ang iyang igabautismo kaninyo mao ang Espiritu Santo, ug kalayo.”²⁷

Sa ingon, ang Aaronic Priesthood, uban sa mga yawe sa pagpangalagad sa mga anghel ug sa ebanghelyo sa pagpangandam, moandam sa paagi nga madawat sa mga anak sa Dios, pinaagi sa Melchizedek Priesthood, ang gasa sa Espiritu Santo, ang labing mahinungdanong gasa nga atong madawat niining kinabuhia.²⁸

Unsa ka talagsaon nga responsibilidad ang gihatag sa Dios ngadto sa mga naghupot sa Aaronic Priesthood!

Usa ka Pagdapit ug Saad

Mga ginikanan ug mga lider sa priesthood, nakita ba ninyo ang kaimportante sa tambag ni Presidente Monson nga tabangan ang mga batan-ong lalaki nga makasabut “kon unsay gipasabut . . . sa mahimong mga tighupot sa priesthood sa Dios?”²⁹ Ang pagsabut ug pagpalambo sa Aaronic Priesthood moandam kanila nga mahimong matinud-anong mga

maghuhupot sa Melchizedek Priesthood, mga misyonaryo nga puno sa gahum, ug matarung nga mga bana ug mga amahan. Pinaagi sa ilang pagserbisyo, ilang masabtan ug mabati ang katinuod sa gahum sa priesthood, ang gahum sa paglihok pinaagi sa ngalan ni Kristo alang sa kaluwasan sa mga anak sa Dios.

Mga batan-ong lalaki, ang Dios adunay ipabuhat kaninyo.³⁰ Ang inyong ordinasyon sa Aaronic Priesthood mahinungdanon sa pagtabang sa Iyang mga anak nga makadawat sa maulaong gahum ni Kristo. Mosaad ko kaninyo nga samtang ibutang ninyo kining sagradong mga katungdanan diha sa sentro sa inyong kinabuhi, mobati kamo sa gahum sa Dios nga wala pa mahitabo sukad. Makasabut kamo sa inyong pagka kamo isip anak sa Dios, nga gitawag uban sa balaang tawag nga mohimo sa Iyang buhat. Ug, sama ni Juan Bautista, motabang kamo sa pag-andam sa dalan alang sa pag-anhi sa Iyang Anak. Niining mga kamatuoran ako mopamatuod sa pangalan ni Jesukristo, amen. ■

MUBO NGA MGA SULAT

1. Mao kini ang nahitabo kang Moises. Human sa iyang talagsaong paghimamat sa Dios, nagsugod siya sa pagtan-aw sa iyang kaugalingon sa lahi nga paagi—isip anak sa Dios. Kini nga panglantaw nakatabang kaniya nga makabatok kang Satanas, kinsa mitawag kaniya nga “anak sa tawo” (tan-awa sa Moises 1:1–20). Tan-awa usab sa Thomas S. Monson, “Tan-awa ang Uban kon Unsa Sila sa Umaabut,” *Liahona*, Nob. 2012, 68–71; Dale G. Renlund, “Pinaagi sa Panan-aw sa Dios,” *Liahona*, Nob. 2015, 93–94.
2. Thomas S. Monson, miting sa pagpangulo sa kinatibuk-ang komperensya, Mar. 2011.
3. Tan-awa sa Dale G. Renlund, “Ang Priesthood ug ang Matubsanong Gahum sa Manluluwas,” *Liahona*, Nob. 2017, 64–67.
4. Tan-awa sa 2 Nephi 31–32; 3 Nephi 11:30–41; 27:13–21; Ether 4:18–19; Moises 6:52–68; 8:24.
5. Moroni 10:32; tan-awa usab sa *Isangyaw ang Akong Ebanghelyo: Usa ka Giya sa Misyonaryo nga Pangalagad* (2004), 6.
6. Tan-awa sa Doktrina ug mga Pakigsaad 13:1; 84:26–27; 107:20.
7. Mga Taga-Roma 10:14–15, 17. Si Joseph Smith nagtudlo sa samang kamatuoran: “Ang hugot nga pagtuo moabut pinaagi sa pagpaminaw sa pulong sa Dios, pinaagi sa pagpamatuod sa mga sulugoon sa Dios; kana nga pagpamatuod kanunay nga giubanan sa Espiritu sa pagpanagna ug pagpadayag” (*Mga Pagtulun-an sa mga*

Presidente sa Simbahan: Joseph Smith [2007], 467).

8. Moroni 7:22; tan-awa usab sa Alma 12:28–30; 13:21–24; 32:22–23; 39:17–19; Helaman 5:11; Moroni 7:21–25, 29–32; Doktrina ug mga Pakigsaad 20:35; 29:41–42; Moises 5:58; tan-awa usab sa Mateo 28:19; Mga Taga-Roma 10:13–17.
9. Tan-awa sa George Q. Cannon, *Gospel Truth*, sel. Jerrel L. Newquist (1987), 54.
10. Tan-awa sa James Strong, *The New Strong's Exhaustive Concordance of the Bible* (1984), Hebreohanon ug Chaldee nga diksyonaryo seksyon, 66, Gresyanhon nga diksyonaryo seksyon, 7.
11. Doktrina ug mga Pakigsaad 20:59.
12. Tan-awa sa Henry B. Eyring, “Nga Siya Mamahimo nga Lig-on Usab,” *Liahona*, Nob. 2016, 75–78; Alma 17:3; Helaman 5:18; 6:4–5; Doktrina ug mga Pakigsaad 28:3.
13. Tan-awa sa 1 Juan 2:14; Alma 17:2; 26:13; 32:42. Ang *Pagtuman sa Akong Katungdanan ngadto sa Dios: Alang sa mga Tighupot sa Aaronic Priesthood* usa ka bililhong himan nga makatabang sa pagtuman niini.
14. Doktrina ug mga Pakigsaad 11:21; tan-awa usab sa Doktrina ug mga Pakigsaad 84:85.
15. Tan-awa sa 2 Nephi 32:3; Doktrina ug mga Pakigsaad 42:14; 50:17–22.
16. Tan-awa sa Moroni 7:25.
17. Russell M. Nelson, “Honoring the Priesthood,” *Ensign*, Mayo 1993, 40; tan-awa usab sa Alma 27:4.
18. Tan-awa sa Alma 34:17; Helaman 14:13.
19. Doktrina ug mga Pakigsaad 84:27.
20. Tan-awa sa Doktrina ug mga Pakigsaad 20:46, 51–59, 73–79. Ang *Pagtuman sa Akong Katungdanan ngadto sa Dios: Alang sa mga Tighupot sa Aaronic Priesthood* usa ka bililhong himan nga makatabang kanato nga masabtan ang atong mga katungdanan.
21. Gordon B. Hinckley, “The Aaronic Priesthood—a Gift from God,” *Ensign*, Mayo 1988, 46.
22. Si Elder D. Todd Christofferson mipasabut: “Ang pagpabunyang diha sa tubig mao ang katapusan o labing mahinungdanon nga lakang sa paghinulsol. Ang pagsalikway sa sala, inubanan sa atong pakigsaad sa pagkamasulundon, mokompleto sa atong paghinulsol; sa tinuoray, ang paghinulsol dili mahumanon kon wala kana nga pakigsaad” (“Pagpalambo og Pagtuo diha kang Kristo,” *Liahona*, Sept. 2012, 14–15). Tan-awa usab sa D. Todd Christofferson, “Ang Balaanong Gasa sa Paghinulsol,” *Liahona*, Nob. 2011, 38–41; Hubad ni Joseph Smith, Mateo 26:24 (sa Giya ngadto sa mga Kasulatan).
Ang ordinansa sa sakrament naghatag kanato og “usa ka oportunidad matag semana sa pagbag-o sa sagradong mga pakigsaad nga nagtugot kanato nga mahimong tig-ambit sa maulaong grasya sa Manluluwas nga may samang epekto sa paglimpyo sa espirital nga paagi sa bunyang ug kumpirmasyon” (“Pagsabut sa Atong mga Pakigsaad ngadto sa Dios,” *Liahona*, Hulyo 2012, 21). Tan-awa usab

sa Dallin H. Oaks, “Always Have His Spirit,” *Ensign*, Nob. 1996, 59–61.

23. Dallin H. Oaks, “The Aaronic Priesthood and the Sacrament,” *Liahona*, Ene. 1999, 44.
24. Si Elder David A. Bednar mipasabut: “Ang mga ordinansa sa kaluwasan ug kahimayaan nga gipangalagad sa gipahiuli nga Simbahan sa Ginoo mas labaw pa kay sa mga ritwal o simbolikanhong mga buhat. Hinoon, kini naglangkob sa awtorisadong paagi diin ang mga panalangin ug gahum sa langit modagayday sa tinagsa natong kinabuhi” (“Kanunay nga Magbaton og Kapasayloan sa Inyong mga Sala,” *Liahona*, Mayo 2016, 60).
25. Doktrina ug mga Pakigsaad 20:73.
26. Moises 1:39.
27. Mateo 3:11.
28. Daghang lider sa Simbahan ang miila sa Espiritu Santo isip ang labing mahinungdanong gasa sa mortalidad.
Si Presidente Dallin H. Oaks miingon, “Ang pagbaton sa padayon nga pakig-uban sa Espiritu Santo mao ang labing bililhong butang nga atong mabatunan dinhi sa mortalidad” (“The Aaronic Priesthood and the Sacrament,” *Liahona*, Ene. 1999, 44).
Si Elder Bruce R. McConkie nagtudlo: “Namulong gikan sa panglantaw sa kahangturan, ang kinabuhing dayon mao ang labing mahinungdanon sa tanang gasa sa Dios. Apan kon hisgutan ang panglantaw niining kinabuhia lamang, ang gasa sa Espiritu Santo mao ang labing mahinungdanong gasa nga matagamtam sa usa ka mortal” (“What Is Meant by ‘The Holy Spirit?’” *Instructor*, Feb. 1965, 57).
Si Presidente Wilford Woodruff mipamatuod: “Kon anaa ang Espiritu Santo uban kanimo—ug ang tanan kinahanglan nga aduna—moingon ko kanimo nga walay laing mas importante nga gasa, walay mas importante nga panalangin, walay laing mas importante nga pagpamatuod nga gihatag ngadto ni bisan kinsang tawo sa yuta. Makasinati tingali kamo og pagpangalagad sa mga anghel; makakita tingali kamo og daghang mga milagro; makakita tingali kamo og daghang mga kahibulongan sa yuta; pero moingon ako nga ang gasa sa Espiritu Santo mao ang pinakaimportante nga gasa nga ikatugyan diha sa tawo” (*Mga Pagtulun-an sa mga Presidente sa Simbahan: Wilford Woodruff* [2004], 54–55).
Ug si Elder David A. Bednar midugang: “Ang mga sugo sa Dios nga atong gituman ug ang dinasig nga mga tambag gikan sa mga lider sa Simbahan nga atong gisunod sa kasagaran nagtumong alang sa pag-angkon og pakig-uban sa Espiritu. Labaw sa tanan, ang tanang pagtulun-an sa ebanghelyo ug mga kalihokan gitumong alang sa umaabut natong pagdawat sa Espiritu Santo sa atong kinabuhi” (“Dawat ang Espiritu Santo,” *Liahona*, Nob. 2010, 97).
29. Thomas S. Monson, miting sa pagpangulo sa kinatibuk-ang komperensya, Mar. 2011.
30. Tan-awa sa Moises 1:6.



Ni Presidente Russell M. Nelson

Pasiuna nga Pakigpulong

Kami mopahibalo og usa ka mahinungdanon nga kausaban sa atong mga korum sa Melchizedek Priesthood aron mas epektibo ang pagpatuman sa buhat sa Ginoo.

Salamat, Brother Holmes, sa imong importante nga mensahe.

Minahal nga kaigsoonan, gimingaw kaayo kami ni Presidente Thomas S. Monson ug Elder Robert D. Hales. Apan kinahanglan kaming “mopadayon sa buhat sa Ginoo.”¹

Mapasalamaton ko sa matag lalaki kinsa naghupot sa balaan nga priesthood. Kamo ang paglaum sa atong Manunubos nga nagtinguha “nga ang matag tawo unta mamulong sa ngalan sa Dios nga Ginoo, gani ang Manluluwas sa kalibutan.”² Buot Niya nga ang *taman* Niyang giorden nga mga anak nga lalaki magrepresentar Kaniya, mamulong alang Kaniya, molihok alang Kaniya, ug mopanalangin sa mga kinabuhi sa mga anak sa Dios sa tibuok kalibutan nga ang katuyoan mao “nga ang hugot nga pagtuo usab molambo sa [tibuok] yuta.”³

Ang pipila kaninyo nagserbisyo sa lugar nga ang Simbahan naestablisar sa daghan nang mga henerasyon. Ang uban nagserbisyo sa lugar nga ang Simbahan bag-ohay pa lang. Alang sa pipila, ang inyong mga ward dagko. Alang sa uban, ang inyong mga branch gagmay ug lagyo kaayo. Bisan pa man sa inyong indibidwal nga mga kahimtang, ang matag usa kaninyo sakop

sa korum sa priesthood nga adunay balaan nga mandato sa pagkat-on ug pagtudlo, sa paghigugma ug pagserbisyo sa uban.

Karong gabii, kami mopahibalo og usa ka mahinungdanon nga kausaban sa atong mga korum sa Melchizedek Priesthood aron mas epektibo ang pagpatuman sa buhat sa Ginoo. *Sa matag ward, ang mga high priest ug ang mga elder magtipon na karon isip usa ka korum sa mga elder.* Kini nga kausaban makapalambo og dako sa kapasidad ug abilidad sa mga kalalakian kinsa naghupot sa priesthood sa pagserbisyo sa uban. Ang mga prospective elder [gilauman nga mahimong elder] maabiabi ug ma-fellowship pinaagi niana nga

korum. Sa matag stake, ang kapanguloan sa stake magpadayon sa pagdumala sa korum sa mga high priest sa stake. Apan ang malangkob niana nga korum magbase sa *kasamtangang* mga calling sa priesthood, nga ipasabut sa dili madugay.

Si Elder D. Todd Christofferson ug si Elder Ronald A. Rasband sa Korum sa Napulog Duha karon modugang og tudlo kanato mahitungod niining importanting mga kausaban.

Kining mga kausaban gipaubos sa pagtuon sulod sa daghang mga bulan. Among gibati ang dinaliang panginahanglan sa pagpalambo sa atong pamaagi sa pag-amuma sa atong mga miyembro ug pag-report sa atong mga inter-aksyon uban kanila. Sa pagpalambo niini, kinahanglan natong lig-unon ang mga korum sa priesthood aron mahatagan og dakong pagtagad ang pagpangalagad sa gugma ug suporta nga gusto sa Ginoo alang sa Iyang mga Santos.

Kini nga mga kausaban dinasig sa Ginoo. Samtang ato kining ipatuman, mas mahimo kitang epektibo kay sa kaniadto.

Nalambigit kita sa buhat sa Makagagahum nga Dios. Si Jesus mao ang Kristo! Kita Iyang mga mapaubsanong sulugoon! Ang Ginoo mopanalangin kaninyo, mga kaigsoonan, samtang kita nagkat-on ug nagbuhat sa atong katungdanan, ako nag-ampo sa pangalan ni Jesukristo, amen. ■

MUBO NGA MGA SULAT

1. “Let Us All Press On,” *Hymns*, nu. 243.
2. Doktrina ug mga Pakigsaad 1:20.
3. Doktrina ug mga Pakigsaad 1:21.





Ni Elder D. Todd Christofferson
Sa Korum sa Napulog Duha ka mga Apostoles

Ang Korum sa mga Elder [Elders Quorum]

Ang pagbaton og usa ka korum sa Melchizedek Priesthood diha sa ward maghiusa sa mga naghupot sa priesthood sa pagpatuman sa tanang aspeto sa buhat sa kaluwasan.

Dili pa dugay human naorganisar ang Simbahan sa katapusang dispensasyon, ang Ginoo miingon diha sa usa ka pagpadayag, “Pinaagi sa inyong pag-ampo sa hugot nga pagtuo kamo makadawat sa akong balaod, nga kamo masayud unsaon pagdumala ang akong simbahan ug makaangkon sa tanan nga butang nga matarung diha sa akong atubangan.”¹ Kini nga baruganan gisunod sa Simbahan—ug kana nga saad gituman sa Ginoo—sukad niadto. Mga sundanan alang sa organisasyon sa priesthood ug pagserbisyo gipadayag na matag karon ug unya, sugod ni Propeta Joseph Smith sa dihang ang mga katungdanan sa priesthood ug mga korum unang natukod sa atong panahon. Mahinungdanong mga paghapsay ang gipadayag ug gipatuman atol sa pagdumala nila ni Presidente Brigham Young, John Taylor, ug Spencer W. Kimball, inubanan sa pagtahud ngadto sa Korum sa Napulog Duha, sa Seventy, mga high priest, ug ubang mga katungdanan ug mga korum sa Melchizedek ug Aaronic Priesthood.² Karon, sa makasaysayanon nga pamahayag pipila ka gutlo ang

milabay, si Presidente Russell M. Nelson mipahibalo og dugang nga mahinungdanon kaayong kausaban.

Kon tugutan akong ibalik ang tipik sa iyang pamahayag: “Karong gabii kami mopahibalo og usa ka mahinungdanon nga kausaban sa atong mga korum sa Melchizedek Priesthood aron sa mas epektibo nga pagpatuman

sa buhat sa Ginoo. *Sa matag ward, ang mga high priest ug ang mga elder magtipon na karon isip usa ka korum sa mga elder [elders quorum]. . . [ug] ang maglangkob sa [mga high priest sa stake] nga korum ibase na sa kasamtangang mga calling sa priesthood.”*

Si Presidente Nelson midugang:

“Kining mga kausaban gipaubos sa pagtuon sulod sa daghang mga bulan. Among gibati ang dinaliang panginahanglan sa pagpalambo sa pamaagi sa pag-amuma sa atong mga miyembro. . . . Sa maayong pagbuhat niana, kinahanglan natong lig-unon ang mga korum sa priesthood aron sa paghatag og mas dakong direksyon ngadto sa pagpangalagad sa gugma ug suporta nga maoy tuyo sa Ginoo alang sa Iyang mga Santos.

“Kini nga mga kausaban dinasig sa Ginoo. Samtang atong ipatuman kini, mahimo kitang mas epektibo kay sa unsa ta kaniadto.”³

Sa direksyon sa Unang Kapangulohan, si Elder Ronald A. Rasband ug ako modugang og pipila ka detalye nga sa among pagtuo makatubag sa inyong mga ipangutana.

Mga Korum sa Elder ug High Priest

Una, sa pagsubli, unsa ang mga kausaban alang sa mga grupo sa ward high priest ug sa mga korum sa mga elder? Sa mga ward, ang mga miyembro sa





sa korum? Dili, kini nga aksyon dili makapatangtang sa bisan unsa nga katungdanan sa priesthood diin si bisan kinsa nga sakop sa korum naordinahan na kaniadto. Sa inyo nang nahibaloan, ang usa ka lalaki mahimong maordinahan ngadto sa nagkalian-laing mga katungdanan sa priesthood sa tibuok niyang kinabuhi, ug dili mawad-an o matangtangan sa bisan unsa nga giorden kaniya kon makadawat man siya og bag-o. Samtang sa ubang mga sitwasyon ang naghupot sa priesthood mahimong moserbisyo og labaw sa usa ka katungdanan sa usa ka higayon, sama kon ang high priest nagserbisyo usab isip patriyarka o isip bishop, sa kasagaran dili siya molihok sa tanang katungdanan sa priesthood sa samang higayon. Ang mga Bishop ug Seventy, sama pananglit, dili aktibong magserbisyo nianang mga katungdanan human sila ma-release o mahimong emeritus. Sa ingon niana, bisan unsang lain nga katungdanan o mga katundanan sa priesthood nga huptan sa usa ka lalaki, samtang siya miyembro sa korum sa mga elder, siya magserbisyo isip usa ka elder.

Katuigan na ang milabay, si Presidente Boyd K. Packer nakabantay nga “ang priesthood mas dako pa kay sa bisan unsa nga mga katungdanan niini. . . . Ang priesthood dili mahimong tungaon. Ang usa ka elder naghupot og sama nga priesthood sa usa ka Apostol. (Tan-awa sa D&P 20:38.) Kon ang lalaki [aduna nay priesthood nga gitugyan kaniya], iyang madawat ang tanan niini. Hinuon, adunay mga katungdanan diha sa priesthood—mga pagbahinbahin sa katungod ug responsibilidad. . . . Usahay ang katungdanan mahisgutan nga ‘mas labaw’ o ‘mas ubos’ kay sa ubang katungdanan. Imbis ‘mas labaw’ o ‘mas ubos,’ ang mga katungdanan sa Melchizedek Priesthood, nagrepresentar sa nagkalain-laing mga dapit sa pagserbisyo.”⁴ Mga kaigsoonan, sinsero akong naglaum nga dili na kita maghisgut og “i-advance” ngadto sa laing katungdanan sa Melchizedek Priesthood.

Ang mga Elder padayon nga iorden nga mga high priest kon matawag sila sa kapangulohan sa stake, high council,

mga korum sa mga elder ug mga grupo sa mga high priest ipunon na karon ngadto sa usa ka korum sa Melchizedek Priesthood nga adunay usa ka kapangulohan sa korum. Kini nga korum, nga misaka ang gidaghanon ug pagkahiusa, pagatawgon nga “korum sa mga elder [elders quorum].” Ang mga grupo sa mga high priest [high priests groups] walaon na. Ang korum sa mga elder maglakip sa tanang elder ug mga prospective elder [gilauman nga mahimong elder] diha sa ward ingon man usab ang mga high priest kinsa sa kasamtangan *wala* magserbisyo sa bishopric, sa kapangulohan sa stake, sa high council, o isip nag-function nga mga patriyarka. Ang korum sa mga high priest sa stake maglangkob niadtong mga high priest *kinsa* nagserbisyo diha sa kapangulohan sa stake, sa mga bishopric, sa high council, ug isip nag-function nga mga patriyarka.

Ang Kapangulohan sa Korum sa mga Elder [Elders Quorum Presidency]

Unsaon sa pag-organisar ang kapangulohan sa korum sa mga elder? Ang kapangulohan sa stake mo-release sa kasamtangang mga lider sa grupo sa

mga high priest ug kapangulohan sa korum sa mga elder ug magtawag og bag-o nga presidente ug mga magtatambag sa korum sa mga elder sa matag ward. Ang bag-ong presidency sa korum sa mga elder [elders quorum] mahimong maglakip sa mga elder ug mga high priest, sa managlahing pangidaron ug kasinatian, nga magtinabangay sa pagserbisyo diha sa usa ka presidency sa korum. Ang usa ka elder o high priest mahimo rang moserbisyo isip presidente sa korum o isip magtatambag sa kapangulohan. Dili kini “pag-takeover [pagpuli]” sa mga high priest nganha sa korum sa mga elder. Among gilauman nga ang mga elder ug mga high priest maghiusa sa pagtrabaho sa bisan unsa nga kombinasyon diha sa kapangulohan sa korum ug sa pagserbisyo sa korum. Kini nga mga kausaban kinahanglang mapatuman sa labing sayon og daling panahon.

Mga Katungdanan sa Priesthood [Priesthood Offices] diha sa Korum sa mga Elder

Kini nga kausaban sa istruktura makapausab ba sa katungdanan sa priesthood nga gihuptan sa mga sakop

o bishopric—o sa ubang higayon kon buot sa presidente sa stake pinaagi sa maampuonng konsiderasyon ug inspirasyon. Sa dihang ang ilang mga termino sa pagserbisyo sa kapangulohan sa stake, high council, o bishopric mahuman, ang mga high priest mabalik ug ipon sa korum sa mga elder diha sa ilang ward.

Direksyon alang sa Presidente sa Korum sa mga Elder

Kinsa ang magdumala sa buhat sa presidente sa korum sa mga elder? Ang presidente sa stake magdumala sa Melchizedek Priesthood sa iyang stake. Busa, ang presidente sa korum sa mga elder direkta nga responsable ngadto sa presidente sa stake, kinsa mohatag og pagbansaybansay [training] ug giya gikan sa kapangulohan sa stake ug pinaagi sa high council. Ang bishop, isip nagdumala nga high priest sa ward, kanunay usab makigkita sa presidente sa korum sa mga elder. Ang bishop makigtambag uban kaniya ug mohatag og tukmang direksyon kalabut sa labing maayong paagi sa pagserbisyo ug pagpanalangin sa mga miyembro sa ward, makigtambayayong sa tanang organisasyon sa ward.⁵

Ang Katuyoan Niining mga Kausaban

Unsa ang mga katuyoan niining mga kausaban sa mga korum sa Melchizedek Priesthood? Ang pagbaton og usa ka korum sa Melchizedek Priesthood diha sa ward maghiusa sa mga tighupot sa priesthood sa pagpatuman sa tanang aspeto sa buhat sa kaluwasan, lakip na ang templo ug ang buhat sa family history nga kaniadto gipakigtakdo [coordinated] sa mga grupo sa mga high priest. Nagtugot kini sa mga miyembro sa korum sa bisan unsang pangidaron ug mga kagikan nga makabenepisyo gikan sa panglantaw ug kasinatian sa usag usa ug gikan sa managlahi nga mga hugna sa kinabuhi. Maghatag usab kini og dugang kahigayunan alang sa sinati na nga mga tighupot sa priesthood sa pagtudlo sa uban, lakip na ang mga prospective elder [gilauman nga mahimong elder], bag-ong mga miyembro, mga young

adult, ug niadtong mibalik na sa kalihukan sa Simbahan. Dili ko hingpit nga makapadayag sa akong kahinam nga maghuna-huna sa dugang nga mahinungdanong tahas nga sa umaabut buhaton sa korum sa mga elder. Ang kahibalo, kasinatian, kapasidad, ug kalig-on nga makita niining mga korum tilimad-on sa bag-ong sinugdanan ug bag-ong sumbanan sa serbisyo sa priesthood sa tibuok Simbahan.

Sa kinatibuk-ang komperansya baynte ka tuig ang milabay, akong giasoy ang istorya nga unang giasoy ni Elder Vaughn J. Featherstone sa Seventy nga gituohan nako nga angayang ibalik dinhi.

Niadtong 1918 si Brother George Goates usa ka mag-uuma nga nagtanom og sugar beats sa Lehi, Utah. Ang tingtugnaw miabut og sayo nianang tuiga ug mipakaging sa kadaghanan sa iyang beet crop diha sa yuta. Alang ni George ug sa iyang anak nga lalaki nga si Francis, ang ani gamay ra ug lisud. Sa samang higayon, ang epidemya sa influenza nagkagrabe. Ang makahahadlok nga sakit mikalas sa kinabuhi sa anak ni George nga si Charles ug sa tulo sa gagmayng anak ni Charles—duha ka batang babaye ug usa ka lalaki. Sulod lamang sa unom ka adlaw, ang masulub-ong si George Goates mihimo og tulo ka managlahi nga pagbiyahe ngadto sa Ogden, Utah aron mahatud ang mga lawas sa ilang balay alang sa paglubong. Sa pagtapus niining makalilisang nga higayon, Si George ug Francis miandam sa ilang karwahe ug namalik sa umahan.

“[Sa ilang pagbiyahe] ilang naagian ang daghang karwahe nga puno og mga beet nga gihakot ngadto sa pabrika ug gidrayban sa kasilinganan nga mga mag-uuma. Samtang sila milabay, ang matag drayber motimbaya og moingon: ‘Kumusta ka, Tiyo George,’ ‘Pasensya na, George,’ ‘Lisud imong naagian, George,’ ‘Aduna kay daghang mga higala, George.’

“Sa katapusang karwahe sakay ang . . . tawomtumon og nawong nga si Jasper Rolfe. Miwarawara siya og mali-payong mitimbaya ug misinggit: ‘Mao ra to ang tanan, Tiyo George.’

“[Si Brother Goats] miatubang kang Francis ug miingon: ‘Unta ato tong tanan.’

“Sa pag-abut nila sa ganghaan sa umahan, mikanaog si Francis gikan sa dakong karwahe sa red beet ug miabli sa pultahan samtang [ang iyang amahan] midiretso sa umahan. [Si George] mibira sa renda, mipahunong sa mga kabayo, . . . ug gianinaw ang umahan. . . . Walay sugar beet sa tibuok umahan. Dayon naamguhan niya unsay gipasabut ni Jasper Rolfe sa dihang misinggit siya og: ‘Mao ra to ang tanan, Tiyo George!’

“Nanaog [si George] sa karwahe, mihakop og tambok, brown nga yuta nga iyang gihigugma kaayo, ug unya . . . usa ka udlot sa beet, ug mitan-aw siya sa makadiyot niining mga simbolo sa iyang kahago, nga daw dili siya makatuo sa iyang nakita.

‘Dayon milingkod [siya] ibabaw sa pundok sa mga udlot sa beet—kining tawhana kinsa mihatud sa upat sa iyang mga pinalangga aron malubong sulod sa unom lamang ka adlaw; mihimo og lungon, mikalot og lubnganan, ug gani mitabang nga masul-ob ang sinina nga panglubong—kining talagsaon nga tawo kinsa wala gayud magduha-duha, wala mosibug, wala mopaling-paling sa kinatibuk-an niining mga pag-antus—milingkod sa pundok sa mga udlot sa beet ug mihilak sama sa gamayng bata.

“Dayon mibarug siya, gitrapuhan ang iyang mga mata, . . . mihangad sa



langit, ug miingon: ‘Salamat, Amahan, tungod sa mga elder sa among ward.’”⁶

Oo, salamat sa Dios tungod sa mga lalaki sa priesthood ug sa serbisyo nga ila unyang ihatag sa pagbayaw sa mga indibidwal ug mga pamilya ug sa pag-establisar sa Zion.

Ang Unang Kapangulohan, ang Korum sa Napulog Duha ka mga Apostoles, ug ang Kapangulohan sa Seventy naghunahuna niini nga mga kausaban sulod sa taas nga panahon. Uban sa tumang pag-ampo, makuti nga pagtuon sa mga pundasyon sa kasulatan bahin sa mga korum sa priesthood, ug kumpirmasyon nga kini kabubut-on sa Ginoo, magpadayon kaming magkahiusa sa tinud-anay nga usa ka lakang nga makapalambo sa Pagpahiuli. Ang giya sa Ginoo gipakita, ug nalipay ako niini, samtang ako mosaksi Kaniya, sa Iyang priesthood, ug sa inyong mga ordinasyon niana nga priesthood, sa ngalan ni Jesukristo, amen. ■

MUBO NGA MGA SULAT

1. Doktrina ug mga Pakigsaad 41:3.
2. Tan-awa, pananglitan, William G. Hartley, “The Priesthood Reorganization of 1877: Brigham Young’s Last Achievement,” sa *My Fellow Servants: Essays on the History of the Priesthood* (2010), 227–64; “To the Seventies,” in James R. Clark, comp., *Messages of the First Presidency of The Church of Jesus Christ of Latter-day Saints* (1965), 352–54; Hartley, “The Seventies in the 1880s: Revelations and Reorganizing,” in *My Fellow Servants*, 265–300; Edward L. Kimball, *Lengthen Your Stride: The Presidency of Spencer W. Kimball* (2005), 254–58; Susan Easton Black, “Early Quorums of the Seventies,” sa David J. Whittaker and Arnold K. Garr, eds., *A Firm Foundation: Church Organization and Administration* (2011), 139–60; Richard O. Cowan, “The Seventies’ Role in the Worldwide Church Administration,” in *A Firm Foundation*, 573–93.
3. Russell M. Nelson, “Pasiuna nga Pakigpulong,” *Liahona*, Mayo 2018, 54.
4. Boyd K. Packer, “What Every Elder Should Know—and Every Sister as Well: A Primer on Principles of Priesthood Government,” *Tambuli*, Nob. 1994, 17, 19.
5. Tan-awa sa *Handbook 2: Administering the Church* (2010), 7.3.1.
6. D. Todd Christofferson, “The Priesthood Quorum,” *Liahona*, Ene. 1999, 47; tan-awa usab sa Vaughn J. Featherstone, “Now Abideth Faith, Hope, and Charity,” *Ensign*, Hulyo 1973, 36–37.



Ni Elder Ronald A. Rasband

Sa Korum sa Napulog Duha ka mga Apostoles

Tan-awa! Ang Harianon nga Kasundalohan

Pagkamalipayon sa tanang naghupot sa Melchizedek Priesthood nga makabaton sa panalangin sa pagtudlo, pagkat-on, ug pagkuyugay nga moserbisyo.

Akong minahal nga mga kaigsoonan sa priesthood, giubanan og dakong pagpaubos ang akong pagbarug sa inyong atubangan niining makasaysayan nga okasyon, ubos sa sugo sa atong pinalanggang propeta ug Presidente, si Russell M. Nelson. Dako kaayo ang akong gugma ug pagpaluyo niining talagsaong tawo sa Dios ug sa bag-o natong Unang Kapangulohan. Akong idugang ang akong pagsaksi kang Elder D. Todd Christofferson ug sa uban nakong Kaigsoonan sa Korum sa Napulog Duha ka mga Apostoles nga ang gipahibalong mga kausaban niining gabhiona kabubut-on sa Ginoo.

Sigun sa gisulti ni Presidente Nelson, butang kini nga mainampuon gihisgutan ug gihunahuna sa senior nga Kaigsoonan sa Simbahan sulod sa dugayng panahon. Ang tinguha mao ang pagpangita sa kabubut-on sa Ginoo ug paglig-on sa mga korum sa Melchizedek Priesthood. Nadawat ang inspirasyon, ug niining gabhiona gipahibalo sa atong propeta ang kabubut-on sa Ginoo. “Sa pagkamatuod ang Ginoong Dios dili magbuhat sa bisan unsa, gawas kon ang iyang tinago

ipadayag niya sa iyang mga alagad ang mga manalagna”!¹ Pagkabulahan nato nga aduna kitay buhing propeta karon!

Sa tibuok namong kinabuhi, si Sister Rasband ug ako nakabiyaha sa kalibutan alang sa lain-lain nga buluhatong propesyunal ug sa Simbahan. Akong nakita ang hapit tanang han-ay sa matag unit sa Simbahan: usa ka gamayng branch sa Russia diin ang gidaghanon sa naghupot sa



Melchizedek Priesthood maihap ra sa tudlo, ang bag-o ug nagtubo nga ward sa Africa diin ang duha ka high priest ug mga elder nag-abut nga usa ra ka pundok kay diyutay ra ang naghupot sa Melchizedek Priesthood, ug ang estabilisado nang mga ward diin ang gidaghanon sa mga elder kinahanglan nga bahin-bahinon ngadto sa duha ka korum!

Bisan asa kami moadto, nasaksihan namo ang kamot sa Ginoo atubangan sa Iyang mga sulugoon, nag-andam sa katawhan ug sa agianan aron mapanalanginan ang Iyang mga anak sigun sa ilang matag panginahanglan. Dili ba misaad man Siya nga Siya “molakaw diha sa [atong] atubangan” ug “maanaa sa [atong] tuo nga kamot ug sa [atong] wala” ug ang Iyang “Espiritu mahimo nga anaa sa [atong] mga kasingkasing, ug ang [Iyang] mga anghel anaa libut [kanato]”?²

Sa paghunahuna kaninyong tanan, nahinumdom ko sa himno nga “Tan-awa! Ang Harianon nga Kasundalohan.”

*Tan-awa'ng! Harianon,
Nga kasundalohan,
Nagmartsa sa pagbuntog
Ngadto's panggubatan.
Lig-o'ng nagkahiusa,
Ang kasundalohan,
Sa Pangulo motuman
Nag-awit ang tanan.*³

Gitubag ni Elder Christofferson ang pipila ka mga pangutana nga siguradong motumaw gikan sa pahibalo nga ang grupo sa mga high priest ug mga korum sa elder, sa ward nga lebel, itipon na sa usa ka hinugpong, lig-ong kasundalohan sa kaigsoonan sa Melchizedek Priesthood.

Kini nga mga kausaban makatabang sa korum sa mga elder ug sa mga Relief Society nga magkahiusa sa ilang buhat. Mapasayon usab nila ang koordinasyon sa korum kauban sa bishopric ug sa ward council. Ug magtugot kini nga madelegar sa bishop ang mas daghang responsibilidad sa korum sa mga elder ug mga presidente sa Relief Society aron ang bishop ug ang iyang mga magtatambag makatutok sa nag-una



nilang mga katungdanan—ilabi na sa pagpangulo sa young women, ug sa young men nga naghupot sa Aaronic Priesthood.

Ang kausaban sa mga organisasyon ug mga function sa Simbahan komon ra. Niadtong 1883, gisultihan sa Ginoo si Presidente John Taylor: “[Kabahin] sa pagdumala ug sa organisasyon sa akong Simbahan ug sa Priesthood . . . akong ipadayag kaninyo, sa matag karon ug unya, gamit ang pamaagi nga akong gipili, sa tanan nga gikinahanglan alang sa umaabut nga kalamboan ug pagkahingpit sa akong Simbahan, alang sa pag-usab ug pagpadayon sa akong gingharian.”⁴

Karon, pipila ka pulong alang kaninyo mga kaigsoonan nga mga high priest—hibaloi nga kamo among gihi-gugma! Ang atong Amahan sa Langit nahigugma kaninyo! Kamo ang dako nga bahin sa harianong kasundalohan sa priesthood, ug dili kita makapadayon niini nga buhat nga wala ang inyong kamaayo, serbisyo, kasinatian, ug pagkamatarung. Mitudlo si Alma nga ang kalalakin-an tawagon nga mga high priest tungod sa hugot nilang pagtuo ug maayo nga mga buhat sa pagtudlo ug pagpangalagad sa uban.⁵ Kana nga kasinatian mas gikinahanglan karon kay sa kaniadto.

Diha sa daghang ward, posibling duna kitay mga high priest kinsa may

oportunidad na karon nga mapangulohan sa usa ka elder isip ilang presidente sa korum. May sumbanan na kita nga ang mga elder mangulo sa mga high priest sa pagkakaran dunay mga elder nga nagserbisyo isip mga branch president sa ubang mga rehiyon sa kalibutan diin ang mga high priest nagpuyo sa branch, ug dunay mga branch diin ang korum sa mga elder ra ang naorganisar ug anaay mga high priest.

Pagkamalipayon sa *tanang* Melchizedek Priesthood nga makabaton sa panalangin sa pagtudlo, pagkat-on, ug pakigtambayayong sa tanang miyembro sa ilang ward. Bisan asa kamo ug unsay inyong mga kahimtang, dapiton ko kamo sa mainampuon, matinudanon, ug malipayong paagi sa pagdawat sa bag-ong mga oportunidad nga mangulo o mapangulohan ug maghugpong sa pagserbisyo isip hut-ong sa mga kaigsoonan sa priesthood.

Akong hisgutan karon ang uban pang mga butang nga nagkinahanglan og katin-awan, samtang padayon natong iimplementar ang kabubut-on sa Ginoo kabahin sa organisasyon sa Iyang mga korum sa balaang priesthood.

Unsa ang mga kausaban sa mga korum sa high priest sa stake? Ang mga korum sa high priest sa stake magpadayon sa pag-function. Ang mga kapangulohan sa stake padayong



magserbisyo isip kapangulohan sa korum sa mga high priest sa stake. Hinoon, sigun sa gipahinumdom ni Elder Christofferson, ang mga sakop sa korum sa mga high priest sa stake karon maglangkob na sa mga high priest nga *kasamtangang* nagserbisyo sa stake presidency, isip mga sakop sa bishopric sa ward, isip mga sakop sa stake high council, ug sa functioning nga patriarch. Ang mga klerk sa ward ug stake ug ang mga executive secretary dili mga sakop sa korum sa mga high priest sa stake. Kon ang tawo nga aktibong nagserbisyo isip high priest, patriarch, Seventy, o Apostol mobisita sa ward ug gustong motambong og miting, makigtagbo siya sa korum sa mga elder.

Kon ang mga kaigsoonan nga ania niini nga mga calling ma-release sa dagan sa panahon, mobalik sila sa ilang unit isip mga sakop sa korum sa mga elder.

Unsa ang *tahas* sa korum sa mga high priest sa stake? Ang stake presidency makigtagbo sa mga sakop sa korum sa mga high priest aron sa pagpakigtambag, sa pagpamatuod, ug paghatag og training. Ang mga miting sa stake nga gi-outline sa atong mga handbook magpadayon uban sa duha ka kausaban:

Una, ang mga ward ug stake dili na maghimo og mga priesthood executive committee miting. Kon may espesyal nga problemang motumaw sa ward sama sa seryusong isyu sa pamilya o dili kasarangan nga hagit sa panginahanglan, pwede ra kining mahisgutan

sa dugang nga miting sa bishopric. Ang uban nga dili kaayo sensitibong mga hilisgutan pwede rang hisgutan sa ward council. Ang nailhan kaniadto nga stake priesthood executive committee meeting karon tawagon na og “high council meeting.”

Ikaduha, ang tinuig nga miting sa tanang na-orden nga high priest sa stake dili na ipahigayon. Hinoon, ang kapangulohan sa stake magpadayon sa paghimo og tinuig nga miting sa mga korum sa high priest sa stake nga gipahibalo karon.

Ang usa ka ward posible bang dunay sobra sa usa ka korum sa mga elder? Ang tubag oo. Sa pagsunod sa sanglitanan diha sa Doktrina ug mga Pakigsaad seksyon 107, bersikulo 89, kon ang ward may dili kasarangan nga gidaghanon sa aktibong mga Melchizedek Priesthood, mahimo rang magorganisar ang mga lider og sobra sa usa ka korum sa mga elder. Sa ingon niini nga sitwasyon, ang matag korum adunay makatarungan nga balanse base sa pangidaron, kasinatian, ug katungdanan [office] sa priesthood ug kalig-on.

Mopamatuod ko nga samtang magpadayon kita niining dinasig nga paghan-ay sa atong mga ward ug stake, atong makita ang daghang panalangin. Akong isulti ang pipila lang ka mga ehemplo.

Ubos sa direksyon sa bishop, mas daghang kapanguhaan sa priesthood ang makaabag sa buhat sa kaluwasan. Maglakip kini sa pagpundok sa Israel pinaagi sa templo ug buhat sa family

history, pakigtambayayong sa mga pamilya ug mga indibidwal nga nanginahanglan, ug pagtabang aron makadala og mga kalag ang mga misyonaryo ngadto kang Jesukristo.

Samtang ang kanhi nangulo nga mga lider mobalik sa pagpaambit sa ilang kasinatian diha sa korum sa mga elder, moresulta ang mas lig-on nga kasakopan sa korum.

Anaa ang mas dagkong panaglahi sa mga gasa ug kapasidad sulod sa korum.

Anaa ang mas dako nga pagka-mailin-ilinon ug pagkaadunay panahon sa pag-atubang sa dinaliang panginahanglan sa ward ug korum ug pagtuman sa managlahing buluhaton sa pagpangalagad.

Anaa ang malamboon nga paggiya ug panaghiusa samtang ang bag-ong elder ug sinati na nga high priest maginambitay sa mga kasinatian, magtambayayong, diha sa mga miting sa korum ug mga buluhaton.

Ang mga bishop ug mga presidente sa branch gawasnon na sa pag-atiman sa ilang mga calling sa pagbantay sa ilang mga karnero ug pagpangalagad sa nanginahanglan.

Nakasabut kami nga ang matag ward sa stake magkalahi. Samtang gisabut kini nga panaglahi, malaumon kami nga sundon ninyo kini nga mga kausaban diha-diha dayon human niini nga komperensya. Gihatagan kita og direksyon sa usa ka propeta sa Dios! Pagkadakong panalangin ug responsibilidad. Tumanon nato kini sa tanang pagkamatarung ug kakugi!

Akong ipahinumdom kaninyo: nga ang awtoridad sa priesthood moabut pinaagi sa pag-set apart ug pag-orden, apan ang tinuod nga gahum sa priesthood, ang gahum sa paglihok sa ngalan ni Ginoong Jesukristo, moabut lamang pinaagi sa matarung nga pagpakabuhi.

Mipahayag ang Ginoong Propeta Joseph Smith, propeta sa Pagpahiuli:

“Tan-awa, ug sud-onga, Ako moalima sa inyong mga panon, ug mopasamay og mga anciano [elder] ug ipadala ngadto kanila.

“Tan-awa, Ako modali sa akong

buluhaton diha sa iyang angay nga panahon.”⁶

Sa pagkatinuod, kini ang panahon nga nagpadali ang Ginoo sa Iyang buhat.

Gamiton nato kini nga oportunidad sa pagpamalandong ug pagpalambo sa atong kinabuhi aron mas masubay kini sa Iyang kabubut-on aron maangayan kita sa daghang panalangin nga Iyang gisaad alang sa matinuoron ug matinud-anon.

Kaigsoonan, salamat sa tanan nin-yong gibuhay nga mahimong kabahin niining talagsaong buhat. Hinaot nga magpadayon kita niining dako ug dungganong kawsa.

*Kon gubat mahuman na,
Kasamok wala na,
Kon tanan maghiusa
Ngad-to's panggubatan,
Sa Haring mahangturon,
Ang gamhanang panon
Moday'g sa Iyang ngalan,
Kini ang awiton:*

*Modaug, modaug,
Tungod sa Ginoo!
Modaug, modaug,
Pinaagi'ng Kristo!
Modaug, modaug, modaug,
Pinaagi'ng Kristo!⁷*

Karon kitang tanan mobarug nga mga saksi sa Ginoo nga nagpadayag sa Iyang kabubut-on pinaagi sa Iyang propeta, si Presidente Russell M. Nelson. Mopamatuod ko nga propeta siya sa Dios dinhi sa yuta. Mohatag ko sa akong pagsaksi bahin ni Ginooong Jesukristo, kinsa mao ang atong talagsaong Manunubos ug Manluluwas. Iya kini nga buhat, ug Iya kini nga kabubut-on, diin ako mohatag sa ligdong nga pagpamatuod sa ngalan ni Jesukristo, amen. ■

MUBO NGA MGA SULAT

1. Amos 3:7.
2. Doktrina ug mga Pakigsaad 84:88.
3. Tan-awa! A Royal Army,” *Hymns*, nu. 251.
4. Sa James R. Clark, comp., *Messages of the First Presidency of The Church of Jesus Christ of Latter-day Saints* (1965), 2:354.
5. Tan-awa sa Alma 13.
6. Doktrina ug mga Pakigsaad 88:72-73.
7. “Behold! A Royal Army,” *Hymns*, nu. 251.



Ni Presidente Henry B. Eyring

Ikaduhang Magtatambag sa Unang Kapangulohan

Dinasig nga Pagpangalagad

Makadawat kita sa Balaang Espiritu kon tutukan nato ang pagserbisyo ngadto sa uban. Mao kana ngano nga kita adunay priesthood nga responsibilidad sa pagserbisyo alang sa Manluluwas.

Minahal kong mga kaigsoonan, mapasalamaton ako sa pribilehiyo nga makapamulong kaninyo niining makasaysayan nga kinatibuk-ang komperensya. Napaluyohan na nato si Presidente Russell M. Nelson isip Presidente sa Ang Simbahan ni Jesukristo sa mga Santos sa Ulahing mga Adlaw. Kay ako

napanalanginan sa pakigtrabaho kaniya matag adlaw, akong gibati ang kumpirmasyon sa Espiritu nga si Presidente Nelson gitawag sa Dios nga mangulo sa tinuod nga Simbahan sa Ginoo.

Akong pagsaksi usab nga ang Ginoo mitawag ni Elder Gerrit W. Gong ug ni Elder Ulisses Soares nga moserbisyo isip sakop sa Korum sa Napulog





Duha ka mga Apostoles. Gihigugma ug gipaluyohan nako sila. Sila, sa ilang pagpangalagad, mopanalangin og mga kinabuhi sa tibuok kalibutan ug sa tanang henerasyon.

Kini nga komperensya makasaysayan alang sa ubang rason. Gipahibalo ni Presidente Nelson ang dinasig nga kalamboan sa organisadong plano sa Ginoo para sa Iyang Simbahan. Kana nga plano naglakip og bag-ong estruktura alang sa mga korum sa priesthood sa mga ward ug stake aron mas matuman nato ang atong mga responsibilidad sa priesthood. Kana nga mga responsibilidad tanan may kalabutan sa atong priesthood nga pag-atiman sa mga anak sa Amahan.

Ang plano sa Ginoo alang sa Iyang mga Santos sa paghatag og mapinangaong pag-atiman natuman sulod sa daghang katuigan. Sa unang mga adlaw sa Nauvoo, nagkinahanglan si Joseph Smith og organisadong paagi sa pag-atiman sa daghang kinabig nga mga kabus nga nangadto sa siyudad. Upat sa akong mga apohan sa tuhod kauban usab nila—ang mga Eyring, mga Bennion, ug mga Romney, ug mga Smith. Giorganisar sa Propeta ang pag-atiman niadtong mga Santos pinaagi sa hiyograpiya. Kadto nga mga dibisyon sa siyudad sa Illinois gitawag og “ward.”

Samtang namalhin ang mga Santos sa kapatagan, ang ilang pag-atiman sa

usag usa giorganisar isip mga “company.” Usa sa apohan nako sa tuhod (sa habig ni papa) mouliay na sa iyang misyon sa gitawag karon og Oklahoma dihang natagboan niya ang company sa agianan. Luya kaayo siya tungod sa sakit mao nga siya ug ang iyang kompanyon nagsakay sa gamay nga karwahe.

Ang lider sa company mipadala og duha ka batan-ong babaye sa pagtabang sa anaa sa nabiyaaan nga karwahe. Usa kanila, mao ang batan-ong sister nga nakabig sa Switzerland, mitan-aw sa usa sa mga misyonaryo ug gibati og kalooy. Naluwas siya tungod niana nga company sa mga Santos. Naulian siya igo nga makalakaw hangtud nakaabut sa Walog sa Salt Lake nga naa sa iyang kilid ang mga batan-ong tigluwas. Nagkahigugmaay sila ug nagminyo. Nahimo siya nakong apohan sa tuhod nga si Henry Eyring, ug siya akong apohan sa tuhod si Maria Bommeli Eyring.

Mga tuig ang milabay, dihang gihisgutan sa mga tawo ang grabing kalisud sa pagtabok sa kontinente, miingon siya, “Ah dili oy, dili kadto lisud. Samtang naglakaw kami, nag-istorya kami bahin sa dakong milagro sa among pagkakaplag sa tinuod nga ebanghelyo ni Jesukristo. Pinakamalipayon kadtong panahon nga akong mahinumduman.”

Sukad niadto, migamit ang Ginoo og lain-laing paagi sa pagtabang sa Iyang mga Santos sa pag-atiman sa usag usa.

Karon Iya kitang gipanalanginan og lig-on ug nagkahiusang korum diha sa ward ug stake nga lebel—mga korum nga naglihok kauban sa tanang organisasyon sa ward.

Ang mga ward sa lungsod, ang mga company ug ang nalog-on mga korum tanan nagkinahanglan og pinakaminus duha ka butang aron molampus ang katuyoan sa Ginoo alang sa Iyang mga Santos sa pag-atiman sa usag usa sama sa Iyang gihimo. Milampus sila dihang ang mga Santos mibati sa gugma ni Kristo alang sa usag usa labaw sa kaugalingon nilang interes. Gitawag kana sa kasulatan og “gugmang putli . . . ang tiunay nga gugma ni Kristo” (Moroni 7:47). Ug milampus sila dihang ang Espiritu Santo migiya sa tig-atiman aron mahibalo unsay nasayran sa Ginoo nga pinakamaayo alang sa tawo nga Iyang gitabangan.

Bag-ohay lang niining semanaha, akong nakita ang mga miyembro sa Simbahan nga naglihok nga daw sila nakapanglantaw kon unsay buhaton sa Ginoo, sumala sa gipahibalo dinhi karon. Mohatag ko og duha lang ka ehemplo kaninyo. Una, mao ang yano nga pakigpulong sa sakrament miting sa 14-anyos nga teacher sa Aaronic Priesthood kinsa nakasabut kon unsay pweding matuman sa mga naghupot sa priesthood sa ilang pagserbisyo sa Ginoo. Ikaduha, ang naghupot sa Melchizedek Priesthood kinsa, may gugma ni Kristo, nadasig sa pag-alagad sa usa ka pamilya.

Una, akong ihatag kaninyo ang mga pulong sa batan-ong lalaki nga namulong sa sakrament miting sa ward nga akong natambungan. Didto ko. Sulayi sa paghinumdom kon unsa ikaw niadtong 14 anyos ka pa ug nakadungog kaniya nga misulti og labaw sa mahibaloan sa usa ka batan-on:

“Ganahan gyud ko nga nasakop ko sa teachers quorum sa atong ward sukad nag-14 sa miaging tuig. Ang teacher duna gihapon sa tanang responsibilidad sa deacon dugangan pa og mga bag-o.

“Kay pipila kanato mga teacher, ang uban unya pa, ug kay ang tanan sa Simbahan napanalanginan sa

priesthood, importante nga tanan kita mahibalo og daghan pa sa mga katungdanan sa teacher.

“Una sa tanan, ang Doktrina ug mga Pakigsaad 20:53 nag-ingon, ‘Ang katungdanan sa teacher mao ang pagbantay diha sa simbahan sa kanunay, ug [pag]paduol ug [pag]lig-on kanila.’

“Sunod, ang Doktrina ug mga Pakigsaad 20:54–55 nag-ingon:

“Ug ang pagtan-aw nga walay kadautan sa simbahan, ni kapintas sa usag usa, ni pamakak, paglibak, ni pagsulti og kadautan;

“Ug ang pagtan-aw nga ang simbahan magkatigum sa kanunay, ug usab ang pagtan-aw nga ang tanan nga mga sakop naghimo sa ilang katungdanan.”

Mipadayon ang batan-on:

“Nagsulti kanato ang Ginoo nga atong katungdanan dili lang ang pag-atiman sa Simbahan apan sa pag-atiman usab sa mga tawo nga naa sa sulod sa Simbahan sama sa buhaton ni Kristo kay Iya man kini nga Simbahan. Kon ugaling naningkamot kita sa pagtuman sa mga sugo, pagmabination sa usag usa, pagmatinuoron, pagmaayo nga higala, ug ikalipay ang panagtigom, niana maangkon nato ang Espiritu ug mahibalo unsay gusto nga ipabuhat kanato sa Amahan. Kay kon dili, nan dili nato matuman ang atong calling.”

Mipadayon siya sa pag-ingon:

“Kon ang usa ka teacher mopili sa pagpakita og maayong ehemplo pinaagi sa pagkahimong maayo nga home teacher, motimbaya sa mga miyembro sa simbahan, moandam sa sakrament, motabang sa balay, ug tighimo og kalinaw, gipili niya ang pagtahud sa iyang priesthood ug pagtuman sa iyang calling.

“Ang pagkamaayo nga teacher wala lang magpasabut nga responsable kon naa kita sa simbahan o sa mga kalihokan sa Simbahan. Mitudlo si Apostol Pablo, ‘Pagkinabuhi ingon nga panig-ingnan sa sinultihan ug sa paggawi, sa gugma, sa pagtuo, sa kaputli’ (1 Timoteo 4:12).”

Dayon miingon ang batan-on:

“Bisan asa man kita o unsay atong gihimo, mamahimo kitang maayong

ehemplo sa pagkamatarung sa tanang panahon ug sa tanang dapit.

“Ako ug ang akong papa mag-home teach sa mga Brown.¹ Kada adto namo didto, may nindot kaayo kong panahon sa pakig-istorya ug maka-ila kanila. Usa ka butang nga ganahan kaayo nako sa mga Brown mao nga kada adto namo didto, andam silang maminaw ug kanunay silang may nindot nga istoryang ipaambit.

“Kon mas mailhan nato ang mga tawo sa ward tungod sa home teaching, mas mosayon ang pagbuhat sa sunod nga katungdanan sa teacher, ug kana mao ang pagtimbaya sa mga miyembro sa simbahan. Ang pagtabang sa mga tawo nga mobati nga gihangop ug gipaapil sa simbahan makatabang sa tanang miyembro sa ward nga mobati nga gihigugma ug andam nga moambit sa sakrament.

“Human matimbaya ang mga miyembro nga misimba, ang mga teacher motabang kada Domingo sa pag-andam sa sakrament. Ganahan gyud ko nga moapud-apod ug moandam sa sakrament dinhi sa ward kay ang tanan hilum kaayo. Kanunay kong mobati sa Espiritu kon mag-andam ko ug moapud-apod sa sakrament. Usa ka tinuod nga panalangin kanako nga mahimo ko kini kada Domingo.

“Ang ubang serbisyo sama sa pag-apud-apod sa sakrament makita sa mga tawo ug pasalamatan kita sa paghimo niini, apan ang ubang serbisyo sama sa pag-andam sa sakrament kasagarang gihimo nga walay nakamatikud. *Dili* importante nga *makita* kita nga nagserbisyo; ang importante nga nahibalo ang Ginoo nga nagserbisyo kita Kaniya.

“Isip mga teacher, maningkamot kita kanunay sa paglig-on sa Simbahan, sa atong mga higala, ug atong pamilya pinaagi sa pagtuman sa atong mga responsibilidad sa priesthood. Dili kanunay sayon, apan ang Ginoo walay isugo kanato ‘gawas kon siya moandam og paagi alang [kanato nga kita] makatuman sa butang diin siya misugo’ (1 Nephi 3:7).”

Santang mitapos kadto nga batan-on, padayon kong natingala sa iyang kahingkod ug kaalam. Gi-summarize



niya sa pag-ingon, “Nahibalo kong mas momaayo kita kon pilion nato ang pagsunod ni [Jesukristo].”

Laing sugilanon sa priesthood nga pagserbisyo giistorya usa ka bulan ang milabay sa sakrament miting sa ward. Didto na usab ako. Niining sitwasyuna, kining batid nga naghupot sa priesthood wala mahibalo nga samtang siya namulong gihulagway niya sa tukmang paagi unsay tinguha sa Ginoo nga mahitabo uban sa nalig-on nga mga korum sa priesthood. Mao kini ang unang detalye sa iyang istorya:

Siya ug iyang kompanyon sa home teaching gi-assign nga moserbisyo og pito ka pamilya. Hapit tanan nila *dili* gustong mabisitahan. Dihang nangadto ang mga home teacher sa ilang mga apartment, wala sila atubanga. Dihang gitawagan nila sa telepono, wala sila tubaga. Dihang nagbilin sila og mensahe, walay gibalik nga tubag. Kini nga senior kompanyon sa katapusan midangop sa pagsulat nga pangalagad. Gani nagsugod siya nga mogamit og yellow nga envelope sa panghinaot nga matubag.

Usa sa pito ka pamilya mao ang single sister nga dili kaayo aktibo nga langyaw gikan sa Europe. May duha siya ka batan-ong mga anak.

Human sa daghang pagsulay nga makontak siya, nakadawat siya og mensahe sa text. Direkto siyang mipahibalo nga wala siyay oras sa pakigkita



sa mga home teacher. Duha ang iyang trabaho ug naa usab sa militar. Ang una niyang trabaho mao ang pagka opisyal sa pulis, ug ang tumong niya sa panarbaho mao ang pagkahimong detective ug mobalik sa nasud nga iyang natawhan ug mopadayon og trabaho didto.

Ang home teacher wala gayud makabisita niya sa ilang balay. Panagsa mo-text siya sa iyaha. Matag bulan magpadala siya og sulat, pakapinan og holiday cards para sa matag anak.

Wala siya makadawat og tubag.

Apan nahibalo siya kinsay iyang mga home teacher, unsaon sila sa pagkontak, ug nga magpadayon sila niini nga priesthood nga pagserbisyo.

Dayon usa ka adlaw nakadawat siya og dinaliang text gikan niya. Nagkinahanglan kaayo siya og tabang. Wala siya makaila sa bishop apan nakaila siya sa iyang mga home teacher.

Sulod sa pipila ka adlaw, mobiya na siya sa estado alang sa usa ka bulan nga military training nga kalihokan. Dili niya mahimong ikuyog ang mga anak. Ang iyang mama, nga mobantay unta sa iyang mga anak, bag-o lang mibiyahe sa Europe aron atimanon ang iyang bana, sa medikal nga emerhensya.

Kining dili kaayo aktibo nga single sister dunay igong kwarta nga ikapalit og tiket padulong sa Europe para sa kamanghuran niyang anak apan dili paigo para sa iyang 12 anyos nga anak, nga si Eric.² Nangutana siya sa iyang home teacher kon makakita ba siya og

buotang LDS nga pamilya nga modala ni Eric sa ilang balay sulod sa sunod nga 30 ka adlaw!

Giteksan og balik sa home teacher nga buhaton niya ang tanan. Gikontak dayon niya ang iyang mga lider sa priesthood. Misugot ang bishop, kinsa mao ang tigdumalang high priest, nga iyang duolon ang mga sakop sa ward council, lakip ang presidente sa Relief Society.

Diha dayon nakakita ang presidente sa Relief Society og upat ka buotang LDS nga pamilya, nga may mga anak nga kaedad ni Eric, nga modala niya sa ilang balay kada usa sulod sa usa ka semana. Sulod sa misunod nga bulan, kini nga mga pamilya mipakaon ni Eric, gihatagan og kwarto sa puno na nilang apartment o gamay nga balay, gidala siya sa ilang naplano nang mga pagbakasyon sa pamilya, gipakuyog sa simbahan, gipaapil sa ilang mga family home evening, ug daghan pa.

Ang mga pamilya sa mga bata nga kaedad ni Eric mipaapil kaniya sa ilang mga korum miting sa deacon ug mga kalihokan. Atol niini nga 30 ka adlaw, kada Dominggo naa si Eric sa simbahan sa pinakaunang higayon sa iyang kinabuhi.

Pag-uli sa iyang mama gikan sa iyang training, padayong nagsimba si Eric, kasagaran kauban sa usa niining upat ka bolunter nga LDS nga pamilya nga nakighigala kaniya, lakip sa mga visiting teacher sa iyang mama. Niining

panahona, naorden siya nga deacon ug nagsugod sa pag-apud-apod sa sakrament kanunay.

Karon tan-awon nato ang kaugmaon ni Eric. Dili kita masurprisa kon mahimo na siyang lider sa Simbahan sa nasud nga iyang natawhan kon mouli na ang iyang pamilya didto—nahimo ang tanan tungod sa mga Santos kinsa nagtinabangay nga nagkahiusa, ubos sa direksyon sa usa ka bishop, sa pagserbisyo tungod sa gugmang putli sa ilang kasingkasing ug uban sa gahum sa Espiritu Santo.

Nahibalo kita nga ang gugmang putli importante aron maluwas kita sa gingharian sa Dios. Misulat si Moroni, “Gawas kon kamo adunay gugma nga putli kamo dili mahimo nga maluwas sa gingharian sa Dios” (Moroni 10:21; tan-awa usab sa Ether 12:34).

Nahibalo kita nga ang gugmang putli itugyan kanato human nato mabuhat ang tanan. Kinahanglan nga kita “[mag]-ampo ngadto sa Amahan uban sa tibuok kusog sa kasingkasing, nga kamo unta mapuno niini nga guma, diin siya mitugyan diha sa tanan kinsa tinuod nga mga sumusunod sa iyang Anak, nga si Jesukristo” (Moroni 7:48).

Para nako makadawat kita sa Balaang Espiritu kon tutukan nato ang pagserbisyo ngadto sa uban. Mao kana ngano nga kita adunay priesthood nga responsibilidad sa pagserbisyo alang sa Manluluwas. Kon moapil kita sa pagserbisyo sa uban, minus ang atong paghunahuna sa atong kaugalingon, ug ang Balaang Espiritu mas andam nga moduol kanato ug motabang sa atong tibuok kinabuhi nga paningkamot sa pag-angkon sa gasa sa gugmang putli nga gitugyan kanato.

Mosaksi ko kaninyo nga nasugdan na sa Ginoo ang dakong kalamboan sa Iyang plano aron mas magmadasigon kita ug magmanggiloy-on sa atong serbisyo sa priesthood nga pagpangalagad. Nagpasalamat ko sa Iyang gugma, nga walay puas nga Iyang gihatag kanato. Ako mopamatuod pinaagi sa sagradong pangalan ni Jesukristo, amen. ■

MUBO NGA MGA SULAT

1. Ang pangalan giusab.
2. Ang pangalan giusab.



Ni Presidente Dallin H. Oaks
Unang Magtatambag sa Unang Kapangulohan

Ang mga Gahum sa Priesthood

Ang pagpalambo sa balaang priesthood nga inyong gihuptan mahinungdanon sa buhat sa Ginoo diha sa inyong pamilya ug sa inyong mga calling sa Simbahan.

Minahal nga mga kaigsoonan, nakadungog kita og usa ka pinadayag nga pahibalo gikan ni Presidente Russell M. Nelson. Nakadungog kita og importante nga mga pagpasabut nila ni Elder Christofferson ug Elder Rasband ug ni Presidente Eyring. Unsa pa ang laing ipamulong karon, lakip sa idugang pa ni Presidente Nelson, mopasabut unsa ang buhaton ninyo, mga lider sa Ginoo ug mga naghupot sa priesthood, sa inyong mga responsibilidad. Aron sa pagtabang niana, akong ibalik ang pipila ka mga sukaranang mga baruganan nga nagdumala sa priesthood nga inyong gihuptan.

I. Ang Priesthood

Ang Melchizedek nga Priesthood mao ang balaan nga katungod nga gitugyan sa Ginoo aron sa pagpatuman sa Iyang buhat “sa pagpahinabo sa . . . kinabuhing dayon sa tawo”. (Moises 1:39). Niadtong 1829, gitugyan kini kang Joseph Smith ug Oliver Cowdery pinaagi sa mga Apostoles sa Manluluwas nga sila si Pedro, Santiago ug Juan. (tan-awa sa D&P 27:12). Kini sagrado

ug gamhanan labaw pa sa atong gahum sa paghulagway.

Ang *mga yawe* sa priesthood mao ang mga gahum sa pagdumala sa paggamit sa katungod sa priesthood. Busa, kon ang mga Apostoles mitugyan sa Melchizedek Priesthood ngadto ni Joseph ug Oliver, ila usab silang gihatagan og mga yawe sa pagdumala sa paggamit niini. (Tan-awa sa D&P 27:12–13).

Pero dili tanang mga yawe sa priesthood ang gitugyan niadtong higayuna. Ang tanang mga yawe ug kahibalo nga gikinahanglan alang niining “kapaigoan sa kahingpitan sa panahon” (D&P 128:18) gihatag nga “pagtulun-an ngadto sa lain nga pagtulun-an” (bersikulo 21). Dugang mga yawe gihatag diha sa Templo sa Kirtland pito ka tuig ang milabay (tan-awa sa D&P 110:11–16). Kining mga yawe gihatag aron sa pagdumala sa katungod sa priesthood sa dugang nga mga buluhaton nga gihatag niadtong higayuna, sama sa bunyag alang sa mga patay.

Ang Melchizedek Priesthood dili kahintang o titulo. Kini usa ka balaan nga gahum nga gitugyan aron magamit alang sa kaayuhan sa buhat sa Ginoo alang sa Iyang mga anak. Kinahanglan natong hinumduman kanunay nga ang mga lalaki kinsa naghupot sa priesthood *dili* “mao ang priesthood.” Dili tukma nga moingon nga “ang priesthood ug ang mga babaye.” Kinahanglan kitang mo-refer ngadto “sa *mga naghupot* sa priesthood ug sa mga babaye.”

II. Usa ka Pangalagad sa Pagserbisyo

Karon atong hunahunaon unsa ang gilauman ni Ginoong Jesukristo gikan niadtong naghupot sa Iyang priesthood—unsaon nato pagdala og mga kalag ngadto Kaniya.

Si Presidente Joseph F. Smith mitudlo: “Tinuod nga gisulti kini nga ang





Simbahan hingpit nga naorganisar. Ang problema lamang mao nga ang mga organisasyon dili hingpit nga nagtagad sa mga obligasyon nga gisangon diha kanila. Kon mahimo na silang hingpit nga makamatngon sa mga gikinahanglan diha kanila, sila motuman na sa ilang mga katungdanan sa mas labaw pa ka matitud-anon, ug ang trabaho sa Ginoo mahimo nga labaw pa ka lig-on ug labaw pa ka gamhanan ug makaimpluwensya dinhi sa kalibutan.”¹

Si Presidente Smith mipahimangno usab:

“Ang hinatag sa Dios nga titulo . . . nga giubanan sa pipila ka mga buhatan ug mga kapunungan sa Balaan nga Priesthood, dili pagagamiton ni isipon sama sa mga titulo nga nagagikan sa tawo; dili kini alang sa dayan-dayan ni kini pagpakita sa pagkahawod, kondili sa pagkatudlo ngadto sa mapainubsanon nga serbisyo sa trabaho sa usa ka Magtutudlo kang kinsa atong giangkong nga alagaran. . . .

“ . . . Naghago kita alang sa kaluwasan sa mga kalag, ug kinahanglan nga mobati kita nga kini ang atong pinakamahinungdanon nga katungdanan nga gitugyan kanato. Busa, kinahanglan nga mobati kita nga andam sa pagsakripisyo sa tanang butang, kon gikinahanglan, tungod sa paghigugma sa

Dios, sa kaluwasan sa mga tawo, ug sa kadaugan sa gingharian sa Dios dinhi sa yuta.”²

III. Ang mga Katungdanan sa Priesthood

Sa Simbahan sa Ginoo, ang mga katungdanan sa Melchizedek Priesthood adunay nagkalain-lain nga mga buluhaton. Ang Doktrina ug mga Pakigsaad nag-refer sa mga high priest isip “dili mopanaw nga mga presidente o mga sulugoon diha sa nagkalain-lain nga mga istaka nga nagkatag sa lain nga dapit” (D&P 124:134). Kini nagpasabut sa mga elders isip “mga ministro diha sa simbahan [sa Ginoo]” (D&P 124:137). Ania ang ubang panudlo niining laing mga buluhaton.

Ang high priest magdumala ug mangalagad sa espirituhanon nga mga butang (tan-awa sa D&P 107:10, 12). Dugang pa, sama sa gipanudlo ni Presidente Joseph F. Smith, “Tungod kay siya gi-orden nga high priest, [siya] kinahanglan mobati nga siya obligado . . . nga mopakita og ehemplo nga angayang sundon atubangan sa batan-on ug tigulang, ug ipahimutang ang iyang kaugalingon sa posisyon nga mahimong magtutudlo sa pagkamatarong, dili lamang sa mga lagda apan ilabi na pinaagi sa ehemplo—paghatag sa mga kabatan-onan og kaayuhan sa

kasinatian sa kapanahonan, ug sa ingon sa tinagsa mahimong gahum taliwala sa komunidad diin siya nagpuyo.”³

Sa ubang buluhaton sa usa ka elder, si Elder Bruce R. McConkie sa Korum sa Napulog Duha mitudlo: “Ang elder usa ka ministro ni Ginoong Jesukristo. . . . Siya gitahasan nga mobarug ug morepresentar sa iyang Agalon . . . Sa pagpangalagad ngadto sa iyang isig ka tawo. Siya ang sulugoon sa Ginoo.”⁴

Si Elder McConkie misaway sa ideya nga ang naghupot sa priesthood “usa lamang ka elder.” “Ang matag elder sa Simbahan naghupot og samang priesthood sa Presidente sa Simbahan . . .,” siya miingon. “Unsa ang usa ka elder? Usa siya ka Magbalantay, ang Magbalantay nga nagserbisyo sa toril sa Maayong Magbalantay.”⁵

Niining importanting buluhaton sa pagpangalagad sa toril sa Maayong Magbalantay, walay kalainan tali sa mga katungdanan sa high priest ug sa elder diha sa Melchizedek Priesthood. Diha sa mahinungdanon nga seksyon 107sa Doktrina ug mga Pakigsaad, ang Ginoo mipahayag, “Ang Halangdon nga mga Pari sunod sa kapunungan sa Melchizedek nga Pagkapari adunay katungod sa pagdumala diha sa ilang kaugalingon nga kahimtang, ubos sa pagmando sa kapangulohan, diha sa pagpangalagad sa espirituhanon nga mga butang, ug usab sa buhatan sa usa ka anciano [o mga buhatan sa Aaronic Priesthood]” (D&P 107:10; tan-awa usab sa bersikulo 12).

Ang labing importante nga baruganan alang sa tanang naghupot sa priesthood mao ang baruganan nga gitudlo ni propeta Jacob sa Basahon ni Mormon. Human nga siya ug ang iyang igsoong lalaki nga si Joseph gitudlo nga mga pari ug magtutudlo sa katawhan, siya mipahayag, “Ug kami mipalambo sa among mga buluhaton ngadto sa Ginoo, nag-angkon ngari kanamo sa katungod, manubag sa mga sala sa mga katawhan dinhi sa among mga ulo kon dili kami motudlo kanila sa pulong sa Dios uban sa tanan nga kakugi” (Jacob 1:19).

Mga igsoon, seryuso nga butang ang atong mga responsibilidad isip mga

nanaghupot sa priesthood. Ang ubang mga organisasyon mahimong matagbaw sa kalibutanon nga mga sumbanan sa binuhatan sa pagpaabut sa ilang mga mensahe ug pagbuhat sa ilang ubang mga buluhaton. Apan kita nga naghupot sa priesthood sa Dios adunay balaan nga gahum nga gani nagdumala sa pagsulod ngadto sa celestial nga gingharian sa Dios. Aduna kitay katuyoan ug responsibilidad nga gitin-aw sa Ginoo disa sa gipadayag nga pasiuna sa Doktrina ug mga Pakigsaad. Kinahanglan kita nga mosangyaw sa kalibutan:

“Nga ang matag tawo unta mamulong sa ngalan sa Dios ang Ginoo, gani ang Manluluwas sa kalibutan;

“Nga ang hugot nga pagtuo usab molambo sa yuta;

“Nga ang akong walay katapusan nga pakigsaad unta mapahimutang;

“Nga ang kahingpitan sa akong ebanghelyo mahimo tingali ikapahayag pinaagi sa mahuyang ug yano ngadto sa mga lumulupyo sa kalibutan” (D&P 1:20–23).

Sa pagpatuman niining balaan nga buluhaton, kinahanglan kitang magmatinud-anon sa “pagpalambo” sa atong priesthood nga mga calling ug responsibilidad. (Tan-awa sa D&P 84:33). Si Presidente Harold B. Lee, mipasabut kon unsa ang gipasabut sa pagpalambo sa priesthood: “Kon ang usa ka tawo mahimo nga tighupot sa priesthood, mahimo siya nga tinugyanan sa Ginoo. Kinahanglan siya maghunahuna sa iyang calling ingon og siya anaa sa pagkasinugo sa Ginoo. Kana mao unsa ang gipasabut sa pagpalambo sa priesthood.”⁶

Busa, mga kaigsoonan, kon ang Ginoo Mismo mohangyo kaninyo sa pagtabang og usa sa Iyang mga anak nga lalaki o babaye—nga Iyang gibuhat pinaagi sa Iyang mga sulugoon—buhaton mo ba kana? Ug kon ikaw mibuhat, molihok ka ba isip Iyang tinugyanan, nga “anaa sa buluhaton sa Ginoo,” naglaum sa Iyang gisaad nga tabang?

Si Presidente Lee adunay lain nga panudlo mahitungod sa pagpalambo sa priesthood: “Kon ikaw maggunit og magnifying glass ibabaw sa usa ka butang makahimo kana nianang

butanga nga daw modako kay sa imong makita sa yano nga pagtan-aw; mao kana ang magnifying glass. Karon, . . . Kon bisan kinsa nag-magnify sa ilang priesthood—nga maoy, makahimo niana nga mas dako kay sa una nilang gihunahuna nga kini mao—kana ang pamaagi nga ikaw mag-magnify sa imong priesthood.”⁷

Aniay ehemplo sa usa ka naghupot sa priesthood nga nagpalambo sa iyang priesthood nga responsibilidad. Nadunggan nako gikan ni Elder Jeffrey D. Erekson, akong kauban sa usa ka komperensya sa stake sa Idaho. Isip batan-on nga minyo nga elder, kabus kaayo ug mibati nga dili makahaman sa iyang katapusang tuig sa kolehiyo, si Jeffrey mihukom nga moundang ug modawat sa madanihon nga gitanyag nga trabaho. Pipila ka adlaw ang milabay ang presidente sa iyang elders korum miadto sa iyang panimalay.

“Nakasabut ka ba sa kaimportante sa mga yawe sa priesthood nga akong gihuptan?” ang presidente sa elders quorum nangutana. Sa dihang si Jeffrey miingon nga siya nakasabut, ang presidente misulti kaniya nga sukad siya nakadungog sa iyang tuyo nga moundang sa kolehiyo, gihadol siya sa Ginoo atol sa mga gabii nga dili siya makatulog aron sa paghatag ni Jeffrey niini nga mensahe: “Isip imong presidente sa elders korum, ako motambag kanimo sa dili pag-undang sa kolehiyo. Kana usa ka mensahe kanimo gikan sa Ginoo.” Si Jeffrey mipadayon sa pag-eskwela. Katuigan ang milabay ako siyang nahimamat sa dihang siya usa na ka malampuson nga negosyante ug nakadungog kaniya nga misulti sa nanambong nga mga tighupot sa priesthood, “Kato [nga tambag] nakahimo og dakong kalainan sa akong kinabuhi.”

Usa ka tighupot sa priesthood nga nag-magnify sa iyang priesthood ug calling, ug kana nakahimo og “dako nga kalainan” sa kinabuhi sa laing anak sa Dios.

IV. Priesthood diha sa Pamilya

Hangtud karon, nagsige ko og pamulong bahin sa mga buluhaton sa priesthood diha sa Simbahan. Karon

ako mamulong sa priesthood diha sa pamilya. Nagsugod ko sa mga yawe. Ang baruganan nga ang katungod sa priesthood magamit lamang ubos sa pagdumala sa usa ka naghupot sa mga yawe alang niana nga buluhaton importante diha sa Simbahan apan wala maglakip sa paggamit sa katungod sa priesthood diha sa pamilya.⁸ Ang amahan kinsa naghupot sa priesthood mangulo sa iyang pamilya pinaagi sa katungod sa priesthood nga iyang gihuptan. Dili na niya kinahanglan ang paggiya o pagtugot sa mga yawe sa priesthood aron sa pagtambag sa mga sakop sa iyang pamilya, magpahigayon og mga miting sa pamilya, maghatag og mga panalangin sa priesthood sa iyang asawa ug mga anak, o paghatag og panalangin sa pag-ayo ngadto sa mga sakop sa pamilya o sa uban.

Kon ang mga amahan mo-magnify sa ilang priesthood sa ilang kaugalingon nga pamilya, makapauswag kini sa misyon sa Simbahan og sa bisan unsa pa nga ilang buhaton. Ang mga amahan nga naghupot sa Melchizedek Priesthood kinahanglan nagtuman sa mga sugo aron makabaton sila sa gahum sa priesthood sa paghatag og mga panalangin ngadto sa mga sakop sa ilang pamilya. Ang mga amahan kinahanglan usab mga mag-ugmad og mahigugmaong mga relasyon sa pamilya aron ang mga sakop sa pamilya madasig sa pagpangayo sa mga panalangin sa ilang mga amahan. Ug ang mga ginikanan kinahanglan modasig og dugang mga panalangin sa priesthood sulod sa pamilya.

Mga amahan, lihok isip “katimbang nga kauban” sa inyong mga asawa, sama sa gitudlo sa pamahayag sa pamilya.⁹ Ug, mga amahan, kon kamo nahatagan og kahigayunan sa paggamit sa gahum ug impluwensya sa inyong katungod sa priesthood, himua kana pinaagi “sa pagdani, sa pagkainantuson, sa kalumo ug kaaghup, ug sa tiunay nga paghigugma” (D&P 121:41). Kanang taas nga sumbanan alang sa paggamit sa katungod sa priesthood maoy labing importante diha sa pamilya. Si Presidente Harold B. Lee mihatag niini nga saad human siya

mahimong Presidente sa Simbahan: “Wala pa sukad ang gahum sa priesthood, nga inyong gihuptan, labaw pa ka maanindot kay sa panahon sa usa ka krisis diha sa inyong panimalay, sa usa ka grabe nga sakit, o sa pipila ka dagkong desisyon nga kinahanglan nga pagahimoon. . . . Lakip sa gahum sa priesthood, nga mao ang gahum sa Langitnong Dios, mao ang gahum sa paghimo og mga milagro kon ang Ginoo magbuot niini, apan aron kita makagamit niana nga priesthood, kita kinahanglan nga takus sa paggamit niini. Ang pagkapakyas sa pagsabut niini nga baruganan mao ang pagkapakyas sa pagdawat sa mga panalangin sa paghupot nianang gamhanan nga priesthood.”¹⁰

Ang pagpalambo sa balaang priesthood nga inyong gihuptan mahinungdanon sa buhat sa Ginoo diha sa inyong pamilya ug sa inyong mga calling sa Simbahan.

Mopamatuod ako Kaniya kansang priesthood Iyaha. Pinaagi sa Iyang maulaong pag-antus ug sakripisyo ug pagkabanhaw, tanang lalaki ug babaye adunay kasigurohan sa imortalidad ug kahigayunan alang sa kinabuhing dayon. Matag usa kanato kinahanglang magmatinud-anon ug makugihon sa atong bahin niining talagsaong buhat sa Dios atong Amahan sa Kahangturan, sa pangalan ni Jesukristo, amen. ■

MUBO NGA MGA SULAT

1. *Mga Pagtulun-an sa mga Presidente sa Simbahan*: Joseph F. Smith (1998), 416.
2. *Mga Pagtulun-an*: Joseph F. Smith, 412–13, 415–6.
3. Joseph F. Smith, *Gospel Doctrine*, ika-5 nga ed. (1939), 182.
4. Bruce R. McConkie, “Only an Elder,” *Ensign*, Hunyo 1975, 66; ang emphasis sa orihinal wala mapreserbar.
5. Bruce R. McConkie, “Only an Elder,” 66; ang emphasis sa orihinal wala mapreserbar.
6. *Mga Pagtulun-an sa mga Presidente sa Simbahan*: Harold B. Lee (2000), 112.
7. *Teachings of Harold B. Lee*, ed. Clyde J. Williams (1996), 499.
8. Tan-awa sa Dallin H. Oaks, “Katungod sa Priesthood diha sa Pamilya ug sa Simbahan,” *Liahona*, Nob. 2005, 24–27.
9. Tan-awa sa “Ang Pamilya: Usa ka Pamahayag ngadto sa Kalibutan,” *Liahona*, Mayo 2017, 145.
10. *Mga Pagtulun-an*: Harold B. Lee, 117.



Ni Presidente Russell M. Nelson

Ang Pagpangalagad uban sa Gahum ug Katungod sa Dios

Mangalagad kita sa Iyang ngalan, sa Iyang gahum ug katungod, ug uban sa Iyang mahigugmaong pagbati.

Akong minahal nga mga kaigsoonan, salamat sa inyong debosyon sa Ginoo ug sa Iyang balaan nga buhat. Gikalipay gayud nako og dako nga ikauban kamo. Isip usa ka bag-o nga Unang Kapangulohan, magpasalamat kami sa inyong mga pag-ampo ug sa inyong mapaluyuhon nga mga pagserbisyo. Mapasalamaton kami sa inyong kinabuhi ug sa inyong pagserbisyo sa Ginoo. Ang inyong debosyon sa katungdanan ug inyong dili hinakog nga pagserbisyo sama ra kaimportante sa inyong mga calling mao usab kami sa among mga calling. Pinaagi sa tibuok kinabuhi nga pagserbisyo niining Simbahan, akong nakat-unan nga dili gayud kana igsapayan *asa* moserbisyo ang usa ka tawo. Ang gipakabanaan pag-ayo sa Ginoo mao ang *giunsa* pagserbisyo sa usa ka tawo.

Ako mopahayag og dakong pasalamat kang Presidente Thomas S. Monson, kinsa usa ka ehemplo kanako sa sobra 50 ka tuig. Ug sa iyang mga magtatambag, si Presidente Henry B. Eyring ug Presidente Dieter F. Uchtdorf,

ako mopadayag og tumang pagdayeg. Gidayeg nako sila sa ilang pagserbisyo sa Ginoo ug sa Iyang mga propeta. Kaning duha ka maunungon nga mga sulugoon nakadawat og bag-ong mga buluhaton. Padayon silang magserbisyo nga dunay kalagsik ug pasalig. Akong gipasidunggan ug gimahal silang duha.

Usa ka talagsaon nga panalangin ang pagserbisyo sa tinuod ug buhi nga Simbahan sa Ginoo uban sa Iyang katungod ug gahum. Ang pagpahuili sa priesthood sa Dios, naglakip sa mga yawe sa priesthood, nga bukas alang ngadto sa mga takus nga mga Santos sa Ulahing mga Adlaw mao ang labing mahinungdanon sa tanang mga espiritwal nga panalangin. Makita nato kadtong mga panalangin nga midagay-day ngadto sa mga babaye, mga lalaki, ug mga bata sa tibuok kalibutan.

Atong makita ang matinud-anong mga babaye kinsa nakasabut sa gahum nga anaa sa ilang mga calling ug diha sa pagtuga [endowment] ug ubang mga ordinansa sa templo. Kini nga mga babaye nakahibalo unsaon



pagsangpit sa mga gahum sa langit aron sa pagpanalipod ug paglig-on sa ilang mga bana, mga anak ug uban pang ilang gihigugma. Kini ang mga babaye nga adunay espiritwal nga kalig-on kinsa mangulo, motudlo, ug mangalagad nga walay kahadlok diha sa ilang mga calling uban sa gahum ug katungod sa Dios!¹ Mapasalamatan kaayo ko kanila!

Sa samang paagi, atong makita ang matitud-anon nga mga lalaki kinsa mibarug sa ilang pribilehiyo isip mga tighupot sa priesthood. Migiya ug miserbisyo sila pinaagi sa pagsakripisyo diha sa pamaagi sa Ginoo uban sa gugma, pagkamabination, ug pailub. Mipanalangin, migiya, mipanalipod, ug mipalig-on sila sa uban pinaagi sa gahum sa priesthood nga ilang gihuptan. Nagdala sila og mga milagro niadtong ilang giserbisuhan samtang gipabilin nila nga luwas ang ilang kaugalingon nga kaminyoon ug pamilya. Ilang gilikayan ang dautan ug gamhanang mga elder sa Israel.² Mapasalamatan kaayo ko kanila!

Karon, mahimo ba akong mosulti sa akong kabalaka? Mao kini: Daghan ra kaayo sa atong mga kaigsoonan ang wala kaayo makasabut sa konsepto sa gahum ug katungod sa priesthood. Molihok sila sama og pagtagbaw ra sa ilang kaugalingong hinakog nga mga tinguha ug mga gana kay sa mogamit

sa gahum sa Dios aron sa pagpanalangin sa Iyang mga anak.

Ako nahadlok nga daghan ra kaayo sa atong mga kaigsoonan ang wala makasabut sa mga pribilehiyo nga pwe-ding mailaha.³ Ang uban natong mga igsoon, sama pananglit, molihok nga sama sa wala sila makasabut kon unsa ang priesthood ug unsa ang mahimo nila tungod niini. Tuguti ko sa paghatag ninyo og piho nga mga ehemplo.

Dili pa lang dugay, mitambong ako og sakrament miting diin usa ka bata ang hatagan og ngalan ug panalangin sa amahan. Ang batan-ong amahan nagsapnay sa iyang bililhon nga masuso, mihatag kaniya og pangalan, ug dayon mihalad og matahum nga *pag-ampo*. Apan *wala* siya mohatag sa bata og panalangin. Kadtong matahum nga batang babaye nahatagan og pangalan apan walay panalangin! Kadtong minahal nga elder wala makahibalo sa kalainan tali sa pag-ampo ug sa panalangin sa priesthood. Uban niining katungod ug gahum sa priesthood, makapanalangin unta siya sa iyang masuso, apan wala niya mabuhat. Naghuna-huna ko, “Unsa ka sayang nga kahigayunan!”

Tuguti ko sa paghatag og laing mga pananglitan. May nahibaloan kaming mga kaigsoonan kinsa mi set-apart sa mga sister isip mga lider sa Primary, Young Women, o Relief Society ug mga magtutudlo apan napakyas sa

pagpanalangin kanila—sa pagpanalangin kanila og gahum sa pagtuman sa ilang mga calling. Mihatag lang sila og mga pahimangno og instruksyon. Makakita kita og takus nga amahan kinsa pakyas sa paghatag sa iyang asawa ug mga anak og mga panalangin sa priesthood kon kana mao gayud ang ilang gikinahanglan. Ang gahum sa priesthood napahiuli dinhi sa yuta, ug sa gihapon daghan kaayo sa atong mga kaigsoonan ang nakasinati og makalilisang nga mga pagsulay sa kinabuhi nga wala pa gayud makadawat og tinuod nga panalangin sa priesthood. Pagkadako nga trahedyal! Usa kana ka trahedyal nga mahimo ra natong wagtangon.

Mga kaigsoonan, naghupot kita sa balaan nga priesthood sa Dios! Anaa kanato ang Iyang katungod sa pagpanalangin sa Iyang katawhan. Hunahuna lang ang talagsaong pasalig nga gihatag sa Ginoo sa dihang Siya miingon, “Si bisan kinsa nga imong panalanginan Ako mopanalangin.”⁴ Atong pribilehiyo ang paglihok pinaagi sa ngalan ni Jesukristo sa pagpanalangin sa mga anak sa Dios sumala sa Iyang kabubut-on alang kanila. Mga presidente sa stake ug mga bishop, palihug siguroha nga ang matag sakop sa mga korum ubos sa inyong pagkatinugyanan makahibalo kon unsaon sa paghatag og panalangin sa priesthood—lakip

na sa personal nga katakus ug espi-ritwal nga pagpangandam nga gikina-anglan alang sa hingpit nga pagtawag sa gahum sa Dios.⁵

Sa tanang mga kaigsoonan nga naghupot sa priesthood, gidapit ko kamo nga magdasig sa mga miyembro sa pagtuman sa ilang mga pakigsaad, magpuasa ug mag-ampo, magtuon sa mga kasulatan, magsimba sa templo, ug magserbisyo nga may hugot nga pagtuo isip mga anak nga lalaki ug mga babaye sa Dios. Makatabang kita sa tanan nga makakita uban ang mata sa hugot nga pagtuo nga ang pagkama-sulundon ug pagkamatarung makapa-duol kanila kang Jesukristo, tuguti sila nga makatagamtam sa pagpakig-uban sa Espiritu Santo, ug makasinati og kalipay sa kinabuhi!

Ang timailhan sa tinuod ug buhi nga Simbahan sa Ginoong kanunay mao ang organisado, gidumala nga paningkamot sa pagpangalagad ngadto sa indibid-wal nga mga anak sa Dios ug ilang mga pamilya.⁶ Tungod kay kini Iyang Simbahan, kita isip Iyang mga sulugon mangalagad ngadto sa usa, sama sa Iyang gibuhay.⁷ Mangalagad kita sa Iyang ngalan, sa Iyang gahum ug katungod, ug uban sa Iyang mahigug-maong pagbati.

Usa ka kasinatian nako sobra 60 ka tuig na ang milabay sa Boston mitudlo kanako kon unsa gayud ka gamha-nang pribilehiyo ang one-on-one nga pagpangalagad. Usa ako ka resident surgeon niadto sa Massachusetts General Hospital—nagtrabaho og maadlaw, matag ikaduhang gabii, ug duha ka tapus sa semana matag bulan. Aduna akoy limitado nga panahon alang sa akong asawa, among upat ka mga anak, ug kalihukan sa Simbahan. Bisan pa niana, ang among presidente sa branch misangon kanako sa pagbisita sa panimalay ni Wilbur ug Leonora Cox uban sa paglaum nga si Brother Cox maaktibo og balik sa mga kalihukan sa Simbahan. Siya ug si Leonora na-seal na sa templo.⁸ Apan, si Wilbur wala na moapil sulod sa daghang mga katuigan.

Ako ug ang akong kauban [com-panion] miadto sa ilang panimalay. Sa among pagsulod, mainiton ming

giabi-abi ni Sister Cox,⁹ apan si Brother Cox daling milakaw ngadto sa laing lawak ug misira sa pultahan.

Miadto ko sa sirado nga pultahan ug nanuktok. Wala madugay, nakadungog ko og hinay nga “dayon.” Giablihan nako ang pultahan og nakita si Brother Cox nga naglingkod tupad sa han-ay sa mga panglingaw-lingaw [amateur] nga ekipo sa radyo. Niana nga gamayng lawak, nagdagkot siya og sigarilyo. Klaro kaayo, wala siya malipay sa akong pagbisita.

Mitan-aw ko sa lawak nga may kati-ngala ug miingon, “Brother Cox, gana-han kaayo kong makakat-on og dugang mahitungod sa buhat sa panglingaw-lingaw [amateur] nga radyo. Mahimo ka bang motudlo kanako mahitungod niini? Pasayloa ko pero dili ko magdu-gay karong gabhiona, pero pwedi ba kong makabalik sa sunod?”

Sa makadiyut nagduhaduha siya, ug dayon mitando. Mao kadto ang sinug-danan sa nahimong usa ka talagsaon nga panaghigalaay. Mibalik ko ug iya kong gitudloan. Misugod ako sa pag-higugma ug pagtahod kaniya. Pinaagi sa sunod-sunod nga pagbisita, ang katalagsaon niining tawhana mitumaw. Nahimo kaming suod nga managhigala, mao usab ang among mga minahal nga mahangturong kauban. Dayon, sa paglabay sa panahon, ang among pamilya mibalhin. Ang lokal nga mga lider nagpadayon sa pag-amuma sa pamilyang Cox.¹⁰

Mga walo ka tuig human niadtong unang pagbisita, ang Boston Stake natukod.¹¹ Makatag-an mo kinsa ang ilang unang presidente sa stake? Oo! Si Brother Cox! Sa mga katuigan sukad niadto, nakaserbisyo siya isip presidente sa misyon ug presidente sa templo.

Paglabay sa katuigan, isip sakop sa Korum sa Napulog Duha, gitahasan ko sa pagtukod og bag-o nga stake sa Sanpete County, Utah. Atol sa naandan nga mga interbyu, nahimuot ko nga nasurprisa nga nagkita mi pag-usab sa akong minahal nga higala si Brother Cox! Nadasig ko nga tawagon siya isip bag-o nga patriyarka sa stake. Human nako siya ma-orden, nagginaksanay mi ug nanghilak. Ang mga tawo sa lawak

nahibulong nganong kining duha ka hamtung nga mga lalaki nanghilak. Apan kami nahibalo. Ug si Sister Cox nahibalo. Mga luha kadto sa among kalipay! Sa hilum among nahinumdu-man ang dili katuohan nga panaw sa gugma ug paghinulsol nga nagsugod sobra 30 ka tuig na ang milabay, usa ka gabii sa ilang panimalay.

Kini nga istorya wala mahuman didto. Ang pamilya ni Brother ug Sister Cox midaghan nga naglakip sa 3 ka anak, 20 ka apo, ug 54 ka apo sa tuhod. Idugang niana ang ilang epekto sa gatasan ka mga misyonaryo, sa libuan pa diha sa templo, ug sa gatasan pa nga nakadawat sa patriyarka nga mga panalangin sa mga kamot ni Wilbur Cox. Ang impluwensya niya ug ni Leonora magpadayong moim-pluwensya sa daghang henerasyon sa tibuok kalibutan.

Ang mga kasinatian nga sama ni-ning Wilbur ug Leonora Cox nahitabo matag semana—hinaut pa unta, kada adlaw—sulod niining Simbahan. Ang mapahinunguron nga mga sulugon ni Ginoong Jesukristo mopatuman sa Iyang buhat, uban sa Iyang gahum ug katungod.

Mga igsoon, adunay mga pultahan nga atong maablihan, mga panalangin sa priesthood nga atong mahatag, mga kasingkasing nga atong maayo, mga palas-anon nga atong maalsa, pagpa-matuod nga atong malig-on, mga kina-buhi nga atong maluwas, ug hingpit nga kalipay nga atong madala ngadto sa mga panimalay sa mga Santos sa Ulahing mga Adlaw—ang tanan tungod kay kita naghupot sa priesthood sa Dios. Kita ang mga lalaki nga “gitawag ug giandam gikan sa katukuran sa kali-butan sumala sa daan nga kasayuran sa Dios, tungod sa [atong] naghingapin nga hugot nga pagtuo,” sa pagbuhat niini nga trabaho.¹²

Karong gabii giawhag ko kamo sa pagbarug uban kanako sa atong talagsaon nga mahangturong panag-igsoonay. Inig tawag nako sa inyong priesthood nga katungdanan, palihug og barug ug magpabiling magba-rug. Mga Deacon, palihug og barug! Mga Teacher, barug! Mga Priest! Mga



Ang mga General Authority ug Kinatibuk-ang mga Opisyal sa Ang Simbahan ni Jesukristo sa mga Santos sa Ulahing mga Adlaw

ANG UNANG KAPANGULOHAN



Dallin H. Oaks
Unang Magtatambag



Russell M. Nelson
Presidente



Henry B. Eyring
Ikaduhang Magtatambag

ANG KORUM SA NAPULOG DUHA KA MGA APOSTOLES



M. Russell Ballard



Jeffrey R. Holland



Dieter F. Uchtdorf



David A. Bednar



Quentin L. Cook



D. Todd Christofferson



Neil L. Andersen



Ronald A. Rasband



Gary E. Stevenson



Dale G. Renlund



Gerrit W. Gong



Ulisses Soares

ANG KAPANGULOHAN SA SEVENTY



L. Whitney Clayton



Craig C. Christensen



Lynn G. Robbins



Juan A. Uceda



Patrick Kearon









































































































Carl B. Cook



Robert C. Eby

MGA GENERAL AUTHORITY SEVENTY

(sa alpabetikal nga pagkahang-ay)

ANG PRESIDING BISHOPRIC

			
---	---	---	---

KINATIBUK-ANG MGA OPISYAL

SUNDAY SCHOOL

YOUNG WOMEN

RELIEF SOCIETY

PRIMARY

YOUNG MEN



Bishop! Mga Elder! Mga High Priest!
Mga Patriyarka! Mga Seventy! Mga
Apostoles!

Karon, mga igsoon, palihug pabiling magbarug ug modungan sa atong koro sa pagkanta sa tanang tulo ka bersikulo sa “Rise Up, O Men of God.”¹³ Samtang kamo nagkanta, hunahunaa ang inyong katungdanan isip gamhanang kasundaluhan sa Dios sa pagtabang sa pag-andam sa kalibutan alang sa Ikaduha nga Pag-anhi sa Ginoo. Ato kining katungdanan. Ato kining pribilehiyo. Mopamatuod ko sa pangalan ni Jesukristo, amen. ■

MUBO NGA MGA SULAT

1. Tan-awa sa Russell M. Nelson, “Usa ka Hangyo ngadto sa Akong mga Sister,” *Liahona* Nob. 2015, 96.
2. Tan-awa sa Russell M. Nelson, “Ang Bugti sa Gahum sa Priesthood,” *Liahona* Mayo 2016, 66–69; tan-awa usab sa Alma 13:7–8; Doktrina ug mga Pakigsaad 84:17–20, 35–38.
3. Tan-awa sa Doktrina ug mga Pakigsaad 84:19–22; 107:18–19; Hubad ni Joseph Smith, Genesis 14:30–31 (diha sa Giya ngadto sa mga Kasulatan).
4. Doktrina ug mga Pakigsaad 132:47.
5. Ang koneksyon tali sa gahum sa priesthood ug personal nga pagkamatayang mas hingpit nga napalambo diha sa Russell M. Nelson, “Ang Bugti sa Gahum sa Priesthood,” 66–69; tan-awa usab sa Doktrina ug mga Pakigsaad 121:34–37, 41–44.
6. Ang importanting tahas sa organisado, giniyahan nga paningkamot sa pagpangalagad ngadto sa mga indibidwal ug mga pamilya makita bisan asa ug bisan kanus-a nga maestablisar ang Simbahan ni Jesukristo. Tan-awa ang, para sa sanglitanan, Lucas 10:1–20; Mga Buhat 6:1–6; Mga taga-Efeso 4:11–14; Mosiah 18:9, 18–19, 27–29; Doktrina ug mga Pakigsaad 20:42, 51, 57.
7. Tan-awa sa 3 Nephi 17:9–10, 20–21.
8. Manti Utah Temple, Hunyo 15, 1937.
9. Ang pagpuasa ug pag-ampo ni Leonora kada Lunes sa daghang katuangan siguradong adunay gamhanang impluwensya alang sa kaayuhan.
10. Niadtong 1954, ang presidente sa branch nga si Ira Terry mitawag kang Wilbur nga mahimong superintendent sa Sunday School sa branch. Gidawat ni Wilbur ang tawag ug gibiyahan hangtud sa hangtud ang mga kinaiya nga sukwahi sa Pulong sa Kaalam. Iyang gigahin ang nahabilin sa iyang kinabuhi sa pagserbisyo sa buhat sa Manluluwas.
11. Niadtong 1962.
12. Alma 13:3.
13. “Rise Up, O Men of God,” *Hymns*, nu. 324.



Ni Elder Larry Y. Wilson
Sa Seventy

Dawata ang Balaang Espiritu isip Inyong Giya

Pagkatalagsaon nga gasa ang moabut niadtong mobutang sa ilang pagtuo kang Jesukristo. Kana nga gasa mao ang Balaang Espiritu.

Niining Dominggo sa Pasko sa Pagkabanhaw, ang atong mga hunahuna matumong ngadto sa Pagkabanhaw ni Ginoong Jesukristo ug sa walay sulod nga lubnganan nga naghatag og paglaum sa matag tumutuo sa kadaugan ni Kristo batok sa siguradong kapildihan. Ako nagtuo, uban ni Apostol Pablo, nga sama nga ang Dios “nagbanhaw kang Kristo gikan sa mga patay [sa ingon] magahatag usab [Siya] og kinabuhi nganha sa [atong] mga kamatayong mga lawas pinaagi sa iyang Espiritu nga nagapuyo sa sulod [kanato].”¹

Ang *paghatag og kinabuhi* nagpasabot nga buhion. Sama nga buhion og balik ni Kristo ang atong mga lawas human sa pisikal nga kamatayon pinaagi sa gahum sa Iyang Pagkabanhaw, sa ingon usab Siya mobuhi kanato gikan sa espiritwal nga kamatayon.² Sa basahon ni Moises, atong mabasa si Adan nga misinati niini nga matang sa pagkabuhi: “[Si Adan] gibunyagan, ug ang Espiritu sa Dios mikunsad diha kaniya, ug sa ingon siya natawo sa Espiritu, ug nabuhi diha sa iyang kaugalingon.”³

Pagkatalagsaon nga gasa ang moabut niadtong mobutang sa ilang

pagtuo kang Jesukristo. Kana nga gasa mao ang Balaang Espiritu nga naghatag kanato sa unsay gitawag sa Bag-ong Tugon nga “[kinabuhi] pinaagi kang Kristo.”⁴ Apan mobaliwala ba kita usahay sa ingon nga gasa?

Mga kaisogsoonan, usa ka talagsaong pribilehiyo nga “makadawat sa Balaang Espiritu alang sa [atong] paggiya,”⁵ nga gipakita sa mosunod nga kasinatian.

Panahon sa Gubat sa Korea, si Ensign Frank Blair miserbisyo sa usa ka barko nga sakyanan sa mga tropa nga nadedestino sa Japan.⁶ Ang barko dili kaayo dako aron magkinahanglan og pormal nga chaplain, mao nga ang kapitan mihangyo ni Brother Blair nga mahimong dili pormal nga chaplain sa barko, kay nakaobserbar nga ang batan-on usa ka tawo nga dunay pagtuo ug baruganan, gitahud pag-ayo sa tanang tripulante.

Misulat si Ensign Blair: “Ang among barko naabtan og dakong bagyo. Ang mga balud hapit 45 ka pye [14 ka metros] ang gitason. Oras nako sa pagbantay . . . diin nianang panahona usa sa among tulo ka mga makina mihunong sa pag-andar ug dunay gi-report nga liki sa sentro sa barko. Duha ang

among nahabiling makina, diin ang usa nag-andar lang sa katunga sa gikusgon niini. Anaa kami sa grabeng kakuyaw.”

Nahuman ni Ensign Blair ang iyang oras sa pagbantay ug nangandam na aron matulog sa dihang nanuktok ang kapitan sa iyang pultahan. Mihangyo siya, “Mahimo ba nga mag-ampo ka alang niining barko?” Siyempre, miuyon si Ensign Blair nga mobuhat sa ingon.

Nianang puntoha, si Ensign Blair mahimo lang nga mag-ampo sa yano, “Langitnong Amahan, palihug panalangini ang among barko ug ipabilin kami nga luwas,” ug dayon matulog na. Imbis niana, nag-ampo siya nga masayud kon aduna ba *siyay mabuhat* aron makatabang sa pagsiguro nga mahimong luwas ang barko. Agig tubag sa pag-ampo ni Brother Blair, ang Espiritu Santo midasig kaniya sa pag-adto sa lawak-pangnabigar sa barko [bridge], makigsulti sa kapitan, ug magkat-on pa. Iyang nasayran nga ang kapitan naningkamot sa pagtino unsa ka paspas nga padaganon ang nahabilin nga mga makina sa barko. Mibalik si Ensign Blair sa iyang cabin aron mag-ampo pag-usab.

Nag-ampo siya, “*Unsay akong mabuhat* aron makatabang sa pagsulbad sa problema sa mga makina?”

Agig tubag, ang Espiritu Santo mihunghong nga kinahanglan siyang molakaw libut sa barko ug mag-obserbar aron makakuha og dugang nga impormasyon. Mibalik na usab siya sa kapitan ug nangayo og pagtugot nga molakaw libut sa barko. Dayon, gihigtan og makasuporta nga pisi ang iyang hawak, migawas siya ngadto sa bagyo.

Nagbarug sa lubot sa barko, giobserbahan niya ang mga higanteng pala sa barko [propeller] samtang mogawas kini sa tubig kon ang barko maisa ibabaw sa balud. Usa ra ang hingpit nga naglihok, ug paspas kaayo ang pagtuyok niini. Human niini nga mga obserbasyon, nag-ampo pag-usab si Ensign Blair. Ang klarong tubag nga iyang nadawat mao nga ang nahabilin nga maayong makina nabug-atan ra kaayo ug kinahanglang pahinayan. Busa mibalik siya sa kapitan ug mihimo niana nga rekomendasyon. Nasurprisa ang kapitan, gisultihan siya nga ang engineer sa barko bag-o



lang misugyot og sukwahi niini—nga pakusgan nila ang kapasas sa maayong makina aron maunhan ang unos. Bisan pa niana, ang kapitan mipili nga sundon ang sugyot ni Ensign Blair ug gipahinayan ang makina. Pagka-kaadlawon ang barko luwas nga miabut sa kalma nga katubigan.

Paglabay lamang sa duha ka oras, ang maayong makina mihunong na gyud sa pag-andar. Uban sa katunga lang nga kusog sa nahabilin nga makina, ang barko nakahimo sa inanay nga pag-abut sa dunggoanan.

Misulti ang kapitan kang Ensign Blair, “Kon wala pa nato pahinayi kadto nga makina niadtong puntoha, maguba unta kini sa tunga-tunga sa unos.”

Kon wala kadto nga makina, wala gayud untay paagi sa pagtimon. Ang barko makulob unta, ug malunod. Mipasalamat ang kapitan sa batan-ong LDS nga opisyal ug miingon nga nagtuo siya nga ang pagsunod sa espiritwal nga mga impresyon ni Ensign Blair nakaluwas sa barko ug sa mga tripulante niini.

Karon, makapaukyab kaayo kini nga istorya. Samtang walay kalagmitan nga mag-atubang kita og ingon ka kuyaw nga mga kahimtang, kini nga istorya naglangkob og importanting mga giya kon unsaon nato nga *mahimong* mas kanunay nga makadawat sa giya sa Espiritu.

Una, kabahin sa pagpadayag, kinahanglang magpakabuhi kita sa paagi nga nagtugot kanato nga makadawat og langitnong pag-aghat. Si Ensign Blair nagpakabuhi og limpyo ug

matinud-anong kinabuhi. Kon dili pa siya masulundon, *wala* unta siyay espiritwal nga pagsalig nga gikinahanglan aron mag-ampo sama sa iyang gibuhit alang sa kasiguroan sa iyang barko ug makadawat og ingon ka piho nga giya. Kinahanglang maningkamot ang matag usa kanato nga mapahiangay ang atong kinabuhi sa mga sugo sa Dios aron Iyang magiyahan.

Usahay dili kita makadawat og mga pag-aghat sa espiritu tungod kay dili kita takus. Ang paghinulsol ug pagkamasulundon mao ang paagi sa pagkab-ot og klaro nga komunikasyon. Ang Daang Tugon nga pulong sa *paghinulsol* nagpasabut nga “moliko” o “mobalik.”⁷ Kon gibati ninyo nga layo sa Dios, gikinahanglan lamang ninyong mohimo sa desisyon nga mobiya sa sala ug moatubang sa Manluluwas, diin makita ninyo Siya nga naghulat kaninyo, nagtuyhad sa Iyang mga kamot. Mahinamon Siya nga mogiya kaninyo, ug gikinahanglan lamang ninyong mag-ampo aron makadawat pag-usab niana nga giya.⁸

Ikaduha, si Ensign Blair wala lang mohangyo sa Ginoo sa *pagsulbad* sa iyang problema. Nangutana siya unsay *mahimo niyang buhaton* aron mahimong parte sa solusyon. Sa samang paagi mahimo kitang mangutana, “Ginoo, unsay kinahanglan nakong buhaton *aron mahimong parte sa solusyon?*” Imbis nga maghimo og talaan sa atong mga problema diha sa pag-ampo ug mohangyo sa Ginoo sa pagsulbad niini, angay kitang mangita og mas aktibong mga paagi nga makadawat sa tabang sa Ginoo ug

mopasalig sa paglihok sumala sa giya sa Espiritu.

Adunay ikatulo nga importanting leksyon sa istorya ni Ensign Blair. Makahimo ba siya sa pag-ampo uban sa ingon ka kalma nga kasiguroan kon wala pa siya makadawat og giya gikan sa Espiritu sa nangaging mga okasyon? Ang pag-abut sa bagyo dili mao ang panahon nga magtinguha sa gasa sa Espiritu Santo human nga gipasagdan kini ug maghunahuna unsaon sa paggamit niini. Kining batan-ong lalaki klaro nga nagsunod og sundanan nga gigamit na niya sa makadaghan kaniadto, lakip isip full-time nga misyonaryo. Magkinahanglan kita sa Balaang Espiritu isip atong giya sa malinawong katubigan, aron ang Iyang tingog dili nato masaypan panahon sa makalilisang nga unos.

Ang uban tingali naghunahuna nga dili kita angay nga magdahum og inadlaw-adlaw nga giya gikan sa Espiritu tungod kay “dili maayo nga [ang Dios] magsugo diha sa tanan nga mga butang,” basin pa unya mahimo kitang tapulan nga mga sulugoon.⁹ Kini nga kasulatan, hinoon, gihatag ngadto sa pipila sa nag-unang mga misyonaryo kinsa mihangyo ni Joseph Smith nga modawat og pinadayag nga sila unta ang modawat alang sa ilang kaugalingon. Sa nag-una nga bersikulo, ang Ginoo misulti kanila nga moadto sa mission field “*ingon sa ilang gikauyunan tali sa ilang mga kaugalingon ug kanako.*”¹⁰

Kini nga mga misyonaryo gusto og piho nga pagpadayag mahitungod sa ilang pagbiyahe. Wala pa sila makakat-on sa pagpangita og kaugalingon nilang giya sa personal nga mga butang. Ang Ginoo mitawag niini nga kinaiya kon unsa gayud kini: pagkatapulan. Ang unang mga miyembro sa Simbahan tingali nalipay kaayo nga adunay tinuod nga propeta nga nameligro sila nga mapakyas sa pagkat-on kon unsaon sa pagdawat og pinadayag sa ilang kaugalingon. Ang pagkamapaningkamuton sa kaugalingon sa espirital nga paagi mao ang pagkadungog sa tingog sa Ginoo pinaagi sa Iyang Espiritu alang sa kaugalingong kinabuhi.



Si Alma mitambag sa iyang anak nga “[makil]tambag uban sa Ginoo sa *tanan nimo nga buhaton.*”¹¹ Ang pagpuyo niini nga paagi—kasagaran natong gitawag nga “pagpakabuhi pinaagi sa Espiritu”—usa ka halangdong pribilehiyo. Nagdala kini og usa ka pagbati sa kalinaw ug kasiguroan ingon man sa mga bunga sa Espiritu sama sa gugma, kalipay, ug kalinaw.¹²

Ang abilidad ni Ensign Blair sa pagdawat og pinadayag miluwas kaniya ug sa iyang mga kaubanan sa barko gikan sa grabeng unos. Ubang mga matang sa mga unos ang midagsa karon. Ang sambingay sa kahoy sa kinabuhi diha sa Basahon ni Mormon¹³ naghatag og kusganong paghulagway kon unsaon sa pagkab-ot og espirital nga kasiguroan sa ingon nga kalibutan. Kini nga damgo naghigut sa kalit nga mga gabon sa kangitngit nga motumaw aron sa pagdala og espirital nga kalaglagan sa mga miyembro sa Simbahan nga naglakaw sa dalan pabalik sa Dios.¹⁴

Sa paghunahuna niini nga hulagway, akong mahanduraw ang daghang mga tawo nga naglakaw niana nga dalan, ang uban hugtanon nga naggunit ang mga kamot sa gunitanan nga puthaw, apan daghan pang uban nga nagsunod lamang sa mga tiil sa mga tawo sa ilang atubangan. Kining ulahi nga paagi nagkinahanglan og gamay ra nga panghunahuna o paningkamot. Mahimo lamang kamong mobuhat ug maghunahuna sa unsay gibuhit ug gihunahuna sa uban. Mosalir kini kon walay seryuso

nga mga pagsulay. Apan ang mga unos sa pagpanglingla ug mga gabon sa mga bakak motumaw nga walay pasidaan. Niini nga mga sitwasyon, ang pagkapamilyar sa tingog sa Espiritu Santo usa ka butang nga nag-agad ang espirital nga kinabuhi ug kamatayon.

Ang kusganong saad ni Nephi nga “kinsa kadto nga mopatalinghug sa pulong sa Dios, ug *hugot nga mogunit niini* dili gayud . . . malaglag; ni ang mga pagtintal ug ang nagdilaab nga mga panâ sa kaaway makabuntog kanila ngadto sa pagkabuta, sa pagdala kanila sa kalaglagan.”¹⁵

Ang pagsunod sa mga tiil sa mga tawo nga nag-una kaninyo diha sa dalan dili igo. Dili lamang kita maka-buhat ug maghunahuna sa unsay gibuhit ug gihunahuna sa uban; kinahanglang magpuyo kita og giniyahan nga kinabuhi. Kinahanglang ang matag usa kanato magkupot ang kaugalingong kamot diha sa gunitanan nga puthaw. Dayon mahimo kitang moduol sa Ginoo uban sa mapainubsanon nga pagsalig, nasayud nga Siya “moagak [kanato] pinaagi sa kamot, ug mohatag [kanato] og tubag sa [atong] mga pag-ampo.”¹⁶ Sa pangalan ni Jesukristo, amen. ■

MUBO NGA MGA SULAT

1. Mga Taga-Roma 8:11; tan-awa usab sa Juan 14:16.
2. Tan-awa sa 2 Nephi 2:21; Alma 42:9.
3. Moises 6:65.
4. Mga Taga-Roma 8:2; tan-awa usab sa 2 Nephi 25:25.
5. Doktrina ug mga Pakigsaad 45:57.
6. Ang kasinatian gipaambit uban sa pagtugot ni Frank Blair. Si Brother Blair, karon 89 anyos na, anaa sa Conference Center alang niini nga pakigpulong.
7. Ang Hebreohanon nga pulong nga gihubad isip “paghinulsol” diha, sama pananglit, sa Ezekiel 14:6 mao ang *shoob* (gi-transliterate). Nagpasabut kini nga “mobalik.” (Tan-awa sa James Strong, *The Exhaustive Concordance of the Bible* [1890], nu. 7725.)
8. Tan-awa sa Jacob 6:5; Mosiah 16:12; Alma 5:33; 19:36; 29:10; 3 Nephi 9:14.
9. Doktrina ug mga Pakigsaad 58:26.
10. Doktrina ug mga Pakigsaad 58:25; emphasis gidugang.
11. Alma 37:37; emphasis gidugang.
12. Tan-awa sa Mga Taga-Galacia 5:22.
13. Tan-awa sa 1 Nephi 8; 12; 15.
14. Tan-awa sa 1 Nephi 8:23–24; 12:17.
15. 1 Nephi 15:24; emphasis gidugang.
16. Doktrina ug mga Pakigsaad 112:10.



Ni Reyna I. Aburto

Ikaduhang Magtatambag sa Kinatibukang Kapangulohan sa Relief Society

Magkahiusa

Aron makab-ot ang matahum natong destinasyon, nagkinahanglan kita sa usag usa, ug sa panaghiusa.

Usa sa labing nindot nga nilalang sa yuta mao ang monarch nga alibangbang. Sa usa ka biyahe ngadto sa Mexico aron mogahin sa Pasko uban sa pamilya sa akong bana, nangadto kami og sanctuary sa alibangbang, diin minilyon ka monarch nga alibangbang ang nangadto sa tingtugnaw. Matahum kaayong tanawon kini nga talan-awon ug among nahanduraw ang ehemplo sa paghiusa ug kamasulundon sa balaang mga

balaod nga gipakita sa mga nilalang sa Dios.¹

Ang monarch nga alibangbang mga batid sa pagnabigar. Gamiton nila ang posisyon sa adlaw aron makita ang direksyon sa angay nilang adtoan. Matag tingpamulak, mobiyahe sila og liboan ka milya gikan sa Mexico ngadto sa Canada, ug matag tinglarag, mamalik sila sa mao gihapong lunhawng kakahoyan sa Mexico.² Buhaton nila kini kada tuig, magkapa-kapa sa gamiting

nga mga pako matag higayon. Atol sa ilang panaw, magtapok sila inig kagabii sa kakahoyan aron mapanalipdan sila sa kabugnaw ug sa mga mokaon kanila.³

Ang pundok sa mga alibangbang gitawag og kaleidoscope.⁴ Dili ba nindot kana nga hulagway? Ang matag alibangbang sa kaleidoscope talagsaon ug lahi, apan kining daw malumong mga nilalang gidesinyo sa mapinangaong Tiglalang nga may abilidad sa paglahutay, pagbiyahe, pagdaghan, ug pagpasanay og kinabuhi samtang magbalhin-balhin sila sa kabulakan, magsabwag sa pollen. Ug bisan managlahi ang matag alibangbang, nagtambayayong sila aron mahimong matahum ug mabungahon ang kalibutan.

Sama sa monarch nga mga alibangbang, nagpanaw kita balik sa atong langitnong panimalay, diin didto atong ikahiusa ang Langitnon natong mga Ginikanan.⁵ Sama sa mga alibangbang, gihatagan kita og balaang mga hiyas aron makanabigar kita sa kinabuhi sa, “[pag]puno . . . sa sukod sa [atong] pagkalalang.”⁶ Sama nila, kon mabugkos kita sa paghiusa,⁷ panalipdan kita sa Ginoo “ingon sa usa ka himongaan [magtigum] sa iyang mga pisô sa ilawom sa iyang mga pakô”⁸ ug himoon kitang matahum nga kaleidoscope.

Mga bata, mga batan-on, mga igsoong lalaki ug babaye, naghiusa kita niini nga panaw. Aron makab-ot ang matahum natong destinasyon, nagkinahanglan kita sa usag usa, ug sa panaghiusa. Misugo ang Ginoo kanato, “Paghiusa; ug kon kamo dili magkahiusa kamo dili ako.”⁹

Si Jesukristo maoy sukaranang ehemplo sa pagkahiusa sa Iyang Amahan. Usa ra ang ilang katuyoan, sa gugma, ug sa buhat, ang “kabubut-on sa Anak ingon nga gituhop ngadto sa kabubut-on sa Amahan.”¹⁰

Sa unsang paagi masunod nato ang hingpit nga ehemplo sa pagkahiusa sa Ginoo ngadto sa Iyang amahan ug mas mahiusa uban Kanila ug sa usag usa?

Usa ka makadasig nga sundanan anaa sa Mga Buhat 1:14. Atong mabasa, “[Ang katawhan] tanan nagpadayon sa paghiusa sa pag-ampo, kauban sa mga babaye.”¹¹



Sama sa monarch nga mga kaba-kaba nga mibalik sa ilang panimalay sa Mexico, kita anaa sa panaw balik ngadto sa atong langitnong panimalay.

Tingali may kahulugan nga ang mga pulong nga “magkahiusa” makita sa daghang higayon diha sa basahon sa Mga Buhat, diin mabasa nato unsay gibuhat diha-diha dayon sa mga sumusunod ni Jesukristo human siya misaka sa langit isip nabanhawng binuhat, ug sa mga panalangin nga ilang nadawat tungod sa ilang paningkamot. May kahulugan usab nga makita nato ang sama nga sundanan tali sa mga matitud-anon sa kontinente sa Amerika dihang mibisita ug nangalagad ang Ginoo kanila. Ang buot ipasabut sa “magkahiusa” mao ang panag-uyon, paghiusa, ug pagkasinabut.

Ang ubang butang nga hiniusang gihimo sa matitud-anong mga Santos sa maong mga dapit mao ang pagpamatuod nila kang Jesukristo, pagtuon sa pulong sa Dios, pag-alagad sa usag usa uban sa gugma.¹²

Ang mga sumusunod sa Ginoo usa sa katuyoan, sa gugma, ug sa mga buhat. Nahibalo sila kinsa sila, nahibalo sila unsay ilang buhaton, ug gihimo nila kini uban sa gugma sa Dios ug sa usag usa. Kabahin sila sa talagsaong kaleidoscope nga maghiusa sa pagpadayon.

Ang ubang panalangin nga ilang nadawat mao nga napuno sila sa Espiritu Santo, nanghitabo ang mga milagro kanila, milambo ang Simbahan, wala nay panagbingkil sa katawhan, ug gipanalanginan sila sa Ginoo sa tanang butang.¹³

Makaingon kita nga mao diyang nagkahiusa sila tungod kay personal silang nakaila sa Ginoo. Suod sila Kaniya, ug mga saksi sila sa Iyang balaan nga misyon, sa mga milagro nga Iyang gihimo ug sa Iyang Pagkabanhaw. Nakakita ug nakahikap sila sa mga marka sa Iyang mga kamot ug tiil. Nahibalo sila uban sa kasiguroan nga Siya ang gisaad nga Mesiyas, ang Manunubos sa kalibutan. Nahibalo sila nga “Siya ang tinubdan sa tanang pagpang-ayo, kalinaw, ug mahangturong pag-uswag.”¹⁴

Bisan wala nato makita ang atong Manluluwas sa pisikal natong mga mata, masayud kita nga Siya buhi. Kon magpaduol kita Kaniya, kon



magtinguha kitang makadawat og personal nga saksi pinaagi sa Espiritu Santo sa Iyang balaan nga misyon, maangkon nato ang mas maayong panabut sa atong katuyoan; ang gugma sa Dios maanaa sa atong kasingkasing;¹⁵ maangkon nato ang determinasyon nga mahiusa diha sa mga kaleidoscope sa atong mga pamilya, ward, ug komunidad; ug makapangalagad kita sa usag usa sa “mas bag-o, mas maayong pamaagi.”¹⁶

Ang mga milagro mahitabo kon ang mga anak sa Dios magtambayayong nga giniyahan sa Espiritu sa pagtabang sa ubang nagkinahanglan.

Daghan kita’g nadungog nga mga istorya bahin sa sinilingan nga paghigugma nga gipakita kon mohugpa ang mga katalagman. Sama pananglit, dihang ang siyudad sa Houston gibanlas og dako kaayong baha sa miaging tuig, gikalimtan sa mga tawo ang kaugalingon nilang panginahanglan ug nangadto sa pagluwas. Usa ka presidente sa elders quorum nanawagan sa pagtabang sa komunidad, ug 77 ka sakayan ang naorganisa diha dayon. Ang mga tigluwas milibut sa naapektuhan nga kasilinganan ug gidala ang mga pamilya sa usa sa atong mga meetinghouse, diin nakapasilong sila ug natabangan. Ang mga miyembro ug dili miyembro nagtinabangay sa usa ka katuyoan.

Sa Santiago, Chile, usa ka presidente sa Relief Society may tinguhang motabang sa mga imigrante sa iyang komunidad nga gikan sa Haiti. Pinaagi sa pakigtambag sa iyang mga lider sa priesthood, siya ug ang ubang lider naka-ideya nga motanyag og klase sa Kinatsila ngadto sa mga langyaw, mitabang aron mas maayo ang ilang pakig-uban sa bag-o nilang pinuyanan. Matag Sabado sa buntag ang mga misyonaryo mopundok sa mahinamon nilang mga estudyante. Ang pagbati sa paghiusa niana nga building usa ka makadasig nga ehemplo sa katawhan gikan sa managlahing kaagi nga nagkahiusa sa pagserbisyo.

Sa Mexico, gatusan ka miyembro mibiyahé og mga oras sa pagtabang sa mga biktima sa duha ka kusog nga linog. Nangadto sila dala ang kagamitan, makinarya, ug gugma alang sa ilang silingan. Dihang nagkapundok ang mga bolunter sa usa sa atong meetinghouse naghulat sa mga instruksyon, ang mayor sa syudad sa Ixhuatán wala makapugong sa iyang mga luha dihang nakita niya ang “gugmang putli ni Kristo.”¹⁷

Ang Ginoo karon naghatag kanato og oportunidad sa pagtinambagay matag bulan sa atong mga korum sa priesthood ug Relief Society, aron mas maaktibong partisipante kitang tanan sa atong ward o branch kaleidoscope—sa dapit nga mohaum kitang tanan diin tanan kita gikinahanglan.

Ang matag usa sa atong mga dalan magkalahi, apan dungan kitang manglakaw niini. Ang atong dalan dili mahitungod kon unsay atong nahimo o diin kita gikan; mahitungod kini sa atong padulngan ug unsay atong abton, sa paghiusa. Kon magtinambagay kita nga giniyahan sa Espiritu Santo, makita nato kon asa na kita ug asang dapit kita angay. Ang Espiritu Santo mohatag kanato og panan-awon nga dili nato makita sa atong natural nga mga mata, kay “nagkatag ang pagpadayag kanato,”¹⁸ ug kon ipahimutang nato kana nga pagpadayag, mas daghan ang atong makita.

Kon magtambayong kita, kinahanglan nga ang atong katuyoan mao ang pagpangita ug pagbuhat sa kabubut-on



sa Ginoo; kinahanglan nga ang atong kadasig mao ang gugma nga atong gibati alang sa Dios ug alang sa atong mga silingan;¹⁹ ug kinahanglan nga ang kinadak-an natong tinguha mao ang “pag-ugmad og maayo,”²⁰ aron atong maandam ang dalan sa mahimayaong pagbalik sa Manluluwas. Ang bugtong paagi nga kita makahimo niini mao ang “maghiusa.”

Sama sa mga monarch nga alibang-bang, ipadayon nato ang atong panaw inubanan sa katuyoan, matag usa gamit ang kaugalingon natong mga hiyas ug kontribusyon, magtinabangay nga mahimong mas matahum ug mabungahon kining kalibutan—sa hinay-hinay ug hingpit nga pinasubay sa mga sugo sa Dios.

Gisaaran kita sa atong Ginoong si Jesukristo nga kon magkatigom kita alang sa Iyang ngalan, anaa Siya sa atong taliwala.²¹ Mopamatuod ko nga buhi Siya ug nabanhaw Siya sa matahum nga buntag sa tingpamulak sama karon. Siya ang Monarch sa tanang monarch, “ang Hari sa tanang hari, ug Ginoo sa mga ginoo.”²²

Hinaot nga usa kita sa Amahan ug sa Iyang Bugtong Anak, samtang giyahan kita sa Espiritu Santo, maoy mapaubsanon nakong pag-ampo sa ngalan ni Jesukristo, amen. ■

MUBO NGA MGA SULAT

1. Tan-awa sa Abraham 3:26; 4:7, 9–12, 15, 18, 21, 24–25.
2. Usa ka maka-interes nga kamatuoran bahin sa mga monarch nga alibangbang mao ang biyahe nila padulong sa amihanang Canada nga mokabat og tulo ka henerasyon. Hinoon, ang usa ka “super nga henerasyon” mohimo sa tibuok biyahe gikan sa habagatan padulong sa Mexico, magpalabay sa tingtugnaw didto, ug mohimo sa unang bahin nga pagbalik sa amihanan. (Tan-awa sa “Flight of the Butterflies” [video, 2012]; “Flight’: A Few Million Little Creatures That Could,” WBUR News, Sept. 28, 2012, wbur.org.)
3. Tan-awa sa “Why Do Monarchs Form Overnight Roosts during Fall Migration?” learner.org/jnorth/tm/monarch/sl/17/text.html.
4. Tan-awa sa “What Is a Group of Butterflies Called?” amazingbutterflies.com/frequentlyaskedquestions.htm; tan-awa usab sa “kaleidoscope,” merriam-webster.com. Ang *Kaleidoscope* naggikan sa Greek nga pinulongan nga *kalos* (“matahum”) ug *eidos* (“porma”).
5. Tan-awa sa “Ang Pamilya: Usa ka Pamahayag ngadto sa Kalibutan,” *Liahona*, Mayo 2017, 145.
6. Doktrina ug mga Pakigsaad 88:19; tan-awa usab sa Doktrina ug mga Pakigsaad 88:25.
7. Tan-awa sa Mosiah 18:21.
8. 3 Nephi 10:4.
9. Doktrina ug mga Pakigsaad 38:27.
10. Mosiah 15:7.
11. Mga Buhat 1:14; emphasis gidugang.
12. Pipila ka butang nga gibuhay sa mga Santos sa Jerusalem: mipili og bag-ong Apostol ug “pito ka tawo nga maayo og dungog” ug misuporta kanila (tan-awa sa Mga Buhat 1:26; 6:3–5); nagkatigom sa adlaw sa Pentecostes (tan-awa sa Mga Buhat 2:1); mipamatuod kang Jesukristo (tan-awa sa Mga Buhat 2:22–36; 3:13–26; 4:10, 33; 5:42); mitawag sa mga tawo sa paghinulsol ug mibunyang kanila (tan-awa sa Mga Buhat 2:38–41); padayon nga pagpakigadit ug pagpikas-pikas sa pan, ug sa pag-ampo (tan-awa sa Mga Buhat 2:42); nagtipon-tipon ug may mga butang nga komon kanila (tan-awa sa Mga Buhat 2:44–46; 4:34–35); mitambong sa templo (tan-awa sa Mga Buhat 2:46); mikaon sa ilang tinapay uban sa “kasadya ug kayano sa kasingkasing” (Mga Buhat 2:46); midayeg sa Dios ug gikahimut-an sa tanang katawhan (tan-awa sa Mga Buhat 2:47); nagmasulundon sa pagtuo (tan-awa sa Mga Buhat 6:7); mihatag sa ilang kaugalingon og padayong pag-ampo ug “pag-alagad labut sa pulong” (Mga Buhat 6:4). Pipila ka butang nga gipanghimo sa mga Santos sa kontinente sa Amerika: misangyaw sa ebanghelyo ni Kristo (tan-awa sa 3 Nephi 28:23); mipahimutang sa simbahan ni Kristo (tan-awa sa 4 Nephi 1:1); mibunyang og mga tawo (tan-awa sa 4 Nephi 1:1); ang tanang tawo nagmakiangayon sa usag-usag (tana-wa sa 4 Nephi 1:2); may mga butang nga alang kanilang tanan (tan-awa sa 4 Nephi 1:3); mitukod og balik sa mga siyudad (tan-awa sa 4 Nephi 1:7–9); nagminyo (tan-awa sa

- 4 Nephi 1:11); nagsubay sa mga sugo nga ilang nadawat gikan sa Ginoo (tan-awa sa 4 Nephi 1:12); nagpadayon sa pagpuasa ug pag-ampo (tan-awa sa 4 Nephi 1:12); nagtigom sa kanunay alang sa pag-ampo ug pagpamati sa pulong sa Ginoo (tan-awa sa 4 Nephi 1:12).
13. Pipila sa mga panalangin nga nadawat sa mga Santos sa Jerusalem: napuno sila sa Espiritu Santo (tan-awa sa Mga Buhat 2:4; 4:31); nadawat nila ang gasa sa pinulongan ug panagna ug namulongan “og kahibulungan nga buhat sa Dios” (tan-awa sa Mga Buhat 2:4–18); daghang katingalahan ug mga timailhan gihimo sa mga Apostoles (tan-awa sa Mga Buhat 2:43); mga milagro nahitabo (tan-awa sa Mga Buhat 3:1–10; 5:18–19; 6:8, 15); mas daghang tawo ang mipasakop sa Simbahan (tan-awa sa Mga Buhat 2:47; 5:14). Pipila ka panalangin nga nadawat sa mga Santos sa kontinente sa Amerika: ang mga tawo nakabig ngadto sa Ginoo (tan-awa sa 3 Nephi 28:23; 4 Nephi 1:2); usa ka henerasyon ng napanalanginan (tan-awa sa 3 Nephi 28:23); walay panagbingkil ug panaglalis tali kanila (tan-awa sa 4 Nephi 1:2, 13, 15, 18); walay adunahan ug mga kabus (tan-awa sa 4 Nephi 1:3); “tanang sila gihimong gawasnon ug mag-aambit sa langitnong gasa” (4 Nephi 1:3); dunay kalinaw sa yuta (tan-awa sa 4 Nephi 1:4); dagkong milagro ang nahitabo (tan-awa sa 4 Nephi 1:5, 13); ang Ginoo mipauswag kanila sa hilabihan (tan-awa sa 4 Nephi 1:7, 18); nagkalig-on sila, misanay sa hilabihan ka kusog, ug nahimo nga hilabihan ka maanindot ug makapahimuot (tan-awa sa 4 Nephi 1:10); gipanalanginan sila sumala sa mga gisaad kanila sa Ginoo (tan-awa sa 4 Nephi 1:11); “walay panagbingkil sa yuta, tungod sa gugma sa Dios nga mipuyo sa kasingkasing sa katawhan” (4 Nephi 1:15); “wala nay mga kasina, ni panagbangi, ni kagubot, ni malaw-ay nga mga buhat, ni mga pamakak, ni mga pagbuno, ni bisan unsa nga matang sa pagkamaulagon; ug sa pagkamatuod wala nay mga katawhan nga labaw pa ka malipayon sa tanan nga mga katawhan nga gilalang sa kamot sa Dios” (4 Nephi 1:16); “wala nay mga tulisan, ni mga mamumuno, ni adunay mga Lamanite, ni bisan unsa nga matang sa pundok sa mga katawhan; apan sila nagkahiusa, mga anak ni Kristo, ug manunonod sa gingharian sa Dios” (4 Nephi 1:17); ang Ginoo mipanalangin kanila sa tanan nila nga mga kalihokan (tan-awa sa 4 Nephi 1:18).
14. Jean B. Bingham, “Nga ang Imong Hingpit nga Kalipay Mapuno,” *Liahona*, Nob. 2017, 85.
15. Tan-awa sa 4 Nephi 1:15.
16. Jeffrey R. Holland, “Mga Representante sa Simbahan,” *Liahona*, Nob. 2016, 62.
17. Moroni 7:47.
18. Neil L. Andersen, sa “Auxiliary Panels Use New Training Library,” *Liahona*, Abr. 2011, 76.
19. Tan-awa sa Mateo 22:37–40.
20. Jacob 5:61.
21. Tan-awa sa Mateo 18:20.
22. 1 Timoteo 6:15.



Ni Elder Massimo De Feo
Sa Seventy

Tiunay nga Gugma: Ang Tinuod nga Timaan sa Matag Tinuod nga Disipulo ni Jesukristo

Ang ebanghelyo ni Jesukristo nakasentro sa gugma sa Amahan ug sa Manluluwas alang kanato ug sa atong gugma alang Kanila ug sa usag usa.

Gimahal ug gimingaw kita ni Presidente Monson, ug gimahal ug gipaluyohan nato si Presidente Russell M. Nelson. Adunay espesyal nga luna si Presidente Nelson sa akong kasingkasing.

Sa bag-o pa kong amahan, ang gamay namong anak, singko anyos pa, miuli gikan sa eskwela usa ka adlaw ug nangutana sa iyang mama, “Unsay trabaho ni Papa?” Mipasabut ang bata nga naglalis ang iyang mga classmate bahin sa mga trabaho sa ilang mga papa. Miingon ang usa nga ang iyang papa dako-dako sa city police, samtang mapagarbuhong miingon ang lain nga ang iyang papa dako-dako sa kompanya.

Sa dihang gipangutana ang akong anak bahin sa iyang papa, miingon ang akong anak, “nagtrabaho si papa sa opisina diha sa kompyuter.” Dayon, nakabantay nga wala kaayo maka-dayeg ang bag-o niyang mga higala,

midugang siya, “Hinoon, ang akong papa maoy dako-dako sa universe.”

Tingali kadto ang mibugto sa pagsultihanay.



Giingnan nako ang akong asawa, “Panahon na nga tudloan nato siya og dugang nga mga detalye sa plano sa kaluwasan ug kon kinsa gayud ang nagdumala.”

Dihang gitudloan namo ang among mga anak sa plano sa kaluwasan, milambo ang ilang gugma sa Langit-nong Amahan ug sa Manluluwas samtang nagkat-on sila nga plano kini sa gugma. Ang ebanghelyo ni Jesukristo nakasentro sa gugma sa Amahan ug sa Manluluwas alang kanato ug sa atong gugma alang Kanila ug sa usag usa.

Miingon si Elder Jeffrey R. Holland: “Ang unang dako nga *sugo* sa tanang kahangturan mao ang paghigugma sa Dios sa tibuok *natong* kasingkasing, gahum, hunahuna, ug kusog—mao kana ang una ug dakong sugo. Apan ang unang dako nga *kamatuoran* sa tanang kahangturan mao nga ang Dios nahigugma *kanato* sa tibuok *Niyang* kasingkasing, gahum, hunahuna, ug kusog. Kana nga gugma mao ang pundasyon nga bato sa kahangturan, ug kini maanaa sa tukuranan nga bato sa atong inadlaw-adlaw nga kinabuhi.”¹

Isip pundasyon nga bato sa atong inadlaw-adlaw nga kinabuhi, ang tiunay nga gugma maoy rekisito sa matag tinuod nga disipulo ni Jesukristo.

Mitudlo si propeta Mormon, “Busa, akong hinigugma nga mga kaigsoonan, pag-ampo ngadto sa Amahan uban sa tibuok kusog sa kasingkasing, nga kamo unta mapuno niini nga gugma, diin siya mitugyan diha sa tanan kinsa tinuod nga mga sumusunod sa iyang Anak, nga si Jesukristo.”²

Ang gugma sa pagkatinuod mao ang tinuod nga timaan sa matag tinuod nga disipulo ni Jesukristo.

Ang tinuod nga mga disipulo malipay nga moserbisyo. Nahibalo sila nga ang pagserbisyo usa ka ekspresyon sa tinuod nga gugma ug pakigsaad nga gihimo nila sa bunyag.³ Bisan unsay ilang calling sa Simbahan o tahas nila sa komunidad, bation nila ang nagtubong tinguha sa paghigugma ug pagserbisyo sa Ginoo ug sa usag usa.

Ang tinuod nga mga disipulo malipay nga mopasaylo. Nasayud sila nga ang Pag-ula sa Manluluwas motabon



sa tanang sala ug kasaypanan sa matag usa kanato. Nasayud sila nga ang bugti nga Iyang gibayad “presyong naglakip sa tanan.” Espirituhanong mga buhis, balayranan, galastuhan ug bayad nga konektado sa mga sala, kasaypanan, o mga sipyat giapil tanan. Ang tinuod nga disipulo dali nga mopasaylo ug dali nga mangayo’g pasaylo.

Minahal kong kaisogon, kon nag-lisud kamo sa pagpangita og kalig-on sa pagpasaylo, ayaw hunahunaa kon unsay nabuhat sa uban kaninyo, apan hunahunaa unsay nahimo sa Ginoo kaninyo, ug makaplagaan ninyo ang kalinaw diha sa makatubos nga mga panalangin sa Pag-ula.

Ang tinuod nga mga disipulo malipay nga motugyan sa ilang kaugalingon ngadto sa Ginoo uban sa kalinaw sa ilang kasingkasing. Mapaubsanon sila ug matugyanon tungod kay sila nahigugma Kaniya. May pagtuo sila sa hingpit nga pagsunod sa Iyang kabu-but-on, dili lang unsay Iyang gihimo apan kon giunsa ug kanus-a. Ang tinuod nga mga disipulo nahibalo nga ang tinuod nga mga panalangin dili ang unsay ilang gusto sa kanunay apan unsay gusto sa Ginoo kanila.

Ang tinuod nga mga disipulo nahigugma sa Ginoo kay sa kalibutan ug makanunayon ug dili matarug sa ilang pagtuo. Padayon silang lig-on sa mausabon ug makalibug nga kalibutan. Ang tinuod nga mga disipulo malipay nga maminaw sa tingog sa Espiritu ug

sa mga propeta ug dili malibug sa mga tingog sa kalibutan. Ang tinuod nga mga disipulo malipay nga maanaa sa balaang mga dapit⁴ ug malipay nga mohimong balaan sa mga dapit asa sila nagbarug. Bisan asa sila moadto, gidala nila ang gugma sa Ginoo ug kalinaw ngadto sa kasingkasing sa uban. Ang tinuod nga mga disipulo malipay nga mosunod sa mga sugo sa Ginoo, ug mosunod sila kay gihigugma nila ang Ginoo. Samtang mohigugma ug motuman sila sa mga sugo, mabag-o ang ilang mga kasingkasing ug sila mismo mausab.

Ang tiunay nga gugma mao ang tinuod nga timaan sa matag tinuod nga disipulo ni Jesukristo.

Akong nakat-unan ang tiunay nga gugma gikan sa akong inahan. Dili siya miyembro sa Simbahan.

Usa ka adlaw daghang tuig nang milabay, mibisita ko sa akong mama, nga nag-antus sa kanser. Nasayud kong mamatay na siya, apan nabalaka ko sa iyang pag-antus. Wala ra koy gisulti, apan nakaila kaayo siya kanako, miingon siya, “akong nakita ang imong kabalaka.”

Dayon sa akong katingala, sa nag-kurog nga tingog mihangyo siya nako, “Pweding tudloan ko nimo unsaon sa pag-ampo? Gusto kong mag-ampo para nimo. Nasayud kong sugdan nimo og ‘Mahal nga Langitnong Amahan,’ apan unsa dayon ang akong isulti?”

Samtang nagluhod ko tupad sa iyang gihigdaan nag-ampo siya para nako, akong gibati ang gugma nga

sukad wala pa nako mabatyagi. Yano kadto, tinuod, tiunay nga gugma. Bisan wala siya mahibalo sa plano sa kaluwasan, naa sa iyang kasingkasing ang personal nga plano sa gugma, ang plano sa gugma sa inahan para sa iyang anak. Anaa siya sa kasakit, nanglimbasug aron lang makaangkon og kusog nga makaampo. Dili kaayo nako madungog ang iyang tingog, apan akong gibati ang iyang gugma.

Nahinumdom kong naghunahuna, “Sa unsang paagi ang tawo nga naa niana nga labihang kasakit makaampo para sa uban? Siya ang nanginahanglan.”

Dayon miabut ang tubag nga tin-aw sa akong hunahuna: tiunay nga gugma. Gihigugma kaayo ko niya nga gikalimtan niya ang iyang kaugalingon. Sa pinakalisud niyang gutlo, gihigugma ko niya labaw sa iyang kaugalingon.

Karon, mahal kong mga igsoon, dili ba mao kini ang gihimo sa Ginoo? Siyempre, sa mahangturon ug mas lapad nga panglantaw. Apan taliwala sa grabe Niyang kasakit, sa tanaman niadtong gabhiona, Siya ang nagkinahanglan og tabang, nag-antus sa paagi nga dili nato mahunahuna o masabtan. Apan sa katapusan, gikalimtan Niya ang Iyang kaugalingon ug nag-ampo alang kanato hangtud Iyang gibayaran ang tibuok kantidad. Giunsa Niya kini sa paghimo? Tungod sa Iyang tiunay nga gugma alang sa Amahan, nga mipadala Kaniya, ug alang kanato. Ang Amahan ug kita Iyang gihigugma labaw sa Iyang Kaugalingon.

Gibayaran Niya ang butang nga wala Niya mahimo. Gibayaran Niya ang mga sala nga wala Niya mabuhat. Ngano? Tiunay nga gugma. Kay nabayaran ang tibuok kantidad, may katungod Siya nga motanyag kanato sa mga panalangin sa unsay Iyang gibayaran kon kita maghinulsol. Nganong gitanyag Niya kini? Usab, ug kanunay, tiunay nga gugma.

Ang tiunay nga gugma mao ang tinuod nga timaan sa matag tinuod nga disipulo ni Jesukristo.

Miingon si Presidente Thomas S. Monson: “Hinaut nga magsugod kita karon, niining adlaw, sa pagpadayag

og gugma ngadto sa tanang mga anak sa Dios, sakop man sa atong pamilya, atong mga higala, mga kaila, o dili kaila. Sa atong pagbangon matag buntag, atong hukman nga atubangon kini uban sa gugma ug kalooy sa bisan unsay moabut sa atong dalan.”⁵

Mga kaigsoonan, ang ebanghelyo ni Jesukristo ebanghelyo sa gugma. Ang pinakadako nga sugo mahitungod sa gugma. Alang kanako, mahitungod kining tanan sa gugma. Sa gugma sa Amahan, kinsa misakripisyo sa Iyang Anak alang kanato. Sa gugma sa Manluluwas, kinsa misakripisyo alang kanatong tanan. Sa gugma sa inahan o amahan kinsa mohatag sa tanan alang sa ilang mga anak. Sa gugma niadto kinsa hilum nga moserbisyo ug wala mailhi sa daghan kanato apan nailhan sa Ginoo. Sa gugma niadtong kinsa mopasaylo sa tanan ug sa kanunay. Sa gugma sa mga tawo kinsa mohatag labaw kay sa ilang nadawat.

Akong gimahal ang akong Langitnong Amahan. Akong gimahal ang akong Manluluwas. Akong gimahal ang ebanghelyo. Akong gimahal kini nga Simbahan. Akong gimahal ang akong pamilya. Akong gimahal kining talagsaong kinabuhi. Alang kanako, mahitungod kining tanan sa gugma.

Unta kining adlaw sa paghinumdom sa Pagkabanhaw sa Manluluwas usa ka adlaw sa espirital nga pagbag-o sa matag usa kanato. Unta kining adlaw maoy sinugdanan sa kinabuhi nga puno sa gugma, “ang pundasyon nga bato sa atong inadlawng pagpakabuhi.”

Unta ang atong kasingkasing mapuno sa tiunay nga gugma ni Kristo, ang tinuod nga timaan sa matag tinuod nga disipulo ni Jesukristo. Kini ang akong pag-ampo sa ngalan ni Jesukristo, amen. ■

MUBO NGA MGA SULAT

1. Jeffrey R. Holland, “Ugma ang Ginoo Mobuhat og Katingalahan diha Kaninyo,” *Liahona*, Mayo 2016, 126.
2. Moroni 7:48.
3. Tan-awa sa Mosiah 18:10.
4. Doktrina ug mga Pakigsaad 45:32.
5. Thomas S. Monson, “Gugma—ang Kahulugan sa Ebanghelyo,” *Liahona*, Mayo 2014, 94.



Ni Elder Claudio D. Zivic
Sa Seventy

Ang Molahutay Hangtud sa Katapusan Maluwas

Magmatinud-anon kita sa unsay atong gituohan ug nahibaloan.

Mga kaigsoonan, nagpasalamat ko og maayo sa oportunidad nga makapadayag diha kaninyo sa pipila sa akong mga pagbati.

Pipila ka tuig ang milabay, ang akong asawa ug ako nanambong sa unang seremonya sa pag-abli sa interactive children’s exhibit sa Church History Museum sa Siyudad sa Salt Lake. Pagkahuman sa seremonya, si Presidente Thomas S. Monson mipadulong kanamo, ug dihang milamano siya sa among mga kamot, miingon siya,

“Lahutay, ug kamo magmadaugon”—usa ka lawom nga pagtulun-an ug usa kansang kamatuoran, sa tinuod lang, mapanghimatud-an natong tanan.

Si Jesukristo mipasalig kanato nga “Ang molahutay hangtud sa katapusan maluwas.”¹

Ang paglahutay nagpasabut “sa pagpabilin nga lig-on diha sa usa ka pasalig nga magmatinud-anon ngadto sa mga sugo sa Dios bisan pa sa pagtintal, pagbatok, ug kalisdanan.”²

Bisan kadtong nakaangkon og



gamhanang espirituhanong kasinatian ug matinud-anong nakaserbisyo usa ka adlaw mahisalaag o mahimong dili aktibo kon sila dili molahutay hangtud sa katapusan. Hinaut kanunay ug kusganon natong ibutang sa atong mga hunahuna ug kasingkasing ang mga pulong nga “Kini dili mahitabo ngari kanako.”

Sa dihang nagtudlo si Jesukristo didto sa Capernaum, “daghan sa iyang mga tinun-an mitalikod ug wala na managpanglakaw uban kaniya.

“Ug si Jesus nangutana sa Napulog Duha, Buot ba usab kamong mobiya kanako?”³

Nagtuo ko nga karon, si Jesukristo mangutana kanatong tanan kinsa mihi-mo og sagradong mga pakigsaad uban Kaniya, “Buot ba usab kamong mobiya kanako?”

Ako nag-ampo nga kitang tanan, uban sa lawom nga pagpamalandong kabahin sa unsay nagpaabut kanato sa kahangturan, motubag sama sa gibuhat ni Simon Pedro: “Ginoo, kang kinsa man kami moadto? ikaw mao ang may mga pulong mahitungod sa kinabuhing dayon.”⁴

Magmatinud-anon kita sa unsay atong gituohan ug nahibaloan. Kon kita wala magpakabuhi sumala sa atong nahibaloan, mag-usab kita. Ang mga makasasala kinsa nagpadayon sa ilang mga sala, ug dili maghinulsol, mas magka-unlod pa gayud ngadto sa kahugaw, hangtud nga si Satanas mismo ang moangkon, girisgo og maayo ang ilang oportunidad nga makahinulsol, mapasaylo, ug mapananglanginan sa tanan nga mga panalangin sa kahangturan.

Nakadungog ko og daghang pangatarungan gikan niadtong mga mihunong sa aktibong pag-apil sa Simbahan ug nawad-an sa husto nga panglantaw sa katuyoan sa atong panaw dinhi sa yuta. Ako moawhag kanila sa pagpamalandong ug sa pagbalik, tungod kay nagtuo ko nga walay usa nga makapangatarungan diha sa atubangan sa atong Ginoo, si Jesukristo.

Sa dihang gibunyagan kita, mihimo kita og mga pakigsaad—dili ni bisan kinsang tawo apan sa Manluluwas,

miuyon sa “pagdala [sa atong kaugalingon] sa ngalan ni Jesukristo, nga adunay hugot nga tinguha sa pag-alagad kaniya ngadto sa katapusan.”⁵

Ang pagtambong sa mga miting sa sakrament mao ang usa sa importanting paagi nga kita motimbang-timbang sa atong determinasyon sa pagserbisyo Kaniya, sa atong espirituhanong kaligon, ug sa pagtubo sa atong hugot nga pagtuo diha ni Jesukristo.

Ang pag-ambit sa sakrament mao ang labing importanting butang nga atong buhaton sa adlaw nga Igpa-pahulay. Ang Ginoo mipasabut niini nga ordinansa sa Iyang mga Apostoles sa wala pa Siya namatay. Gihimo usab Niya kini didto sa kontinente sa Amerika. Nagsulti Siya kanato nga kon kita moapil niining ordinansa, mahimo kining pagpamatuod ngadto sa Amahan nga kita kanunay mohinumdom Kaniya, ug Siya misaad nga, sa samang paagi, kita makaangkon sa Iyang Espiritu uban kanato.⁶

Sa mga pagtulun-an ni Alma nga batan-on ngadto sa iyang anak nga lalaki si Shiblun, makakita kita og maalamon nga tambag ug pasidaan nga makatabang nato nga magpabiling matinud-anon sa atong mga pakigsaad:

“Pagmatngon nga ikaw dili madala ngadto sa garbo; oo, pagmatngon nga ikaw dili manghambog sa imong kaugalingon nga kaalam, ni sa imong gahum.

“Gamita ang imong kaisug, apan dili ang pagpalabi-labi; ug pagmatngon



usab nga ikaw makapugong sa tanan nimo nga mga mainit nga pagbati, nga ikaw mapuno uban sa paghigugma; pagmatngon nga ikaw makapugong gikan sa pagtinapulan.”⁷

Pipila ka tuig ang milabay, samtang nagbakasyon, gusto kong mosakay og kayak sa unang higayon. Miabang ko og kayak, ug sa tumang kadasig, misugod dayon ko sa pagpalutaw ngadto sa dagat.

Paglabay sa pipila ka minutos, gilimbuwad sa balod ang kayak. Sa dakong paningkamot, naggunit sa bugsay ang usa ka kamot ug ang pikas sa kayak, nahimutang na ko pag-usab.

Naningskamot ko pag-usab sa pagbugsay sa kayak, apan human lang sa pipila ka minutos, ang kayak natuwad na usab. Padayon kong naningskamot og maayo, nga kawang lang, hangtud dunay tawo kinsa nakasabut sa pagpanakay og kayak misulti nako nga basin niliki ang kasko ug basin nasudlan ang kayak og tubig, nga maoy hinungdan nga dili kini mabalanse ug dili makontrol. Akong gibitad ang kayak sa baybayon ug gitangtang ang song-song [plug], ug sigurado gayud, nanggawas ang daghang tubig.

Usahay maghunahuna ko nga nagpadayon kita sa kinabuhi nga dunay mga sala nga, sama sa liki diha sa akong kayak, makabalda sa atong espiritwal nga pag-uswag.

Kon kita nagpadayon diha sa atong mga sala, makalimtan nato ang atong gihimong mga pakigsaad sa Ginoo, bisan og magsige ta og kalimbuwad tungod sa ka walay balanse nga namugna niadtong mga sala diha sa atong mga kinabuhi.

Sama sa mga liki sa akong kayak, ang mga liki sa atong kinabuhi kinahanglan atimanon. Pipila ka sala magkinahanglan og dugang nga mga paningskamot kay sa uban aron mahinulsolan.

Kinahanglan atong pangutan-on ang atong kaugalingon: Hain man kita dapit kalabut sa atong kinaiya ngadto sa Manluluwas ug sa Iyang buhat? Anaa ba kita sa sitwasyon ni Pedro sa dihang siya milimud ni Jesukristo? O miabante ba kita ngadto sa punto nga kita



nakaangkon og kinaiya ug determinasyon nga naa niya human sa dakong katungod nga iyang nadawat gikan sa Manluluwas?⁸

Kinahanglan kitang maningkamot sa pagsunod sa tanang mga sugo ug mohatag og pagtagad niadtong lisud kaayo natong masunod. Anaa ang Ginoo sa atong kiliran, nagtabang nato sa panahon sa panginahanglan ug kahuyang, ug kon kita magpakita og sinserong tinguha ug molihok sumala niana, Siya mohimo sa “mahuyang nga mga butang nga mahimo nga malig-on.”⁹

Ang pagkamasulundon makahatag nato og kalig-on sa pagbuntog sa sala. Kinahanglan usab natong masabtan nga ang pagsulay sa atong hugot nga pagtuo nagkinahanglan nga kita mosunod, sa kanunay wala masayud sa mga resulta.

Mosugyot ko og usa ka pormula nga makatabang nato nga makalahutay hangtud sa katapusan:

1. Sa kada adlaw, pag-ampo ug pagbasa sa mga kasulatan.
2. Sa kada semana, pag-ambit sa sakrament uban sa usa ka

mapainubsanon nga kasingkasing ug mahinulsulon nga espiritu.

3. Bayad sa atong ikapulo ug mga halad.
4. Matag duha ka tuig—kada tuig alang sa kabatan-onan—bag-uhon ang atong mga temple recommend.
5. Sa tibuok natong kinabuhi, pagserbisyo diha sa buluhaton sa Ginoo.

Hinaut ang talagsaong mga kamatuoran sa ebanghelyo magpermi sa atong hunahuna, ug hinaut nga atong himon ang atong kinabuhi nga walay mga liki nga makapugong sa atong luwas nga biyahe sa dagat sa kinabuhi.

Ang kalampusan diha sa pamaagi sa Ginoo adunay kantidad, ug ang bugtong paagi nga makab-ot kini mao ang pagbuhay kon unsay gikinahanglan.

Mapasalamaton kaayo ko nga ang atong Manluluwas milahutay hangtud sa katapusan, mikompleto sa Iyang talagsaon nga maulaong sakripisyo.

Miantus Siya alang sa atong mga sala, kasakit, depresyon, kaguol, balatian, ug kahadlok, ug busa Siya nasayud unsaon sa pagtabang kanato, unsaon sa pagdasig kanato, unsaon sa paghupay kanato, ug unsaon sa

paglig-on kanato aron kita makalahutay ug makabaton og korona nga gitagana alang niadtong kinsa wala nabuntog.

Managlahi ang atong mga kinabuhi. Kitang tanan adunay panahon sa pagsulay, sa kalipay, sa pagdesisyon, sa pagbuntog sa mga babag, ug pagpahimulos sa mga oportunidad.

Kon unsa may atong personal nga mga sitwasyon, ako mopamatuod nga ang atong Langitnong Amahan kanunay nag-ingon, “Gihigugma ko kamo. Gipaluyohan ko kamo. Giubanan ko kamo. Ayaw og hunong. Paghinulsol ug lahutay diha sa dalan nga Akong gipakita kaninyo. Ug Ako mopasalig kaninyo nga kita magkita pag-usab sa atong celestial nga panimalay.” Sa ngalan ni Jesukristo, amen. ■

MUBO NGA MGA SULAT

1. Mateo 24:13.
2. Ang Giya ngadto sa mga Kasulatan, “Lahutay,” scriptures.lds.org.
3. Juan 6:66–67.
4. Juan 6:68.
5. Doktrina ug mga Pakigsaad 20:37.
6. Tan-awa sa 3 Nephi 18:7.
7. Alma 38:11–12.
8. Tan-awa sa Marcos 16:15.
9. Ether 12:27.



Ni Presidente Henry B. Eyring
Ikaduhang Magtatambag sa Unang Kapangulohan

Ang Iyang Espiritu Magauban Kaninyo

Nag-ampo ko sa tibuok nakong kasingkasing nga inyong madungog ang tingog sa Espiritu, nga gipadala kaninyo sa hilabihan ka madagayaon.

Mga kaigsoonan, mapasalamaton ko sa oportunidad nga mamulong kaninyo sa Igpapahulay sa Ginoo, sa kinatibuk-ang komperensya sa Iyang Simbahan, niining panahon sa Pasko sa Pagkabanhaw. Nagpasalamat ko sa atong Langitnong Amahan alang sa gasa sa Iyang Pinalanggang Anak, nga boluntaryong mianhi sa yuta aron mahimo natong Manunubos. Mapasalamaton ko nga masayud nga gitubos

Niya ang atong mga sala ug mibangon diha sa Pagkabanhaw. Matag adlaw napanalanginan ko nga masayud nga, tungod sa Iyang Pag-ula, ako unya mabanhaw aron mabuhi sa kahangturan diha sa usa ka mahigugmaong pamilya.

Nasayud ako niadtong mga butanga pinaagi sa *bugtong paagi* nga si bisan kinsa kanato mahimong masayud niini. Ang Espiritu Santo namulong sa akong hunahuna ug kasingkasing nga kini tinuod—dili lang kausa apan kanunay. Nagkinahanglan ko nianang padayon nga kahupayan. Kitang tanan makasinati og trahedyang diin magkinahanglan kita sa kahupayan sa Espiritu. Gibati ko kana usa ka adlaw samtang nagbarug ko uban sa akong amahan diha sa ospital. Nagtan-aw mi sa akong inahan nga mihimo og pipila ka mugbo nga mga ginhawa—ug dayon mihunong na. Samtang mitan-aw mi sa iyang nawong, nagpahiyum siya sa dihang nawala ang kasakit. Human sa pipila ka hilom nga gutlo, misulti og una ang akong amahan. Miingon siya, “Ang gamayng batang babaye mipauli na.”

Hinay niya kining gisulti. Daw malinawon siya. Gipaambit niya ang usa ka butang nga nasayaran niya nga tinuod.

Hilum niyang gisugdan ang paghipos sa personal nga mga butang ni Mama. Miadto siya sa hawanan sa ospital aron magpasalamat sa matag usa sa mga nurse ug doktor nga nangalagad ni mama sa daghang mga adlaw.

Ang akong amahan adunay pakig-uban sa Espiritu Santo nianang higayona aron mobati, masayud, ug mobuhat sa unsay iyang gibuhat nianang adlaw. Nadawat niya ang saad sama sa naangkon sa kadaghanan: “Nga sila unta makabaton sa iyang Espiritu uban kanila” (D&P 20:79).

Ang akong panghinaut karon nga mapadak-an ang inyong tinguha ug inyong abilidad sa pagdawat sa Espiritu Santo. Hinumdumi, Siya ang ikatulong sakop sa Dios nga Kapangulohan. Ang Amahan ug ang Anak nabanhaw nga mga binuhat. Ang Espiritu Santo usa ka personahe sa espiritu. (Tan-awa sa D&P 130:22.) Inyong pagpili kon modawat ba Kaniya ug mopasulod Kaniya diha sa inyong kasingkasing ug hunahuna.

Ang mga kondisyon diin atong madawat kanang langitnong panalangingin gipatin-aw sa mga pulong nga gipamulong matag semana apan tingali dili kanunay motuhop sa atong mga kasingkasing ug hunahuna. Aron ipadala ang Espiritu ngari kanato, kita kinahanglang “sa kanunay mohinumdum” sa Manluluwas ug “maghupot sa iyang mga sugo” (D&P 20:77).

Kini nga panahon sa tuig makatabang kanato sa paghinumdum sa sakripisyo sa Manluluwas ug sa Iyang pagbangon gikan sa lubnganan isip usa ka nabanhaw nga binuhat. Daghan kanato ang naghanduraw niadto nga mga talanawon. Kausa nagbarug ko uban sa akong asawa sa gawas sa usa ka lubnganan sa Jerusalem. Daghan ang nagtuo nga mao kadto ang lubnganan diin ang gilansang sa krus nga Manluluwas migawas isip nabanhaw ug buhi nga Dios.

Ang matinahuron nga tiggiya nianang adlaw misinyas sa iyang kamot ug miingon kanamo, “Dali, tan-awa ang walay sulod nga lubnganan.”

Miduko kami aron makasulod. Nakakita mi og bato nga lingkuranan tupad sa bongbong. Apan misulod sa akong hunahuna ang lain nga



hulagway, sama ka tinuod sa unsay among nakita nianang adlaw. Kadto ang kang Maria, kinsa gibiyaa sa mga Apostoles diha sa lubnganan. Mao kana ang gipakita kanako sa Espiritu ug gani nadungog diha sa akong hunahuna, klaro kaayo nga daw anaa ako didto:

“Apan sa gowa sa lubnganan, si Maria nagtindog nga naghilak, ug samtang naghilak siya, mitikubo siya aron sa paglili sa lubnganan,

“Ug didto iyang nakita ang duha ka mga manolunda nga nanagsapot ug maputi, nanaglingkod sa dapit nga nahimutangan sa lawas ni Jesus, ang usa diha sa ulohan ug ang usa diha sa tiilan.

“Ug sila miingon kaniya, Babaye, nganong nagahilak ikaw? Siya miingon kanila, Kay ila mang gikuha ang akong Ginoo, ug wala ako masayud kon diin siya nila ibutang.

“Sa pagsulti niya niini, siya miliso ug nakita niya si Jesus nga nagtindog, apan wala siya mahibalo nga kadto mao si Jesus.

“Ug si Jesus miingon kaniya, Babaye, nganong nagahilak ikaw? Kinsa may imong gipangita? Sa pagdahum niya nga kadto mao ang magbalantay sa tanaman, si Maria miingon kaniya, “Senyor, kon ikaw man ang nagkuha kaniya, tug-ani ako diin mo siya ibutang, ug ako siyang kuhaon.

“Si Jesus miingon kaniya, Maria. Siya milingi ug miingon kaniya sa pinulongan nga Hebreohanon, Rabboni; nga sa ato pa, Magtutudlo.

“Si Jesus miingon kaniya, Ayaw na ako pagkupti, kay wala pa ako maka-saka ngadto sa Amahan: apan adtoa ang akong mga kaigsoonan ug suginli sila nga mosaka ako ngadto sa akong Amahan, ug inyong Amahan, sa akong Dios, ug inyong Dios” (Juan 20:11–17).

Nag-ampo ko aron tugutan nga mobati sa unsay gibati ni Maria sa lubnganan ug unsay gibati sa duha ka mga disipulo diha sa dalan padulong sa Emaus samtang naglakaw sila uban sa nabanhaw nga Manluluwas, nagtuo nga usa Siya ka bisita sa Jerusalem:

“Apan gihawiran siya nila nga nag-ingon, Pabilin uban kanamo: kay hapit na magabii, ug tapus na ang adlaw. Ug siya misaka ug mipabilin uban kanila.



“Ug sa nagtambong siya sa kananan uban kanila, siya mikuhag tinapay ug nanalangin, ug kini iyang gipikaspikas, ug gihatag kanila.

“Ug unya nabuka ang ilang mga mata, ug ilang naila siya; ug unya nahanaw siya sa ilang mga mata.

“Ug sila nasig-ingon ang usa sa usa, Dili ba ang atong mga kasingkasing nagdilaab man sa sulod nato samtang nagsulti siya kanato diha sa dalan, samtang nagsaysay siya kanato sa kasulatan?” (Lucas 24:29–32).

Ang pipila niadto nga mga pulong gibalik og sulti sa usa ka miting sa sakrament nga akong gitambungan sobra sa 70 ka tuig na ang milabay. Niadtong panahuna ang mga miting sa sakrament gipahigayon sa gabii. Ngitngit na sa gawas. Ang kongregasyon nanganta niining pamilyar nga mga pulong. Kadaghan na ako makadungog niini. Apan ang mahangturon nakong panumduman mao ang sa usa ka pagbati sa usa ka partikular nga gabii. Mipaduol kini kanako sa Manluluwas. Tingali kon isulti nako ang mga pulong, moabut kini kanatong tanan pag-usab:

*Ubani ko; gabii na.
Ang adlaw misalop na;
Miabut na ang kangitngit;
Ug ang kagabhion.
Sulod sa kasingkasing ko,
Ikaw dinapit ko.*

*Ubani ko; gabii na.
Sa panag-uban tang duha
Nadasig kasingkasing ko,
Sa pakigsulti nimo.
Napuno ang kalag ko sa pulong mo
Naduol ko kanimo.*

*O Manluluwas, ubani ako;
Karon nga gabii na.
O Manluluwas, ubani ako;
Karon nga gabii na.¹*

Mas bililhon kay sa panumduman sa mga panghitabo mao ang panumduman sa Espiritu Santo nga naghikap sa atong mga kasingkasing ug sa Iyang padayon nga pagpanghimatuod sa kamatuoran. Mas bililhon kay sa pagkakita pinaagi sa atong mga mata o paghinumdom sa mga gipamulong ug gibasa mao ang paghinumdom sa mga pagbati nga nag-uban sa hinay nga tingog sa Espiritu. Panagsa ra nga gibati ko kini nga sama gayud sa gibati sa mga mibiyahé diha sa dalan sa Emaus—nga daw hinay apan dili masaypan nga kainit sa kasingkasing. Kasagaran usa kini ka pagbati sa kagaan ug hilum nga kasiguroan.

Aduna kitay bililhon nga saad sa Espiritu Santo isip usa ka kauban, samtang aduna usab kitay tinuod nga mga direksyon kon unsaon sa pag-angkon niana nga gasa. Kini nga mga pulong isulti sa awtorisado nga sulugoon sa Ginoo samtang ang iyang mga kamot anaa sa atong ulo: “Dawata ang Espiritu Santo.” Nianang higayona ikaw ug ako aduna sa kasiguroan nga Siya ipadala. Apan ang atong obligasyon mao ang pagpili sa pag-abli sa atong mga kasingkasing aron madawat ang pag-alagad sa Espiritu sa tibuok kinabuhi.

Ang mga kasinatian ni Propeta Joseph Smith naghatag og giya. Iyang gisugdan ug gipadayon ang iyang pagpangalagad uban sa desisyon nga kulang ang iyang kaugalingong kaalam aron masayud unsa nga dalan ang

iyang subayon. Gipili niya nga magpaubos atubangan sa Dios.

Sunod, gipili ni Joseph nga mangu-tana sa Dios. Nag-ampo siya uban sa pagtuo nga ang Dios motubag. Ang tubag miabut samtang bata pa siya. Kadto nga mga mensahe miabut sa dihang kinahanglan niyang masayud kon sa unsang paagi ipaestablisar sa Dios ang Iyang Simbahan. Ang Espiritu Santo mihupay ug migiya kaniya sa tibuok niyang kinabuhi.

Misunod siya sa inspirasyon bisan kon kini lisud. Sama pananglit, nakadawat siya og instruksyon nga ipadala ang Napulog Duha ngadto sa England sa dihang nanginahanglan siya pag-ayokanila. Gipadala Niya sila.

Midawat siya og koreksyon ug paghupay gikan sa Espiritu sa dihang napriso siya ug ang mga Santos hilabihan nga gidaug-daog. Ug mituman siya sa dihang miadto siya sa lungsod sa Carthage bisan kon nasayud siya nga nagatubang siya og posibleng kamatayon.

Si Propeta Joseph Smith mipakita og ehemplo kanato kon unsaon nga makadawat kanunay og espirital nga direksyon ug kahupayan pinaagi sa Espiritu Santo.

Ang unang pagpili nga iyang gihimo mao ang pagpaubos atubangan sa Dios.

Ang ikaduha mao ang pag-ampo uban ang pagtuo diha ni Ginoong Jesukristo.

Ang ikatulo mao ang hingpit gayud nga pagsunod. Ang pagkamasulundon mahimong nagpasabut nga molihok dayon. Mahimong nagpasabut kini nga mangandam. O tingali nagpasabut kini sa paghulat nga mapailubon alang sa dugang nga inspirasyon.

Ug ang ikaupat mao ang pag-ampo aron masayud sa mga panginahanglan ug mga kasingkasing sa uban ug unsaon sa pagtabang kanila alang sa Ginoo. Si Joseph nag-ampo alang sa mga Santos nga nag-antus sa dihang anaa siya sa bilanggoan. Aduna koy oportunidad nga makaobserbar sa mga propeta sa Dios samtang nag-ampo sila, nangayo og inspirasyon, midawat og direksyon, ug misunod niini.

Nakita nako nga ang ilang mga pag-ampo kasagaran kalabut sa mga tawo



nga ilang gimahal ug giserbisuhan. Ang ilang pagpakabana alang sa uban daw miabli sa ilang mga kasingkasing aron makadawat og inspirasyon. Mahimong ingon ana usab alang kaninyo.

Ang inspirasyon motabang kanato sa pag-alagad sa uban alang sa Ginoo. Nakita ninyo kana sa inyong mga kasi-natian, sama nako. Ang akong bishop kausa misulti kanako—sa panahon nga ang akong asawa mibati og hilabihang kalisud sa iyang kaugalingong kinabuhi—“Matag higayon nga makadungog ko og tawo sa ward nga nagkinahanglan og tabang, inig-abut nako didto aron motabang, makita nako nga nag-una na ang imong asawa. Giunsa man niya sa pagbuhat niana?”

Susama siya sa tanan nga maayo nga mga tigpangalagad sa ginghari-an sa Ginoo. Daw adunay duha ka butang nga ilang buhaton. Ang maayo nga mga tigpangalagad nahimong takus sa hapit kanunay nga pakig-uban sa Espiritu Santo. Ug nahimo silang takus sa gasa sa gugmang putli, nga mao ang tiunay nga gugma ni Kristo. Kadto nga mga gasa milambo diha kanila samtang gigamit nila kini sa pag-alagad gumikan sa gugma alang sa Ginoo.

Ang paagi diin ang pag-ampo, inspirasyon, ug gugma sa Ginoo magtambayayong diha sa atong pagserbisyo hingpit nga gihulagway alang kanako niini nga mga pulong:

“Kon pinaagi sa akong ngalan mangayo kamog bisan unsa, kini akong pagabuhaton.

“Kon nahigugma kamo kanako, inyong pagatumanon ang akong mga sugo.

“Ug ako mangamuyo sa Amahan, ug kamo iyang pagahatagan og laing Manlalaban, nga magapakig-uban kaninyo hangtud sa kahangturan;

“Nga mao ang Espiritu sa kama-tuoran; kang kinsa ang kalibutan dili makadawat tungod kay ang kalibutan dili man makakita kaniya ni makaila kaniya: apan kamo nakaila na kaniya, kay siya nagapuyo man uban kaninyo, ug maanha siya sa sulod ninyo.

“Dili ko kamo pagabiyaan nga daw mga ilo: ako mobalik ra kaninyo.

“Hamubo na lang ang panahon, ug unya ang kalibutan dili na makakita kanako; apan kamo makakita ra unya kanako: tungod kay ako buhi, kamo usab mabuhi.

“Niadto unyang adlawo inyong masuta nga ako anaa sa akong Amahan, ug nga kamo ania kanako, ug ako anaa kaninyo.

“Ang nagabaton sa akong mga sugo ug nagatuman niini, kini siya mao ang nahigugma kanako; ug ang nahigugma kanako pagahigugmaon sa akong Amahan, ug ako mahigugma kaniya ug magapadayag sa akong kaugalingon ngadto kaniya” (Juan 14:14–21).

Mohatag ko sa akong personal nga pagsaksi nga ang Amahan niining higayuna nakaila kaninyo, nasayud sa inyong mga pagbati, ug sa espirital ug temporal nga panginahanglan sa tanan nga naglibut kaninyo. Ako mopamatuod nga ang Amahan ug Anak mopadala sa Espiritu Santo sa tanan nga aduna niana nga gasa, nangayo niana nga panalangin, ug nagtinguha nga mahimong takus niini. Ang Amahan, ang Anak, ug ang Espiritu Santo dili mopugos sa Ilang

Kaugalingon sulod sa atong kinabuhi. Gawasnon kita nga mopili. Ang Ginoo miingon sa tanan:

“Tan-awa, nagatindog ako sa pultahan, ug nagatuktok: kon may magapatalinghug sa akong tingog, ug moabli sa pultahan, kaniya mosulod ako, ug makigsalo ako sa pagkaon uban kaniya, ug siya uban kanako.

“Ang magamadaugon pagatugutan ko sa paglingkod sa akong trono uban kanako, maingon nga ako usab nagmadaugon, ug milingkod uban sa akong Amahan diha sa iyang trono.

“Ang adunay igdulogog, kinahanglan magpatalinghug sa sulti sa Espiritu” (Pinadayag 3:20–22).

Nag-ampo ko sa tibuok nakong kasingkasing nga inyong madungog ang tingog sa Espiritu, nga gipadala kaninyo sa hilabihan ka madagayon. Ug ako nag-ampo nga kanunay ninyong ablihan ang inyong kasingkasing sa pagdawat Kaniya. Kon kamo mangayo uban sa tinuod nga katuyoan ug uban sa pagtuo diha ni Jesukristo alang sa inspirasyon, madaawat ninyo kini sumala sa pamaagi sa Ginoo ug sa Iyang panahon. Gibuhat kana sa Dios alang sa batan-ong si Joseph Smith. Gibuhat Niya kini karon alang sa atong buhi nga propeta, si Presidente Russell M. Nelson. Mibutang Siya kaninyo diha sa kinabuhi sa ubang mga anak sa Dios aron sa pagserbisyo kanila alang Kaniya. Nasa-yud ako niana dili lamang tungod sa akong nakita pinaagi sa akong mga mata apan sa mas gamhanang paagi pinaagi sa unsay gihunghong sa Espiritu sa akong kasingkasing.

Gibati nako ang gugma sa Amahan ug sa Iyang Hinigugmang Anak alang sa tanang mga anak sa Dios dinhi sa kalibutan ug sa Iyang mga anak sa kalibutan sa espiritu. Gibati nako ang paghupay ug ang direksyon sa Espiritu Santo. Nag-ampo ko nga makaangkon kamo og kalipay sa pagbaton sa Espiritu isip kanunay ninyong kauban. Sa pangalan ni Jesukristo, amen. ■

MUBO NGA SULAT

1. “Abide with Me; ’Tis Eventide,” *Hymns*, nu. 165.



Ni Presidente Dallin H. Oaks

Unang Magtatambag sa Unang Kapanguloan

Gagmay ug Yano nga mga Butang

Kinahanglan nga mapahinumduman kita nga kon tingubon sulod sa taas nga panahon, kining daw gagmayng mga butang makahimo og dagkong mga butang.

I.

Minahal kong mga kaigsoonan, sama kaninyo, natandog kaayo ako ug nalig-on ug nadasig sa mga mensahe ug musika ug sa mga pagbati sa panagpundok karon. Sigurado nga mamulong ako kaninyo sa pagpahayag sa mga pasalamat sa atong mga kaigsoonan kinsa, isip mga instrumento sa mga kamot sa Ginoo, mihatag kanato sa makalig-on nga epekto niining panagpundok karon.

Mapasalamaton ko nga mamulong niining nanambong sa Pasko sa Pagkabanhaw. Karon miapil kita sa ubang mga Kristiyano sa pagsaulog sa Pagkabanhaw ni Ginoong Jesukristo. Alang sa mga miyembro sa Ang Simbahan ni Jesukristo sa mga Santos sa Ulahing mga Adlaw, ang literal nga Pagkabanhaw ni Jesukristo usa ka haligi sa atong pagtuo.

Tungod kay nagtuo kita sa mga istorya sa Biblia ug sa Basahon ni Mormon mahitungod sa literal nga Pagkabanhaw ni Jesukristo, nagtuo usab kita sa daghang mga pagtulunan sa kasulatan nga ang susama nga pagkabanhaw moabut ngadto sa tanang mortal nga sukad nakapuyo niini nga yuta. Kana nga pagkabanhaw naghatag

nato sa unsay gitawag ni Apostol Pablo nga “usa ka buhing paglaum” (1 Pedro 1:3). Kanang buhing paglaum mao ang atong kombiksyon nga ang kamatayon dili ang katapusan sa atong pagkatawo apan gikinahanglan nga lakang ngadto sa maloloy-ong plano sa atong Langitnong Amahan alang sa kaluwasan sa Iyang mga anak. Kana nga plano nagkinahanglan og transisyon gikan sa pagka-mortal ngadto sa pagka-imortal. Ang importante nga baruganan niana nga transisyon mao ang pag-abut sa kamatayon ug mahimayaong kabuntagon nga nahimong posible sa Pagkabanhaw sa atong Ginoo ug Manluluwas nga atong gisaulog niining Domingo sa Pasko sa Pagkabanhaw.

II.

Sa usa ka nindot nga himno kansang mga pulong gisulat ni Eliza R. Snow, kita mokanta:

*Kadako, ug himaya
Ang dakong plano sa katubsanan,
Diin ang kaangayan, gugma, ug kaloo-
oy nagkahiusa
Unsa ka balaan!¹*

Isip kabahin sa pagtuman nianang balaan nga plano ug panag-uyon, magpundok kita sa mga miting, lakip niini nga komperensya, sa pagtudlo ug pag-awhag sa usag usa.

Karong buntaga nadasig ako nga gamiton isip tema sa akong pakigpulong ang pagtulun-an ni Alma ngadto sa iyang anak nga si Helaman, nga narekord sa Basahon ni Mormon: “Pinaagi sa gagmay ug yano nga mga butang ang mga dagko nga butang ipahinabo” (Alma 37:6).

Gitudloan kita sa daghang gagmay ug yanong mga butang sa ebanghelyo ni Jesukristo. Kinahanglan nga mapahinumduman kita nga kon tingubon sulod sa taas nga panahon, kining daw gagmayng mga butang makahimo og dagkong mga butang. Aduna nay daghang mga pakigpulong niini nga hilisgutan sa mga General Authority ug sa ubang tinahud nga mga magtu-



tudlo. Ang hilisgutan importante kaayo nga gibati nako nga balikon kini sa paghisgot.

Gipahinumduman ako sa gahum sa gagmay ug yanong mga butang sa unsay akong nakita samtang naglakaw ako usa ka buntag niana. Ania ang litrato nga akong nakuha. Ang baga ug lig-ong semento sa sidewalk nangliki. Resulta ba kini sa dako ug kusog nga pagtay-og gikan sa ilawom? Dili, ang hinungdan niini nga pagliki mao ang hinay, ginagmay nga pagtubo sa usa sa

mga gamut nga migawas gikan sa duol nga kahoy. Ania ang susama nga ehemplo nga akong nakita sa laing dalan.

Ang kusog nga pagduot nga nakapaliki niining gahi nga semento sa sidewalk gamay ra kaayo kon sukdon sa inadlaw-adlaw o bisan binulan, apan ang epekto niini paglabay sa panahon dako kaayo.

Mao usab ang dakong epekto paglabay sa panahon sa gagmay ug yanong mga butang nga atong gitudlo diha sa mga kasulatan ug sa buhi nga mga propeta. Ikonsiderar ang pagtuon sa kasulatan nga gitudlo kanato nga iapil sa atong inadlaw-adlaw nga kinabuhi. O ikonsiderar ang personal nga mga pag-ampo ug ang pagluhod diha sa mga pag-ampo sa pamilya nga gihimo kanunay sa matinud-anong mga Santos sa Ulahing mga Adlaw. Ikonsiderar ang pagtambong sa mga klase sa seminary alang sa kabatan-onan o institute alang



sa mga young adult. Bisan og ang matag usa niini nga mga buhat ingon og gagmay ug yano, paglabay sa panahon moresulta kini sa gamhanang espirituhang pagbayaw ug pagtubo. Kini mahitabo tungod kay ang matag usa niining gagmay ug yanong mga butang nagdapat sa pagpakig-uban sa Espiritu Santo, ang Tigpamatuod nga molamdag ug mogiya nato sa kamatuoran.

Laing tinubdan sa espirituhang pagbayaw ug pagtubo mao ang padayon nga buhat sa paghinulsol, bisan sa

daw gagmay nga mga kalapasan. Ang atong kaugalingong dinasig nga pagtimbang-timbang sa kaugalingon makatabang nato nga makakita sa atong pagkapakyas ug unsaon nga makahimo kita og mas maayo. Ang maong paghinulsol kinahanglang mag-una sa atong sinemana nga pag-ambit sa sakrament. Ang pipila ka mga hilisgutan nga ikonsiderar niini nga proseso sa paghinulsol gisugyot sa himno “Have I Done Any Good?”

Nakabuhat ba ko’g maayo karon?

Nakatabang ba ako sa usa nga nagkinahanglan?

Nakapasaya ba ako sa nagsubo ug nakapalipay ba ako og usa ka tawo?

Kon wala, napakyas gyud ako.

May palas-anon ba nga napagaan karon

Tungod kay mauyunon kong makigbahin?

Ang masakiton ug naluya natabangan ba sa ilang pagpanaw?

Dihang kinahanglan nila?²

Tinuod gagmay ra kining mga butanga, apan kini maayong mga ehemplo sa unsay gitudlo ni Alma sa iyang anak nga si Helaman: “Ug ang Ginoong Dios mibuhat sa pamaagi aron sa pagmugna sa iyang mahinungdanon ug walay katapusan nga mga katuyoan; ug pinaagi sa gagmay nga mga pamaagi ang Ginoo molibug sa maalamon ug mopahigayon sa kaluwasan sa daghan nga mga kalag” (Alma 37:7).

Si Presidente Steven C. Wheelwright mihatag sa nanambong sa Brigham Young University–Hawaii niining makadasig nga deskripsyon sa pagtulun-an ni Alma: “Si Alma mimatuod sa iyang anak nga sa pagkatinuod ang sumbanaan nga gisunod sa Ginoo kon kita magpakita og pagtuo diha Kaniya ug magsunod sa iyang tambag sa gagmay ug yanong mga butang mao nga siya mopanalangin kanato sa ginagmay kada adlaw nga mga milagro, ug paglabay sa panahon, uban sa katingalahan nga mga buhat.”³

Si Presidente Howard W. Hunter mitudlo nga “kasagaran mao kini ang sagad nga mga buluhaton . . . nga may

talagsaong positibo nga impluwensya sa kinabuhi sa uban, ikumpara sa mga butang nga sagad gipakita sa kalibutan kabahin sa kahalangdon.⁴

Usa ka makadani nga dili relihiyoso nga pagtulun-an niining sama nga baruganan nagagikan sa kanhi Senator Dan Coats sa Indiana, kinsa misulat: “Ang bugtong pagpangandam alang nianang importante nga desisyon nga makausab og kinabuhi, o gani sa usa ka nasud, mao kadtong gatusan ug liboan ka mga desisyon nga wala kaayo mahibaloi ug mga desisyon nga makatino kinsa kita, ingon og dili kaayo importante nga mga desisyon nga gihimo sa pribado.”⁵

Kadto nga “ingon og dili kaayo importante” pribado nga mga desisyon naglakip unsaon nato sa paggamit sa atong panahon, unsay atong tan-awon sa telebisyon ug sa internet, unsay atong basahon, sa art ug musika nga gipalibut nato sa atong kaugalingon sa trabahoan ug sa panimalay, unsay atong gipangita nga kalingawan, ug unsaon nato sa paggamit ang atong pasalig nga magmatinuoron ug magmatinud-anon. Laing gagmay ug yanong butang mao ang pagkamatinahuron ug pagkamalipayon sa atong mga inter-aksyon.

Wala niining gitinguha nga gagmay ug yanong mga butang ang makabayaw nato ngadto sa dagkong mga butang gawas kon ipadayon kini sa paghimo ug sa kanunay. Si Presidente Brigham Young gikareport nga nag-ingon: “Ang atong kinabuhi hinimo gikan sa ginagmay, yanong mga sirkumstansya nga mosangput ngadto sa dagkong butang kon ipunon, ug tingbon ang tibuok kinabuhi sa lalaki o babaye.”⁶

Gilibutan kita sa mga impluwensya sa media ug pagkakunhod sa kultura nga mopaubos sa atong mga sumbanaan kon dili kita makigbatok kanunay. Aron makapadayon ngadto sa atong mahangturong tumong, kinahanglan nga kanunay gayud kitang magbugsay. Makatabang kon kita kabahin sa usa ka grupo nga nagbugsay, sama sa gipakita niini nga biswal sa usa ka pundok nga nagtinabangay. Sa paggamit niana nga



ehemplo, ang sulog sa kultura kusog kaayo nga kon kita mohunong sa pagbugsay, ianud kita ngadto sa destinasyon nga wala nato tinguhaa apan mahimong dili malikayan kon kita dili kanunay maningkamot sa pagpadayon.

Human makasugilon sa ingon og gamay nga panghitabo nga adunay dakong mga sangputanan, si Nephi misulat, “Ug sa ingon kami nakakita nga pinaagi sa gagmay nga mga paagi ang Ginoo makapahinabo sa mahinungdanon nga mga butang.” (1 Nephi 16:29). Ang Daang Tugon naglakip sa usa ka halandumon nga ehemplo niini. Didto mabasa nato kon sa unsa nga

paagi midagsang sa mga Israelites ang mga bitin nga mapintas. Daghang mga tawo ang nangamatay gikan sa mga pinaakan (tan-awa sa Numeros 21:6). Sa dihang nag-ampo si Moises alang sa kahupayan, nadasig siya sa paghimo og “bitin nga tumbaga, ug gibutang kini ibabaw sa bandila.” Dayon, “kon adunay bitin nga makapahit sa bisan kinsa kanila, sa diha nga siya makatanaw sa bitin nga tumbaga, mabuhi siya” (bersikulo 9). Gamay kaayo nga butang alang sa milagroso nga resulta! Apan, sama sa gipasabut ni Nephi sa dihang iyang gitudlo kini nga ehemplo ngadto niadtong misukol batok sa Ginoo,

bisan kon ang Ginoo nag-andam og yanong paagi diin sila mamaayo, “tungod sa pagkayano sa paagi, o sa kasayon niini, adunay daghan kinsa namatay.” (1 Nephi 17:41).

Kana nga ehemplo ug kana nga pagtulun-an nagpahinumdom nato nga ang kayano sa paagi o sa kasayon sa gisugo nga buluhaton wala magpasa-but nga dili kini importante sa pagkabot sa atong matarung nga tinguha.

Sa samang paagi, bisan ang gagmay nga buhat sa pagsupak o gagmay nga mga kapakyasan sa pagsunod sa matarung nga mga buhat makadala nato ngadto sa sangputanan nga gipasidaan nga likayan. Ang Pulong sa Kaalam naghatag og ehemplo bahin niini. Ingon ta nga ang epekto sa lawas sa usa ka sigarilyo o usa ka tungab sa alkohol o usa ka dosis sa lain nga druga dili masukod. Apan paglabay sa panahon, ang epekto dako kaayo ug dili na mausab pa. Hinumdumi nga ang pagliki sa sidewalk tungod sa hinay-hinay nga ginagmay nga pagtubo sa gamut sa kahoy. Usa ka butang nga sigurado, ang terrible nga mga sangputanan sa paggamit sa bisan unsa nga makaadik, sama sa drugas nga moataki sa atong mga lawas o pornograpiya nga materyal nga makadaot sa atong mga hunahuna, sa hingpit malikayan kon kita dili gayud mogamit sa unang higayon—bisan kausa.

Daghang mga tuig na ang milabay, si Elder M. Russell Ballard mihulagway sa mga naminaw sa kinatibuk-ang komperensya “pagkagamay ug pagkayano sa mga butang nga mahimong negatibo ug makalaglag sa kaluwasan sa usa ka tawo.” Mitudlo siya: “Sama sa gabok nga hilo nga himoong lambo, dayon linubid, ug sa kata-pusan usa ka pisi, kining gagmayng mga butang kon hiusahon mahimong gahi kaayong putlon. Kinahanglang makahibalo kita sa gahum nga anaa sa gagmay ug yanong mga butang aron mapalambo ang pagka-espirituhanon. Sa samang higayon, kinahanglang makahibalo kita nga si Satanas mogamit sa gagmay ug yanong mga butang aron mawad-an kita og paglaum ug maalaot.”⁷

Si Presidente Wheelwright mihatag og susamang pasidaan ngadto sa naminaw niya sa BYU–Hawaii: “Ang pagkapakyas sa paghimo sa gagmay ug yanong mga butang maoy makaingon nga ang pagtuo mapaling-paling o mokunhod, mga milagro mohunong, ug ang kauswagan ngadto sa Ginoo ug sa Iyang gingharian mohunong ug dayon magsugod pagkunhod ang tinguha human ang gingharian sa Dios pulihan sa mas daghang temporal nga mga paningkamot ug kalibutanong mga ambisyon.”⁸

Sa pagpanalipod batok sa nagkahi-usa nga negatibo nga mga epekto nga makalaglag sa atong espirituhanong kauswagan, kinahanglang kitang mosunod sa espirituhanong sumbanan sa gagmay ug yanong mga butang. Gihulagway kini ni Elder David A. Bednar sa usa ka BYU Women’s Conference: “Dili kita makakat-on og daghan mahitunod sa kinaiyahan ug kaimportante niining espirituhanong sumbanan gikan sa teknik sa . . . pagpatulo og tubig nga hinay kaayo,” sa pagtandi sa pagpabaha o pagsablig og daghang tubig diin wala kini kinahanglang.

Mipasabut siya nga: “Ang kanunay nga pagpatulo sa tubig motuhop ngadto sa yuta ug mohatag og grabe nga kaumog sa yuta diin ang mga tanom motubo. Sa samang paagi, kon ikaw ug ako makatutok ug kanunay makadawat og tinulo sa espirituhanong pag-amuma, nan ang mga gamut sa ebanghelyo makatuhop sa atong kalag, lig-on nga maestablisar ug adunay maa-yong pundasyon, ug makapamunga og dili ordinaryo ug lamian nga bunga.”

Sa pagpadayon, miingon siya, “Ang espirituhanong sumbanan sa gagmay ug yanong mga butang nga makahatag og dagkong mga butang makahimo og kalig-on ug pagkamakanunayon, nagkalig-on nga debosyon, ug mas kompleto nga pagkakabig ngadto ni Ginoong Jesukristo ug sa Iyang ebanghelyo.”⁹

Si Propeta Joseph Smith mitudlo niini nga baruganan sa mga pulong nga karon anaa na sa Doktrina ug mga Pakigsaad: “Himoa nga walay tawo nga moisip kanila ingon og walay

hinungdan nga mga butang; kay aduna pay daghan nga umaabut, kalabut sa mga santos, nga misalig diha niini nga mga butang” (D&P 123:15).

Sumpay sa labing sayong mga pagsulay sa pag-establisar sa Simbahan sa Missouri, ang Ginoo mitambag og pagpailub alang sa “tanang nga mga butang kinahanglang gayud mahinabo diha sa ilang panahon.” (D&P 64:32). Dayon mihatag Siya niining talagsa-ong pagtulun-an: “Busa, ayaw pagluya diha sa maayo nga buhat, kay kamo nagpahimutang sa tukuranan sa usa ka mahinungdanon nga buhat. Ug gikan sa gagmay nga mga butang magagikan ang mga dagko” (D&P 64:33).

Nagtuo ko nga kitang tanan nagtinguha sa pagsunod sa hagit ni Presidente Russell M. Nelson sa pagpadayon “sa dalan sa pakigsaad.”¹⁰ Ang atong pasalig sa pagbuhat sa ingon malig-on pinaagi sa kanunay nga pagsunod sa “gagmay nga mga butang” nga gitudlo kanato sa ebanghelyo ni Jesukristo ug sa mga lider sa Iyang Simbahan. Mopamatuod ko ug motawag sa Iyang mga panalangin sa tanan kinsa nagtinguha sa pagpabilin diha sa Iyang dalan sa pakigsaad, sa pangalan ni Jesukristo, amen. ■

MUBO NGA MGA SULAT

1. “How Great the Wisdom and the Love,” *Hymns*, nu. 195.
2. “Have I Done Any Good?” *Hymns*, nu. 223.
3. Steven C. Wheelwright, “The Power of Small and Simple Things” (Brigham Young University–Hawaii devotional, Ago. 31, 2007), 2, devotional.byuh.edu.
4. *Mga Pagtulun-an sa mga Presidente sa Simbahan: Howard W. Hunter* (2015), 186.
5. Dan Coats, “America’s Youth: A Crisis of Character,” *Imprimis*, vol. 20, nu. 9 (Sept. 1991), 4; tan-awa usab sa Elder Wilford Andersen sa iyang kolum sa *Mesa Tribune*, Mayo 1996.
6. Brigham Young, pakigpulong sa Ogden Tabernacle, Hulyo 19, 1877, sumala sa gireport sa “Discourse,” *Deseret News*, Okt. 17, 1877, 578.
7. M. Russell Ballard, “Small and Simple Things,” *Ensign*, Mayo 1990, 7, 8.
8. Steven C. Wheelwright, “The Power of Small and Simple Things,” 3.
9. David A. Bednar, “By Small and Simple Things Are Great Things Brought to Pass” (Brigham Young University Women’s Conference, Abr. 29, 2011), womensconference.byu.edu.
10. Russell M. Nelson, “Samtang Dungan Kita nga Magpadayon sa Unahan,” *Liahona*, Abr. 2018, 7.



Ni Presidente Russell M. Nelson

Pagpadayag alang sa Simbahan, Pagpadayag alang sa Atong mga Kinabuhi

Sa umaabut nga mga adlaw, dili na posible ang espirituanong pagsugakod kon wala ang giya, direksyon, ug makahupay nga impluwensya sa Espiritu Santo.

Pagkamahimayaon nga kahigayunan niining makasaulog sa Pasko sa Pagkabanhaw uban kaninyo niining Domingo sa kinatibuk-ang komperensya! Wala nay lain nga mas tukma pa kay sa pagsaulog sa labing importante nga kalihokan nga nahitabo sukad dinhi sa kalibutan pinaagi sa pagsimba sa labing importante nga binuhat sukad nga naglakaw dinhi sa yuta. Dinhi sa, Ang Simbahan ni Jesukristo sa mga Santos sa Ulahing mga Adlaw, ato Siyang gisimba kinsa misugod sa Iyang walay kinutubang Pag-ula diha sa Tanaman sa Getsemani. Andam Siyang mag-antus alang sa mga sala ug mga kahuyang sa matag usa kanato, kansang pag-antus nakapahimo Kaniya “sa pagpaagas sa dugo sa matag lungag sa panit.”¹ Siya gilansang sa krus sa Kalbaryo² ug mibangon sa ikatulo nga adlaw isip ang unang nabanhaw nga binuhat sa tanang mga anak sa atong

Langitnong Amahan. Gihigugma ko Siya ug mopamatuod nga Siya buhi! Siya ang nangulo ug naggiya sa Iyang Simbahan.

Kon wala pa ang walay kinutuban nga Pag-ula sa atong Manunubos, walay bisan usa kanato ang makalaum nga makabalik pa sa atong Langitnong Amahan. Kon wala pa ang Iyang Pagkabanhaw, ang kamatayon mao na ang katapusan. Ang Pag-ula sa atong Manluluwas naghimong posible sa pagka-imortal alang sa tanan.

Tungod sa Iyang talagsaon nga misyon ug sa kalinaw nga iyang gihatag sa Iyang mga sumusunod nga ang akong asawa, si Wendy, ug ako mibati og kahupayan usa ka gabii niadtong Enero 2, 2018, sa dihang gipukaw kami sa usa ka tawag sa telepono nagsulti kanamo nga si Presidente Thomas S. Monson mitapon na sa tabil.

Gimingaw kaayo kami ni Presidente Monson! Among gipasidunggan ang iyang kinabuhi ug iyang kabilin. Tawo nga may talagsaong espiritwal nga kalig-on, nagbilin siya og walay pagkappapas nga impluwensya diha sa tanang nakaila kaniya ug sa Simbahan nga iyang gihigugma.

Sa Dominggo, niadtong Enero 14, 2018, didto sa ibabaw nga lawak sa Templo sa Salt Lake, ang Unang Kapangulohan giorganisar pag-usab pinaagi sa simple apan sagrado nga sumbanan nga giestablisar sa Ginoo. Dayon, sa maligdong nga katiguman gahapon sa buntag, ang mga miyembro sa Simbahan sa tibuok kalibutan mipataas sa ilang mga kamot sa pagkumpirmar sa aksyon nga sa sayo pa gibuhat sa mga Apostoles. Akong gibati ang mapaubsanong pagpasalamat alang sa inyong pagpaluyo nga suporta.

Magpasalamat usab ako alang niadtong nahauna kanako. Usa ka pribilehiyo ang pagserbisyo diha sa Korum sa Napulog Duha sulod sa 34 ka tuig ug personal nga nailhan ang 10 sa miaging 16 ka Presidente sa Simbahan. Daghan ako og nakat-unan gikan sa matag usa kanila.

Dako usab ang akong utang sa akong mga katigulangan. Ang tanan sa walo nakong mga apohan sa tuhod mga kinabig sa Simbahan sa Europa.



Ang matag usa niadtong maisugon nga mga kalag misakripisyo sa tanan aron makaanhi sa Zion. Sa nagsunod nga mga henerasyon, dili tanan sa akong mga katigulangan ang nagpabilin nga mapasaligon. Tungod niini, wala ako magdako sa usa ka panimalay nga nakasentro sa ebanghelyo.

Akong gitahud ang akong mga ginikanan. Importante kaayo sila kanako ug mitudlo kanako og mahinungdanon nga mga leksyon. Dili igo ang akong pasalamat kanila alang sa malipayong kinabuhi sa panimalay nga ilang gihimo alang kanako ug sa akong mga igsoon. Apan, bisan sa bata pa ko, nahibalo ko nga naay kulang sa akong kinabuhi. Usa ka adlaw misakay ako sa sakyanan ug miadto sa usa ka LDS bookstore aron mangita og libro mahitungod sa Simbahan. Ganahan ko nga magkat-on mahitungod sa ebanghelyo.

Sa dihang ako nang nasabtan ang Pulong sa Kaalam, gusto nako nga ang akong mga ginikanan magsunod niana nga balaod. Busa, usa ka adlaw sa dihang bata pa kaayo ako, miadto ko sa among silong ug gipangbuak ang tanang botelya sa bino sa sementado nga salog! Nagpaabut ko nga silutan ko sa akong amahan, apan wala siyay gisulti bisan usa ka pulong.

Sa dihang midako na ko ug nagsugod sa pagkasabut sa kahalangdon sa plano sa Langitnong Amahan, kanunay kong miingon sa akong kaugalingon, “dili nako gusto og regalo sa Pasko! Gusto lang ko nga ma-seal sa akong mga ginikanan.” Kadtong akong gihandom nga hitabo wala mahitabo hangtud nga ang akong mga ginikanan lapas na sa 80, apan nahitabo gayud kini. Dili nako ikapahayag sa hingpit ang kalipay nga akong gibati niadtong adlaw,³ ug sa matag adlaw akong gibati kana nga kalipay sa ilang paka-seal ug ang akong pagka-seal ngadto kanila.

Niadtong 1945, samtang didto pa ko sa medical school, akong giminyuan si Dantzel White sa Templo sa Salt Lake. Siya ug ako napanalanginan og siyam ka madanihong mga anak nga babaye ug usa ka bililhon nga anak nga lalaki. Karon ang among nagkadaghang



pamilya usa sa labing dako nga kalipay sa akong kinabuhi.

Niadtong 2005, human sa dul-an 60 ka tuig nga kaminyoon, ang akong minahal nga si Dantzel wala damha nga gitawag ngadto sa langitnong panimalay. Sulod sa usa ka panahon, hapit dili ko makalihok sa kasubo. Apan ang mensahe sa Pasko sa Pagkabanhaw ug ang saad sa pagkabanhaw mipalahutay kanako.

Dayon ang Ginoo mipadala ni Wendy Watson sa akong kiliran. Na-seal kami sa Templo sa Salt Lake niadtong Abril 6, 2006. Gihigugma kaayo nako siya! Usa siya ka talagsaon nga babaye—usa ka dako nga panalangin kanako, sa among pamilya, ug sa tibuok Simbahan.

Ang matag usa niini nga mga panalangin miabut isip resulta sa pagpangita ug pagpatalinghug sa mga pag-aghat sa Espiritu Santo. Si Presidente Lorenzo Snow miingon, “Mahinungdanon kini nga pribilehiyo sa matag Santos sa Ulahing mga Adlaw . . . nga atong katungod nga mobati sa Espiritu matag adlaw sa atong kinabuhi.”⁴

Usa sa mga butang nga gibalik-balik sa Espiritu og sil-sil sa akong hunahuna sukad sa akong bag-o nga

tawag isip Presidente sa Simbahan mao ang pagkaandam sa Ginoo nga mopadayag sa Iyang hunahuna ug kabubut-on. Ang pribilehiyo sa pagdawat og pagpadayag usa sa labing mahinungdanon nga mga gasa sa Dios ngadto sa Iyang mga anak.

Pinaagi sa mga gipakita sa Espiritu Santo, ang Ginoo moabag kanato sa tanan natong matarung nga mga paningkamot. Nakahinumdom ko sa usa ka lawak operahanan, nagbarug ako atubangan sa usa ka pasyente—dili sigurado kon unsaon paghimo ang usa ka wala pa mabuhat sukad nga operasyon—ug nakasinati nga ang Espiritu Santo mipakita sa pamaagi diha sa akong hunahuna.⁵

Sa pagpalig-on sa akong tanyag nga makigminyo kang Wendy, miingon ko kaniya, “Nasayud ko sa pagpadayag ug unsaon pagdawat niini.” Sa iyang pagkadalaygon—ug, sa ako dayong nahibaloan, nga nabatasan na niya—nakapangayo na siya ug nakadawat sa iyang kaugalingon nga pagpadayag mahitungod kanamo, nga mihatag niya sa kaisug nga mosugot.

Isip sakop sa Korum sa Napulog Duha, nag-ampo ako matag-adlaw alang sa pagpadayag ug mipasalamat

sa Ginoo matag higayon nga Siya misulti sa akong kasingkasing ug hunahuna.

Hunahunaa ang ka milagro niana! Bisan unsa ang atong calling sa Simbahan, maka-ampo kita sa atong Langitnong Amahan ug makadawat og giya ug direksyon, mapahimangnuan mahitungod sa mga kakuyaw ug sa mga makabalda, ug makabuhat og mga butang nga dili gayud nato mahimo kon kita lang. Kon kita tinuoray nga modawat sa Espiru Santo ug magkat-on sa pag-ila ug pagsabut sa Iyang mga pag-aghat, magiyahan kita sa mga sitwasyon nga dagko ug gagmay.

Sa bag-ohay pa lang nakong pagsinati og malisud nga tahas sa pagpili og duha ka magtatambag, naghunahuna ko kon unsaon kaha nako pagpili og duha lamang gikan sa napulog duha kinsa akong gimahal ug gitahud.

Tungod kay ako nahibalo nga ang maayo nga inspirasyon pinasikad sa maayo nga impormasyon, mainampuon akong nakigsulti sa matag Apostoles usa ngadto sa usa.⁶ Misulod dayon ako nga nag-inusara sa usa ka pribado nga lawak sa templo ug nangayo sa kabubut-on sa Ginoo. Ako mopamatuod nga ang Ginoo misugo kanako sa pagpili ni Presidente Dallin H. Oaks ug Presidente Henry B. Eyring sa pagserbiyo isip akong mga magtatambag sa Unang Kapangulohan.



Sa sama nga pamaagi, ako mopamatuod nga ang Ginoo midasig sa pagtawag nila ni Elder Gerrit W. Gong ug Elder Ulisses Soares nga pagaordinahan isip Iyang mga Apostoles. Ako ug kami mi-welcome kanila niining talagsaon nga panag-igsoonay sa pagserbiyo.

Sa dihang nagtigum kami isip Konseho sa Unang Kapangulohan ug Korum sa Napulog Duha, ang among mga lawak mitinganan nahimong mga lawak sa pagpadayag. Ang Espiritu tataw kaayo nga anaa. Samtang kami nakigbisug sa mga komplikado nga mga hilisgutan, usa ka kulba-hinam nga proseso ang nahitabo samtang ang matag Apostoles gawasnon nga mipadayag sa iyang mga hunahuna ug panglantaw. Bisan paman kon managlahi kami sa among unang mga panglantaw, ang gugma nga among gibati sa usag usa anaa kanunay. Ang among panaghiusa nakatabang kanamo sa pag-ila sa kabubut-on sa Ginoo alang sa Iyang Simbahan.

Sa among mga miting, ang kadaghanan [mayoriya] dili gayud maoy matuman! Mainampuon kaming naminauw sa usag usa ug nakigsulti sa usag usa hangtud nagkahiusa kami. Dayon dihang nakab-ot na namo ang hingpit nga panag-uyon, ang makapahiusa nga impluwensya sa Espiritu Santo makapadasig! Among nasinati kon unsay nahibaloan ni Propeta Joseph Smith sa dihang siya mitudlo, “Pinaagi sa panaghiusa sa pagbati kita makaangkon og gahum sa Dios.”⁷ Walay gayuy sakop sa Unang Kapangulohan o sa Korum sa Napulog Duha nga motugyan sa mga desisyon alang sa Simbahan sa Ginoo sa iyang kaugalingon nga labing maayong paghukom lamang!

Mga kaigsoonan, unsaon nato pagkahimo nga mga lalaki ug babaye—mga Kristohanong sulugoon—nga gikinahanglan sa Ginoo nga angay natong maabut? Unsaon nato pagkakita sa mga tubag sa mga pangutana nga nakapalibug kanato? Kon ang langitnong kasinatian ni Joseph Smith sa Sagrado nga Kakahoyan nakatudlo kanato og bisan unsa, kana mao nga ang mga langit abli ug nga ang Dios makigsulti sa Iyang mga anak.

Si Propeta Joseph Smith mipahiluna og sumbanan nga atong sundon sa pagtubag sa atong mga pangutana. Naaghat sa panaad ni Santiago nga kon kita nakulangan og kaalam kita makapangayo sa Dios,⁸ ang batang si Joseph midala sa iyang pangutana direkta ngadto sa Langitnong Amahan. Nangayo siya og personal nga pagpadayag, ug ang iyang pagpangita miabli niining katapusang dispensasyon.

Sa sama nga paagi, unsa ang maabli diha kaninyo sa inyong pagpangita? Unsa nga kaalam ang kulang kaninyo? Unsa ang inyong gibati nga maoy dinaliang panginahanglan nga mahibaloan o masabtan? Sunda ang ehemplo ni Propeta Joseph. Pangita ug mingaw nga lugar diin kamo kanunay makaadto. Ipaubos ang inyong kaugalingon atubangan sa Dios. Ibubo ang inyong kasingkasing ngadto sa inyong Langitnong Amahan. Dangop Kaniya alang sa mga tubag ug alang sa kahupayan.

Pag-ampo sa ngalan ni Jesukristo bahin sa inyong mga kabalaka, inyong mga kahadlok, inyong mga kahuyang—o, ang mga tinguha sa inyong kasingkasing. Ug dayon maminaw! Isulat ang mga ideya nga masulod sa inyong hunahuna. Isulat ang inyong mga gibati ug sundi kini sa paglihok sa unsay giaghat nga angay ninyong buhaton. Kon inyong balikbalikon kini nga proseso matag adlaw, matag bulan, matag tuig, kamo “molambo ngadto sa baruganan sa pagpadayag.”⁹

Ang Dios *buot* ba gayud makigsulti kaninyo? Oo! “Maayo pa sa tawo nga molugway sa iyang walay kusog nga kamot sa pagpahunong sa sapa sa Missouri sa iyang walay pagkabalhin nga agianan . . . kay sa pagpugong sa Makagagahum sa pagbu-bu sa kahibalo gikan sa langit diha sa mga ulo sa mga Santos sa Ulahing mga Adlaw.”¹⁰

Dili na kamo kinahanglan maghunahuna kon unsa ang kamatuoran.¹¹ Dili na kamo maghunahuna kinsa ang inyong luwas nga masaligan. Pinaagi sa personal nga pagpadayag, makadawat kamo sa inyong kaugalingon nga pag-saksi nga ang Basahon ni Mormon mao ang pulong sa Dios, nga si Propeta Joseph Smith usa ka propeta, ug nga

kini ang Simbahan sa Ginoo. Bisan kon unsa man ang isulti o buhaton sa uban, walay bisan kinsa ang makapawala sa pagsaksi nga midala ngadto sa inyong kasingkasing ug hunahuna kon unsa ang kamatuoran.

Giawhag ko kamo nga palapdan pa ang inyong kasamtangang espiritwal nga abilidad sa pagdawat og personal nga pagpadayag, tungod kay ang Ginoo misaad nga “Kon kamo mangayo, kamo makadawat og pagpadayag ug dugang nga pagpadayag, kahibalo ug dugang nga kahibalo, nga kamo masayud sa mga misteryo ug malina-won nga mga butang—nga nagdala og hingpit nga kalipay, niana nga nagdala og kinabuhi nga dayon.”¹²

O, aduna pay daghang gusto sa inyong Amahan sa Langit nga inyong mahibaloan. Sama sa gitudlo ni Elder Neal A. Maxell, “Alang niadtong adunay mga mata sa pagtan-aw ug mga dalunggan sa pagpaminaw, tataw kaayo nga ang Amahan ug ang Anak mihatag sa mga sekreto sa uniberso!”¹³

Walay lain nga makabukas sa kalangitan sama sa kombinasyon sa nagtubo nga kaputli, hingpit nga kamasulundon, sinserong nangita, inadlaw nga pagbasa sa mga pulong ni Kristo diha sa Basahon ni Mormon,¹⁴ ug regular nga panahon nga ipasalig alang sa buhat sa templo ug family history.

Sa tinuod lang, aduna tingali mga higayon nga inyong bation nga daw sirado ang kalangitan. Apan ako mosaic nga samtang kamo magpadayon nga magmasulundon, mopahayag og pasalamat alang sa matag panalangin nga gihatag sa Ginoo kaninyo, ug samtang kamo mapailubon nga motahud sa panahon sa Ginoo, pagatagaan kamo sa kahibalo ug pagsabut nga inyong gipangita. Ang matag panalangin sa Ginoo alang kaninyo—gani mga milagro—mosunod. Mao kana ang mabuhat sa personal nga pagpadayag lang kaninyo.

Malaumon ako mahitungod sa kaugmaon. Mapuno kini sa mga oportunidad alang sa matag usa kanato nga mouswag, makatampo ug magdala sa ebanghelyo sa tanang suok sa kalibutan. Apan nahibalo usab ako sa



umaabut nga mga adlaw. Nagpuyo kita sa kalibutan nga komplikado ug nagkadaghan ang kasungian. Ang padayon nga paggamit sa sosyal medya ug ang 24 oras nga mga balita nga mohangok kanato og walay hunong nga mga mensahe. Kon gusto kitang makaangkon og paglaum nga makaayag sa daghang mga opinyon ug sa mga pilosopiya sa katawhan nga nagatake sa kamatuoran, kinahanglan makakat-on kita sa pagdawat og pagpadayag.

Ang atong Manluluwas ug Manunubos, si Jesukristo, mohimo sa uban Niyang labing gamhanan nga mga buhat karon ug sa higayon nga Siya mobalik na pag-usab. Makakita kita og milagrusong timailhan nga ang Dios Amahan ug ang Iyang Pinalanggang Anak magdumala dinhi sa kalibutan sa kahalangdon ug himaya. Apan sa umaabut nga mga adlaw, dili na posible ang espirituhanong pagsugakod kon

wala ang giya, direksyon, ug makahupay nga impluwensya sa Espiritu Santo.

Akong minahal nga mga kaigsoonan, mohangyo ko kaninyo sa pagpagpalambo sa inyong espirituhanong kapasidad sa pagdawat og pagpadayag. Himoa kining Dominggo sa Pasko sa Pagkabanhaw nga higayon nga makapausab gayud sa inyong kinabuhi. Pilia ang paghimo sa espiritwal nga buhat nga maoy gikinahanglan aron sa pagtagamtam sa gasa sa Espiritu Santo ug mas kanunay ug mas klaro nga pagpaminaw sa tingog sa Espiritu.

Uban ni Moroni, ako moawhag kaninyo niining Dominggo sa Pasko sa Pagkabanhaw sa “[pag]duol ngadto ni Kristo, ug mohupot diha sa matag maayo nga gasa,”¹⁵ sugod sa gasa sa Espiritu Santo, kansang gasa makausab ug mousab sa inyong kinabuhi.

Kita mga sumusunod ni Jesukristo. Ang labing importante nga kamatuoran nga saksihan sa Espiritu Santo kaninyo mao nga si Jesus *mao* ang Kristo, ang Anak sa buhing Dios. Siya buhi! Siya atong Manlalaban diha sa Amahan, atong maayong Ehemplo ug atong Manunubos. Niining Dominggo sa Pagkabanhaw, atong saulugon ang Iyang maulaong sakripisyo, Iyang literal nga Pagkabanhaw, ug Iyang kabalaan.

Mao kini ang Iyang Simbahan, nga gipahiuli pinaagi ni Propeta Joseph Smith. Kana ang akong pagpamatuod, uban sa akong pagpadayag og gugma alang sa matag usa kaninyo, sa sagra-dong ngalan ni Jesukristo, amen. ■

MUBO NGA MGA SULAT

1. Doktrina ug mga Pakigsaad 19:18.
2. Tan-awa sa Lucas 23:33.
3. Tan-awa sa Alma 26:16.
4. *Mga Pagtulun-an sa mga Presidente sa Simbahan: Lorenzo Snow* (2012), 88.
5. Tan-awa sa Russell M. Nelson “Ang Maaghop nga Gahum sa Pag-ampo,” *Liahona*, Mayo 2003, 8.
6. Tan-awa sa 3 Nephi 28:1.
7. *Mga Pagtulun-an sa mga Presidente sa Simbahan: Joseph Smith* (2007), 477.
8. Tan-awa sa Santiago 1:5.
9. *Mga Pagtulun-an: Joseph Smith*, 154-155.
10. Doktrina ug mga Pakigsaad 121:33.
11. Tan-awa sa Moroni 10:5.
12. Doktrina ug mga Pakigsaad 42:61.
13. Neal A. Maxwell, “Meek and Lowly” (Brigham Young University devotional, Okt. 21, 1986), 9, speeches.byu.edu.
14. Tan-awa sa 2 Nephi 32:3.
15. Moroni 10:30.



Ni Elder Gerrit W. Gong
Sa Korum sa Napulog Duha ka mga Apostoles

Si Kristo ang Ginoo Nabanhaw Karon

Kini ang Dominggo sa Pasko sa Pagkabanhaw. Matinahuron akong mosaksi ug ligdong nga mopamatuod sa buhi nga Kristo—Siya kinsa “namatay, gilubong, ug mibangon sa ikatulong adlaw, ug mikayab ngadto sa langit.”

Minahal nga mga kaigsoonan, sa bata pa kaayo ang among mga anak, suginlan nako sila og mga istorya mahitungod sa mga itoy nga beagle ug kantahan og mga awit tingkatulog, lakip ang “Si Kristo ang Ginoo Nabanhaw Karon.”¹ Usahay kalingawan nako sa pag-usab ang mga pulong: Oras na karon para matulog—hallelujah. Kasagaran makatulog dayon ang among mga anak; o kaha nasayud sila nga kon nagtuo ko nga nakatulog na sila, mohunong ko sa pagkanta.

Ang mga pulong—labing minos akong mga pulong—dili makapahayag sa naghingapin nga mga pagbati sukad nga mahigugmaong gigunitan ni Presidente Russell M. Nelson ang akong mga kamot, nga anaa sa akong tupad ang minahal ko nga si Susan, ug mihatag niining sagradong tawag gikan sa Ginoo nga nakasurprisa kaayo kanako ug kadaghan nga nakapahilak nako niining milabay nga pipila ka adlaw.

Ning Pasko sa Pagkabanhaw nga Igpapahulay, malipayon akong

moawit, “Alleluia.” Ang kanta sa matubsanong gugma sa atong nabanhaw nga Manluluwas² nagsaulog sa panag-uyon sa mga pakigsaad (nga nagkonektar nato ngadto sa Dios ug sa usag usa) ug sa Pag-ula ni Jesukristo (nga nagtabang nato sa pag-salikway sa kinaiyanhong tawo ug



motugyan ngadto sa mga pagdani sa Balaang Espiritu³).

Magkauban, ang atong mga pakigsaad ug ang Pag-ula sa atong Manluluwas makapaarang ug makapaligdong kanato. Magkauban, nagtabang kini kanato nga magmatinud-anon ug mosalikway sa sala. Magkauban, kini mopatam-is, mopreserbar, mobalaan, motubos.

Miingon si Propeta Joseph Smith: “Kini maingon ngadto sa uban og usa ka dili kasagaran nga doktrina nga kita naghigot—ang gahum nga nagsulat o nagbugkos dinhi sa yuta ug nagbugkos didto sa langit. Bisan pa niana, sa tanan nga panahon sa kalibutan, sa matag higayon ang Ginoo mihatag og kapaigoan sa pagkapari ngadto ni bisan kinsa nga tawo pinaagi sa tinuod nga pagpadayag, o ni bisan kinsa nga pundok sa mga tawo, kini nga gahum kanunay nga gihatag.”⁴

Ug mao usab kini karon. Ang sagra-dong mga pakigsaad ug mga ordinansa, nga wala sa ubang dapit, dawaton diha sa 159 ka balaan nga mga balay sa Ginoo sa 43 ka mga nasud. Ang gisaad nga mga panalangin moabut pinaagi sa gipahiuli nga mga yawe sa priesthood, doktrina, ug awtoridad, nagpakita sa atong pagtuo, pagkamasulundon, ug ang mga saad sa Iyang Balaang Espiritu ngari kanato sa atong mga henerasyon, karon ug sa kahangturan.

Minahal nga kaigsoonan sa tanang nasud, kaliwatan, ug pinulongan, tadlas sa atong tibuok kalibutan nga Simbahan, salamat sa inyong buhing pagtuo, paglaum, ug gugmang putli sa tanan ninyong gibuhay. Salamat sa pagkahimong pundok nga puno sa pagpamatuod ug kasinatian sa gipahiuli nga ebanghelyo.

Minahal nga kaigsoonan, nahisakop kita sa usag usa. Mahimo kitang “mabugkos diha sa panaghiusa ug sa gugma”⁵ sa tanang butang ug sa tanang dapit.⁶ Samtang nagdapit si Ginoong Jesukristo sa matag usa kanato, bisan asa kita, bisan unsay atong mga kahimtang, palihug “Umari kamo ug makita ninyo.”⁷

Karong adlaw mapainubsanon nakong isaad ang tanang mga umoy ug galamhan sa akong kalag,⁸ bisan

unsa man kini karon o mamahimo, sa akong Manluluwas, sa akong minahal nga si Susan ug sa among pamilya, sa akong Kaigsoonan, ug sa matag usa kaninyo, akong minahal nga kaigsoonan.

Ang tanang maayo ug mahangturon nakasentro sa buhi nga reyalidad sa Dios nga atong mahigumaong Amahan sa Kahangturan, ug sa Iyang Anak, si Jesukristo, ug sa Iyang Pag-ula, nga gisaksihan sa Espiritu Santo.⁹ Kini ang Dominggo sa Pasko sa Pagkabanhaw. Matinahuron akong mosaksi ug ligdong nga mopamatuod sa buhi nga Kristo—Siya kinsa “namatay, gilubong, ug mibangon sa ikatulong adlaw, ug mikayab ngadto sa langit.”¹⁰ Siya mao ang Alpha ug Omega¹¹—uban kanato sa sinugdanan, Siya magauban kanato hangtud sa katapusan.

Magpamatuod ko sa mga propeta sa ulahing mga adlaw, gikan ni Propeta Joseph Smith ngadto ni Presidente Russell M. Nelson, kinsa malipayon natong gipaluyohan. Sama sa pagkanta sa atong Primary nga mga bata, “Sunda’ng propeta; nasayud siya.”¹² Mosaksi ko nga, sama sa gipanagna sa balaang mga kasulatan, lakip sa Basahon ni Mormon: Lain nga Tugon ni Jesukristo, “ang gingharian sa Ginoo sa makausa pa gitukod na usab dinhi sa yuta, pagpangandam sa Ikaduhang Pag-anhi sa Mesiyas.”¹³ Sa balaan ug sagradong pangalan ni Jesukristo, amen. ■

MUBO NGA MGA SULAT

1. “Kristo ang Ginoo Nabanhaw Karon,” *Mga Himno ug mga Awit sa mga Bata*, nu. 54.
2. Tan-awa sa Alma 5:26.
3. Tan-awa sa Mosiah 3:19.
4. Doktrina ug mga Pakigsaad 128:9.
5. Mosiah 18:21.
6. Tan-awa sa Mosiah 18:9.
7. Juan 1:39.
8. Tan-awa sa 1 Nephi 15:25.
9. “Kamo nakadawat sa Espiritu Santo, diin mosaksi sa Amahan ug sa Anak, ngadto sa katumanan sa saad diin siya mihimo, nga kon kamo mosulod pinaagi sa agianan kamo kinahanglan makadawat” (2 Nephi 31:18).
10. *Mga Pagtulun-an sa mga Presidente sa Simbahan: Joseph Smith* (2007), 58.
11. Tan-awa sa Doktrina ug mga Pakigsaad 19:1.
12. “Sunda ang Propeta,” *Songbook sa mga Bata*, 58-59.
13. Pasiuna sa Basahon ni Mormon.



Ni Elder Ulisses Soares

Sa Korum sa Napulog Duha ka mga Apostoles

Ang mga Propeta Mamulong pinaagi sa Gahum sa Balaang Espiritu

Ang pagkaadunay mga propeta usa ka timaan sa gugma sa Dios alang sa Iyang mga anak. Ipahibalo nila ang mga saad ug ang tinuod nga kinaiyahan sa Dios ug kang Jesukristo.

Minahal kong mga kaigsoonan, bisan asa kamo, gusto kong mopahayag sa sinsero ug dako nakong pasalamat sa inyong pagpaluyo nga boto kagahapon. Bisano og gibati nako nga dili larino ug dili maayong



manulti sama kang Moises, gihupay nako ang akong kaugalingon sa mga pulong sa Ginoo kaniya:

“Kinsa man diay ang nagbuhat sa ba-ba sa tawo? kun kinsa ba ang nagbuhat sa tawo nga mama [amang], kun bungol, kun sa makakita, kun sa buta? Dili ba ako man, ang Ginoo?”

“Busa karon lumakaw ka, kay ako magauban sa imong ba-ba, ug magatudlo kanimo kong unsa ang imong igasulti” (Exodo 4:11–12; tan-awa usab sa bersikulo 10).

Nahupay usab ako pinaagi sa gugma ug suporta sa pinangga nakong asawa. Ehemplo siya sa kamaayo, gugma, ug hingpit nga debosyon sa Ginoo ug ngari kanako ug sa akong pamilya. Gimahal nako siya sa matag tipik sa akong kasingkasing, ug mapasalamaton ako sa positibo niyang impluwensya kanamo.

Mga kaigsoonan, gusto nakong ipamatuod nga si Presidente Russell M.

Nelson ang propeta sa Dios dinhi sa yuta. Wala pa ko kakita og tawo nga labaw kamabination ug kamapinangaon kay kaniya. Bisan og akong gibati ang kakulang alang niini nga sagra-dong tawag, ang iyang mga pulong ug ang iyang malumo nga pagtan-aw kanako dihang gihatag niya kini nga responsibilidad naghatag kanako og pagbati sa gakos sa Manluluwas. Salamat, Presidente Nelson. Gipaluyohan ko ikaw ug gimahal ko ikaw.

Dili ba panalangin man ang pagkaadunay mga propeta, manalagna, ug tigpadayag dinhi sa yuta niining mga adlaw diin kita nagpuyo, kinsa nagtinguhang mahibalo sa kabubut-on sa Ginoo ug pagsunod niini? Makahupay ang pagkahibalo nga wala kita maginusara sa kalibutan, bisan sa mga hagit nga atong giatubang sa kinabuhi. Ang pagkaadunay mga propeta usa ka timan sa gugma sa Dios alang sa Iyang mga anak. Ipahibalo nila ang mga saad ug ang tinuod nga kinaiyahan sa Dios ug kang Jesukristo ngadto sa Ilang katawhan. Nakat-unan ko kana pinaagi sa personal nakong mga kasinatian.

Dise-otso ka tuig ang milabay, ang akong asawa ug ako nakadawat og tawag gikan ni Presidente James E. Faust, nga kaniadto Ikaduhang Magtatambag sa Unang Kapangulohan. Gitawag niya kami sa pagserbisyo isip mission president ug kompanyon sa Portugal. Iya kaming giingnan nga unom na lang ka semana magsugod na kami sa misyon. Bisan gibati namo ang kadili andam ug kakulang, gidawat namo ang tawag. Ang pinakadako namong kabalaka adtong higayuna mao ang pagkuha og mga visa nga gikinahanglan sa pagserbisyo niana nga nasud tungod kay, sumala sa miaging kasinatian, nasayran namo nga mokabat og walo ka bulan una mahuman ang proseso.

Nangutana si Presidente Faust kon may pagtuo ba kami nga mohimo ang Ginoo og milagro ug paspas ra namong masulbad ang problema sa visa. Dakong oo ang among tubag, ug gisugdan dayon namo ang paglihok. Giandam namo ang mga dokumento nga gikinahanglan para sa visa, midala sa among tulo ka gagmayng mga anak,



ug nagdali kutob sa mahimo sa pagadto sa consulate. Usa ka buotang babaye ang mitagbo namo didto. Sa pagribyu sa among mga papeles ug sa pagkahibalo unsay buhaton namo sa Portugal, mitan-aw siya kanamo og nangutana, “Tabangan ba gyud ninyo ang mga tawo sa akong nasud?” Mitubag kami og hugot nga oo ug mipasabut nga magrepresentar kami kang Jesukristo ug mopamatuod Kaniya ug sa Iyang balaang misyon sa kalibutan. Namalik mi didto human sa upat ka semana, nadawat ang among mga visa, ug naabut sa mission field sulod sa unom ka semana, sigun sa gihangyo sa propeta sa Ginoo nga among buhaton.

Mga kaigsoonan, gikan sa kinauyukan sa akong kasingkasing, mopamatuod ko nga ang mga propeta mamulong pinaagi sa gahum sa Balaang Espiritu. Mopamatuod sila kang Kristo ug sa Iyang balaan nga misyon dinhi sa yuta. Nagrepresentar sila sa hunahuna ug kasingkasing sa Ginoo ug gitawag nga morepresentar Kaniya ug motudlo kanato unsa ang angay natong buhaton aron makabalik

pagpuyo sa presensya sa Dios ug sa Iyang Anak, si Jesukristo. Bulahan kita kon mogamit kita og pagtuo ug mosunod sa ilang mga pagtulun-an. Pinaagi sa pagsunod kanila, mas sadya ang atong kinabuhi ug minus ang kakomplikado, ang atong mga kalisdanan ug mga suliran mas sayon nga mapas-an, ug mamugna nato ang espiritwal nga taming libut kanato nga mosalipud kanato sa mga pag-atake sa kaaway sa atong panahon.

Niining adlaw sa Pasko sa Pagkabanhaw ligdong ko nga mopamatuod nga si Jesukristo buhi, ug Siya ang nagdumala sa Iyang Simbahan dinhi sa yuta pinaagi sa Iyang mga propeta, manalagna, ug tigpadayag. Mopamatuod ko nga Siya ang Manluluwas ug Manunubos sa kalibutan ug pinaagi Kaniya maluwas kita ug mahimaya sa presensya sa atong minahal nga Dios. Gihigugma nako Siya; Ako siyang gisimba. Sundon nako Siya ug buhaton ang Iyang kabubut-on ug magmahisma Kaniya. Isulti ko kining mga butanga sa pagpaubos diha sa pangalan sa Ginoo nga si Jesukristo, amen. ■



Ni Presidente Russell M. Nelson

Pagpangalagad

Atong ipatuman ang mas bag-o, mas balaan nga paagi sa pag-amuma ug pagpangalagad sa uban.

Salamat Elder Gong ug Elder Soares sa inyong kinasingkasing nga pagpahayag sa hugot nga pagtuo. Mapasalamaton kaayo kami kaninyo ug sa inyong minahal nga mga kapikas.

Minahal nga mga kaigsoonan, makanunayon kaming nagtinguha og direksyon gikan sa Ginoo kon unsaon nato aron matabangan ang atong mga miyembro sa pagtuman sa mga sugo

sa Dios, ilabi na niadtong duha ka dagkong mga sugo sa paghigugma sa Dios ug sa atong mga silingan.¹

Sulod sa mga bulan, nagtinguha kami og usa ka mas maayong paagi sa pagpangalagad sa espirital ug temporal nga mga panginahanglan sa atong katawhan diha sa pamaagi sa Manluluwas.

Midesisyon kami nga undangon ang “home teaching” ug “visiting teaching”

sigun sa atong nahibaloan niini. Hinoon, atong ipatuman ang mas bag-o, mas balaan nga paagi sa pag-amuma ug pagpangalagad sa uban. Atong tawagon kining mga paningkamot isip “pagpangalagad.”

Ang epektibong mga paningkamot sa pagpangalagad makapahimo sa natural nga mga gasa sa mga sister, ug pinaagi sa walay ikatandi nga gahum sa priesthood. Kitang tanan nagkinahanglan sa maong proteksyon gikan sa maliputon nga pagdani sa kaaway.

Si Elder Jeffrey R. Holland sa Korum sa Napulog Duha ka mga Apostoles ug si Sister Jean B. Bingham, ang Kinatibuk-ang Presidente sa Relief Society, mopasabut kon unsaon pag-function karon sa gitahasan nga kaigsoonan sa priesthood ug sa gitahasan nga mga sister sa Relief Society ug sa Young Women sa pagserbisyo ug sa pagbantay sa mga miyembro sa Simbahan sa tibuok kalibutan.

Ang Unang Kapangulohan ug ang Napulog Duha nagkahiusa sa pag-endorso sa ilang mga mensahe. Mapasalamaton ug mainampoon abilhan nato kining bag-ong kapitulo sa kasaysayan sa Simbahan. Sa pangalan ni Jesukristo, amen. ■

MUBO NGA SULAT

1. Tan-awa sa Lucas 10:27.





Ni Elder Jeffrey R. Holland
Sa Korum sa Napulog Duha ka mga Apostoles

“Magpaduol ug Maglig-on Kanila”

Ang among pag-ampo karong adlaw mao nga ang matag lalaki ug babaye mobiya niining komperensya nga mas hugot ang kamasaligon sa kinasingkasing nga pagpakabana alang sa usag usa.

Sa pag-paraphrase ni Ralph Waldo Emerson, Ang labing halandumon nga mga higayon sa kinabuhi mao kadtong diin kita mobati sa kalit-kalit nga pagpadayag.¹ Presidente Nelson, ambot lang kaha pila pa ka “kalit-kalit” ang among makaya niining semana-ha. Ang uban kanato huyang og mga kasingkasing. Apan samtang naghuhuna ko niini, imo man usab diay kanang masulbad. Pagkanindot nga pagkapropeta!

Nunot sa diwa sa kahibulongang mga pahayag ug pagpamatuod ni Presidente Nelson kagabii ug karung buntag, Ako mohatag sa akong kaugalingong pagsaksi nga kining mga kausaban mga ehemplo sa pagpadayag nga naggiya niining Simbahan sukad sa sinugdanan. Kini sila dugang mga timailhan nga ang Ginoo mopadali sa Iyang buluhaton sa iyang angay nga panahon.²

Alang niadtong naghinamhinam nang mahibaloan ang mga detalye niining mga butanga, palihug hibalo kana inig kahuman dayon niini nga sesyon sa komperensya, ang han-ay nga pagasugdan maglangkob, dili kinahanglan nga

sama niini pagkasunod, padala ug sulat gikan sa Unang Kapangulohan ngadto sa tanang miyembro sa Simbahan nga anaa kami email adress. Pito ka pahina nga dokumento sa mga pangutana ug mga tubag ang ipasukip alang sa tanang mga priesthood ug mga lider sa auxillary.

Sa katapusan, kini nga mga materyal mabutang dayon sa ministering.LDS.org. “Pangayo, ug kamo pagahatagan; pangita, ug kamo makakaplag.”³

Karon mahitungod sa maanindot kaayo nga buluhaton nga nahatag ni Presidente Russel M. Nelson ngari kanako ug ngadto ni Sister Jean B. Bingham. Mga kaigsoonan, samtang ang buhat sa mga korum ug mga auxiliary mohingkod na isip organisasyon, angayan lang nga kita sa atong kaugalingon kinahanglan mahingkod usab—tagsa-tagsang maglikay sa naandan, balik-balik nga pamatasan nga walay kinasingkasing nga pagbati sa pagkadi-sipulo nga gipasabut sa Manluluwas sa pagtapus sa Iyang yutan-ong pangalagad. Sa dihang nangandam na Siya sa pagbiya sa Iyang inosente pa ug murag naglibug nga gamayng grupo sa mga sumusunod, wala Siya maglista og daghang mga administratibong lakang nga ilang pagabuhaton o mihatag kanila og daghang mga report nga ang tulo ka kopya sulatan. Wala, Iyang gilaktod ang ilang tahas sa usa ka sukaranan nga sugo: “Maghigugmaay kamo ang usa sa usa; maingon nga Ako nahigugma kaninyo. . . . Ang tanang tawo makaila nga kamo mga tinun-an ko pinaagi niini, kon kamo maghigugmaay ang usa sa usa.”⁴





Agi og paningkamot sa pagpaduol ngadto nianang sumbanan sa ebanghelyo, kining bag-ong gipahibalo nga konsepto sa pagpangalagad sa priesthood ug Relief Society maglakip sa, uban sa laing mga butang, ang mosunod nga mga elemento, ang uban niana gigamit na sa Relief Society uban sa talagsaong kalampusan.⁵

- Dili na kita moggamit sa pulong nga home teaching ug visiting teaching. Tungod kana kay sa usa ka bahin kadaghanan sa atong paningkamot sa pagpangalagad anaa sa mga dapit gawas lang sa panimalay ug sa laing bahin tungod kay ang atong pakig-kita dili man mahulagway pinaagi sa pagtudlo og mga inandam nga leksyon, bisan kon ang leksyon mahimo gayud nga ipaambit kon adunay panginahanglan niana. Ang nag-unang katuyuan niining ideya sa pagpangalagad mao ang, sama sa gikaingon bahin sa katawhan sa panahon ni Alma, “mibantay ibabaw sa ilang mga katawhan, ug . . . nag-amuma kanila sa mga butang kabahin sa pagkamatarung.”⁶
- Mopadayon kita sa pagbisita og mga panimalay kutob sa mahimo, apan sa lokal nga mga sirkumstansya sama sa dinagko nga gidaghanon,

lagyong distansya, personal nga kaluwasan, ug ubang mahagiton nga mga kahimtang nga makapugong kanato sa pagbisita sa matag panimalay matag bulan. Sumala sa tambag sa Unang Kapangulohan katuigan na ang milabay, buhata ang kutob sa inyong mahimo.⁷ Agig dugang sa bisan unsa nga iskedyul nga inyong napahiluna alang sa aktwal nga mga pagbisita, kana nga iskedyul mahimong madugangan og mga tawag sa telepono, mubo nga mga sulat, mga text, mga email, mga video chat, mga panag-istoryahanay sa mga miting sa Simbahan, mga proyekto sa pagpaambit og serbisyo, mga kalihokan sa katilingban, ug daghan pang mga posibilidad sa kalibutan sa sosyal media. Hinuon, akong klaruhon nga kining halapad nga bag-ong mga paagi sa pakigdait wala maglakip sa makauulaw nga taras nga bag-uhay lang nakong nakita sa usa ka gipapilit sa bumper awto. Mabasa kini, “Kon moserbatu ko, gi-home teach na ka.” *Palihug*, palihug, mga igsoon (ang mga sister dili gayud mahimong sad-an niana—nagsulti ko sa mga kaigsoonang lalaki sa Simbahan), nunot niining kausaban gusto kita og mas daghang pagpakabana ug kabalaka, dili minus.

- Uban niining mas bag-o, mas nakabase sa ebanghelyo nga konsepto sa pagpangalagad, akong gibati nga nagsugod na kamo og kalisang kon unsa ang mabutang diha sa report. Nan, relaks lang, tungod kay walay bisan unsang ireport—maayo nalang kon aduna sa ika-31 sa bulan nga, “basta lang gyud makahatag” og report. Dinhi usab kita naningkamot nga mohingkod. Ang ireport mao lang ang gidaghanon sa mga interbyu nga napahigayon sa mga lider uban sa mga parisian sa nangalagad diha sa ward niana nga quarter. Ingong nga yano lang kining paminawon, mga higala, kadtong mga interbyu hilabihan ka mahinungdanon. Kon wala kadto nga impormasyon kana nga bishop dili makadawat og impormasyon

mahitungod sa espiritwal ug temporal nga mga kahimtang sa iyang mga tawo. Hinumdomi: ang tigpangalagad nga mga kaigsoonan nagrepresentar sa bishopric ug sa kapangulohan sa korum sa mga elder, dili sila maoy ipuli kanila. Ang mga yawe sa bishop ug sa presidente sa korum molabaw pa niining konsepto sa pagpangalagad.

- Tungod kay kini nga report lahi gikan sa bisan unsa nga inyo nang nasumiter sauna, akong klaruhon nga *kami* sa ulohang buhatan sa Simbahan wala magkinahanglang mahibalo kon *giunsa* o *asa* o *kanus-a* kamo mohimo og pagkontak sa inyong mga tawo, nagkinahanglang lang kaming makahibalo ug nagpakabanana ba kamo *nagbuhat* ug nagpanalangin kanila sa tanang paagi nga inyong mahimo.

Mga Kaigsoonan, aduna kitay kahigayunan nga hinatag sa langit isip tibuk Simbahan sa pagpakita og “putli nga relihiyon . . . nga walay buling atubangan sa Dios”⁸—“sa pagtambayayong sa mga alantuson sa usag usa, nga sila mahimo nga magaan” ug sa “paghupay niadto nga nagkinahanglang sa kahupayan,”⁹ mangalagad ngadto sa mga biyuda ug sa walay amahan, sa minyo ug ang dili minyo, sa lig-on ug sa magulanon, sa dinaug-daog ug sa baskog, sa malipayon ug sa magulanon—sa laktod, kitang tanan, matag usa kanato, tungod kay kitang tanan nanginahanglang mobati sa madasigon nga kamot sa panaghigalaay ug makadungog sa lig-on nga pamahayag sa hugot nga pagtuo. Hinuon, mopasidaan ko kaninyo, usa ka bag-ong ngalan, bag-o nga kapailin-ilinan, ug mas dyutay nga mga report dili makahimo og kalainan sa atong serbisyo gawas lang kon ato kining isipon nga imbitasyon sa pag-amuma alang sa usag usa sa dayag, bag-o, mas balaan nga paagi, sumala sa bag-o lang gisulti ni Presidente Nelson. Samtang ibayaw nato ang atong espirituhanong mga mata ngadto sa pagpuyo sa balaod sa gugma nga mas malukpanon, mopahinungod kita sa mga henerasyon kinsa nagserbisyo niana

nga paagi sa daghang mga katuigan. Mosulti ko og bag-o nga ehemplo niini nga debosyon sa paglaum nga daghan pa ang makasabut sa sugo sa Ginoo nga “magpaduol ug maglig-on kanila”¹⁰ atong mga kaigsoonan.

Niadtong Enero 14, Dominggo, mga pasado alas 5:00 sa hapon, akong mga batan-ong higala nga si Brett ug Kristin Hamblin nag-istoryahanay sa ilang panimalay sa Tempe, Arizona, human sa tibuok adlaw nga pagserbisyo ni Brett sa bishopric ug si Kristin nagkapuliki og atiman sa ilang lima ka anak.

Sa kalit lang si Kristin, ingon og malampuson nga nakalingkawas sa kanser sa totoy sa milabay nga tuig, nakuyapan. Usa ka tawag sa 911 miabut ang emergency team nga naningkamot og maayo sa pagluwas kaniya. Samtang nag-ampo ug nangalyupo si Brett, midali siya og himo og duha ka lain pang tawag: ang usa sa iyang inahan naghango kaniya pagtabang sa pagbantay sa iyang mga anak, ang usa ngadto kang Edwin Potter, ang iyang home teacher. Mao kini ang nahitabo sa ilang panag-istoryahanay sa kinatibuk-an:

Edwin, nakita ang pangalan sa caller ID, miingon, “Oy, Brett, unsay ato?”

Ang murag nagsyagit nga tubag ni Brett: “Nagkinahanglan ko nimo dinhi—karon dayon!”

Sulod lang sa pipila ka minutos, ang iyang kauban sa priesthood anaa na sa iyang kiliran, mitabang sa mga bata ug midrayb ni Brother Hamblin ngadto sa ospital nagsunod sa ambulansya nga nagdala sa iyang asawa. Didto, wala kaabut og 40 minutos human siya makuyapan, ang mga doktor midiklarar ni Kristin nga patay na.

Samtang si Brett nagbakho, si Edwin yanong migunit sa iyang mga bukton ug miduyog kaniya sa paghila—sulod sa dugay, dugayng panahon. Dayon, gihatagan og higayon si Brett nga magbangutan uban sa ubang mga sakop sa pamilya, si Edwin miadto sa panimalay sa bishop aron pagsulti kaniya unsay nahitabo bag-ohay lang. Ang Bishop miadto dayon sa ospital samtang si Edwin mipadayon

ngadto sa panimalay sa mga Hamblin. Didto siya og ang iyang asawa, si Charlotte, kinsa miadto usab nga nagdagan, nakigdula sa lima ka batang Hamblin nga karon wala nay inahan, nag-edad og 12 paubos ngadto sa 3. Gipapanihapon nila sila, mipahigayon og impromptu nga recital sa musika ug mitabang nila sa pag-andam sa pagpangatulog.

Sa kaulahian sa Brett misulti kanki, “Ang makapahibulong nga bahin niini nga istorya dili ang pag-abut ni Edwin sa dihang mitawag ako. Sa usa ka emerhensiya, aduna gayuy tawo nga andam motabang. Dili, ang makapahibulong nga bahin niini nga istorya mao nga siya ang akong nahunahunan. Adunay laing mga tawo sa palibut. Si Kristin adunay igsoon nga lalaki ug babaye kinsa parihong nagpuyo wala kaabut lima ka kilometro ang gilay-on. Aduna kami maayo nga bishop, ang labing maayo. Apan ang relasyon tali namo ni Edwin hilabihan nga akong natural nga gibati ang pagtawag kaniya kon magkinahanglan ko og tabang. Ang Simbahan naghatag kanato og pinahimutang nga pamaagi sa mas maayo nga pagsunod sa ikaduhang sugo—sa paghigugma, pagserbisyo, ug pag-ugmad og mga relasyon uban sa atong mga kaigsoonan nga makatabang kanato nga maduol sa Dios.”¹¹

Ang giingon ni Edwin mahitungod sa iyang kasinatian mao nga, “Elder Holland, ang pagkabali aning tanan kay si Brett mas dugay na nga home teacher sa among pamilya kay sa kami sa ilaha. Nianang higayuna, nakabisita siya kanamo og mas kadaghan isip higala kay sa tungod usa ka buluhaton. Siya nahimong usa ka talagsaon nga ehemplo, ang sumbanan kon unsa gayud ang aktibo ug malambigiton nga tighupot sa priesthood. Akong asawa, among mga anak—wala magtan-aw kaniya nga tawo nga obligadong magdala kanamo og mensahe sa katapusan sa matag bulan; giisip na namo siya nga higala kinsa nagpuyo sa unahan ug duol sa eskina, kinsa mobuhat kutob sa iyang mahimo aron sa pagpanalangin kanamo. Malipayon

ako nga makabalos bisan gamay lang sa akong utang kaniya.”¹²

Mga kaigsoonan, moapil ako kaninyo sa pagpasidungog sa matag block teacher ug ward teacher ug home teacher ug visiting teacher kinsa mihigugma ug miserbisyo nga matinud-anon sa tibuok natong kasaysayan. Among pag-ampo karong adlaw mao nga ang matag lalaki ug babaye—ug atong mga hamtung nga young men ug young women—mobiya niining kinatibuk-ang komperensya nga mas hugot ang kamasaligon sa kinasingkasing nga pagpakabana alang sa usag usa, dinasig lamang sa putli nga gugma ni Kristo sa pagbuhat sa ingon. Bisan pa sa unsay atong bation nga atong mga limitasyon ug mga kakulangan—ug kitang tanan adunay mga hagit—bisan paman, hinaot nga maghago ta uban sa Ginoo sa ubasan,¹³ sa paghatag og tabang sa Dios ug Amahan natong tanan sa Iyang dako nga buluhaton sa pagtubag sa mga pag-ampo, paghatag og kahupayan, pagpahid sa mga luha, ug paglig-on sa huyang nga mga tuhod.¹⁴ Kon ato kanang buhaton, mahimo kitang mas mahisama sa mga disipulo ni Kristo nga maoy angayan kanato. Unta maghigugmaay kita sa usag usa sama nga Siya nahigugma kanato,¹⁵ ako nag-ampo sa ngalan ni Jesukristo, amen. ■

MUBO NGA MGA SULAT

1. Tan-awa sa Ralph Waldo Emerson, *The Conduct of Life* (1860), 268.
2. Tan-awa sa Doktrina ug mga Pakigsaad 88:73.
3. Lucas 11:9.
4. Juan 13:34–35.
5. Tan-awa sa “Kontaka Siya Bisan Unsang Orasa, Bisan Asa, Sa Bisan Unsang Paagi,” *Liahona*, Ene. 2018, 7.
6. Mosiah 23:18; tan-awa usab sa Doktrina ug mga Pakigsaad 20:53.
7. Tan-awa sa “Watching Over and Strengthening Members,” sulat sa Unang Kapangulohan, Dis. 10, 2001.
8. Santiago 1:27.
9. Mosiah 18:8–9.
10. Doktrina ug mga Pakigsaad 20:53.
11. Brett Hamblin, personal correspondence, Feb. 2018.
12. Edwin Potter, personal correspondence, Feb. 2018.
13. Tan-awa sa Jacob 5:70–72.
14. Tan-awa sa Doktrina ug mga Pakigsaad 81:5.
15. Tan-awa sa Juan 15:12.



Ni Jean B. Bingham

Kinatibuk-ang Presidente sa Relief Society

Pagpangalagad sama sa Gibuhat sa Manluluwas

Hinaut maipakita nato ang atong pasalamat ug gugma alang sa Dios pinaagi sa pagpangalagad uban ang gugma ngadto sa atong mahangturong mga kaigsoonan.

Pagkanindot nga panalangin ang magpuyo sa panahon sa nagpadayong pagpadayag gikan sa Dios! Samtang kita mahinamun nga nagpaabut ug dawaton sa hingpit ang “pagtuman sa tanang mga gisulti sa Dios,”¹ nga mahitabo ug moabut pinaagi sa gipanagna nga mga panghitabo sa atong panahon, giandam kita alang sa Ikaduhang Pag-anhi sa Manluluwas.²

Ug unsa pa ang mas maayong paagi sa pag-andam sa pagsugat Kaniya kay sa pagpaninguha nga mahimong *sama* Kaniya pinaagi sa mahigugmaong pagpangalagad sa usag usa! Ingon nga gitudlo ni Jesukristo sa Iyang mga sumusunod sa sinugdanan niini nga dispensasyon, “Kon kamo nahigugma kanako kamo mag-alagad kanako.”³ Ang atong serbisyo ngadto sa uban usa ka pagpakita sa pagkatinun-an ug sa gugma alang sa Dios ug sa Iyang Anak, si Jesukristo.

Usahay naghunahuna kita nga kinahanglang mobuhat kita og usa ka butang nga bililhon kaayo ug bayanihon aron “maihap” isip pagserbisyo sa atong mga silingan. Apan ang yano nga mga buhat sa serbisyo mahimong adunay

lawom nga mga epekto sa uban—ingon man sa atong mga kaugalingon. Unsa ang gibuhat sa Manluluwas? Bisan og ang Iyang balaang mga gasa sa Pag-ula ug Pagkabanhaw—nga atong gisaulog niining nindot nga Dominggo sa Pagkabanha—“walay lain nga adunay labaw ka mahinungdanong impluwensya diha sa tanan kinsa nakapuyo na ug kinsa magpuyo pa dinhi sa yuta.”⁴ Apan Siya usab mipahiyom ni, nakigsulti



uban ni, nakiglakaw kauban ni, naminaw ngadto ni, mihatag og oras alang ni, miawhag, mitudlo, mipakaon, ug mipasaylo. Managsama Niyang giserbis-yohan ang pamilya ug mga higala, mga silingan ug dili mga kaila, ug gidapit Niya ang mga kaila ug mga minahal sa pagpahimulos sa buhong nga mga panalangin sa Iyang ebanghelyo. Kad-tong “yano” nga mga serbisyo ug gugma naghatag og sumbanan alang sa atong pagpangalagad karon.

Samtang kamo adunay pribilehiyo sa pagbarug alang sa Manluluwas sa inyong pagpangalagad nga mga paningkamot, pangutan-a ang inyong kaugalingon, “Unsaon nako pagpakigbahin ang kahayag sa ebanghelyo ngadto niini nga tawo o pamilya? Unsa ang giaghat sa Espiritu nga akong buhaton?”

Ang pagpangalagad mahimong buhaton sa daghang nagkalain-lain nga mga paagi. Busa unsa ang panig-ingnan niini?

Ang pagpangalagad sama sa mga kapangulohan sa korum sa mga elder ug Relief Society nga mainampuong nagtambag mahitungod sa mga buluhaton. Kay sa mga lider nga naghatag lamang og gagmayng mga papel, kini sama sa nagtambag mahitungod sa mga indibidwal ug mga pamilya nga tawo samtang ang mga buluhaton gihatag ngadto sa mangalagad nga mga kaigsoonan. Kini sama sa nanglakaw, nag-uban og dula sa gabii, nagtanyag og serbisyo, o gani nagkuyog sa pagpangalagad. Kini sama sa personal nga pagduaw o nakigsulti diha sa telepono o nag-istorya online o nag-text. Kini sama sa naghatud og birthday card ug nag-abiba og dula sa soccer. Kini sama sa pakigbahin og kasulatan o kutlo gikan sa pakigpulong sa komperensya nga makahuluganon ngadto niana tawo. Kini sama sa pakighisgot og pangutana sa ebanghelyo ug pakigbahin sa pagpamatuod aron magdala og katin-awan ug kalinaw. Kini sama sa mahimong kabahin sa kinabuhi sa usa ka tawo ug mag-amuma kaniya. Kini sama usab sa interbyu sa pagpangalagad diin ang mga panginahanglan ug mga kalig-on gihisgutan sa mabination

ug tukma nga paagi. Kini sama sa ward council nga nag-organisar aron sa pagtubag sa usa ka mas dako nga panginahanglan.

Kini nga matang sa pagpangalagad naglig-on sa usa ka sister kinsa mibalhin og pinuy-anan sa dihang ang iyang bana misugod og graduate school. Nga walay telepono nga magamit ug may batang gamay nga amumahan, naglibug siya diha sa bag-ong dapit, hingpit nga walay nahibaloan ug nag-inusara. Walay pasiuna nga pahibalo, usa ka Relief Society nga sister mituktok sa pultahan nga nagdala og usa ka parisang gamay nga sapatos alang sa masuso, gipasakay ang duha sa iyang sakyanan, ug gidala sa grocery. Mi-report ang mapasalamatong sister, “Siya ang nahimo nakong sandiganan!”

Ang tinuod nga pagpangalagad gipakita sa usa ka mas hingkod nga sister sa Africa kinsa gisugo sa pagpa-ngita og sister nga dugay nang wala mosimba. Sa pag-adto niya sa panimalay sa sister, iyang nakita nga ang babaye gibun-og ug gikawatan, dihay gamay kaayo nga pagkaon, ug walay masul-ob nga sinina nga gibati niya nga dili angayan alang sa mga miting sa Simbahan ma-Dominggo. Ang babaye nga mangalagad kaniya nagdala og dunggan nga andam maminaw, bunga gikan sa iyang halaman, mga kasulatan aron basahon ug panaghigalaay. Ang “nawala” nga sister sa wala madugay misimba ug karon may calling na tungod kay nasayud siya nga gihigugma siya ug gihatagan og bili.

Tipunon ang mao nga mga paningkamot sa Relief Society ug sa karong giusab nga korum sa mga elder modala og panaghiusa nga makahatag og makatingala nga mga resulta. Ang pagpangalagad nahimong usa ka hinan-ay nga paningkamot aron sa pagtuman sa katungdanan sa priesthood sa “pagduaw sa balay sa matag sakop” ug sa “pagbantay diha sa simbahan sa kanunay, ug magpaduol ug maglig-on kanila,”⁵ ingon man sa pagkab-ot sa katuyoan sa Relief Society sa pagtinabangay og andam alang sa mga panalangin sa mahangturong kinabuhi.⁶ Magtrabaho og dungan ubos



sa direksyon sa bishop, mga kapanguloan sa korum sa mga elder ug Relief Society makadasig samtang sila nani-nguha sa labing maayo nga mga paagi sa pagbantay ug pag-amuma sa kada tawo ug pamilya.

Tuguti ako sa paghatag kaninyo og usa ka ehemplo. Usa ka inahan nahiling nga adunay kanser. Wala madugay misugod siya sa pagpatambal, ug dihadidha dayon, ang mga sister sa Relief Society mitrabaho, nagplano unsaon nga labing makatabang sa iyang mga pagkaon, kasakyan sa higayon nga magpagpatambal, ug uban pang tabang. Kanunay siyang gibisitahan, gihatagan og makalipay nga pakig-uban. Sa samang higayon, ang korum sa Melchizedek Priesthood misugod sa paglihok. Gitrabaho nila ang pagdugang og inusab nga katulganan ug kaligoanan aron mas sayon ang pag-amuma sa masakiton nga sister. Ang young men mitrabaho sa pagtabang nianang mahinungdanong paningkamot. Ug ang young women miapil: malipayon nilang giplano sa tinud-anay ang kanunay nga pagpalakawlakaw sa iro kada adlaw. Samtang nanglabay ang panahon, mipadayon ang ward sa ilang serbisyo, nagdugang ug nagpahiuyon diin gikinahanglan. Kini tataw nga usa ka trabaho sa gugma, matag miyembro naghatag sa iyang kaugalingon, naghiusa sa pagpakita og pag-amuma sa tinagsa nga mga paagi nga

mipanalangin dili lamang sa nag-antus nga sister apan sa kada miyembro sa iyang pamilya.

Human sa maisug nga paningkamot, sa katapusan ang sister namatay sa kanser ug gilubong. Ang ward ba nakaginghawa ug naghunahuna sa maayong pagkabuhat ug maayong pagkahuman nga trabaho? Wala, ang young women nagpadayon sa pagpalakawlakaw sa iro kada adlaw, ang mga korum sa priesthood nagpadayon sa pagpangalagad ngadto sa amahan ug sa iyang pamilya, ug ang mga sister sa Relief Society nagpadayon sa pagtabang diha sa gugma aron mapaniguro ang mga kalig-on ug mga panginahanglan. Mga kaigsoonan, kini mao ang pagpangalagad—kini ang paghigugma sama sa gibuhay sa Manluluwas!

Lain nga panalangin kabahin niining dinasig nga mga pahibalo mao ang oportunidad alang sa young women nga nag-edad og 14 ngadto sa 18 sa pag-apil sa pagpangalagad isip mga kauban sa mga sister sa Relief Society, ingon man sa young men nga ilang kadedad nga nagserbisyo isip mga kauban sa mga naghupot sa Melchizedek Priesthood. Ang mga kabatan-onan makahimo sa pagpakigbahin sa ilang talagsaon nga mga gasa ug makatubo sa espiritwal nga paagi samtang sila kauban sa mga hamtong diha sa buhat sa kaluwasan. Ang pagpaapil sa mga kabatan-onan sa pagpangalagad nga mga buluhaton makadugang usab sa kasarang sa Relief Society ug sa mga korum sa mga elder sa pag-amuma sa uban pinaagi sa pagdugang sa gidaghanon sa mga miyembro kinsa moapil.

Samtang ako naghunahuna sa katingalahang batan-ong mga babaye nga akong nailhan, naghinam-hinam ako alang niadtong mga sister sa Relief Society kinsa makabaton og pribilehiyo nga mapanalanginan pinaagi sa kadasig, mga talento, ug espiritwal nga kadalang mobati sa usa ka batan-ong babaye samtang sila nagserbisyo kauban nila o sila ang nangalagad kanila. Ug ako sama kahimuot sa higayon nga ang young women matambagan ug matudloan ug mapalig-on sa ilang mga sister sa Relief Society. Kini nga

oportunidad sa pag-apil sa pagtukod sa gingharian sa Dios mahimong usa ka dako kaayong kaayohan ngadto sa young women, nagtabang kanila nga mas maandam sa pagtuman sa ilang tahas isip mga lider sa Simbahan ug sa komunidad ug isip makaabag nga mga kauban sa ilang pamilya. Sama sa gipakigbahin ni Sister Bonnie L. Oscarson gahapon, ang young women “*gusto* nga moserbisyo. Nagkinahanglan silang masayud nga bililhon sila ug mahinungdanon sa buhat sa kaluwasan.”⁷

Sa tinuod, ang young women nangalagad na ngadto sa uban, nga wala sugoa o walay saba. Usa ka pamilya nga akong nailhan mibalhin og gatusan ka kilometro ngadto sa usa ka bag-ong dapit diin sila walay kaila. Sulod sa unang semana, usa ka 14 anyos ang panuigon nga batang babaye gikan sa ilang bag-ong ward mipakita diha sa ilang balay nagdala og plato sa biskwit, nag-abi-abi kanila niini nga dapit. Ang iyang inahan mapahiyumong nagbarug sa iyang luyo isip usa ka andam nga drayber, nagsuporta sa tinguha sa iyang anak nga babaye nga mangalagad.

Lain nga inahan nabalaka usa ka adlaw niana nga ang iyang 16 anyos ang panuigon nga anak nga babaye wala sa panimalay sa naandang oras. Sa dihang sa katapusan ang batang babaye miabut, ang iyang inahan nangutana kaniya nga may pipila ka kabalaka kon diin siya gikan. Ang 16 anyos ang panuigon ingon og maulawong mitubag nga naghatud siya og bulak ngadto sa usa ka biyuda kinsa nagpuyo sa duol. Namatikdan niya nga ang mas hamtong nga sister masulub-on nga tan-awon ug naaghat sa pagbisita kaniya. Uban sa hingpit nga pagtugot sa iyang inahan, ang batan-ong babaye mipadayon sa pagbisita sa edad-idaran nga babaye. Nahimo silang suod nga managhighala, ug ang ilang nindot nga panag-uban mipadayon sa mga katuigan.

Kada usa niining batan-ong mga babaye, ug daghan pa nga sama kanila, makamatikod sa panginahanglan sa usa ka tawo ug motrabaho sa pagsulbad niini. Ang batan-ong mga babaye



adunay kinaiyanhong tinguha sa pag-amuma ug sa pagpakigbahin nga mahimong mamaayo ang tumong pinaagi sa pagpangalagad nga makig-uban sa usa ka hingkod nga sister.

Dili igsapayan kon pila pay atong edad, kon atong hunahunaon sa unsang paagi ang pagpangalagad nga labing epektibo, mangutana kita, “Unsa ang iyang gikinahanglan?” Ubanan kana nga pangutana og usa ka sinserong tinguha sa pagserbisyo, kita niana giyahan sa Espiritu sa pagbuhat unsay makapabayaw ug makapalig-on sa tawo. Nakadungog ako og dili maihap nga mga istorya kabahin sa mga kaigsoonan kinsa napanalanginan pinaagi sa yanong buhat sa pag-apil ug sa pag-abi-abi diha sa simbahan, usa ka mahunahunaong mensahe diha sa text o email, usa ka personal nga pagkontak atol sa malisud nga panahon, usa ka imbitasyon sa pag-apil diha sa usa ka kalihokan sa grupo, o usa ka tanyag sa pagtabang sa usa ka mahagitong sitwasyon. Ang walay kapikas nga mga ginikanan, bag-ong mga kinabig, dili kaayo aktibo nga mga miyembro, mga biyuda og mga biyudo, o nagkalisud nga batan-on mahimong nagkinahanglan og sobra nga pagtagad ug unang tabang gikan sa tigpangalagad nga mga kaigsoonan. Ang pagtinakdoay

tali sa mga kapangulohan sa korum sa mga elder ug sa Relief Society nagtugot sa tukma nga mga buluhaton nga pagahimoon.

Sa katapusan ang importante, nga ang tinuod nga pagpangalagad nabuhat og tagsa-tagsa uban ang gugma isip ang hinungdan. Ang bili ug ang ganti ug ang kahibulongan sa sinserong pagpangalagad mao nga kini sa tinuod makapausab og mga kinabuhi! Kon bukas ang atong mga kasingkasing ug andam sa paghigugma ug pag-apil, pag-awhag ug paghupay, ang gahum sa atong pagpangalagad dili kapugnan. Uban sa gugma isip ang hinungdan, mga milagro mahitabo, ug makakita kita og mga paagi sa pagdala sa atong “nawala” nga mga kaigsoonan ngadto sa tibuok nga pagdawat sa ebanghelyo ni Jesukristo.

Ang Manluluwas mao ang atong panig-ingnan sa tanan—dili lamang sa unsay kinahanglan natong buhaton apan *nganong* kita kinahanglan nga mobuhat niini.⁸ “Ang Iyang kinabuhi dinhi sa yuta maoy [usa] ka pagdapit kanato—sa pagpataas og gamay sa atong mga pagtan-aw sa pagkalimot sa atong kaugalingon nga mga problema ug [sa] pagtabang ngadto sa uban.”⁹ Samtang atong gidawat ang oportunidad nga mangalagad sa tibuok kasingkasing ngadto sa atong mga kaigsoonan, mapanalanginan kita nga mahimong mas lunsay sa espirituhanong paagi, mas mahiuyon sa kabubut-on sa Dios, ug mas makasabut sa Iyang plano sa pagtabang sa kada usa nga mobalik ngadto kaniya. Mas dali kita nga makaila sa Iyang mga panalangin ug mahinamong molugway niadtong mga panalangin ngadto sa uban. Mokanta ang atong mga kasingkasing og dungan sa atong mga tingog:

*Igsoon ko, higugmaon
Samas paghigugma mo,
Ang kahayag ug ang kusog,
Nimo gipangita ko.
Igsoon ko higugmaon—
Ginoo, Sundon Ko Ikaw.*¹⁰

Hinaut nga ato untag ipakita ang atong pasalamat ug gugma alang sa

Dios pinaagi sa pagpangalagad uban ang gugma ngadto sa atong mahang-turong mga kaigsoonan.¹¹ Ang resulta mao ang panaghiusa sa pagbati sama sa natagamtam sa mga katawhan sa karaang Amerika 100 ka tuig human sa pagpakita sa Manluluwas diha sa ilang yuta.

“Ug nahinabo nga walay panag-bingkil . . . tungod sa gugma sa Dios nga anaa sa mga kasingkasing sa mga katawhan.

“ . . . Ug wala nay mga kasina, ni panagbangi, ni kagubot, . . . ug sa pagkamuod wala nay mga katawhan nga labaw pa ka malipayon sa tanan nga mga katawhan nga gilalang sa kamot sa Dios.”¹²

Malipayon akong personal nga mopamatuod nga kining pinadayag nga mga kausaban dinasig sa Dios ug nga, samtang atong hingpit nga gidawat kini uban sa andam nga mga kasingkasing, mahimo kitang mas andam sa pagsugat sa Iyang Anak, si Jesukristo, sa Iyang pag-anhi. Kita mas duol nang mahimo nga mga katawhan sa Zion ug bation nato ang sobrang hingpit nga kalipay uban niadtong kinsa atong natabangan subay sa agianan sa pagkadisipulo. Nga kita unta mobuhat niini mao ang akong kinasingkasing ug mapainub-sanong pag-ampo diha sa ngalan ni Jesukristo amen. ■

MUBO NGA MGA SULAT

1. Tan-awa sa Mga Buhat 3:19–21.
2. Tan-awa sa Robert D. Hales, “Mga Pagpangandam alang sa Pagpahiuli ug sa Ikaduhang Pag-anhi: ‘Ang Akong Kamot Anaa Ibabaw Kanimo,’” *Liahona*, Nob. 2005, 88-92.
3. Doktrina ug mga Pakigsaad 42:29.
4. “Ang Buhi nga Kristo: Ang Pagpamatuod sa mga Apostoles,” *Liahona*, Mayo 2017, sulod sa atubangang hapin.
5. Doktrina ug mga Pakigsaad 20:47, 53.
6. Tan-awa sa *Handbook 2: Administering the Church* (2010), 9.1.1.
7. Bonnie L. Oscarson, “Young Women in the Work,” *Liahona*, Mayo 2018, 38.
8. Tan-awa sa Mga Taga Efeso 5:2.
9. Tan-awa sa Russell T. Osguthorpe, “What If Love Were Our Only Motive?” (Brigham Young University devotional, Mar. 8, 2011), 7, speeches.byu.edu.
10. “Lord, I Would Follow Thee,” *Hymns*, nu. 220.
11. Tan-awa sa Mosiah 2:17.
12. 4 Nephi 1:15–16.



Ni Elder Dieter F. Uchtdorf

Sa Korum sa Napulog Duha ka mga Apostoles

Tan-awa, ania ra ang Tawo!

Kadtong mangita sa dalan aron tinuod nga makakita sa Tawo makakaplag sa ganghaan ngadto sa labing dako nga mga kalipay sa kinabuhi ug sa balsamo ngadto sa labihan nga mga makapasagmuyo sa kinabuhi.

Minahal nakong mga kaigsoonan, pinalanggang mga higala, nagpasalamat ko nga makauban kamo niining talagsaon nga tapus sa semana nga kinatibuk-ang komperensya. Si Harriet ug ako kauban ninyo sa pagmaya sa pagpaluyo



nilang Elder Gong ug Soares ug sa daghang mga kaigsoonan kinsa nakadawat og bag-ong talagsaon nga mga calling atol niining kinatibuk-ang komperensya.

Bisan tuod nga gimingaw ko sa akong minahal nga higala nga si Presidente Thomas S. Monson, akong gihigugma, gipaluyohan, ug gisuportahan ang atong propeta ug Presidente, si Russell M. Nelson, ug ang iyang mga magtatambag.

Mapasalamaton usab ako ug akong dungog nga sa makausa pa makatrabaho og maayo ang akong minahal nga mga isigka-Igsoon sa Korum sa Napulog Duha.

Labaw sa tanan, mapaubsanon kaayo ko ug malipayon kaayo nga nahimong miyembro sa Ang Simbahan ni Jesukristo sa mga Santos sa Ulahing mga Adlaw, diin ang minilyon ka kalalakin-an, kababayan-an, ug kabataan andam nga *moalsa kon asa sila nagbarug*—sa bisan unsa nga kapasidad o calling—ug naningkamot sa tibuok nilang kasingkasing nga moserbisyo sa Dios ug sa mga isigkatawo, sa pagtukod sa gingharian sa Dios.

Usa karon ka sagrado nga adlaw. Domingo karon sa Pasko sa Pagkabanhaw, kon kanus-a magsaulog kita nianang mahimayaong kabuntagon sa dihang ang atong Manluluwas mibugto sa mga higot sa kamatayon¹ ug migawas nga nagmadaugon gikan sa lubnganan.

Ang Labing Mahinungdanong Adlaw sa Kasaysayan

Bag-ohay lang nangutana ko sa internet, “Unsa nga adlaw ang mas nakapausab sa dagan sa kasaysayan?”

Ang mga tubag gikan sa makapat-ingala ug kahibudngan ngadto sa puno sa ideya ug makapaukyab sa hunahuna. Apil niini, mao ang adlaw nga ang usa ka prehistoric nga asteroid miigo sa Yucatán Peninsula; o sa dihang niadtong 1440, nahuman ni Johannes Gutenberg ang iyang printing press; ug siyempre ang adlaw sa 1903 sa dihang ang managsuong Wright mipakita nga ang mga tawo mahimo gayud nga makalupad.

Kon ang samang pangutana ipangutana nganha ninyo, unsa man ang inyong isulti?

Sa akong hunahuna ang tubag klaro.

Aron makakita sa labing importante nga adlaw sa kasaysayan, kinahanglan gayud kita nga mobalik nianang gabii nga hapit 2,000 ka tuig na ang milabay didto sa Tanaman sa Getsemani sa dihang miluhod si Jesukristo sa grabe nga pag-ampo ug mihalad sa Iyang kaugalingon isip bugti alang sa atong mga sala. Atol kadto niining dako ug walay kinutuban nga sakripisyo sa dili hitupngan nga pag-antus sa lawas ug sa espiritu nga si Jesukristo, gani ang Dios, miagas ang dugo sa matag lungag sa panit. Tungod sa hingpit nga gugma, Iyang gihatag ang tanan aron makadawat unta kita sa tanan. Ang iyang balaanong sakripisyo, nga lisud sabton, nga mabati lamang sa tibuok natong kasingkasing ug hunahuna, mopahinumdom kanato sa utang sa tanan nga pasalamat nga angayan natong ihatag kang Kristo alang sa Iyang balaanong gasa.

Sa ulahing bahin nianang gabhiona, gidala si Jesus sa atubangan sa mga awtoridad sa relihiyon ug sa politika

kinsa mibiay-biay Kaniya, mibunat Kaniya, ug misentensya Kaniya ngadto sa usa ka makauulaw nga kamatayon. Nagbitay Siya nga naghingutas diha sa krus hangtud nga, sa katapusan, “[na]tapus na.”² Ang Iyang wala nay kinabuhi nga lawas gipahimutang sa usa ka hinulman nga lubnganan. Ug dayon, sa buntag sa ikatulong adlaw, si Jesukristo, ang Anak sa Labawng Makagagahum nga Dios, migawas sa lubnganan isip usa ka mahimayaon, nabanhaw nga binuhat sa kaanindot, kahayag, ug kahalangdon.

Oo, dunay daghang panghitabo sa tibuok kasaysayan nga nakaapekto gayud sa kapalaran sa kanasuran ug katawhan. Apan hiusaha kining tanan, ug dili kini makatandi sa kaimportante sa unsay nahitabo nianang unang buntag sa Pasko sa Pagkabanhaw.

Unsa may nakapahimo sa walay kinutuban nga sakripisyo ug sa Pagkabanhaw ni Jesukristo nga labing importante nga panghitabo sa kasaysayan—nga mas impluwensyal pa kay sa mga gubat sa kalibutan, makagun-ob nga mga katalagman, ug makapausab sa kinabuhi nga siyentipikanhong mga nadiskubrihan?

Tungod ni Jesukristo, Mahimong Mabuhi Kita Pag-usab

Ang tubag makita diha sa duha ka dako, imposible nga mga hagit nga atubangon sa matag usa kanato.

Una, kitang tanan mamatay. Bisan unsa pa kamo ka batan-on, ka gwapa, kahimsug, o ka mabinantayon, usa ka adlaw ang inyong lawas mawad-an og kinabuhi. Ang mga higala ug pamilya magbangutan sa inyong kamatayon. Apan dili nila kamo mapabuhing pagbalik.

Bisan pa man niana, tungod ni Jesukristo, ang inyong kamatayon mahimong temporaryo ra. Ang inyong espiritu sa usa ka adlaw mahiusa og balik sa inyong lawas. Kining nabanhaw nga lawas dili na mapaubos sa kamatayon,³ ug mabuhi kamo sa kahangturan, nga gawasnon sa kasakit ug sa pisikal nga pag-antus.⁴

Mahitabo kini tungod ni Jesukristo, kinsa mihalad sa Iyang kinabuhi ug mibawi ra usab niini.

Gibuhat Niya kini alang sa tanan nga mituo Kaniya.

Gibuhat Niya kini alang sa tanan nga wala motuo Kaniya.

Gibuhat Niya kini bisan alang niadtong mibiay-biay, mipanamastamas, ug mipasipala sa Iyang ngalan.⁵

Tungod ni Jesukristo, Makapuyo Kita uban sa Dios

Ikaduha, kitang tanan nakasala. Ang atong mga sala makapugong kanato sa pagpuyo uban sa Dios, tungod kay “walay mahugaw nga butang nga makasulod didto sa iyang gingharian.”⁶

Isip resulta, ang matag lalaki, babaye, ug bata dili na makabalik sa Iyang presensya—nga maingon, hangtud nga si Jesukristo, ang Kordero nga walay lama, mihalad sa Iyang kinabuhi isip bugti alang sa atong mga sala. Tungod kay walay utang si Jesus ngadto sa kaangayan, makahimo Siya sa pagbayad sa atong utang ug makahatag sa gipangayo sa kaangayan alang sa matag kalag. Ug naglakip kana kaninyo ug kanako.

Gibayaran ni Jesukristo ang bugti alang sa atong mga sala.

Ang tanan niini.

Nianang labing importante nga adlaw sa kasaysayan, giablihan ni Jesukristo ang mga ganghaan sa kamatayon ug gitangtang ang mga babag nga nakapugong kanato aron makaagi ngadto sa balaan ug sagrado nga hawanan sa walay katapusan nga kinabuhi. Tungod sa atong Ginoo ug Manluluwas, kamo ug ako gihatagan sa labing bililhon ug walay bugti nga gasa—bisan unsa pa man ang atong kagahapon, makahimo kita sa paghinulsol ug makasunod sa dalan paingon sa celestial nga kahayag ug himaya, nga gilibutan sa matinud-anong mga anak sa Langitnong Amahan.

Nganong Magmaya Kita

Mao kini nganong magsaulog kita sa Domingo sa Pasko sa Pagkabanhaw—magsaulog kita sa kinabuhi!

Tungod ni Jesukristo, mobangon kita gikan sa kawalay paglaum diha sa kamatayon ug mogakus niadtong atong gimahal, nga maghilak tungod sa hilabihan nga kalipay ug puno sa

pasalamat. Tungod ni Jesukristo, mabuhi kita isip mahangturong mga binuhat, mga kalibutan nga walay katapusan.

Tungod ni Jesus nga mao ang Kristo, ang atong mga sala dili lamang mapapas; kini mahimong makalimtan.

Mahimo kitang limpyo ug mahimaya. Balaan.

Tungod sa atong Minahal nga Manluluwas, makainom kita hangtud sa hangtud gikan sa tubod sa tubig nga magatubod ngadto sa kinabuhing dayon.⁷ Makapuyo kita hangtud sa hangtud didto sa mga mansyon sa atong mahangturong Hari, sa dili mahulagway nga himaya ug hingpit nga kalipay.

Makaingon ba Kita nga “Tan-awa, ania ra ang Tawo”?

Bisan pa niining tanan, dunay daghan sa kalibutan karon ang wala mahibalo o wala motuo sa bililhong gasa nga gihatag ni Jesukristo ngari kanato. Mahimong nakadungog na sila bahin ni Jesukristo ug nakaila Kaniya isip usa ka mahinungdanong tawo sa kasaysayan, apan wala nila Siya makita kon kinsa gayud Siya.

Kon maghunahuna ko niini, mahinumdom ko sa Manluluwas nga nagbarug atubangan sa Romano nga gobernador sa Judea, si Pontius Pilato, mga pipila ka oras sa wala pa ang Iyang kamatayan.

Nakita ni Pilato si Jesus gikan sa kalibutanong panglantaw. Si Pilato dunay trabaho nga himoon, ug naglakip kini og duha ka dagkong buluhaton:

pagkolekta og mga buhis alang sa Roma ug pagpabilin sa kalinaw. Karon ang Judeo nga Sanhedrin midala sa iyang atubangan og usa ka tawo nga ilang gipangangkon nga babag sa duha.⁸

Human masukit-sukit ang iyang bini-linggo, mipahibalo si Pilato, “Wala akoy nakitang ikasumbong batok kaniya.”⁹ Apan gibati niya nga kinahanglan niyang pakalmahon ang mga tig-akusar ni Jesus, busa gipahigayon ni Pilato ang usa ka lokal nga kustombre nga mitugot sa usa ka binilanggo nga buhian atol sa panahon sa Pagpalabay. Dili ba nila pabuhian niya si Jesus imbis ang notado nga tulisan ug nakapatay og tawo nga si Barrabas?¹⁰

Apan ang manggugubot nga panon nangayo nga buhian ni Pilato si Barrabas ug ilansang si Jesus.

“Kay ngano man?” Nangutana si Pilato. “Unsa may iyang nabuhat nga dautan?”

Apan misamot na hinoon sila sa pagsinggit. “Ilansang siya sa krus!”¹¹

Sa katapusang paningkamot aron mapahimuot ang manggugubot nga panon, gimanduan ni Pilato ang iyang mga tawo sa paglatigo kang Jesus.¹² Ila kining gibuhat, nga mibiya Kaniya nga nagkadugo ug nagkasamad-samad. Gibugal-bugalan nila Siya, gibutangan og purong-purong nga mga sampinit ang Iyang ulo, ug gisul-oban og kupo nga mapula.¹³

Tingali naghunahuna si Pilato nga matagbaw na ang tinguha sa manggugubot nga panon alang sa dugo. Tingali mopakita na sila og kalooy sa

tawo. “Tan-awa, ania gidala ko siya kaninyo sa gawas,” miingon si Pilato, “aron mahibalo kamo nga wala akoy nakitang ikasumbong batok kaniya. . . . Tan-awa, ania ra ang tawo!”¹⁴

Ang Anak sa Dios personal nga mibarug atubangan sa katawhan sa Jerusalem.

Ilang nakita si Jesus, apan wala gayud sila makakita Niya sa tinuod lang.

Wala silay mga mata aron makakita.¹⁵

Sa mapasumbingayong paagi, gidapit usab kita nga “motan-aw sa tawo.” Nagkalain-lain ang mga opinyon sa kalibutan mahitungod Kaniya. Ang karaan ug moderno nga mga propeta nagpamatuod nga Siya mao ang Anak sa Dios. Ako usab. Mahinungdanon ug importante nga ang matag usa kanato mahibalo sa atong kaugalingon. Busa, kon mamalandong kamo sa kinabuhi ug pangalagad ni Jesukristo, unsa may inyong makita?

Kadtong mangita sa dalan aron tinuod nga makakita sa Tawo makakaplag sa ganghaan ngadto sa labing dako nga mga kalipay sa kinabuhi ug sa balsamo ngadto sa labihan nga mga makapasagmuyo sa kinabuhi.

Busa, kon malukop kamo sa kasakit ug kasub-anan, tan-awa ang Tawo.

Kon mobati kamo nga nawala o nakalimtan, tan-awa ang Tawo.

Kon mawad-an kamo og kadasig, gibiyaan, nagduha-duha, nasakitan, o nasagmuyo, tan-awa ang Tawo.

Mohupay Siya kaninyo.

Moayo Siya kaninyo ug mohatag og kahulugan sa inyong panaw. Mobu-bu Siya sa Iyang Espiritu ug mopuno sa inyong kasingkasing og hilabihan nga kalipay.¹⁶

Mohatag Siya og “gahum niadtong maluya; ug kanila nga walay kabaskog magadugang siya og kusog.”¹⁷

Kon tinuod kita nga motan-aw sa Tawo, makakat-on kita bahin Kaniya ug magtinguha sa pagpahiangay sa atong kinabuhi ngadto Kaniya. Maghinulsol kita ug maningkamot sa pagpatunhay sa atong kinaiya ug molambo nga mas suod ngadto Kaniya. Mosalig kita Kaniya. Ipakita nato ang atong gugma alang Kaniya pinaagi sa pagtuman sa Iyang mga sugo ug pinaagi sa pagsunod sa





ug kinabuhing dayon sa kalibutan nga moabut. Sa sagradong pangalan ni Jesukristo, amen. ■

MUBO NGA MGA SULAT

1. Tan-awa sa Mosiah 15:23.
2. Juan 19:30.
3. Tan-awa sa Alma 11:45.
4. Tan-awa sa Pinadayag 21:4.
5. Tan-awa sa 1 Mga Taga-Corinto 15:21–23.
6. 3 Nephi 27:19.
7. Tan-awa sa Juan 4:14.
8. Tan-awa sa Lucas 23:2.
9. Juan 18:38. Aron malikayan nga makahukom kang Jesus, misulay si Pilato sa pagpasa sa kaso ngadto kang Herodes Antipas. Kon si Herodes, kinsa mimando sa kamatayon ni Juan Bautista (tan-awa sa Mateo 14:6–11), mokondenar kang Jesus, mahimong awtomatik nga mohukom si Pilato nga dili moendorso niini ug mangangkon nga usa lamang kini ka lokal nga butang nga iyang giuyonan aron mapabilin ang kalinaw. Apan wala mosulti si Jesus ug usa ka pulong ngadto kang Herodes (tan-awa sa Lucas 23:6–12), ug gipadala Siya ug balik ni Herodes ngadto kang Pilato.
10. Tan-awa sa Marcos 15:6–7; Juan 18:39–40. Usa ka iskolar sa Bag-ong Tugon misulat, “Daw nahimo na kining kustumbre, nga atol sa Paggalabay ang Romano nga Gobernador mobuhi ngadto sa katawhang Judeo og notado nga binilanggo kinsa ghukman nga patyon” (Alfred Edersheim, *The Life and Times of Jesus the Messiah* [1899], 2:576). Ang ngalan nga *Barabbas* nagpasabut nga “anak sa amahan.” Ang kasulian [irony] sa paghatag sa katawhan sa Jerusalem og kapilian tali niining duha ka tawo makapainterasedo.
11. Tan-awa sa Marcos 15:11–14.
12. Kini nga paglatigo hilabihan ka grabe nga gitawayon kini og “ang tunga-tunga nga kamatayon” (Edersheim, *Jesus the Messiah*, 2:579).
13. Tan-awa sa Juan 19:1–3.
14. Juan 19:4–5.
15. Sa sayo pa, nakaobserbar si Jesus nga “ang kasingkasing niining katawhan nag-anam og kadautan, ug ang ilang mga dalunggan dili makadungog, ug ang ilang mga mata ilang gipiyong; basin unya nga sa bisan unsa nga panahon makakita sila pinaagi sa ilang mga mata, ug makadungog pinaagi sa ilang mga dalunggan, ug makasabut pinaagi sa ilang kasingkasing, ug kinahanglang makabig, ug sila akong ayuhon.” Ug dayon uban sa kalumo miingon Siya ngadto sa Iyang mga disipulo, “Apan bulahan gayud ang inyong mga mata kay makakita man kini: ug ang inyong mga dalunggan kay makabati man kini” (Mateo 13:15–16). Tugutan ba nato ang atong kasingkasing nga matig-a, o ato bang abhian ang atong mga mata ug kasingkasing aron tinuod kita nga motan-aw sa Tawo?
16. Tan-awa sa Mosiah 4:20.
17. Isaias 40:29.
18. Tan-awa sa Dieter F. Uchtdorf, “The Adventure of Mortality” (tibuok kalibutan nga debosyonal alang sa mga young adult, Ene. 14, 2018), broadcasts.lds.org.
19. 2 Nephi 25:26.

atong sagrado nga mga pakigsaad.

Sa laing pagkasulti, mahimo kita nga Iyang mga disipulo.

Ang iyang makapalunsay nga kahayag hingpit nga mopuno sa atong kalag. Ang Iyang grasya modasig kanato. Ang atong mga palas-anon magaan, ang atong kalinaw molambo. Kon tinuod kita nga motan-aw sa Tawo, aduna kitay saad sa usa ka bulahan nga umaabut nga modasig ug mosuporta kanato agi sa likuon ug mga libaong sa panaw sa kinabuhi. Kon maghunahuna sa nangagi, atong maila nga dunay balaanong sumbanan, nga ang mga butang nga nahitabo kaninyo dunay kahulugan ug inyong masabtan ang katuyoan niini.¹⁸

Sa pagdawat ninyo sa Iyang sakripisyo, mahimong Iyang disipulo, ug sa katapusan moabut sa tumoy sa inyong panaw sa kinabuhi, unsa may mahitabo sa mga kasubo nga inyong nalahunay niining kinabuhia?

Wala na kini.

Ang mga kasagmuyo, mga pangpangluib, mga pagpanggukod nga inyong giatubang?

Wala na.

Ang pag-antus, kasakit, kahasol sa tanlag, kaulaw, ug kasub-anan nga inyong naagian?

Wala na.

Makalimtan.

Ikatingala ba nga “[kita] naghisgot

kang Kristo, [kita] nalipay diha kang Kristo, [kita] nagsangyaw kang Kristo, [kita] nanagna kang Kristo . . . nga ang [atong] mga anak mahimo nga masayud sa unsa nga tinubdan sila mahimo nga mangita alang sa kapasayloan sa ilang mga sala?”¹⁹

Ikatingala ba nga maningkamot kita sa tibuok natong kasingkasing nga tinuod nga motan-aw sa Tawo?

Minahal nakong mga kaisgwaan, mopamatuod ko nga ang labing importante nga adlaw sa kasaysayan sa katawhan mao ang adlaw sa dihang si Jesukristo, ang Anak sa Dios, nagmadaugon batok sa kamatayon ug sala alang sa tanang anak sa Dios. Ug ang labing importante nga adlaw sa inyo ug sa akong kinabuhi mao ang adlaw sa dihang nakakat-on kita nga “motan-aw sa tawo”; sa dihang ato Siyang nakita kon si kinsa gayud Siya; sa dihang miambit kita sa tibuok natong kasingkasing ug hunahuna bahin sa Iyang maulaong gahum; sa dihang uban sa gibag-o nga kadasig ug kalig-on, mipasalig kita nga mosunod Kaniya. Hinaut nga kana nga adlaw kanunayng magbalik-balik sa tibuok ninyong kinabuhi.

Ibilin nako kaninyo ang akong pagpamatuod ug panalangin nga samtang kita “motan-aw sa tawo,” makakita kita og kahulugan, hingpit nga kalipay, ug kalinaw niining yutan-ong kinabuhi



Ni Bishop Gérald Caussé
Presiding Bishop

Kining Tanan mahitungod sa mga Tawo

Ang tanan sa Simbahan mahitungod kaninyo, ang mga disipulo sa Ginoo—kadtong kinsa nahigugma ug misunod Kaniya ug midala sa Iyang ngalan diha kanila.

Samtang nangandam alang sa konstruksyon sa nindot nga Paris France Temple, duna koy kasinatian nga dili gayud nako makalimtan. Niadtong 2010, sa dihang nakakita na og luna alang sa templo, ang mayor sa siyudad mihangyo nga makighimamat kanamo aron mahibalo og dugang mahitungod sa atong Simbahan. Kini nga miting usa ka kritikal nga lakang sa pagbaton og building permit. Mai-nampingon kaming nangandam og presentasyon nga naglakip og pipila ka impresibo nga mga litrato sa mga templo sa mga Santos sa Ulahing mga Adlaw. Ang ako gayung gilauman mao nga ang architectural nga kanindot niini makadani sa mayor nga mosuporta sa atong proyekto.

Sa akong katingala, mipasabut ang mayor nga imbis nga moribyu sa among presentasyon, siya ug ang iyang grupo mas ganahan nga mopahigayon sa kaugalingon nilang imbestigasyon aron mahibalo gayud kon unsa nga matang sa simbahan kita. Sa misunod nga bulan, gidapit kami og balik aron maminaw og report nga gihatag sa usa ka konsehal sa siyudad nga usa usab

ka propesor sa kasaysayan sa relihiyon. Miingon siya, “Labaw sa tanan, gusto namong makasabut kon si kinsa ang mga miyembro sa inyong simbahan. Una, mitambong kami og usa sa inyong mga sakrament miting. Milingkod kami sa likod sa chapel ug nag-obserbar og maayo sa mga tawo diha sa kongregasyon ug unsay ilang gibuhat. Dayon nakighimamat mi sa inyong mga silingan—kadtong nagpuyo libut sa inyong stake center—ug amo silang



gipangutana kon unsa nga matang sa mga tawo kamong mga Mormon.”

“Nan unsa man ang inyong mga konklusyon?” Nangutana ko, nga mibati og gamayng kabalaka. Mitubag siya, “Among nadiskubrihan nga Ang Simbahan ni Jesukristo sa mga Santos sa Ulahing mga Adlaw mao ang labing duol sa orihinal nga Simbahan ni Jesukristo kay sa bisan unsa nga simbahan nga among nahibaloan.” Hapit ko mosupak pinaagi sa pag-ingon, “Dili kaayo kana tukma! Dili kini ang labing duol; kini *mao* ang Simbahan ni Jesukristo—ang sama nga Simbahan, ang tinuod nga Simbahan!” Apan gipugngan nako ang akong kaugalingon ug mihalad hinoon og hilum nga pag-ampo sa pagpasalamat. Ang mayor mitambag dayon namo nga, base sa ilang pakisusi, siya ug ang iyang grupo walay pagsupak sa konstruksyon sa usa ka templo diha sa ilang komunidad.

Karon, kon maghunahuna ko mahitungod niana nga milagrusong kasinatian, mapasalamaton ko sa kaalam ug diwa sa pag-ila sa mayor. Nasayud siya nga usa sa labing importante nga butang sa pagsabut sa Simbahan dili ang pagtan-aw niini pinaagi sa unsay makita sa gawas sa mga building niini o bisan isip usa ka organisado kaayo nga institusyon apan pinaagi sa milyon nga matinud-anong mga miyembro niini, nga naningkamot matag adlaw nga mosunod sa ehemplo ni Jesukristo.

Ang kahulugan sa *ang Simbahan* mahimong magagikan sa usa ka tudling sa Basahon ni Mormon nga namahayag, “Ug sila [buot ipasabut ang mga disipulo sa Ginoo] nga nabunyagan diha sa ngalan ni Jesus gitawag og simbahan ni Kristo.”¹

Sa ato pa, ang Simbahan mahitungod tanan sa mga tawo. Kining tanan mahitungod kaninyo, ang mga disipulo sa Ginoo—kadtong kinsa nahigugma ug misunod Kaniya ug midala sa Iyang ngalan diha kanila pinaagi sa pakigsaad.

Si Presidente Russell M. Nelson sa usa ka higayon mipakisama sa Simbahan sa usa ka nindot nga awto. Ganahan kitang tanan niini kon ang atong sakyanan limpyo ug sinaw. Apan ang

katuyoan sa sakyanan dili aron mahimong usa ka makapadani nga makina; kini mao ang pagdala sa *mga tawo* nga naa diha sa sakyanan.² Sa samang paagi, kita, isip mga miyembro sa Simbahan, malipay nga makabaton og nindot nga mga dapit alang sa pagsimba nga limpyo ug maayo pagkaatiman, ug malingaw usab kita nga dunay naglihok gayud nga mga programa. Apan mga sistema lamang kini sa pagsuporta. Ang atong bugtong tumong mao ang pagdapit sa matag anak nga lalaki ug anak nga babaye sa Dios nga moduol kang Kristo ug sa paggiya kaniya diha sa dalan sa pakigsaad. Walay lain nga mas importante pa. Ang atong buhat mahitungod tanan sa mga tawo ug mga pakigsaad.

Dili ba nindot nga ang ngalan nga gihatag pinaagi sa pagpadayag ngadto sa gipahiuli nga Simbahan nagbugkos sa duha sa labing importante nga mga elemento sa matag pakigsaad sa ebanghelyo? Una mao ang ngalan nga *Jesukristo*. Kini nga Simbahan Iyaha, ug ang Iyang makapabalaan nga Pag-ula ug mga pakigsaad mao lamang ang dalan ngadto sa kaluwasan ug kahimayaan. Ang ikaduhang ngalan nagpasabut *kanato*: ang mga Santos, o sa ato pa, ang Iyang mga saksi ug ang Iyang mga disipulo.

Akong nakat-unan ang kaimportante sa pag-focus diha sa mga tawo sa dihang nagserbisyo ko isip stake president sa France. Sa pagsugod sa akong serbisyo, naghunahuna ko og pipila ka ambisyoso kaayo nga mga tumong alang sa stake: ang paghimo og bag-ong mga ward, ang pagtukod og bag-ong mga meetinghouse, ug gani ang konstruksyon sa usa ka templo sa among dapit. Sa dihang na-release na ko unom ka tuig human niana, walay bisan usa niining mga tumong ang natuman. Mabati unta kini nga morag usa ka hingpit nga kapakyasan gawas nga, sa panahon niadtong unom ka tuig, ang akong mga tumong nalahi.

Samtang naglingkod ko sa atubangan nianang adlaw sa pag-release nako, napuno ko sa pagbati og pasalamat ug kalampusan. Nagtan-aw ko sa mga dagway sa gatusan ka mga

miyembro nga nanambong. Akong mahinumduman ang espiritwal nga kasinatian nga konektado sa matag usa kanila.

Didto kadtong mga kaigsoonan nga nabunyagan, kadtong akong gipirmahan ang ilang unang mga recommend aron makadawat sila sa sagradong mga ordinansa sa templo, ug kadtong mga batan-on ug mga managtiayon nga akong gi-set apart og gi-release isip full-time nga mga misyonaryo. Didto pay daghan kinsa akong gipangalagan samtang nakasinati sila og mga pagsulay ug kalisdanan sa ilang kinabuhi. Mibati ko og grabe nga inigsoong paghigugma alang sa matag usa kanila. Nakakita ko og tiunay nga kalipay diha sa pagserbisyo kanila ug nagmaya sa ilang kaminud-anon ug hugot nga pagtuo ngadto sa Manluluwas.

Si Presidente M. Russell Ballard nagtudlo, “Ang labing importante sa atong mga responsibilidad sa Simbahan dili ang mga numero nga gireport o ang mga miting nga gihimo apan kon ang kada tawo ba—napangalagan sama sa gibuhay sa Manluluwas—nabayaw ug nadasig ug sa katapusan nausab.”³

Minahal kong mga kaigsoonan, aktibo ba kita sa ebanghelyo, o nabusy lang kita diha sa Simbahan? Ang yawe mao ang pagsunod sa ehemplo



sa Manluluwas sa tanang butang. Kon ato kanang buhaton, natural lamang nga mag-focus kita sa pagluwas sa mga indibidwal imbis nga magpahigayon sa mga buluhaton ug mag-implementar og mga programa.

Napangutana na ba ninyo ang inyong kaugalingon kon unsa kaha ang mahitabo kon ang Manluluwas mobisita sa inyong ward o branch sa sunod nga Dominggo? Unsa may Iyang buhaton? Mabalaka ba Siya nga mahibalo kon ang mga visual aid maayo ba o kon ang mga lingkuranan nabutang og sakto diha sa classroom? O mangita ba Siya og tawo nga Iyang mahigugma, matudloan, ug mapanalanginan? Tingali mangita Siya og bag-ong miyembro o higala nga abi-abihon, usa ka masakiton nga brother o sister nga nanginahanglan og kahupayan, o usa ka nagduha-duha nga batan-on nga nagkinahanglan nga bayawon ug dasigon.

Unsa nga mga klase ang bisitahon ni Jesus? Dili ko matingala kon bisitahon Niya og una ang mga bata sa Primary. Tingali moluhod Siya ug makig-istorya kanila nga motan-aw sa ilang mata. Iyang ipahayag ang Iyang gugma ngadto kanila, sultihan sila og mga istorya, mopahalipay kanila sa ilang mga gidrowing, ug mopamatuod bahin sa Iyang Amahan sa Langit. Ang Iyang kinaiya yano ra, tinuod, ug walay pagpakaaron-ingnon. Makahimo ba kita sa samang butang?

Mosaad ko kaninyo nga samtang maningkamot kamo sa pagbuhay kon unsay gustong ipahimo sa Ginoo kaninyo, walay mahimong mas importante kay sa mangita niadtong mga tawo nga inyong matabangan ug mapanalanginan. Diha sa simbahan mag-focus kamo sa pagtudlo sa mga indibidwal ug sa pagtandog sa ilang kasingkasing. Ang inyong kabalakan mao ang pag-awhag og espiritwal nga kasinatian kay sa pag-organisar og perpekto nga kalihokan, sa pagpangalagad sa inyong isig ka miyembro imbis nga dayegon lamang tungod sa gidaghanon sa mga pagbisita nga inyong nahimo. Dili kini mahitungod kaninyo apan mahitungod *kanila* kinsa atong gitawag nga mga igsoon.

Usahay maghisgot kita mahitungod sa *pag-adto* sa simbahan. Apan ang Simbahan labaw pa sa usa ka building o partikular nga dapit. Ingon kini kati-nuod ug kamadasigon diha sa labing yano nga mga pinuy-anan sa pinakalayo nga dapit sa kalibutan sama nga kini anaa dinhi sa punoang buhatan sa Simbahan sa Siyudad sa Salt Lake. Kay ang Ginoo Mismo miingon, “Kay diin gani ang duha kon tulo magakatigum sa akong ngalan, anaa ako sa ilang taliwala.”⁴

Makabaton kita sa samang kahim-tang nga atong bation sa Simbahan bisan asa kita moadto: sa trabahoan, sa eskwelahan, sa bakasyon, ug ilabi na sa atong mga panimalay. Ang ato mis-mong presensya ug impluwensya igo na nga makahimo sa usa ka dapit nga balaan bisan asa man kita maanaa.


Nakahinumdom ko og panag-istor-yahanay nako uban sa usa ka higala nga dili miyembro sa atong relihiyon. Natingala siya nga mahibalo nga si bisan kinsa nga takus nga lalaki sa atong Simbahan makadawat sa pries-thood. Nangutana siya, “Apan pila man ka naghupot sa priesthood ang anaa sa inyong ward?”

Mitubag ko, “Mga anaa sa 30 hang-tud sa 40.”

Naglibug, mipadayon siya, “Sa akong kongregasyon, usa ra ang among pari. Nganong nagkinahanglan man mo og daghan kaayong pari sa Dominggo sa buntag?”

Naintriga sa iyang pangutana, nadasig ko sa pagtubag, “Miuyon ko nimo. Siguro wala mi magkinahanglan nianang daghang mga naghupot sa priesthood sa simbahan ma-Dominggo. Apan kami nagkinahanglan *gayud* og usa ka naghupot sa priesthood sa matag panimalay. Ug kon walay priesthood sa usa ka panimalay, laing mga naghupot sa priesthood ang tawagon aron magbantay ug mangalagad ngadto niana nga pamilya.”

Ang ato dili lamang usa ka pang-Dominggo nga simbahan. Ang atong pagsimba magpadayon sa matag adlaw sa semana, bisan asa kita ug bisan unsa ang atong gibuhat. Ang atong mga panimalay sa piho mao “ang nag-unang mga dapit diin gipakita nato ang atong



gituohan.”⁵ Kasagaran diha gayud sa atong mga panimalay nga kita mag-ampo, kita manalangin, kita magtuon, kita magtudlo sa pulong sa Dios, ug kita moserbisyo uban sa tiunay nga gugma. Makapamatuod ko gikan sa personal nga kasinatian nga ang atong mga panimalay sagrado nga mga dapit diin anaa ang Espiritu—sama kadaghan sa, ug usahay mas sobra pa kay sa, diha sa atong por-mal nga mga dapit sa pagsimba.

Mohatag ko sa akong pagsaksi nga kini nga Simbahan mao ang Simba-han ni Jesukristo. Ang kalig-on ug kalagsik niini nagagikan sa inadlaw nga mga aksyon sa minilyon sa Iyang mga disipulo nga naningkamot matag adlaw nga mosunod sa Iyang labing

mahinungdanong ehemplo pinaagi sa pag-atiman sa uban. Si Kristo buhi ug Iyang gigiyahan kini nga Simbahan. Si Presidente Russell M. Nelson mao ang propeta nga Iyang gipili nga mangulo ug mogiya kanato sa atong panahon. Niini nga mga butang ako magpamatu-od sa pangalan ni Jesukristo, amen. ■

MUBO NGA MGA SULAT

1. 3 Nephi 26:21.
2. Tan-awa sa Russell M. Nelson, miting sa pagpangulo sa kinatibuk-ang komperensya, Abr. 2012.
3. M. Russell Ballard, “O Pagmaalamon,” *Liahona*, Nob. 2006, 20.
4. Mateo 18:20.
5. Russell M. Nelson, “The Doctrinal Importance of Marriage and Children” (tibuok kalibutan nga miting sa pagbansay sa pagpangulo, Peb. 2012), broadcasts.lds.org.



Ni Elder Quentin L. Cook
Sa Korum sa Napulog Duha ka mga Apostoles

Pagpangandam sa Pagsugat sa Dios

Ang paghimo sa balaang gitudlo nga mga responsibilidad diha sa pagkamatarung, panaghiusa ug panag-angay makaandam nato sa pagsugat sa Dios.

Si Eliza R. Snow, naghigot sa pagpahinungod sa Templo sa Kirtland (nga iyang natambungan), miingon: “Ang mga seremonya nianang pagpahinungod mahimong maasoy pag-usab, apan walay mortal nga pinulongan nga makahulagway sa langitnong mga pagpakita niadtong halandumong adlaw. Ang mga angel mipakita sa uban, samtang usa ka matang sa balaanong mga nanambong namatngonan sa tanan nga miadto, ug ang matag kasingkasing napuno sa dili matukib nga kalipay ug napuno sa himaya.”¹

Ang balaang mga pagpakita nga nahitabo sa Templo sa Kirtland mao ang pundasyon sa katuyoan sa gipahiuli nga Simbahan ni Jesukristo aron sa pagpahinabo sa kaluwasan ug kahimayaan sa mga anak sa atong Langitnong Amahan.² Sa atong pagpangandam sa pagsugat sa Dios, mahibaloan nato unsa ang atong balaang gitudlo nga mga responsibilidad pinaagi sa pagribyu sa sagrado nga mga yawe nga gipahiuli didto sa Templo sa Kirtland.

Sa pag-ampo sa pagpahinungod, si Propeta Joseph Smith mapainubsanong

nangamuyo sa Ginoo “sa pagdawat niini nga balay . . . diin ikaw misugo kanamo sa pagtukod.”³

Paglabay sa usa ka semana, sa Dominggo sa Pasko sa Pagkabanhaw,

ang Ginoo nagpakita sa usa ka talagsaong panan-awon ug midawat sa Iyang templo. Nahitabo kini niadtong Abril 3, 1836, hapit 182 ka tuig ang milabay gikan niining Dominggo sa Pasko sa pagkabanhaw. Panahon usab kadto sa Pagpalabay—usa niadtong talagsa nga panahon nga ang Pasko sa Pagkabanhaw ug Pagpalabay nagkadungan. Pagkahuman sa panan-awon, tulo ka karaang propeta, sila si Moises, Elias, ug Elijah, nagpakita ug mitugyan sa mga yawe nga importante aron matuman ang katuyoan sa Ginoo alang sa Iyang gipahiuli sa Simbahan niini nga dispensasyon. Kana nga katuyoan yano, apan maayo kaayo pagkasulti, gipasabut ang pagpundok sa Israel, nag-seal nila isip mga pamilya, ug nagandam sa kalibutan alang sa Ikaduhang Pag-anhi sa Ginoo.⁴

Ang pagpakita nila ni Elijah ug Mioses usa ka “talagsaong pagkapareha . . . [uban] sa tradisyon sa Judeo, nga sumala niini sila si Moises ug Elijah magdungan pag-abut sa ‘katapusan sa panahon.’”⁵ Sa atong doktrina, kini nga pagpakita nakatuman sa pundasyon sa pagpahiuili sa piho nga mga yawe nga “gihatag . . . alang sa katapusan nga mga adlaw ug alang sa katapusan nga



higayon, nga mao ang kapaigoan sa kahingpitan sa mga panahon.”⁶

Ang nahimutangan ug gidak-on sa Templo sa Kirtland wala maklaro. Apan kabahin sa pagkaimportante kaayo niini ngadto sa katawhan, kini adunay *mahangturong-sangputanan*. Ang karaang mga propeta mipahiuli sa mga yawe sa priesthood alang sa mahangturong makaluwas nga mga ordinansa sa ebanghelyo ni Jesukristo. Miresulta kini sa tumang kalipay sa matinu-d-anong mga miyembro.

Kini nga mga yawe naghatag sa “gahum gikan sa kahitas-an”⁷ alang sa balaang gitudlo nga mga responsibilidad nga kaniadto ug karon naglangkob sa importanting katuyoan sa Simbahan.⁸ Nianang talagsaong adlaw sa Pasko sa Pagkabanhaw didto sa Templo sa Kirtland, tulo ka yawe ang gipahiuli:

Una, si Moises nagpakita ug mitugyan sa mga yawe sa pagpundok sa Israel gikan sa upat ka bahin sa yuta, nga mao ang misyonaryo nga buhat.⁹

Ikaduha, si Elias nagpakita ug mitugyan sa mga yawe sa dispensasyon sa ebanghelyo ni Abraham, nga naglakip sa pagpahiuli sa pakigsaad ni Abraham.¹⁰ Si Presidente Russell M. Nelson mitudlo nga ang katuyoan sa yawe sa pakigsaad mao ang pag-andam sa mga miyembro alang sa gingharian sa Dios. Miingon siya, “[Makaila kita] kon kinsa kita ug unsa ang gipaabut sa Dios nato.”¹¹

Ikatulo, si Elijah nagpakita ug mitugyan sa mga yawe sa gahum sa pag-seal niini nga dispensasyon, nga mao ang buhat sa family history ug mga ordinansa sa templo nga nakapahimo sa kaluwasan alang sa mga buhi ug mga patay.¹²

Adunay, ubos sa direksyon sa Unang Kapangulohan ug sa Korum sa Napulog Duha, tulo ka executive councils sa punoang buhatan sa Simbahan nga nagdumala niining tulo ka balaang gitudlo nga mga responsibilidad base sa mga yawe nga gipahiuli sa Templo sa Kirtland. Mao kini ang Missionary Executive Council, ang Priesthood ug ang Family Executive Council, ug ang Temple and Family History Executive Council.



Unsay Atong Gibuhat Karon sa Pagtuman Niining Balaang Gitudlo nga mga Responsibilidad?

Una, kabahin sa pagpahiuli ni Moises sa mga yawe sa pagpundok sa Israel, karon hapit moabut og 70,000 ka misyonaryo ang mikatip sa tibuok yuta nagsangyaw sa Iyang ebanghelyo sa pagpundok sa Iyang pinili. Mao kini ang sinugdanan sa katumanan sa mahinungdanon ug kahibulongan nga buhat nga nakita ni Nephi diha sa mga Hentil ug sa balay ni Israel. Nakakita si Nephi sa atong panahon sa dihang ang mga Santos sa Dios anaa sa tibuok yuta, apan ang ilang gidaghanon diyutay ra tungod sa pagkadautan. Hinoon, iyang nakita nga sila “gisangkapan sa katarung ug uban sa gahum sa Dios sa dako nga himaya.”¹³ Kon ikonsiderar ang tibuok kasaysayan sa gipahiuli nga Simbahan, ang misyonaryo nga paningkamot talagsaon kaayo. Nakita nato ang katumanan sa panan-awon ni Nephi. Bisan og diyutay ra kita, magpadayon kita sa atong paningkamot ug pagtabang niadtong kinsa mopatalinghug sa mensahe sa Manluluwas.

Ikaduha, si Elias nagpakita, ug mitugyan sa dispensasyon sa ebanghelyo ni Abraham, namahayag nga diha kanamo ug sa among binhi sa tanan nga mga kaliwatan nga mosunod kanamo pagapanalanginan. Niini nga komperensya, ang importante nga giya gipresentar aron sa pagtabang sa paghingpit sa mga Santos ug pag-andam kanila alang sa gingharian sa Dios.¹⁴ Ang gipahibalo diha sa sesyon sa priesthood kabahin sa mga korum sa elder ug mga high priest maoy mobuhi

sa gahum ug awtoridad sa priesthood. Ang home ug visiting teaching, nga karon “pagpangalagad,” segun sa larenong pagkatudlo niining sesyon, moandam sa mga Santos sa Ulahing mga Adlaw sa pagsugat sa Dios.

Ikatulo, si Elijah mitugyan sa mga yawe sa pag-seal niini nga dispensasyon. Kadtong kinsa nato nga buhi pa niining higayuna, ang pagdaghan sa mga templo ug buhat sa family history talagsaon. Kini nga paningkamot magpadayon ug magkakusog hangtud sa Ikaduhang Pag-anhi sa Manluluwas, kon dili ang tibuok yuta “sa hingpit malaglag sa iyang pag-anhi.”¹⁵

Ang buhat sa family history, gipanalanginan sa langit og teknolohiya, mianam og kapasas sa miaging pipila ka tuig. Dili kita maalamon nga matagbaw mahitungod niining balaang gitudlo nga responsibilidad ug magpaabut nga si Tiya Jane o ang ubang mapasaligon nga kabanay ang moatiman niini. Tuguti ko nga mopakigbahin sa makahadlok nga mga komentaryo ni Presidente Joseph Fielding Smith: “Walay usa ang walay labut niining dakong obligasyon. Gikinahanglan kini sa apostol ingon man usab sa labing mapainubsanon nga elder [o sister]. Dapit, o pagkainila, o taas nga pagserbisyo sa Simbahan . . . dili makapahimo sa usa ka tawo nga mobaliwala sa kaluwasan sa mga patay.”¹⁶

Kita aduna nay mga templo sa tibuok kalibutan ug mga kapanguhaan nga pundo sa tabang sa patron aron matabangan kadtong nanginahanglan nga layo gikan sa templo.

Isip mga indibidwal, kinahanglan nga atong timbang-timbangon ang

atong paningkamot sa pagpadayon sa buhat sa misyonaryo, templo ug family history, ug pagpangandam sa pagsugat sa Dios.

Ang Pagkamatarung, Panaghiusa, ug Panag-angay sa atubangan sa Ginoo Makahimo og Pundasyon Niining Sagrado nga mga Responsibilidad

Kabahin sa pagkamatarung, kini nga kinabuhi mao ang panahon alang natong tanan sa pag-andam sa pagsugat sa Dios.¹⁷ Ang Basahon ni Mormon naghatag og daghang mga ehemplo sa makalilisang nga mga sangputanan kon ang mga indibidwal o mga grupo mapakyas sa pagtuman sa mga sugo sa Dios.¹⁸

Panahon sa akong kinabuhi, ang kalibutanon nga mga isyu ug mga kabalaka mibalhin gikan sa labing layo ngadto sa pikas—gikan sa walay bili ug dili importante ngadto sa seryoso nga imoralidad. Gidayeg nga ang pipila wala makauyon mibutyag ug mipanghimaraut sa imoralidad.¹⁹ Ang maong wala mauyuni nga imoralidad supak sa mga balaod sa Dios ug sa katilingban. Hinoon, kadtong kinsa nakasabut sa plano sa Dios kinahanglan usab nga mosupak sa giuyunan nga imoralidad, nga usa usab ka sala. Ang pamahayag sa pamilya ngadto sa kalibutan nagpasidaan “nga ang tagsa-tagsa kinsa makalapas sa mga pakigsaad sa kaputli, kinsa moabuso sa ilang kapikas o mga anak [o ni bisan kinsa] . . . moabut ang adlaw nga mobarug nga adunay tulu-bagon sa atubangan sa Dios.”²⁰

Sa atong pag-aninaw sa palibut, makita nato ang kadaut sa pagkadautan ug adiksiyon bisan asa. Kon, isip mga indibidwal, nabalaka kaayo kita mahitungod sa katapusang paghukom sa atong Manluluwas, kinahanglan kitang maghinulsol. Nahadlok ko nga daghang mga tawo ang dili na mobati nga may tulubagon ngadto sa Dios ug dili mogamit sa mga kasulatan o sa mga propeta alang sa giya. Kon kita, isip usa ka katilingban, mamalandong sa mga sangputanan sa sala, adunay dako kaayong publikong pagsupak sa pornograpiya ug pagtagad sa mga babaye nga usa ka butang.²¹ Sama sa gisulti ni



Alma sa iyang anak nga si Corianton sa Basahon ni Mormon, “Pagkadautan dili mahitabo nga mahimo nga kalipay.”²²

Kabahin sa panaghiusa, ang Manluluwas mipahayag, “Kon kamo dili magkahiusa kamo dili akò.”²³ Naka-hibalo kita nga ang espiritu sa panagbingkil gikan sa yawa.²⁴

Sa atong panahon, ang direksyon sa kasulatan alang sa panaghiusa gibaliwala pag-ayo, ug alang sa daghang mga tawo ang gipahimug-atan mao ang kinaiya sa tribo o grupo,²⁵ nga sa kasagaran gibase sa kahimtang, gender, kaliwat, ug bahandi. Sa daghang mga nasud, kon dili kadaghanan, ang mga tawo grabe nga nagkabahin-bahin unsaon sa pagpuyo. Sa Simbahan sa Ginoo, ang bugtong kultura nga atong sundon ug itudlo mao ang kultura sa ebanghelyo ni Jesukristo. Ang panaghiusa nga atong gitinguha mao ang panaghiusa uban sa Manluluwas ug sa Iyang mga pagtulun-an.²⁶

Kon atong ikonsiderar ang nag-unang mga katuyoan sa Simbahan, gibase kining tanan sa **panag-angay sa atubangan sa Ginoo**²⁷ ug sa pagsunod sa kultura sa ebanghelyo ni Jesukristo. Kabahin sa misyonaryo nga buhat, ang unang kwalipikasyon alang sa bunyag mao ang pagpaubos sa kaugalingon sa atubangan sa Dios ug pagduol uban sa masulub-ong kasingkasing ug mahinulsulon nga espiritu.²⁸ Ang edukasyon, bahandi, kaliwat, o nasudnong gigikanan wala gani ikonsiderar.

Agig dugang, ang mga misyonaryo mapainubsanong nagserbisyo diin gitawag. Wala sila mosulay sa pagserbisyo base sa kalibutanong mga sumbanan sa kahimtang o pagpangandam alang sa umaabut nga panarbaho. Nagserbisyo sila uban sa ilang tibuok kasingkasing, gahum, hunahuna, ug kusog, bisan asa sila ma-assign. Wala sili mopili sa ilang misyonaryo nga kompanyon, ug naningkamot sila pag-ayo sa pagpalambo og Kristohanong mga kinaiya,²⁹ nga mao ang sentro sa kultura ni Jesukristo.

Ang mga kasulatan naghatag og giya alang sa atong labing importante nga mga relasyon. Ang Manluluwas mitudlo nga ang unang sugo mao ang “higug-maa ang Ginoo nga imong Dios.” Ug ang ikaduha mao ang “higug-maa ang imong silingan sama sa imong kaugalingon.”³⁰

Ang Manluluwas dayon mipasabut nga ang tanan mao ang atong silingan.³¹ Ang Basahon ni Mormon miklaro nga wala nay mga -ites, mga tribo, o mga klase.³² Kinahanglang magkahiusa ug mag-angay-angay atubangan sa Dios.

Ang sagrado nga mga ordinansa ug balaan nga mga responsibilidad gitukod niini nga ideya. Magpaabut ko nga ang imong kaugalingong mga kasinatian sa templo mahimong susama sa akong kasinatian. Kon ako mobiya sa akong regular nga trabaho sa San Francisco ug moabut sa Oakland Temple, makasinati ko og hilabihan nga pagbati sa gugma ug kalinaw. Ang dakong bahin niana mao ang pagkasabut nga ako mas nahiduol ngadto sa Dios ug sa Iyang mga katuyoan. Ang makaluwas nga mga ordinansa mao ang akong unang gitutukan, apan ang importante nga bahin niadtong maanindot nga mga pagbati mao ang pagkaangay ug panaghiusa nga bation diha sa templo. Ang tanan nagsinina og puti. Walay ebidensya sa bahandi, ranggo, o nahuman nga edukasyon; managsoon kitang tanan nga nagpaubos sa atong mga kaugalingon atubangan sa Dios.

Sa sagrado nga sealing room, ang mahangturong ordinansa sa kaminyon pareha ra sa tanan. Ganahan ko sa kamatuoran nga ang magtiayon gikan

sa pinakaubos nga background ug ang magtiayon gikan sa labing adunahan nga background eksakto nga adunay sama nga kasinatian. Nagsul-ob sila sama nga matang sa mga kupo ug mohimo og sama nga mga pakigsaad sa samang altar. Makadawat usab sila sa samang mahangturong mga panalangin sa priesthood. Mahimo kini diha sa usa ka maanindot nga templo nga gitukod pinaagi sa mga ikapulo sa mga Santos isip sagrado nga balay sa Ginoo.

Ang pagtuman sa balaang gitudlo nga mga responsibilidad, base sa pagkamatarung, panaghiusa, ug panagangay sa atubangan sa Ginoo, naghatag og personal nga kalipay ug kalinaw niini nga kalibutan ug nag-andam nato alang sa kinabuhing dayon sa kalibutan nga moabut.³³ Nag-andam kini nato sa pagsugat sa Dios.³⁴

Mag-ampo kami nga ang matag usa ninyo, bisan pa sa inyong kahimtang karon, mopakigtambag sa inyong bishop ug magpakatakus sa rekomend sa templo.³⁵

Mapasalamaton kami nga daghang mga miyembro ang nag-andam nga moadto sa templo. Adunay igo-igo nga pagsaka sa gidaghanon sa takus nga mg ahamtong nga naghupot og rekomend sa templo sulod sa daghang mga tuig. Ang may kinutuban nga gamit nga rekomend alang sa takus nga kabatانونan misaka pag-ayo sa miaging duha ka tuig. Klaro nga ang matinud-anong miyembro sa Simbahan wala sukad mahimong mas lig-on.

Sa pagtapos, palihug salig nga ang senior nga mga lider sa Simbahan kinsa nagdumala sa balaang gitudlo nga mga katuyoan sa Simbahan nakadawat og balaan nga tabang. Kini nga giya gikan sa Espiritu ug usahay direkta gikan sa Manluluwas. Ang duha ka matang sa espirituhanong giya gihatag. Mapasalamaton ko nga nakadawat sa maong tabang. Apan ang giya gihatag sa panahon sa Ginoo, pagtulun-an human sa usa ka pagtulun-an ug lagda human sa usa ka lagda,³⁶ kon “ang nakahibalo sa tanan nga Ginoo motuyo sa pagpili sa pagpanton kanato.”³⁷ Ang giya alang sa tibuok Simbahan magagikan lamang sa Iyang propeta.

Kitang tanan adunay pribilehiyo sa pagpaluyo ni Presidente Russell M. Nelson isip atong propeta ug Presidente sa Ang Simbahan ni Jesukristo sa mga Santos sa Ulahing mga Adlaw niini nga komperensya. Ang Napulog Duha isip grupo ug indibidwal, adunay talagsaong espirituhanong kasinatian sa dihang among gipatong ang among mga kamot sa ulo ni Presidente Nelson ug ni Presidente Dallin H. Oaks, nga maoy nagdala sa tingog, nag-set apart niya isip Presidente sa Simbahan. Ako mopamatuod nga siya gi-orden nang daan ug giandam sa iyang tibuok kinabuhi nga mahimong propeta sa Ginoo alang sa atong panahon. Sa ngalan ni Jesukristo, amen. ■

MUBO NGA MGA SULAT

1. Eliza R. Snow, sa Janiece Johnson ug Jennifer Reeder, *The Witness of Women: Firsthand Experiences and Testimonies from the Restoration* (2016), 124; tan-awa usab sa Eliza R. Snow, sa Edward Tullidge, *The Women of Mormondom* (1877), 65.
2. Tan-awa sa *Handbook 2: Administering the Church* (2010), 2.2.
3. Doktrina ug mga Pakigsaad 109:4.
4. Tan-awa sa Russell M. Nelson, “Epistles of the Lord” (pakigpulong nga gihatag sa seminar alang sa bag-ong mga presidente sa misyon, Hunyo 25, 2015), 1–2.
5. Stephen D. Ricks, “The Appearance of Elijah and Moses in the Kirtland Temple and the Jewish Passover,” *BYU Studies*, vol. 23, nu. 4 (Fall 1983), 485.
6. Doktrina ug mga Pakigsaad 112:30.
7. Doktrina ug mga Pakigsaad 38:38; tan-awa usab sa Doktrina ug mga Pakigsaad 43:16; 84:20–21.



8. Tan-awa sa *Handbook 2*, 2.2. Ang ikaupat nga responsibilidad, pag-atiman sa kabus ug timawa, wala magkinahanglan og gipahiuli nga mga yawe apan nagsalig sa balaang dinasig nga organisasyon sa Simbahan.
9. Ang Missionary Executive Council nagdumala niining balaang gitudlo nga responsibilidad. Tan-awa sa Doktrina ug mga Pakigsaad 110:11.
10. Ang Priesthood ug ang Family Executive Council nagdumala sa balaang gitudlo nga responsibilidad. Tan-awa sa Doktrina ug mga Pakigsaad 110:12.
11. Russell M. Nelson, “Mga Pakigsaad,” *Liahona*, Nob. 2011, 88.
12. Ang Temple and Family History Executive Council nagdumala sa balaang gitudlo nga responsibilidad. Tan-awa sa Doktrina ug mga Pakigsaad 110:13–16.
13. 1 Nephi 14:14; tan-awa usab sa 1 Nephi 14:5, 7, 12.
14. Tan-awa sa Mosiah 18:9; Alma 6:1; 32:37; tan-awa usab sa Jeffrey R. Holland, “Mga Representante sa Simbahan,” *Liahona*, Nob. 2016, 61–62, 67.
15. Doktrina ug mga Pakigsaad 2:3.
16. Joseph Fielding Smith, *Doctrines of Salvation*, comp. Bruce R. McConkie (1955), 2:148–49.
17. Tan-awa sa Alma 34:32.
18. Ang nagbalik-balik nga tema sa Basahon ni Mormon mao nga ang mga tawo gisultihan nga kon sila maghupot sa mga sugo sila mouswag sa yuta, apan kon sila dili maghupot sa mga sugo, sila isalikway gikan sa atubangan sa Ginoo. Tan-awa, ang pipila, 2 Nephi 1:9; 4:4; Alma 9:13.
19. Kini nahitabo sa #MeToo nga kalihokan.
20. Ang Pamilya: Usa ka Pamahayag ngadto sa Kalibutan,” *Liahona*, Mayo 2017, 145.
21. Tan-awa sa Ross Douthat, “Let’s Ban Porn,” *New York Times*, Peb. 11, 2018, SR11.
22. Alma 41:10.
23. Doktrina ug mga Pakigsaad 38:27.
24. Tan-awa sa 3 Nephi 11:29.
25. Tan-awa sa David Brooks, “The Retreat to Tribalism,” *New York Times*, Ene. 2, 2018, A15.
26. Tan-awa sa Juan 17:21–22.
27. Tan-awa sa 2 Nephi 26:33: “Ang tanan managsama ngadto sa Dios,” lakip sa “itum ug puti, ulipon ug gawasnon, lalaki ug babaye.”
28. Tan-awa sa Doktrina ug mga Pakigsaad 20:37.
29. Tan-awa sa *Isangyaw ang Akong Ebanghelyo: Usa ka Giya sa Misyonaryo nga Pangalagad* (2004), kapitulo 6.
30. Tan-awa sa Mateo 22:36–39.
31. Tan-awa sa Lucas 10:29–37.
32. Tan-awa sa 4 Nephi 1:17.
33. Tan-awa sa Doktrina ug mga Pakigsaad 59:23.
34. Tan-awa sa Alma 34:32.
35. Ang mga pangutana sa interbyu sa rekomend sa templo usa ka maayo nga pagtimbang-timbang kon sa unsang paagi kita nagsunod sa ebanghelyo.
36. Tan-awa sa 2 Nephi 28:30; Doktrina ug mga Pakigsaad 98:12; 128:21.
37. Neal A. Maxwell, *All Things Shall Give Thee Experience* (2007), 31.



Ni Presidente Russell M. Nelson

Magpadayon Tang Tanan

Ang inyong tinguha nga magmasulundon molambo samtang kamo mohinumdom ug mamalandong kon unsa ang inyong gibati sa milabayng duha ka adlaw.

Minahal kong mga kaigsoonan, sa atong pagtapos niining makasaysayanong komperensya, moapil ako kaninyo sa pagpasalamat sa Ginoo sa Iyang paggiya ug makapadasig nga impluwensya. Ang musika maanindot ug makapabayaw. Ang mga mensahe dili lang makapaligon, apan makapausab sa kinabuhi!

Sa maligdong nga katiguman atong gipaluyohan ang bag-o nga Unang Kapangulohan. Duha ka talagsaong

kalalakin-an ang natawag sa Korum sa Napulog Duha ka mga Apostoles. Ug walo ka bag-ong mga General Authority Seventy ang natawag.

Karon usa ka paborito nga himno ang mo-summarize sa atong gibag-o nga tinguha, sa atong hagit, ug sa atong katungdanan sa pagpadayon sa unahan:

*Magpadayon ta sa buluhaton sa Dios,
Nga kita gantihan sa kaulahian;*

*Diha's katarung espada gamiton,
Espada's kamatuoran.*

*Ayaw kahadlok sa kaaway;
Kay ang Dios kanato nagbantay.
Pulong sa dautan di paminawon,
Apan Dios lamang atong sundon.¹*

Awhagon ko kamo sa pagtuon kanunay sa mga mensahe niining komperensya —gani balik-balikon— sulod sa mosunod nga unom ka bulan. Magmakugihon sa pagpangita og mga paagi sa paglakip niining mga mensahe sa inyong mga family home evening, sa inyong pagtudlo sa ebanghelyo, sa inyong mga panag-istorya sa pamilya ug sa mga higala, ug gani sa inyong mga diskusyon niadtong lahi nato og tinuohan. Daghan ang maayong tawo nga mouyon sa mga kamatuoran nga gitudlo niining komperensya kon gidalit diha sa gugma. Ug ang inyong tinguha sa pagsunod mapalambo samtang kamo maghinumdom ug mamalandong kon unsa ang inyong gibati sa milabayng duha ka adlaw.

Kining kinatibuk-ang komperensya nagtimaan sa sinugdanan sa bang-ong kapanahunan sa pagpangalagad. Ang Ginoo naghimo og importanting kausaban sa paagi nga kita moatiman sa usag usa. Mga kaigsoonan—tigulang ug batan-on—moserbisyo sa usag usa sa bag-o, mas balaan nga paagi. Ang mga korum sa mga elder mapalig-on sa pagpanalangin sa mga kinabuhi sa kalalakin-an, kababayan-an ug kabataan sa tibuok kalibutan. Ang mga sister sa Relief Society mopadayon sa pagpangalagad sa ilang lahi ug mahigugmaon nga paagi, mopadangat og mga oportunidad ngadto sa mga sister sa pag-apil nila kon tukma nga gitahasan.

Ang among mensahe ngadto sa kalibutan yano ug sinsero: among gidapit ang tanang anak sa Dios sa duha ka habig sa tabil sa pagduol ngadto sa ilang Manluluwas, dawata ang mga panalangin sa balaan nga templo, pagbaton og molahutay nga kalipay, ug mahimong angayan sa kinabuhing dayon.²

Ang katapusang kahimayaan nagkinahanglan sa atong hingpit nga kamaunongon karon ngadto sa mga



pakigsaad nga atong gihimo ug sa mga ordinansa nga atong nadawat sa balay sa Ginoo. Niining panahona, kita aduna nay 159 ka naggamit nga mga templo, ug mas daghan pa ang kasamtangang gitukod. Gusto namong dad-on ang mga templo paduol ngadto sa nagkadaghan nga mga miyembro sa Simbahan. Mao nga karon ikalipay namong ipahibalo ang mga plano sa pagtukod og pito pa ka mga templo. Kini nga mga templo tokuron sa mosunod nga mga dapit: Salta, Argentina; Bengaluru, India; Managua, Nicaragua; Cagayan de Oro, Philippines; Layton, Utah; Richmond, Virginia; ug sa usa ka dakong siyudad nga wala pa matino dinha sa Russia.

Pinalanggang mga kaigsoonan, ang pagtukod niining mga templo mahimong dili makausab sa inyong mga kinabuhi, apan ang inyong panahon sulod sa templo seguradong makahimo. Niana nga diwa, Ako mopanalangin kaninyo sa pagtino sa mga butang nga inyong ipadaplin aron kamo makagahin og dugang panahon sa templo. Ako mopanalangin kaninyo og mas dakong panag-uyon ug gugma sa inyong panimalay ug mas lawom nga tinguha sa pag-amuma sa inyong mahangturong mga relasyon sa pamilya. Ako mopanalangin kaninyo nga madugangan ang inyong hugot nga pagtuo diha sa Ginoo nga si Jesukristo ug mas dako nga abilidad sa pagsunod Kaniya isip Iyang tinuod nga mga disipulo.

Ako mopanalangin kaninyo sa pagpataas sa inyong tingog sa pagpamatuod, sama sa akong gibuhad karon, nga kita naapil diha sa buhat sa Makagagahum nga Dios! Si Jesus mao ang Kristo. Kini mao ang Iyang Simbahan, nga Siya nagmando pinaagi sa Iyang dinihugan nga mga sulu-goon. Ako nagpamatuod, inubanan sa akong pagpadayag sa gugma alang sa matag usa kaninyo, diha sa sagradong ngalan ni Jesukristo, amen. ■

MUBO NGA MGA SULAT

1. "Let Us All Press On," *Hymns*, nu. 243.
2. Gibatbat diha sa Doktrina ug mga Pakigsaad 14:7 isip "ang labing mahinungdanon sa tanan nga mga gasa sa Dios."

Estatistikal nga Report, 2017

Alang sa impormasyon sa mga miyembro sa Simbahan, ang Unang Kapangulohan miisyu sa mosunod nga estatistikahong report kabahin sa kalamboan ug kahimtang sa Simbahan kutob sa Disyembre 31, 2017.

Mga Unit sa Simbahan

Mga Stake	3,341
Mga Mission	421
Mga District	553
Mga Ward ug Branch	30,506

Mga Miyembro sa Simbahan

Total nga Gidaghanon sa Miyembro	16,118,169
Bag-ong mga Bata nga Anaa sa Rekord	106,771
Mga Kinabig nga Nabunyagan	233,729

Mga Misyonaryo

Full-Time nga mga Misyonaryo	67,049
Mga Church-Service Missionary	36,172

Mga Templo

Mga Templo nga Gipahinugod sa 2017 (Paris France, Tucson Arizona, Meridian Idaho, Cedar City Utah)	4
Mga Templo nga gipahinugod Pag-usab sa 2017 (Idaho Falls Idaho)	1
Mga Templo nga Gigamit hangtud sa Katapusan sa Tuig	159

Indeks sa mga Istorya sa Komperensya

Ang mosunod mao ang lista sa pinili nga mga kasinatian nga may kalabutan sa kinatibuk-ang komperensya. Ang numero nagpasabot sa unang pahina sa pakigpulong.

Mamumulong	Istorya
Reyna I. Aburto	(78) Ang mga Santos sa Ulahing mga Adlaw sa Chile, Peru, Mexico, ug sa Estados Unidos nagtanyag og hinabang pagkahuman sa mga katalagman.
Neil L. Andersen	(24) Si Kathy Andersen mibasa sa miaging mga pakigpulong ni Presidente Russell M. Nelson ug nag-ampo alang sa mas dakong kasiguroan sa iyang mapanagnaong tahas.
M. Russell Ballard	(9) Sa dihang nakita niya ang liso sa mustasa didto sa Jerusalem, si M. Russell Ballard nahinumdom sa mga pagtulun-an sa Manluwas bahin sa pagtuo.
David A. Bednar	(30) Sila si Russell M. Nelson ug si Henry B. Eyring misunod sa imbitasyon ni Presidente Thomas S. Monson sa pagtuon sa Basahon ni Mormon ug migamit sa mga kamatuoran niini.
Jean B. Bingham	(104) Usa ka sister sa Relief Society nangalagad sa “nawala ug nag-inusara” nga batan-ong inahan. Usa ka African nga sister nangalagad sa usa ka sister nga gibunalbunalan og gikawatan. Ang mga miyembro sa ward miatiman sa usa ka sister nga nakigbugno sa kanser. Ang batan-ong mga babaye nagtrabaho aron makatabang sa mga panginahanglan sa silingan.
Gérald Caussé	(111) Sa wala pa aprobahi ang Paris France Temple, ang lokal nga mga sakop sa konseho sa siyudad mibisita og usa ka sakrament miting. Isip usa ka presidente sa stake, si Gérald Caussé nalipay sa dugang pagkamaunungon ug pagtuo sa mga miyembro sa stake diha sa Manluwas. Si Gérald Caussé naghisgot og usa ka higala nga ang matag pamilya nagkinahanglan og naghupot sa priesthood diha sa panimalay.
D. Todd Christofferson	(55) Ang elders quorum miani sa tanom sa usa ka mag-uuma human ang pipila sa miyembro sa iyang pamilya namatay sa influenza.
Quentin L. Cook	(114) Ang balaan nga mga pagpakita mipuno sa mga miyembro sa kalipay sa pagpahinugod sa Templo sa Kirtland Temple. Si Quentin L. Cook mibati og gugma ug kalinaw sa Oakland California Temple.
Massimo De Feo	(81) Ang anak nga lalaki ni Massimo De Feo misulti sa mga kauban sa klase nga ang iyang papa mao ang “dako-dako sa universe.” Ang himatyon nga mama ni Massimo De Feo nagpakita nga siya nahigugma kaniya labaw sa iyang kaugalingon.
Devin G. Durrant	(42) Usa ka dula sa family home evening nakapalig-on sa pagsalig ni Devin G. Durrant. Ang pamilyang Durrant nagpalitrato sa gawas sa templo.
Larry J. Echo Hawk	(15) Ang pamilya ni Echo Hawk mihupay sa mga ginikanan sa hubog nga drayber nga nakapatay sa igsoon ug bayaw ni Larry J. Echo Hawk.
Henry B. Eyring	(61) Ang mga apohan sa tuhod ni Henry B. Eyring nagkahigugmaay samtang nanabok sa kapatagan. Ang usa ka batan-ong lalaki nakasabut unsa ang mahimo sa mga naghupot sa priesthood sa pagserbisyo sa Ginoo. Ang dinasig nga mga home teacher nagserbisyo sa usa ka pamilya nga nanginahanglan pag-ayo. (86) Pagkamatay sa inahan ni Henry B. Eyring, ang iyang amahan nakadawat og kahupayan gikan sa Espiritu Santo.
Taylor G. Godoy	(34) Ang kamatayon sa anak nga lalaki sa usa ka higala nakaaghat ni Taylor G. Godoy sa paggamit sa “usa na lang ka adlaw” sa kinabuhi sa maalamon nga paagi. Ang usa ka Peruvian nga sister miseryoso pag-ayo sa iyang pakigsaad human nagsakripisyo sa pagtambong sa templo. Si Taylor G. Godoy gusto nga mahimong labing maayong estudyante human ang iyang inahan nagsakripisyo alang sa iyang pagtuon sa pagka-dentista.
Gerrit W. Gong	(97) Si Gerrit W. Gong miistorya sa iyang mga anak nga lalaki og mga istorya nga pangkatulog ug mokanta nila sa pagpakatulog.
Jeffrey R. Holland	(101) Usa ka brother kansang asawa nasakit mitawag sa iyang home teacher alang sa panabang.
Douglas D. Holmes	(50) Ang mga naghupot sa Aaronic Priesthood nagpakigbahin sa ilang mga pagpamatuod sa ilang mga kauban. Ang mga sakop sa priest quorum nakat-on unsay gipasabot nga “sinugo ni Jesukristo.”
Russell M. Nelson	(68) Ang mga naghupot sa Priesthood napakyas sa paghatag og mga panalangin ngadto sa mga sakop sa pamilya o sa mga sister nga dunay bag-ong mga calling. Si Russell M. Nelson mitabang sa usa ka tawo nga mobalik sa Simbahan. (93) Isip usa ka bata, si Russell M. Nelson ganahan magkat-on sa ebanghelyo ug naghandom nga ma-seal ngadto sa iyang mga ginikanan. Ang batan-ong Russell M. Nelson mibuak sa mga botelya sa bino tungod kay gusto siya nga ang iyang mga ginikanan mosunod sa Pulong sa Kaalam.
Dallin H. Oaks	(65) Ang usa ka presidente sa elders quorum mitambag sa sakop sa korum nga dili moundang sa kolehiyo.
Bonnie L. Oscarson	(36) Isip usa ka batan-ong babaye, si Bonnie L. Oscarson gisugo nga motuman sa mga assignment ug mga calling nga kasagaran buhaton sa mga hamtong.
Dale G. Renlund	(46) Ang gugma nila ni Parley ug Orson Pratt alang sa ilang katigulangan nakatabang nila sa pagsulbad sa ilang relasyon. Ang mga panalangin sa templo makatabang nga mamaayo ang usa ka pamilya kansang kasingkasing sa patay nga anak gidonar.
Lynn G. Robbins	(21) Ang propesor ni Lynn G. Robbins sa kolehiyo miawhag sa mga estudyante sa pagkonsiderar sa kapakyasan isip magtutudlo ug sa pagpadayon sa pagsulay.
Ulisses Soares	(98) Si Ulisses Soares ug ang iyang asawa nakadawat og mga visa human magpakita og pagtuo nga ang Ginoo mopahigayon og milagro alang kanila.
Gary E. Stevenson	(17) Si Gary E. Stevenson nakaangkon og pagpamatuod sa misunod nga mga propeta human sa kamatayon ni Presidente David O. McKay. Usa ka kanhi estudyante midayeg ni Dr. Russell M. Nelson sa iyang paagi sa pagtudlo.
Brian K. Taylor	(12) Si Brian K. Taylor nahinumdom sa iyang mapailubon nga mga magtutudlo sa Primary. Human sa usa ka aksidente sa sakyanan nga iyang nahimo, ang usa ka batan-ong babaye nakakaplag og kalinaw sa pagkahibalo nga siya usa ka anak sa Dios.
Taniela B. Wakolo	(39) Human makasimba sulod sa 39 ka tuig, ang usa ka tawo nabunyagan ug nakumpirmahan ug unya na-seal ngadto sa iyang asawa diha sa templo.
Larry Y. Wilson	(75) Misunod sa espirituhanong mga impresyon, ang usa ka LDS chaplain mitabang sa pagluwas sa usa ka barko de pasahero ug sa iyang mga sakop gikan sa bagyo.
Claudio D. Zivic	(83) “Lahutay ug ikaw magmadaugon,” Si Presidente Thomas S. Monson misulti ni Claudio D. Zivic ug sa iyang asawa. Ang liki sa kayak ni Claudio D. Zivic nakapahimo niini nga imposible na nga kontrolon.



Elder Gerrit W. Gong

Korum sa Napulog Duha ka mga Apostoles

“Niining Domingo sa Pasko sa Pagkabanhaw, malipayon akong moawit, ‘Alleluia,’” misulti si Elder Gerrit W. Gong sa iyang unang pakigpulong sa kinatibuk-ang komperensya isip sakop sa Korum sa Napulog Duha ka mga Apostoles. “Ang kanta sa matubsanong gugma sa atong nabanhaw nga Manluluwas nagsaulog sa panag-uyon sa mga pakigsaad . . . ug sa Pag-ula ni Jesukristo.”

Si Elder Gong migahin og tibuok kinabuhi nga pagmaya niana nga panag-uyon. Nasayud siya nga ang gahum sa atong mga pakigsaad, inubanan sa Pag-ula sa Manluluwas, “makaparang ug makapaligdong” kanato. “Magkauban, kini mopatamis, mopreserbar, mobalaan, [ug] motubos,” miingon siya.

Sa usa ka kasal sa templo usa niaana ka adlaw, ang gahum sa mga pakigsaad, inubanan sa Pag-ula, nakita diha sa mga salamin sa templo. Gihunahuna niya ang mga henerasyon sa iyang pamilya nga magpadayon sa kahangturan, gikan sa pinakakaraan niyang paryente nga nahibaloan, si First Dragon Gong, nga natawo sa AD 837, tadlas sa 36 ka henerasyon ngadto sa iyang kaugalingong mga apo ug magpadayon sa duha ka direksyon.

“Nagsugod ako sa pagsabut sa akong asawa ug ako isip mga anak sa among mga ginikanan ug mga ginikanan sa among mga anak, isip mga apo sa among mga apohan ug mga apohan sa among mga apo,” miingon siya. “Ang mahinungdanong leksyon sa mortalidad hinay-hinay nga mituhop sa among mga kalag samtang kami nagkat-on ug nagtudlo sa mahangturonong mga tahas, lakip na isip anak ug ginikanan, ginikanan ug anak.”

Si Elder Gong miserbisyo isip usa ka General Authority Seventy sukad sa Abril 2010 ug isip sakop sa Kapangulohan sa Seventy sukad sa Oktubre 2015. Gipaluyohan siya isip sakop sa Korum sa Napulog Duha ka mga Apostoles niadtong Marso 31, 2018, nga iyang gihulagway isip usa ka “sagradong tawag gikan sa Ginoo nga nakasurprisa kaayo kanako.”

Gikan sa 2011 hangtud sa 2015, si Elder Gong miserbisyo isip sakop sa Asia Area Presidency, nga mitapos niana nga pagserbisyo isip Presidente sa Area.

Miserbisyo siya isip full-time nga misyonaryo sa Taiwan Taipei Mission, high councilor, high priests group leader, presidente sa Sunday School sa stake, seminary teacher, bishop, mission president sa stake, presidente sa stake, ug Area Seventy.

Nakaangkon si Elder Gong og bachelor of arts degree sa Asian Studies ug University Studies gikan sa Brigham Young University niadtong 1977. Niadtong 1979 nakadawat siya og master of philosophy degree ug niadtong 1981 usa ka doctorate sa international relations gikan sa Oxford University, diin siya usa ka Rhodes Scholar. Niadtong 1985 miserbisyo siya isip special assistant sa undersecretary of state sa U.S. State Department, ug pagka-1987 isip special assistant sa US ambassador sa Beijing, China. Sugod niadtong 1989, miserbisyo siya sa pipila ka mga posisyon sa Center for Strategic and International Studies sa Washington, D.C. Siya ang assistant sa presidente alang sa pagplano ug pag-assess diha sa Brigham Young University hangtud sa Abril 2010.

Ang mga apohan ni Elder Gong namalhin sa Estados Unidos gikan sa China. Si Elder Gong natawo sa Siyudad sa Redwood, California, USA, niadtong 1953. Naminyo siya kang Susan Lindsay niadtong Enero 1980, ug mga ginikanan sila sa upat ka anak ug adunay tulo ka apo.

“Ang tanang maayo ug mahangturon nakasentro sa buhi nga reyalidad sa Dios nga atong mahigugmaong Amahan sa Kahangturan, ug sa Iyang Anak, si Jesukristo, ug sa Iyang Pag-ula, nga gisaksihan sa Espiritu Santo,” miingon si Elder Gong niini nga komperensya. “Matinahuron akong mosaksi ug ligdong nga mopamatuod sa buhi nga Kristo—Siya . . . uban kanato sa sinugdanan, Siya magauban kanato hangtud sa katapusan.” ■





Elder Ulisses Soares

Korum sa Napulog Duha ka mga Apostoles

Ang buhi nga mga propeta, lakip ni Presidente Russell M. Nelson, maoy usa ka timaan sa gugma sa Dios alang sa Iyang mga anak, mimatuod si Elder Ulisses Soares atol sa iyang unang pakigpulong sa kinatibuk-ang komperensya isip sakop sa Korum sa Napulog Duha ka mga Apostoles.

“Dili ba panalangin man ang pagkaadunay mga propeta, mga manalagna, ug mga tigpadayag dinhi sa yuta niining mga adlawa diin kita nagpuyo, kinsa nagtinguhang mahibalo sa kabubut-on sa Ginoo ug nagsunod niini? Makahupay ang pagkahibalo nga wala kita mag-inusara sa kalibutan, bisan sa mga hagit nga atong giatubang sa kinabuhi.”

Bisan og gibati niya ang kakulang alang sa iyang tawag isip usa ka Apostol, si Elder Soares miingon, ang kang Presidente Nelson nga “mga pulong ug ang iyang malumo nga pagtan-aw kanako dihang gihatag niya kini nga responsibilidad naghatag kanako og pagbati sa gakos sa Manluluwas.”

Uban sa pagpaluyo kaniya niadtong Marso 31, 2018, si Elder Soares nahimong pinakaunang Apostol sa Simbahan nga gikan sa Latin America. Sa wala pa ang iyang tawag, usa siya ka sakop sa Kapangulohan sa Seventy sukad niadtong Enero 6, 2013, ug nagserbisyo sa usa ka espesyal nga buluhaton alang sa Presiding Bishopric sa Siyudad sa Salt Lake.

Si Elder Soares gitawag isip General Authority Seventy niadtong Abril 2, 2005. Niana nga kapasidad, miserbisyo siya isip magtatambag sa Africa Southeast ug Brazil South nga mga Area ug isip Presidente sa Brazil Area.

Si Elder Soares nakaserbisyo sa daghan pa nga mga calling sa Simbahan. Nahimo siyang usa ka full-time nga misyonaryo sa Brazil Rio de Janeiro Mission, presidente sa elders quorum, magtatambag sa bishopric, high councilor, stake executive secretary, regional welfare agent, presidente sa stake, ug presidente sa Portugal Porto Mission gikan sa 2000 hangtud sa 2003.

Usa sa iyang labing importante nga mga calling miabut sa edad nga 15, sa dihang gihangyo siya sa iyang bishop nga temporaryong motudlo og klase sa Sunday School alang sa kabatan-onan. Agig pagpangandam alang sa usa ka leksyon mahitungod sa pag-angkon og

pagpamatuod, ang batan-ong si Ulisses nakahukom nga magampo alang sa kompirmasyon sa kamatuoran sa ebanghelyo.

“Sa dihang ako miluhod ug nangutana sa Ginoo kon ang ebanghelyo tinuod,” mihinumdom siya, “dihay miabut sa akong kasingkasing nga maanindot kaayo nga pagbati, usa ka gamay nga tingog nga mimatuod kanako nga kinahanglan ko nga mopadayon niini. Kusog kaayo kini nga ako dili gayud makasulti nga ako wala masayud.”

Niadtong 1985 nakadawat siya og bachelor of arts degree sa accounting ug economics gikan sa School of Economic Science sa São Paulo Pontifical Catholic University. Human makadawat og master of business administration degree, mitrabaho siya isip usa ka accountant ug auditor alang sa multinational nga mga korporasyon sa Brazil ug isip direktor sa temporal affairs sa area office sa Simbahan sa São Paulo.

Si Ulisses Soares natawo sa São Paulo, Brazil, niadtong Oktubre 2, 1958. Naminyo siya kang Rosana Fernandes niadtong Oktubre 1982. Sa iyang pakigpulong sa kinatibuk-ang komperensya, gipasidunggan ni Elder Soares ang iyang asawa tungod sa iyang gugma ug suporta.

“Ehemplo siya sa kamaayo, gugma, ug hingpit nga debosyon sa Ginoo ug ngari kanako ug sa akong pamilya,” lakip sa tulo ka mga anak sa magtiayon ug sa tulo ka mga apo, miingon siya sa iyang pakigpulong sa komperensya. “Gimahal nako siya sa matag tipik sa akong kasingkasing, ug mapasalamaton ako sa positibo niyang impluwensya kanamo.” ■





Elder Carl B. Cook

Kapangulohan sa Seventy

Si Elder Carl B. Cook nagtuo nga ang pribilehiyo sa pagserbisyo sa maoy usa sa talagsaong mga panalangin sa pagka miyembro sa Ang Simbahan ni Jesukristo sa mga Santos sa Ulahing mga Adlaw. Apan, miangkon siya, nga ang pagdawat ug pagpalambo sa mga calling nagkinahanglan og hugot nga pagtuo.

Si Elder Cook, nga gipaluyohan isip sakop sa Kapangulohan sa Seventy niadtong Marso 31, 2018, mipahisama sa mga miyembro sa Simbahan—kinsa nanagserbisyo sa mga branch ug mga ward, mga korum, ug mga auxiliary—ngadto sa usa ka “compound gear” sa usa ka awto, nga makamugna og dugang kusog.

Ang compound gear, uban sa four-wheel drive, “magtugot kanimo sa pagkambyu ngadto sa ubos nga gear, momugna og dugang kusog, ug dayon modagan,” miingon siya diha sa kinatibuk-ang komperensya sa Oktubre 2016. “Sama sa gihiusa nga mga gear nga makahatag og dugang kusog diha sa compound gear, kita adunay dugang gahum kon magkahiusa. Kon magkahiusa kita sa pagpangalagad sa usag usa, makahimo kita og mas daghan kay sa kon kita-kita ra. Makapadasig kini nga magbuhat ug maghiusa samtang mangalagad ug motabang kita sa buhat sa Ginoo.”

Si Elder Cook gipaluyohan isip usa ka General Authority Seventy niadtong Abril 2, 2011. Sa wala pa ang iyang bag-ong assignment, si Elder Cook miserbisyo sa punoang buhatan sa Simbahan, diin mitabang siya sa pagdumala sa North America West Area, taliwala sa uban pang mga responsibilidad. Kanhi, nagserbisyo siya isip Presidente sa Africa Southeast Area.

Si Elder Cook miawhag sa mga Santos sa Ulahing mga Adlaw sa paghinumdom nga ang mga calling sa Simbahan naggikan sa Dios pinaagi sa Iyang mga gitudlo nga mga sulugoon.

“Ang mga panalangin moabut samtang kita mopadayon sa atong mga calling ug mga responsibilidad ug molahutay gamit ang atong hugot nga pagtuo.”

Si Elder Cook nakahuman og kurso sa bachelor of Arts sa Weber State College sa Utah ug usa ka masters degree sa business administration gikan sa Utah State University. Sa wala pa matawag ngadto sa Seventy, nagtrabaho siya sa komersyal nga real estate development.

Ang mga calling ni Elder Cook naglakip sa pagserbisyo isip usa ka full-time nga misyonaryo didto sa Hamburg, Germany, ug isip usa ka bishop, presidente sa stake, Area Seventy, ug presidente sa New Zealand Auckland Mission.

Natawo siya sa Ogden, Utah, USA, niadtong Oktubre 15, 1957. Naminyo siya ni Lynette Hansen niadtong Disyembre 1979. Mga ginikanan sila sa lima ka anak. ■



Elder Robert C. Gay

Kapangulohan sa Seventy

Samtang nagserbisyo isip mission president sa Ghana, usa ka adlaw si Elder Robert C. Gay nakadawat og impresyon nga mohunong ug tabangan ang batang lalaki nga naghilak. Sa sinugdanan, gibaliwala ra niya ang impresyon apan sa wala madugay nagpadala siya og miyembro sa Simbahan sa pagpangita ug sa pagdala sa bata ngadto kaniya.

Si Elder Gay, gipaluyohan isip sakop sa Kapangulohan sa Seventy niadtong Marso 31, 2018, nasayran nga ang batang lalaki namaligya og buwad alang sa iyang tig-atiman. Nianang adlaw nawala sa bata ang tanan niyang halin tungod sa buslot sa iyang bulsa.

“Kon mopauli siya nga wala ang kwarta, tawagon siya nga bakakon, labing siguro bunalan, ug dayon palayason,” miingon si Elder Gay. “Among gihupay ang iyang kahadlok, giilisan ang nawala, ug gibalik sa iyang tig-atiman.”

Sigun sa iyang gipasabut niadtong Oktubre 2012 nga kinatibuk-ang komperensya, kadto nga kasinatian nakatudlo kang Elder Gay og duha ka talagsaong kamatuoran: “Una, nasayud ko dili sama kaniadto nga ang Dios naghunahuna sa kada usa kanato, ug dili gayud mobiya kanato; ug ikaduha, nga kita kinahanglang maminaw sa tingog sa Espiritu nga naa kanato ug ‘moadto’ bisan asa kita paadtoon bisan pa sa atong kahadlok o bisan unsa nga kalisud.”

Si Elder Gay gipaluyohan isip General Authority Seventy niadtong Marso 31, 2012. Dihang gitawag siya ngadto sa Kapangulohan sa Seventy, nagserbisyo siya isip Area Seventy sa Asia North Area. Nagserbisyo siya kanhi sa headquarters sa Simbahan isip chairman sa Self-Reliance Services/Perpetual Education Fund Committee, nga may mga responsibilidad sa self-reliance services sa tibuok kalibutan.

Sa wala pa siya matawag ngadto sa Seventy, siya ang chief executive officer sa kompanya sa patigayon diin usa siya sa mga nagtukod. Usa usab siya sa nagtukod ug nagserbisyo isip direktor sa daghang humanitarian [makitawhanon] nga mga organisasyon ug nagtrabaho sa mga patigayon sa banko sa Wall Street, isip management consultant, ug isip instruktur sa economics sa Harvard University.

Si Elder Gay nakadawat og bachelors degree sa economics nga may emphasis sa statistics gikan sa University of Utah ug PhD sa business economics sa Harvard University.

Nakaserbisyo si Elder Gay isip full-time nga misyonaryo sa Spain, isip high priest group leader, Young Men president sa ward, high councilor, counselor sa bishopric, ug Area Seventy.

Natawo siya sa Los Angeles, California, USA, niadtong Septyembre 1, 1951. Naminyo siya ni Lynette Nielsen niadtong Abril 1974. Mga ginikanan sila sa pito ka anak. ■



Elder Terence M. Vinson

Kapangulohan sa Seventy

Si Elder Terence M. Vinson mituo nga ang Manluluwas dili gayud layo. “Kanunay Siya nga duol, ilabi na sa sagradong mga dapit ug sa mga panahon sa panginahanglan,” mipamatuod siya niadtong Oktubre 2013 nga kinatibuk-ang komperensya. “Usahay, nga wala gyud nako damha, mobati ko sa Iyang pagpikpik sa akong abaga aron pagpahibalo nga Iya kong gihigugma.”

Kausa, samtang sa Elder Vinson kaubang naglakaw ni Elder Jeffrey R. Holland sa Korum sa Napulog Duha ka mga Apostoles, giagbayan ni Elder Holland si Elder Vinson ug gisultihan siya nga iya siyang gihigugma. Miingon si Elder Vinson, “Nagtuong ko nga kon kita dunay kahigayunan nga maglakaw uban sa Manluluwas, kita mobati sa Iyang pag-agbay kanato sama niadto.”

Si Elder Vinson, nga gipaluyohan isip sakop sa Kapangulohan sa Seventy niadtong Marso 31, 2018, miingon nga ang gugma sa Dios “pinakatam-is nga pagbati.”

Si Elder Vinson, kinsa moasumir na sa iyang bag-o nga calling karong Agosto 1, 2018, gipaluyohan isip General Authority Seventy sa Simbahan niadtong Abril 6, 2013. Sa maong panahon, nagserbisyo siya nga sakop sa Ikawalo nga Korum sa Seventy. Nagserbisyo siya karon isip Presidente sa Africa West Area.

Nakaangkon si Elder Vinson og bachelor’s degree sa mathematics ug statistics, diploma sa edukasyon ug pagkamaestro, ug sa master’s degree sa applied finance. Ang iyang panarbaho naglakip sa pagpanudlo, pag-training, ug pag-lektur sa mga unibersidad. Ang dako gyud niyang trabaho mao ang pagka-financial adviser ug funds manager.

Samtang nagsusi sa Simbahan isip usa ka young adult, nakadawat si Elder Vinson og lig-on nga espritwal nga impresyon. Klaro niyang gibati nga kinahanglan siyang magpasakop sa Simbahan aron mouswag ug makadawat og mga tubag sa nagpabiling mga pangutana. Nabunyagan siya ug nakumpirmahan sa misunod nga semana.

Dayon sugod niana, “Nasayud ko kon unsay gustong ipabuhat sa Ginoo kanako, ug nadiskubrihan nga ang tanan nakong pangutana duna gyud diay mga tubag.”

Sukad sa iyang bunyag niadtong 1974, nakaserbisyo si Elder Vinson isip counselor sa bishopric, bishop, high counselor, counselor sa stake presidency, regional representative, counselor sa mission presidency, ordinance worker sa templo, ug Area Seventy.

Natawo siya sa Sydney, Australia, niadtong Marso 12, 1951. Naminyo siya ni Kay Anne Carden niadtong Mayo 1974. Mga ginikanan sila sa unom ka anak. ■



Elder José A. Teixeira

Kapangulohan sa Seventy

Si Elder José A. Teixeira nahinumdom og usa ka leksyon nga iyang nakat-unan isip usa ka batang lalaki sa Portugal. Panahon sa usa ka reunion sa pamilya, misibat siya aron mamasol. Gibati niya nga kinahanglan siyang mosulti sa iyang mga ginikanan kon asa siya moadto, apan nakahukom siya nga dili na lang tungod kay busy sila sa pakig-istorya.

Paglabay sa mga oras, nakit-an siya sa iyang nabalaka nga mga ginikanan sa daplin sa suba. Gikan niana nga kasinatian, nakat-on siya sa pagsunod dili lamang sa iyang mga ginikanan apan sa mga paghunghong usab sa Espiritu Santo.

Sukad niadto, nahimo na nga gawi ni Elder Teixeira ang pagpaminaw sa ligdong, hinagawhaw nga tingog. Siya ug ang iyang pamilya gipaila sa ebanghelyo niadtong 1976, human ang Portugal gibuksan sa misyonaryo nga buhat. Nabunyagan siya sa edad nga 16 ug wala madugay miserbisyo isip misyonaryo sa Lisbon Portugal Mission.

“Ang atong mga pagpili adunay dili ikalimud nga gahum sa pag-usab sa atong kinabuhi,” miingon si Elder Teixeira, nga gipaluyohan isip sakop sa Kapangulohan sa Seventy niadtong Marso 31, 2018. “Kini nga gasa usa ka talagsaong timailhan sa pagsalig diha kanato ug dungan niini ang usa ka gihambin nga personal nga responsibilidad sa paggamit sa maalamong paagi,” mitudlo siya sa Abril 2009 nga kinatibuk-ang komperensya.

Si Elder Teixeira nakaangkon og mga degree sa accounting ug business management ug mitrabaho sa Simbahan isip usa ka internasyonal nga controller. Nakaserbisyo usab siya sa Portuguese Air Force isip kabahin sa usa ka unit sa NATO. Atol niana nga panahon, gitawag siya isip national public affairs director alang sa Simbahan. Wala madugay human niana, nahimamat niya ang iyang asawa, si Maria Filomena Lopes Teles Grilo. Gikasal sila niadtong 1984 sa Bern Switzerland Temple ug ginikanan sila sa tulo ka anak.

Si José Augusto Teixeira da Silva natawo sa Vila Real, Portugal, niadtong Pebrero 24, 1961. Nakaserbisyo siya isip magtatambag sa bishopric, presidente sa district, presidente sa stake, Area Seventy, ug presidente sa Brazil São Paulo South Mission. Gipaluyohan siya isip General Authority Seventy niadtong Abril 5, 2008. Kasamtangan siyang nagserbisyo isip Presidente sa South America South Area ug magsugod sa iyang pagserbisyo sa Kapangulohan sa Seventy pagka-Agosto 1, 2018.

Labaw sa tanan, si Elder Teixeira mitambag kanato sa kinatibuk-ang komperensya sa Abril 2015 sa “[pagpalawom sa] atong panabut kabahin sa Manluluwas. . . . Dili nato ilangaylangay para ugma ang unsay atong mahimo karon. Karon mao ang panahon nga kinahanglan kitang moduol kang Kristo.” ■



Elder Carlos A. Godoy

Kapangulohan sa Seventy

Sa ulahing bahin sa mga 1980, si Elder Carlos A. Godoy bag-o lang na-release isip bishop. Siya usab migradwar sa kolehiyo, nagtrabaho sa usa ka malampuson nga kompaniya, ug nagtuo nga dili na mahimong mas maayo pa ang kinabuhi—hangtud nga misibita ang usa ka higala.

Ang higala mipahalipay kaniya apan dayon dunay gipangutana nga nakahimo niyang dili komportable: “Kon pada-yon kang magpakabuhi sama sa imong pagpakabuhi karon, matuman kaha ang mga panalangin nga gisaad diha sa imong patriyarkal nga panalangin?”

Nakaamgo si Elder Godoy nga kinahanglan niyang mohimo og mga kausaban kon gusto niyang madawat ang tanan nga gisaad kaniya nga mga panalangin. Bisan pa sa iyang pagkakontento, nakahukom siya nga mokuha og master’s degree. Miundang siya sa iyang trabaho, gibaligya ang tanan niyang gipanag-iya, ug, uban sa iyang pamilya, mibiya sa kapamilyar sa Brazil aron moeskwela sa Estados Unidos.

Si Elder Godoy, gitawag ngadto sa Kapangulohan sa Seventy niadtong Marso 31, 2018, misulti nga kini nga kasinatian mitudlo kaniya og daghan mahitungod sa pagsalig sa plano sa Ginoo ug sa kaandam sa pagbuhat sa mga butang nga dili komportable kaniya.

“Nasayud ako nga ang Ginoo adunay plano kanato niing kinabuhia,” mipamatuod siya niadtong Oktubre 2014 nga kinatibuk-ang komperensya. “Nakaila siya kanato. Nahibalo siya unsay pinakamaayo kanato. Tungod kay hapsay ra ang mga butang wala kana magpasabut nga dili na lang kita maghunahuna nga basin duna pay butang nga mas maayo.”

Si Elder Godoy gipaluyohan isip General Authority Seventy niadtong Abril 5, 2008. Kasamtangan siyang nagserbisyo isip Presidente sa South America Northwest Area ug mosugod sa iyang tawag diha sa Kapangulohan sa Seventy pagka-Agosto 1, 2018.

Sa wala pa ang iyang tawag ngadto sa Seventy, si Elder Godoy nagtrabaho isip human resources manager sa duha ka dagkong korporasyon sa wala pa sugdi ang iyang kaugalingong consulting company. Nakadawat siya og bachelor’s degree sa economics ug political science gikan sa São Paulo Pontifical Catholic University niadtong 1987 ug master’s degree sa organizational behavior gikan sa Brigham Young University niadtong 1994.

Si Elder Godoy nakaserbisyo isip full-time nga misyonaryo sa Brazil São Paulo South Mission, bishop, high counselor, regional welfare agent, Area Seventy, ug presidente sa Brazil Belém Mission.

Natawo siya sa Porto Alegre, Brazil, niadtong Pebrero 4, 1961. Naminyo siya kang Mônica Soares Brandao niadtong Marso 1984, ug aduna silay upat ka anak. ■



Elder Steven R. Bangerter

General Authority Seventy

Atol sa usa ka camping trip sa bata pa, si Elder Steven R. Bangerter ug iyang pamilya nanakay og mga dirt bike paingon sa ibabaw sa bukid. Sa ilang pagpanganaog, nasaag siya ug nahibulag sa uban.

Samtang miluhod siya nianang hapon ug nangamuyo og tabang sa iyang Amahan sa Langit, nakita niya sa iyang hunahuna ang agianan diin siya nasaag. Sa dihang misugod na siya sa pagdulhog, “ang akong igsoong lalaki naabut sa tumoy sa agianan diha sa iyang motorsiklo, migakos nako, ug migiya nako sa pagbalik diha sa kangitngit ngadto sa kampo, nga pila ka oras ang gilay-on.”

Ang panghitabo usa lang sa daghan nga nakapahimo niya nga mobati nga gihigugma atol sa iyang pagkabata. “Wala gayuy higayon sa akong kinabuhi nga naghunahuna ko kon gihigugma ba ko o giamumahan,” miingon si Elder Bangerter.

Si Elder Bangerter natawo sa Siyudad sa Salt Lake, Utah, ngadto ni Max E. ug Thelma R Bangerter niadtong Hulyo 29, 1961. Nagdako siya sa Granger, Utah.

Sulod sa mga semana nga nauli gikan sa pagserbisyo sa Canada Vancouver Mission, si Elder Bangerter nakaila ni Susann Alexis Hughes. Sa ilang unang panag-date, nakabantay siya sa mapaubsanon nga tinguha sa pagserbisyo ni Susann nga nakaaghat kaniya sa pag-propose ngadto kaniya sa ikaduhang panagdate. Na-seal sila sa Templo sa Salt Lake niadtong Marso 17, 1983. Mga ginikanan sila sa unom ka anak nga mga lalaki.

Si Elder Bangerter nakahuman og kurso sa bachelor of arts gikan sa Arizona State University sa relihiyoso nga mga pagtuon ug usa ka degree sa juris doctor gikan sa Western State University College of Law. Sulod sa milabay nga 25 ka tuig, si Elder Bangerter mipresentar sa mga simbahan ug sa faith-based nga mga organisasyon sa pagpraktis og balaod didto sa Southern California ug sa southern Utah. Usa siya ka kanhi kauban sa Cooksey, Toolen, Gage, Duffy, ug Woog gikan sa 1993 hangtud 2003 ug nahimong tigdumalang kauban sa Bangerter, Frazier, ug Graff niadtong 2004.

Si Elder Bangerter nakaserbisyo isip usa ka Area Seventy, presidente sa stake, counselor sa stake presidency, bishop, presidente sa elders korum, ug presidente sa Young Men sa ward. ■



Elder Matthew L. Carpenter

General Authority Seventy

Nahinumduman ni Elder Matthew L. Carpenter ang unang higayon nga mibati siya sa Espiritu Santo. Bata pa siya niadto, mga pito ang pangidaron, anaa sa junior Primary. May kahayag nga misulod sa kwarto, ug may gibati siyang kainit nga wala niya mahibaloi kaniadto.

“Akong gibati ang emosyon sa akong kasingkasing—dili tungod kay miinit ako,” miingon siya. “Nahibalo ko nga ang Dios tinuod, gibati ko kini.”

Dihang nag-onse anyos siya, mitambong siya og sesyon sa kinatibuk-ang komperensya sa Salt Lake Tabernacle kuyog sa iyang papa. Unang higayon kadto nga siya anaa sa sama nga lawak sa propeta, si Presidente Joseph Fielding Smith.

“Dihang nakakita ko niya,” miingon siya, “ang Espiritu misaksi kanako nga siya ang propeta.”

Kining yano nga espirital nga mga kumpirmasyon sa linghod nga pangidaron nakatabang niya nga makasalig siya sa Espiritu isip usa ka giya nga impluwensya sa tibuok niyang kinabuhi.

“Ang akong pagpamatuod dili kay gipakitaan lang og ang-hel,” miingon ang General Authority Seventy, kinsa gipaluyohan niadtong Marso 31, 2018, “apan milambo kini ug mitubo paglabay sa panahon.”

Natawo si Matthew Leslie Carpenter sa Salt Lake City, Utah, USA, niadtong Oktubre 21, 1959, kang Leone Ereksion ug Robert Allred Carpenter. Kinamanghuran siya sa magtiayon nga may walo ka anak, ug nagtubo siya sa panimalay nga may lima ka magulang nga igsoong babaye.

Sa katapusan niyang bulan sa high school, nahimamat niya si Michelle “Shelly” Brown. Nagsugod sila nga mag-date apan gihunong ang ilang paghinalaray sa gugma samtang nagserbisyo siya sa Swiss Geneva Mission sukad 1979 hangtud 1981. Sa iyang pag-uli, nagminyo ang magtiayon sa Salt Lake Temple niadtong Hulyo 9, 1982. Mga ginikanan sila sa lima ka anak.

Nakaangkon si Elder Carpenter og bachelor’s degree sa finance gikan sa Brigham Young University ug degree sa master of business administration gikan sa Harvard Business School. Bag-ohay lang siya ang managing direktor sa Foundation Specialty Financing Fund.

Nakaserbisyo si Elder Carpenter isip bishop, counselor sa bishopric, presidente sa Young Men sa stake, high councilor, stake president, ug Area Seventy. ■



Elder Jack N. Gerard

General Authority Seventy

Sa bata pa, momata si Elder Jack N. Gerard kada adlaw og alas 5:00 sa buntag aron motabang sa pag-atiman sa gipanag-iya sa pamilya nga gatasan sa baka. Ang pagdako sa gamayng umahan sa komunidad duol sa Mud Lake, Idaho, USA, nagtudlo kaniya dili lang sa pagkugi og trabaho ug pagkahimong responsable apan sa pag-ila usab sa bili sa tanang indibidwal isip mga anak sa Dios.

“Ang tanan adunay buluhaton ug ang tanan ania dinhi sa usa ka katuyoan, bisan unsay kahimtang o kainila sa kinabuhi,” miingon si Gerard, kinsa gipaluyohan niadtong Marso 31, 2018, isip General Authority Seventy. Kana nga leksyon usa ka gasa sa tibuok niyang kinabuhi.

Ang iyang panarbaho, nga naglakip sa prominenting mga buluhaton sa pagpangulo alang sa daghang institusyon—sama sa National Mining Association, sa America Chemistry Council, ug sa bag-o lang, sa American Petroleum Institute—naghatag kaniya sa mga oportunidad nga ikauban ang mga tawo gikan sa tanang matang sa kinabuhi.

Si Elder Gerard natawo niadtong 1957 kang James ug Cecil Gasser Gerard. Human makaserbisyo sa Sydney Australia Mission, mieskwela si Elder Gerard sa University of Idaho, diin nadawat niya ang internship ug dayon full-time nga posisyon sa pagkakawani sa usa ka congressman sa Idaho.

Samtang nagtrabaho sa Washington, D.C., nakatagbo niya si Claudette Neff, nga nagtrabaho isip staff assistant sa usa ka senador sa Utah. “Misanag kaniya ang kahayag sa ebanghelyo,” miingon si Elder Gerard sa ilang panagtagbo. Naminyo silang duha niadtong Abril 4, 1984, sa Salt Lake Temple. Duna silay walo ka anak ug upat ka apo.

Nakadawat si Elder Gerard og bachelor of arts degree sa political science ug juris doctor degree gikan sa George Washington University.

Nakaserbisyo si Elder Gerard sa pagka-bishop, stake president, Area Seventy, magtutudlo sa Doktrina sa Ebanghelyo, ug presidente sa Sunday School.

Miingon si Elder Gerard nga siya ug ang iyang asawa parehas og tinguha nga mobuhat sa kabubut-on sa Ginoo. “Isip mga huyang nga mortal, mapasaligon kami sa bisan unsay ipabuhat kanamo sa Ginoo, ug nagdala kini kanamo sa pagpaubos ug sa dungog . . . nga among mapahinungod ang among panahon ug paningkamot sa buhat sa Ginoo.” ■



Elder Mathias Held

General Authority Seventy

Si Elder Mathias Held ug ang iyang asawa, si Irene, tukma nga matawag nga mga ehemplo sa pangtibuok kalibutan nga Simbahan. Silang duha mga taga-Colombia nga adunay German nga kaliwat. Ang mga trabaho ug pag-eskwela mikuha kanila gikan sa ilang South American nga yutang natawhan ngadto sa Canada, Germany, Guatemala, Brazil, ug, sa katapusan, balik sa Colombia. Sa matag nasud, mi-adjust sila sa bag-ong mga pinulongan ug kultura.

“Apan ang Simbahan pareha ra gayud gihapon bisan asa kita moadto,” miingon si Elder Held, kinsa gipaluyohan isip General Authority Seventy niadtong Marso 31, 2018.

Kana nga espirital nga “pagkapareha” mihatag og lig-ong pundasyon sa magtiayon samtang nagpadako sila sa tulo ka mga anak ug milambo diha sa ebanghelyo.

Ang mga Held klasmeyt sa dihang mga bata pa sa usa ka eskwelahan nga German og pinulongan sa ilang yutang natawhan sa Bogotá, Colombia. Na-seal sila niadtong Hunyo 13, 1989, sa Frankfurt Germany Temple, human si Mathias nakaangkon og degree sa mechanical engineering sa Bogotá ug master's degree sa business administration sa Canada.

Ang mga oportunidad sa panarbaho wala madugay midala sa batan-ong magtiayon ngadto sa Hanover, Germany, diin si Sister Held nakadawat og kusganong pagbati nga adunay mahitabong kausaban sa ilang kinabuhi.

“Gisultihan nako si Mathias nga gibati nako nga makadawat kami og mensahe gikan sa langit,” miingon siya. Kana nga langitnong mensahe miabut usa ka ulanon nga hapon sa 1987 uban sa pagpanuktok diha sa atubangang pultahan. Nagbarug sa gawas mao ang Mormon nga mga misyonaryo nga namulong og German nga adunay Amerikano nga tonada.

Sa misunod nga 10 ka bulan, ang mga Held nagtuon uban sa mga misyonaryo ug nakahimo og mga higala diha sa lokal nga kongregasyon sa LDS. Human sa daghang pag-ampo, nakadawat sila og espirital nga komfirmasyon sa kamatuoran sa ebanghelyo ug nabunyagan niadtong 1988.

Si Elder Held mitrabaho og sobra sa 25 ka tuig diha sa tighimo og sakyanan nga Daimler-Benz, diin ang iyang pangdumala nga katungdanan midala kaniya libut sa tibuok kalibutan. Ang mga Held misalig sa Ginoo sa matag dapit nga ilang napuy-an.

“Dili igsapayan kon unsa nga mga pagsulay ang inyong nasinati,” miingon siya. “Kon makigsulti kamo sa langit, ma-okey ra mo.”

Natawo niadtong Hunyo 5, 1960, ngadto nilang Miguel ug Elisabeth Held, si Elder Held nakaserbisyo isip magtatambag sa kapangulohan sa stake, magtatambag sa bishopric, ug Area Seventy sa South America Northwest Area. ■



Elder David P. Homer

General Authority Seventy

Usa sa labing unang mga panumduman ni Elder David P. Homer kalabut sa ebanghelyo mao ang pagka-assign sa edad nga 14 isip usa ka kauban sa home teaching sa usa ka miyembro sa iyang ward “kinsa migamit og usa ka talagsaong paagi sa home teaching,” miingon si Elder Homer. “Dili kadto mahitungod sa pagbisita og balay ug mga tawo; mahitungod kadto sa pagpangalagad sa ilang mga panginahanglan.”

Isip managkompanyon, nag-ampo sila ug maghisgut sa mga pamilya nga gi-assign ngadto nila, dili isip mga ham-tong ngadto sa usa ka batan-on apan isip mga higala diha sa pagserbisyo sa priesthood. “Nakat-on ko nga ang Espiritu moabut ug ang mao inubanan sa pagserbisyo,” miingon si Elder Homer.

Kana nga leksyon nagpabilin kaniya sa tibuok niyang kinabuhi ug sa misunod nga mga pagserbisyo sa Simbahan, mahimong sa pagserbisyo isip usa ka Area Seventy, lider sa nursery, o tig-asikaso sa bulletin Board—usa ka calling nga ilang gituman samtang siya ug ang iyang asawa nagpuyo sa Melbourne, Australia.

Si David Paul Homer natawo niadtong Abril 25, 1961, didto sa Salt Lake City, Utah, USA, nilang Frederick ug Phyllis LeNila Homer. Human sa iyang misyon sa Hong Kong gikan sa 1980 hangtud 1982, naka-ila niya si Nancy Dransfield, usa ka graduate sa Brigham Young University, sa usa ka fireside sa institute didto sa Siyudad sa Salt Lake, diin nagtrabaho siya ug nag-eskwela sa University of Utah. Nagminyo sila didto sa Salt Lake Temple niadtong Hulyo 31, 1984. Gipadako nila ang lima ka mga anak nga mga babaye ug usa ka anak nga lalaki.

Si Elder Homer nakahuman og kurso nga bachelor sa economics sa University of Utah ug usa ka kurso nga master sa business administration gikan sa Wharton School sa University of Pennsylvania.

Atol sa iyang 30-ka tuig nga pagtrabaho isip usa ka executive sa General Mills, siya ug ang iyang asawa mipuyo sa Miami, Florida, USA; Minneapolis, Minnesota, USA; Burlington, Ontario, Canada; ug Saint-Sulpice, Vaud, Switzerland.

Si Elder Homer nakaserbisyo isip presidente sa stake, bishop, presidente sa elders korum, ug executive secretary sa ward. Isip usa ka Area Seventy gisugdan niya ang iyang pagserbisyo sa Canada ug gipadayon kini sa Europe, diin nagserbisyo siya sa milabayng upat ka tuig sa wala pa gipaluyohan isip usa ka Kinatibuk-ang Authority Seventy niadtong Marso 31, 2018. ■



Elder Kyle S. McKay

General Authority Seventy

Gawas sa iyang pamilya ug sa Simbahan, ang pinakagana-
han kaayo ni Elder Kyle S. McKay mao ang pagsakay sa
iyang kabayo ngadto sa kabungturan.

“Dili kini maoy akong relihiyon,” miingon siya, “apan
walay pagduha-duha nakapalig-on kini sa akong [pagtuol].
Akong puli-pulihon ang Ginoo ug ang kabungturan ug ang
kabungturan ngadto sa balay sa Ginoo. Makigkita Siya kanako
nianang mga dapita.”

Gipahisama ni Elder McKay ang kabungturan ibabaw sa
Huntsville, Utah, USA, ngadto sa katubigan ug sa kakahoyan
sa Mormon ug ang ilang kaimportante alang sa katawhan ni
Alma—kining mga dapita, sa iyang kabatan-on, iyang naang-
kon ang kahibalo bahin sa iyang Manunubos.

Natawo si Elder McKay niadtong Pebrero 14, 1960, sa
Chicago, Illinois, USA, kang Barrie Gunn McKay ug Elaine
Stirland McKay, kinsa iyang gipasidunggan tungod sa paghul-
ma kaniya nga mahimong tawo kinsa mao siya karon.

Mihunong una siya sa pag-eskwela sa Brigham Young
University niadtong 1979 aron makaserbisyo og full-time nga
misyon sa Kobe, Japan. Sa wala madugay human nauli gikan
sa iyang misyon aron humanon ang iyang degree sa English,
nahimamat ni Elder McKay si Jennifer Stone, kinsa bag-ohay
lang usab nga nauli gikan sa England Bristol Mission. Nag-
eskwela usab siya og English. Nagminyo silang duha sa tem-
plo sa Oakland California niadtong Hunyo 12, 1984.

Nga ang pamilya maoy sentro sa iyang kinabuhi, miingon
si Elder McKay, siya ug si Sister McKay nakakuha sa kinadak-
an nilang kalipay gikan sa ilang mga kaliwatan. Samtang ang
mga McKay nagpuyo sa Kaysville, Utah, USA, kanunay silang
mogahin og panahon kauban sa ilang siyam ka anak sa Hunt-
sville, diin ang iyang mga katigulangan nagpuyo sa sayo nga
bahin sa mga 1860.

Nakagradwar si Elder McKay nga may juris doctor degree
niadtong 1987 gikan sa J. Reuben Clark School of Law sa
BYU ug midawat dayon og trabaho sa dako nga kompanya sa
regional law sa Portland, Oregon, USA. Wala madugay mibalik
siya sa Utah aron ipadayon ang oportunidad sa lain nga kom-
panya sa pamalaod sa wala pa modawat sa posisyon sa Kroger
Company. Nagtrabaho siya isip vice president sa Smith ug Fry,
duha ka dibisyon sa Kroger sa Utah ug Arizona, USA, sugod
2000 hangtud 2017.

Si Elder McKay nakaserbisyo kanhi isip bishop, high coun-
cilor, stake president, ug Area Seventy. ■



Elder Juan Pablo Villar

General Authority Seventy

Ang pasiunang kasayuran ni Elder Juan Pablo Villar mahi-
tungod sa Simbahan nahitabo sa Santiago, Chile, dihang
ang kamaguwangan niyang igsoon nga si Ivan, mipahibalo sa
pamilya nga nabunyagan siya nga walay pag-aprubar sa iyang
mga ginikanan ug sa wala madugay miingon nga nagplano
siyang magmisyon. Dihang gipangutana kon ngano, gipaambit
ni Ivan ang iyang pagpamatuod ug ang tinguhang moserbisyo.

“Wala ko makasabut sa tanang kahulugan niadtong,” maoy
nahinumduman ni Elder Villar, nga kaniadtong 17 ang edad.
“Apan niadtong higayuna, nagtisok siya og binhi sa akong
kasingkasing.”

Kadto nga liso nahatagan og kahigayunan nga motubo
dihang gi-refer siya sa iyang igsoon ngadto sa mga misyonar-
yo. Atol sa una niyang leksyon, nadawat ni Elder Villar ang
kaugalingon niyang pagpamatuod sa katinuod sa Basahon ni
Mormon.

“Alang sa akong kaugalingon, wala na kinahanglana ang
pagluhod ug pag-ampo, kay dihang gipaambit nila ang ilang
pagpamatuod, nasayud ako sa akong kasingkasing nga tinuod
kini,” miingon siya. “Dihang kadto akong nahibaloan, pwes
ang tanan pang uban tinuod.”

Si Ivan, nagserbisyo sa silingan nga misyon, nakadawat siya
og permisyon nga mobunyag ni Elder Villar niadtong 1988. Sa
wala madugay, ang ilang mama ug ang laing igsoon nga lalaki,
si Claudio, mipasakop usab sa Simbahan.

Paglabay sa usa ka tuig human sa iyang bunyag, nag-
sugod si Elder Villar sa pagserbisyo sa Chile Viña del Mar
Mission, sinugdanan sa kinabuhi nga pagserbisyo nga nag-
lakip sa pagserbisyo isip stake president, bishop, counselor
sa bishopric, counselor sa Chile Santiago East Mission, ug
Area Seventy sa South America South Area. Gipaluyohan siya
niadtong Marso 31, 2018, isip General Authority Seventy.

Si Elder Villar natawo niadtong Septyembre 11, 1969,
sa Valparaiso, Chile, kang Sergio Villar Vera ug Genoveva
Saaverdra. Naminyo siya ni Carola Cristina Barrios niadtong
Marso 31, 1994, sa Santiago Chile Temple. Mga ginikanan sila
sa tulo ka anak.

Human makaangkon og bachelors degree sa social
communications ug public relations ug sa master's degree sa
marketing, mitrabaho siya sa industriya sa pharmaceutical ug
medical devices. Niadtong 2007 nagdugang siya og master's
degree sa business administration gikan sa Brigham Young
University. Dayon mibalik siya sa Chile aron sa pagtrabaho
sa Orica, usa ka service company sa pagmina, pinakalabing
bag-o isip usa ka senior manager. ■



Elder Takashi Wada

General Authority Seventy

Sa usa ka bugnaw nga adlaw sa Nobyembre, ang pangutana gikan sa usa ka Amerikano nga misyonaryo nga nangayo og direksyon ngadto sa lokal nga post office nakapakurat ni Takashi Wada.

Gipasidan-an sa iyang amahan ang 15 anyos nga likayan ang mga Mormon, nga nakig-istorya sa mga tawo diha sa kadalanan sa Nagano, Japan, nga mga tres minutos lang gikan sa ilang panimalay. Apan nakadayeg si Takashi sa Hinapon sa Amerikanong elder.

Paglabay sa pipila ka adlaw, laing misyonaryo ang mipahunong ni Takashi. Bag-o pa lang siya sa Japan. Sa putol-putol nga Hinapon, naningkamot siya sa pagpaambit sa istorya ni Joseph Smith.

Wala makasabut si Takashi sa tanan, “apan gibati nako nga kinahanglan kong maminaw,” mihinumdom siya.

Gitudloan siya sa mga misyonaryo sa mga lakang sa pagampo ug sa mga leksyon. Mitambong siya sa mga miting sa Simbahan ug natandog sa mga pagpamatuod sa lokal nga mga miyembro. Mibati nga napugngan sa mga gilauman sa iyang pamilya nga Buddhist, si Takashi kanunay nga misulti sa mga misyonaryo, “Dili ko makaapil sa Simbahan, apan gusto kong makakat-on pa.”

Paglabay sa duha ka tuig, sa wala pa mobiya si Takashi aron moeskwela sa Estados Unidos sa edad nga 17, ang iyang mga ginikanan miuyon, ug nagpamiyembro siya sa Simbahan.

Si Elder Wada, kinsa natawo sa Pebrero 5, 1965, ngadto nilang Kenzo ug Kazuko Wada, nakadawat og bachelor of arts degree sa linguistics niadtong 1990 ug master’s degree sa business administration niadtong 1996, parehong gikan sa Brigham Young University.

Miserbisyo siya og misyon sa Utah Salt Lake City North Mission ug naminyo kang Naomi Ueno niadtong Hunyo 18, 1994, sa Tokyo Japan Temple. Ang magtiayon adunay duha ka anak nga lalaki.

Ang pagpanarbaho ni Elder Wada naglakip og daghang mga posisyon sa multinational nga mga corporation sa Estados Unidos ug sa Japan, ingon man sa posisyon nga director for temporal affairs sa Simbahan sa North America West, North America Northwest, ug Asia North nga mga Area.

Si Elder Wada usa ka kanhi bishop, high councilor, ug magtutudlo sa seminary. Miserbisyo siya isip presidente sa Japan Tokyo South Mission gikan sa 2013 hangtud sa 2016. Gipaluyohan siya isip General Authority Seventy niadtong Marso 31, 2018. ■



Bonnie H. Cordon

Kinatibuk-ang Presidente sa Young Women

Ang gipangga kaayo nga kasulatan ni Sister Bonnie H. Cordon makita sa Doktrina ug mga Pakigsaad 123:17: “Kita magmalipayon sa pagbuhat sa tanan nga mga butang nga ubos sa atong gahum; ug unya kita magmalinawon, uban ang labing dako nga kasiguroan, nga makasaksi sa kaluwasan sa Dios, ug sa iyang mga bukton nga ipadayag.”

Alang niya kini nga bersikulo naghulagway og mga leksyon nga iyang nakat-unan sa tibuok niyang kinabuhi. “Makahimo kita og lisud nga mga butang, apan mahimo usab nato kini diha sa kalipay,” miingon si Sister Cordon, kinsa gipaluyohan niadtong Marso 31, 2018, isip ang bag-ong Kinatibuk-ang Pangulo sa Young Women.

Kana nga kahibalo anam-anam niyang nakat-unan diha kaniya atol sa “maayo kaayo nga kahimtang sa bata pa” nagtrabaho sa gamay nga umahan didto sa habagatang-silangan sa Idaho ug dayon samtang siya nanglimbasug sa pagkat-on og bag-ong pinulongan isip misyonaryo didto sa Portugal. Usa usab kadto ka mensahe nga kanunay niyang gibalik-balik samtang nagserbisyo siya uban sa iyang bana samtang nagdumala siya sa Brazil Curitiba Mission. Ug mao kini ang iyang plano nga ipaambit karon sa mga young women sa tibuok kalilbutan.

Ang mga young women karon, miingon siya, gihangyo sa paglambo, ug palihokon ang buhat sa Ginoo nga magpada-yon. “Ug nga makahimo kita niini,” dugang pa niya.

Si Bonnie Hillam Cordon natawo niadtong Marso 11, 1964, ngadto nilang Harold ug Carol Rasmussen Hillam sa Idaho Falls, Idaho, USA. Human sa iyang misyon nahuman niya ang kurso sa bachelor of education sa Brigham Young University, diin nakaila niya si Derek Lane Cordon. Naminyo sila niadtong Abril 25, 1986, sa Salt Lake Temple. Sila dunay upat ka anak ug siyam ka apo nga mga lalaki.

Ang iyang tibuok kinabuhi nga pagserbisyo sa Simbahan naglakip sa panahon isip usa ka lider sa nursery ug magtutudlo sa seminary. Sa wala pa ang iyang tawag duha ka tuig ang milabay sa pagserbisyo isip magtatambag diha sa Kinatibuk-ang Kapangulohan sa Primary, si Sister Cordon ganahan nga nagserbisyo isip usa ka presidente sa Young Women sa stake. Bisan og gi-release na gikan niana nga calling, “Wala gayud ko mihunong sa pagampo alang sa mga batan-ong mga babaye,” miingon siya.

Ang mensahe nga matinguhaon kaayo siyang mopaambit sa young women sa tibuok kalibutan mao nga siya nahigugma kanila ug, labaw sa tanan, nga ang Dios nahigugma kanila. ■



Michelle D. Craig

Unang Magtatambag, sa Kinatibuk-ang Kapangulohan sa Young Women

Sa dihang 16 anyos pa, si Sister Michelle D. Craig nakahibalo nga ang iyang pamilya mobalhin gikan sa Provo, Utah, USA, ngadto sa Harrisburg, Pennsylvania, USA, aron makasugod na ang iyang amahan sa usa ka tahas sa pagserbisyo isip usa ka presidente sa mission.

Malipayon siya nga makauban sa iyang pamilya, apan ang pagbalhin “gibati og pag-inusara” atol sa iyang mga tuig sa junior ug senior high school.

“Mao gayud kadto ang mga tuig nga makaimpluwensya,” miingon si Sister Craig. “Imbis magsalig sa mga higala, misalig ko sa akong pamilya ug sa akong pagpamatuod, ug ang simbahan ang nahimong nakahatag og tabang.” Iyang gihaturan og bili ang iyang relasyon sa Langitnong Amahan ug sa Manluluwas.

Si Michelle Daines Craig natawo niadtong Hulyo 13, 1963, sa Provo, Utah, ug ang kinamagulangan sa pito ka mga anak nga natawo ngadto nilang Janet Lundgren ug Robert Henry Daines III. Nagpuyo siya sa Provo hangtud ang iyang pamilya mibalhin ngadto sa Pennsylvania. Paglabay sa duha ka tuig, si Sister Craig mibalik ngadto sa Provo aron moeskwela sa Brigham Young University, diin nadawat niya ang bachelor’s degree sa edukasyon sa elementarya. Niadtong 1984 midawat siya og tawag sa pagserbisyo sa Dominican Republic sa Santo Domingo Mission.

“Ako sa kanunay usa gayud ka tumutuo,” miingon si Sister Craig, kinsa gipaluyohan isip ang Unang Magtatambag diha sa Kinatibuk-ang Kapangulohan sa Young Women niadtong Marso 31, 2018. “Sukad pa sa kabatan-on, nakahibalo ko nga ako anak sa Dios. Apan nakahinumdom ko [sa akong misyon] nga sa matag higayon nga mopamatuod ko ni Propeta Joseph Smith, mabati nako ang Espiritu. Aduna koy maanindot nga kumpirmasyon nga nakapalig-on sa akong pagpamatuod.”

Pila lang gyud ka adlaw human sa iyang pag-uli, ang igsoong lalaki ni Sister Craig misulti kaniya nga kinahanglan siyang makig-date ni Boyd Craig, usa ka higala gikan sa iyang misyon. Paglabay sa walo ka bulan ang duha nahimo nang sinayuran. Naminyo sila niadtong Disyembre 19, 1986, didto sa Templo sa Salt Lake. Mga ginikanan sila sa tulo ka mga anak, ug sila adunay unom ka mga apo.

Nakaserbisyo siya sa daghang mga calling, lakip sa pagka temple ordinance worker didto sa Templo sa Provo Utah. ug isip magtutudlo sa Doktrina sa Ebanghelyo. Sa dihang natawag siya ngadto sa Kinatibuk-ang Kapangulohan sa Young Women, nagserbisyo siya diha sa general board sa Primary. ■



Becky Craven

Ikaduhang Magtatambag, Kinatibuk-ang Kapangulohan sa Young Women

Dunay panultihon nga kanunayng ipaambit ni Sister Becky Craven isip usa ka misyonaryo: “Kon makaila ka kon si kinsa ikaw, lahi ang imong linihukan.”

“Ug mao kana sa tanang aspeto—gikan sa imong sininaan, sa imong sinultihan, sa imong pagpresentar sa imong kaugalingon, ug sa mga kalihokan nga imong apilan,” miingon si Sister Craven, kinsa nagserbisyo kauban sa iyang bana, nga si Ronald L. Craven, dihang nangulo siya sa North Carolina Charlotte Mission sugod 2012 hangtud 2015.

Gipaluyohan si Sister Craven isip Ikaduhang Magtatambag sa Kinatibuk-ang Kapangulohan sa Young Women niadtong Marso 31, 2018. “Kon ang batan-ong mga babaye magsugod sa pagkakita sa ilang kaugalingon diha sa plano sa Dios, makakita sila og panan-awon sa ilang kaugalingon,” miingon siya. “Kinahanglan nga aduna kay panan-awon. Kon ikaw walay panan-awon, dili ka mahibalo asa ka moadto ug dili ka mahibalo unsay buhaton aron moabut didto.”

Si Rebecca Lynn Craven natawo niadtong Oktubre 26, 1959, sa Chardon, Ohio, USA, kang Corless Walter Mitchell ug Linda Louise Kazsuk Mitchell. Mapasigarbuhong motawag sa iyang kaugalingon nga “anak sa sundalo,” nagtubo siya sa Texas, USA, diin mipasakop sa Simbahan ang iyang pamilya; didto sa Germany, diin niining panahona ang iyang pamilya na-seal sa Templo sa Swiss; sa England; sa Utah, USA, diin didto siya nabunyagan atol sa unang pag-tour sa iyang papa sa Vietnam; ug sa U.S. sa mga estado sa Maryland, Kentucky, Missouri ug Kansas.

Naminyo niadtong Agosto 5, 1980 sa Salt Lake Temple, ang mga Cravens ginikanan sa lima ka anak.

Sa wala pa mapaluyuhi sa bag-o niyang calling, nagserbisyo siya isip counselor sa presidency sa ward Relief Society ug isip ordinance worker sa Bountiful Utah Temple. Nakaserbisyo usab siya isip Young Women president sa ward, board member sa Relief Society, stake missionary, ug Webelos leader.

Nakaangkon si Sister Craven og bachelor’s degree sa interior design gikan sa Brigham Young University, diin nakaserbisyo siya sa athletic advisory committee. Nakaserbisyo usab siya isip sakop sa executive board sa CHOICE Humanitarian, usa ka internasyonal nga charitable nga organisasyon nga nakabase sa Utah.

Malingaw siya sa pag-hiking, sa mga water sport, snowshoeing, pagbiyahe, pag-painting, pag-quilt [paghimo’g mga habol], ug mga dula ug mga kalihokan uban sa iyang pamilya. ■



Lisa L. Harkness

Unang Magtatambag, Kinatibuk-ang Kapangulohan sa Primary

Si Lisa L. Harkness kanunay nga adunay gugma sa pagkat-on ug sa kalibutan nga naglibut kaniya, usa ka butang nga iyang nakuha gikan sa iyang mga ginikanan. Nagtuon siya og political science ug gani nakakat-on unsaon sa pagdumala og mga reptile [magkamang nga mga mananap] samtang nagtrabaho sa Monte L. Bean Life Science Museum atol sa iyang panahon sa Brigham Young University—lakip sa mga bitin.

“Motuo ka o dili, aduna silay mga personalidad,” miingon siya. “Adunay usa nga nakaila nako matag higayon nga kuptan nako siya.” Si Howard, ang pula og ikog nga boa constrictor, mokamang pataas sa iyang (Sister Harkness) abaga, molikus sa iyang liog, ug mopahulay sa ulo niini diha sa iyang ulo samtang magtudlo siya sa mga grupo nga moanha sa museyo.

Karon, makapunit ug makaila gihapon siya sa lain-laing mga bitin—basta dili lang kini mositsit kaniya.

Si Sister Harkness natawo sa Los Angeles, California, USA, ngadto nilang Ronald ug LaRae Long niadtong Enero 13, 1965. Ang kinamagulangan sa lima ka anak, siya ug ang iyang pamilya “kanunay nga ganahan og mga panimpalad, maanaa sa gawas, ug mosusi sa kalibutan.” Miingon siya nga tungod kay kanunay siyang makapangutana sa iyang mga ginikanan, “hingpit akong nagtuo ug misalig nga makadangup ko sa Langitnong Amahan ug makakuha og mga tubag.”

Human makaserbisyo og Kinatsila og sinultihan nga misyon sa Louisiana Baton Rouge Mission, si Sister Harkness migradwar gikan sa BYU nga dunay bachelor of science degree sa political science ug secondary teaching. Naminyo siya kang David S. Harkness niadtong Abril 22, 1988, sa Salt Lake Temple. Aduna silay lima ka anak ug duha ka apo.

Si Sister Harkness—kinsa gitawag isip Unang Magtatambag sa Kinatibuk-ang Kapangulohan sa Primary niadtong Marso 31, 2018—nakaserbisyo usab isip general board member sa Primary, presidente sa Young Women sa stake, presidente sa Relief Society sa ward, magtatambag sa kapangulohan sa Young Women sa ward, Mia Maid adviser, camp director sa Young Women, director sa family history sa stake, consultant sa family history sa ward, ug magtutudlo sa Doktrina sa Ebanghelyo.

Nakabolutaryo usab siya sa iyang lokal nga parent-teacher association, diha sa konseho sa komunidad, sa Utah Symphony, ug sa Timpanogos Storytelling Festival, ingon man usab sa iyang lokal nga pangagamhanan sa nagkalainlaing mga katungdanan. ■



Paghatag og Gibug-aton sa Pagpangalagad

Ang home teaching ug visiting teaching hunungon na, si Presidente Russell M. Nelson mipahibalo atol sa sesyon sa Dominggo sa hapon sa kinatibuk-ang komperensya. Ang “Pagpangalagad,” usa ka “bag-o, mas balaan nga paagi” ngadto sa Kristohanong pag-alima alang sa uban, makahatag og hinan-ay nga paningkamot sa pagtabang nga makab-ot ang espirituwal ug temporal nga mga panginahanglan sa miyembro.

Si Sister Jean B. Bingham, ang Kinatibuk-ang Presidente sa Relief Society, ug si Elder Jeffrey R. Holland sa Korum sa Napulog Duha ka mga Apostoles namulong usab mahitungod kon sa unsang paagi nga kining bag-ong paagi mas matutukan ang mga paningkamot sa mga korum sa Melchizedek Priesthood ug sa mga Relief Society diha sa pagpangalagad sama sa gibuhat sa Manluluwas (tan-awa sa mga pahina 101 ug 104).

Ang mga Laurel ug mga Mia Maid mahimo na karon nga makaserbisyo

isip mga tigpangalad nga mga kompanyon sa mga sister sa Relief Society. Diha sa interbyu kada tulo ka bulan, ang tigpangalagad nga mga brother ug mga sister makigtambag uban sa mga lider mahitungod sa mga panginahanglan ug kalig-on niadtong gi-assign kanila. Ang gidaghanon sa mga interbyu sa mga lider atol sa kada tulo ka bulan mao lang ang himoon nga pormal nga report. Ang mga pagbisita importante kon mahimo, apan ang pagpangalagad wala naglakip og piho nga paagi sa pakigkita sa matag bulan.

Ang mga kabatan-onan makahimo sa pagpakigbahin sa ilang talagsaon nga mga gasa ug makatubo sa espirituwal nga paagi samtang sila kauban sa mga hamtong diha sa buhat sa kaluwasan,” miingon si Sister Bingham. Ang pagpaapil sa kabatan-onan makadugang sa gidaghanon sa mga miyembro sa pag-atiman sa uban ug makatabang sa mga kabatan-onan nga “mas maandam sa pagtuman sa ilang mga katungdanan

isip mga lider sa Simbahan ug sa komunidad ug isip magtatampo nga kauban diha sa ilang mga pamilya.”

“*Kami* sa ulohang buhatan sa Simbahan wala magkinahanglang mahibalo kon *giunsa o asa o kanus-a* kamo mohimo og pagkontak sa inyong mga tawo,” miingon si Elder Holland; “nagkinahanglan lang kaming makahibalo ug magpakabana nga kamo *nagbuhat* ba niini ug nagpanalangin kanila sa tanang paagi kutob sa inyong mahimo.”

Sumala sa sulat gikan sa Unang Kapangulohan, ang mga kausaban sa pagpangalagad posibling mataud-tauran pa apan kinahanglan nga mapahimutang dayon kutob sa mahimo. Ministering.lds.org nakahatag og dugang nga mga detalye, lakip sa mga tubag sa mga pangutana nga kanunayng gipangutana. Mga instruksyon sa video ug mga ubang mga kapanguhaan madugang ngadto sa website sa mosunod nga mga semana.

Sugod sa Hunyo, ang *Liahona* maglakip sa binulan nga feature nga gitawag og “Mga Baruganan sa Pagpangalagad” sa pagtabang sa mga miyembro nga makasabut kon unsaon nga mas mahisama kang Kristo kon sila mangalagad sa usag usa. ■



Mga Korum Giusab

Ang grupo sa mga high priest ug korum sa mga elder sa ward (o branch) karon tipunon na ngadto sa usa ka korum sa mga elder, gipahibalo ni Presidente Russell M. Nelson atol sa sesyon sa priesthood sa kinatibuk-ang komperensya. Ang stake presidency padayon nga moserbisyo isip presidency sa korum sa mga high priest sa stake, apan ang korum maglakip lamang sa mga high priest nga kasamtangang nagserbisyo sa stake presidency, sa mga bishopric, sa high council, ug isip functioning nga patriyarka.

Ang korum sa mga elder pangulohan sa usa ka presidency nga langkuban sa mga elder ug high priest. Ang presidente sa korum sa mga elder moreport ngadto sa stake president ug regular nga makigkita sa bishop. Ang mga katungdanan [office] sa priesthood magpabiling mao ra gihapon. Ang kasamtangan nga presidency sa korum sa mga elder sa ward (o branch) ug mga lider sa grupo sa mga high priest i-release, ug ang stake president motawag og bag-ong presidency sa korum sa mga elder. ■

Pito ka Bag-ong Templo Gipahibalo

Ang mga templo tukuron sa Salta, Argentina, Bengaluro, India; Managua, Nicaragua; Cagayan de Oro, Philippines, Layton, Utah, USA; Richmond, Virginia, USA; ug sa usa ka dakong siyudad nga wala pa matino dinha sa Russia, maoy pahibalo ni Presidente Russell M. Nelson dapit sa katapusan sa Dominggo sa hapon nga sesyon sa kinatibuk-ang komperensya.

Sa wala pa ang komperensya, ang Unang Kapangulohan mipahibalo nga ang Templo sa Roma Italya ipahinungod sa Domingo, Marso 10, 2019, hangtud sa Dominggo, Marso 17, 2019. Mipagawas usab ang Simbahan og nindot kaayong hulagway [artistic rendering] sa Bangkok Thailand Temple.

Niadtong Oktubre 2017, gihimo ang ground breaking alang sa Port-au-Prince Haiti Temple; ang Meridian Idaho Temple gipahinungod niadtong Nobyembre 2017; ug ang Cedar City Utah (USA) Temple gipahinungod niadtong Disyembre 2017.

Duha ka templo ang ipahinungod og usab sa dili madugay: ang Houston Texas Temple sa Dominggo, Abril 22, 2018, human sa gihimong mga pag-ayo tungod sa mga baha; ug ang Jordan River Utah Temple sa Dominggo, Mayo 20, 2018, human sa gihimong mga pag-usab. Ug duha ka dugang pa nga mga templo ang ipahinungod sa dili madugay niining tuiga: ang Concepción Chile Temple sa Dominggo, Oktubre 28, 2018; ug ang Barranquilla Colombia Temple sa Dominggo, Disyembre 9, 2018.

Ang Hamilton New Zealand Temple isarado inig ka Hulyo 2018 alang sa dako nga pag-usab ug ipahinungod kini pag-usab inig ka 2021.

Adunay kasamtangan nga 159 ka magamit nga templo sa tibuok kalibutan, nga 30 ka templo ang gipahibalo o gipangtukod na. ■

Rome Italy Temple



Hulagway sa Bangkok Thailand Temple.





Family History: Pagdiskubre, Pagpundok, Pagkonektar

Ang lokal nga mga temple ug family history consultant makatabang sa mga miyembro sa Simbahan ug sa uban aron makita ang kalipay nga moabut gikan sa pagdiskubre, pagpundok, ug pagkonektar sa mga katigulangan, sumala ni Elder Bradley D. Foster, General Authority Seventy ug Executive Director sa Church Family History Department.

Ang tanan adunay mga sugilanon gikan sa ilang family history. Ug posibling mahitabo ang talagsaong mga butang kon sugdan nimo ang pagpangita ug pagkaplag kanila.

“Ang among hatagan og gibug-aton para sa umaabut nga tuig mao ang pagtabang sa mga consultant aron ilang makita ang ilang buluhaton sa pagtabang sa mga miyembro nga makabaton niini nga kasinatian,” miingon si Elder Foster. “Buhaton nato kana usa human sa usa. Adtoon nato ang [katawhan] bisan asa sila, uban sa espesyal nga paghatag og gibug-aton niadtong mag-12 anyos na ug niadtong bag-o nga mga kinabig.” Kana nga duha ka grupo makabeni-pisyo dayon gumikan sa pagkakita kon sa unsang paagi ang buhat sa templo molig-on sa mga pamilya pinaagi sa kahangturan, ug sa kasagaran makamugna kini og kadasig tali sa kaugalingon nilang mga higala ug mga pamilya.

Bisan kadtong dili mga miyembro sa Simbahan pwede nga makaangkon sa kasinatian sa pagdiskubre-pagpundok-pagkonektar pinaagi sa one-on-one nga pag-abag bisan asa sa kapin sa 5,000 ka FamilySearch family history center sa tibuok kalibutan. ■



Pagpahigayon og Misyonaryo nga Buhat

Atol sa katapusang unom ka bulan, ang Simbahan mihimo og pipila ka mga lakang sa pagpahigayon og misyonaryo nga Buhat.

Sumbanan nga mga pangutana.

Ang Unang Kapangulohan mipaila-ila og hugpong sa sumbanan nga mga pangutana alang sa mga bishop ug mga presidente sa stake aron magamit samtang mag-interbyu og propective nga full-time nga mga misyonaryo. Ilang giawhag ang mga lider, mga ginikanan, ug mga kabatan-onan nga magpamilyar sa mga pangutana.

Ang mga sumbanan nga mabutang sa mga pangutana dili makausab o makadugang sa mga gikinahanglan alang sa pagserbisyo sa full-time nga misyonaryo, apan ang regular nga pagribyu niini makapahimo sa mga prospective nga mga misyonaryo ug mga ginikanan nga makat-on sa mga baruganan ug matino ang mga dapit diin ang kalamboan o dugang pagpa-ngandam mahimong gikinahanglan.

Paggamit sa teknolohiya. Ang gidaghanon sa mga misyon nga naggamit og mobile devices nagkadaghan gikan sa 87 ngadto sa 162, ug ang mga tablet gipuli sa mga smartphone. Ang mga telepono makaabag sa mga misyonaryo sa pagtuon, pagpangita, ug pagtudlo.

Ang teknolohiya magamit usab sa paghatag og online content ngadto sa mga tawo nga nangita og mga tubag sa mga pangutana mahitungod sa relihiyon. Ang Simbahan nagsugod sa paggamit og mga online teaching center unom ka tuig na ang milabay ug karon nagpadagan og 20 ka mga online teaching center sa tibuok kalibutan.

Salamat sa teknolohiya, ang mga miyembro kinsa mo-refer og mga higala ngadto sa mga misyonaryo makahinabi na karon sa mga misyonaryo kinsa nagtudlo sa ilang mga higala. Mahimo na nilang mahisgutan ang mga panginahanglan sa mga misyonaryo ug makaapil sa mga leksyon gamit ang internet. Susiha kon unsaon diha sa [lds.org/referrals](https://www.lds.org/referrals).

Pagkab-ot sa kasamtangang panginahanglan. Sugod sa Hulyo 2018, ang Simbahan mousab sa mga utlanan sa 19 ka mga misyon, ug mamugna ang 5 ka bag-ong misyon. Kini mousab sa gidaghanon sa mga misyon gikan sa 421 ngadto sa 407. Ang bag-ong mga misyon mao ang Brazil Rio de Janeiro South, Cote d'Ivoire Yamoussoukro, Nigeria Ibadan, Philippines Cabanatuan, ug Zimbabwe Bulawayo. Ang mga detalye mahitungod sa paghiusa sa mga misyon umaabut pa nga ipahibalo gikan sa mga presidente sa misyon

ngadto sa mga ginikanan sa mga misyonaryo sa apektadong mga misyon.

Gumikan kay ang kausaban sa edad sa mga moserbisyo nga misyonaryo gipahibalo niadtong 2012, ang Simbahan nakamugna og 76 ka bag-ong mga misyon aron maatiman ang pagsulbong sa pagtubo gikan sa 58,000 ngadto sa 88,000 ka mga misyonaryo. Ang inisyal nga bul-og sa mga misyonaryo sukad mios-os, sigun sa gilauman, ug sa kasamtangan mga 68,000 ang mga misyonaryo nga nagserbisyo. Nagpasabut kini nga, sa kasamtangan, mas gamay ang mga misyon ang gikinahanglan. Apan nagpasabut usab kini nga ang tukma nga pagbutang og mga misyonaryo sa mga dapit nga gikinahanglan sa tibuok kalibutan nakagarantiya sa partikular nga pagtagad.

Mga Missionary training center.

Ang Provo Missionary Training Center sa Utah, USA, ug ang MTC sa Pilipinas napadak-an na ug gipahinungod, ug ang bag-ong missionary training center sa Ghana gipahinungod na usab. Ang mga training center sa Spain ug Chile mosira inig ka Enero 2019, ug ang mga misyonaryo kinsa manangbong unta niining mga center pagabansayon sa usa sa nahabilin nga 13 ka mga missionary training center sa tibuok kalibutan. ■

Bag-ong mga Polisiya, Proseso, ug Produkto

Kabatan-onan ug ang buhat sa templo. Ang Unang Kapangulohan mipahibalo sa kausaban sa polisiya sa templo nga makahatag sa batan-ong mga lalaki ug batan-ong mga babaye og daghang mga oportunidad diha sa buhat sa templo ug motabang sa mga bata sa Primary nga mas maka-andam nga makaserbisyo sa templo.

Paglikay, pagtino, ug pagresponde sa pagpang-abuso. Agig padayon nga paningkamot sa pagtambag sa mga lider kon unsaon sa paglikay, pagtino ug pagresponde ngadto sa pagpang-abuso, niadtong Marso 26, 2018, ang Unang Kapangulohan mipadala og sulat ug usa ka kapanguhaan nga dokumento ngadto sa mga lider sa Simbahan sa Estados Unidos ug Canada. Ang dokumento naglakip sa mga gi-update nga mga lagda alang sa paagi kon unsaon sa mga bishop ug mga presidente sa stake sa pagtambag sa mga biktima sa sekswal nga pagpang-abuso ug kon unsaon nila sa pagpahigayon ang mga interbyu sa mga miyembro sa Simbahan.

Mga Kausaban sa Young Women camp. Ang mga kausaban sa programa sa Young Women camp sa Simbahan, naglakip sa usa ka bag-ong giya sa camp nga i-release sa umaabut nga mga bulan, nga naglakip sa giwagtang nga certification ug paghatag og gibug-aton sa mga lider sa kabatan-onan.

Angay lang nga “magamit sa tanan” alang sa batan-ong mga babaye nga nagpuyo sa tanang mga dapit sa kalibutan, ang bag-ong *Young Women Camp Guide* sa kasamtangan anaa sa Iningles (ug sa katapusan sa 23 ka mga pinulongan) isip usa ka kapanguhaan sa kapangulohan sa Young Women, mga camp specialist, ug mga lider sa youth camp sa youngwomen.lds.org.

Mga pagsumiter og mga musika. Ang kasamtangang mga kausaban sa proseso sa pagsumiter og musika sa Simbahan karon gihimo nang mas dali ug gipasayon alang sa mga miyembro sa pagsumiter sa orihinal ug sagradong musika ngadto sa Simbahan. Ang Musika mahimong isumiter sa apps.lds.org/artcomp.

“How To” video channel. Ang Simbahan milunsad sa bag-ong channel

sa YouTube nga gitawag og “How To” nga makahatag og yano, praktikal nga tabang alang sa mga hagit sa tinuod nga kinabuhi. Gitawag nga usa ka “one-stop channel alang sa pagkaplag sa tabang nga inyong gikinahanglan kon kamo nagkinahanglan niini,” ang channel sa kasamtangan adunay kapin sa 600 ka mga video nga gibahig ngadto sa siyam ka mga kategoriya, ang matag usa adunay daghang playlist sa mga video sa nagkadaiyang hilisgutan diha sa Iningles, adunay pipila nga ang sulod Spanish ug Portuguese. Susiha kini sa HowTo.lds.org.

Mga hubad sa kasulatan. Ang Simbahan mipahibalo sa proyekto sa paghubad alang sa dugang 34 ka mga pinulongan, lakip ang usa ka bag-ong proseso nga makatugot sa mga indibidwal sa pagtuon sa hinagpat nga mga porsyon sa mga hubad sa dili pa ang pagmantala sa katapusan nga mga paghubad, nagpasabut nga ang mga miyembro aduna nay access sa mga kasulatan diha sa ilang mga pinulongan. ■

Inyong mabasa ang dugang pa mahitungod niini sa news.lds.org.





DALI, SUNOD KANAKO—

Para sa Elders
Quorum ug Relief
Society

*Kini nga mga kapanguhaan makita
usab diha sa Gospel Library app ug sa
comefollowme.lds.org.*

Nganong Aduna Man Kitay

mga Miting sa Korum ug Relief Society?

Niining ulahing mga adlaw, ang Dios mipahiuli sa priesthood ug miorganisar sa mga korum sa priesthood ug sa Relief Society sa pagtabang sa pagtuman sa Iyang buhat sa kaluwasan. Tungod niini, sa matag Dominggo nga magpundok kita diha sa mga miting sa elders quorum ug sa Relief Society, maghisgut ug magplano kita unsa ang atong buhaton sa pagtabang nga matuman ang buhat sa Dios. Aron mahimong epektibo, kini nga mga miting kinahanglang sobra pa kay sa mga klase lang. Mga oportunidad kini sa pagtinambagay bahin sa buhat sa kaluwasan, magkat-on og dungan mahitungod niana nga buhat gikan sa mga pagtulun-an sa mga lider sa Simbahan, ug magplano ug mo-organisar sa atong kaugali-ngon sa pagtuman niini.



Mga Miting sa Council sa Unang Dominggo

Sa unang Dominggo sa matag bulan, ang mga miting sa elders quorum ug Relief Society *dili maglakip* og *leksyon nga itudlo sa usa ka magtutudlo*. Imbis niana, ang mga kapangulohan sa elders quorum ug Relief Society modumala og mga miting sa council. Niini nga mga miting sa council sa unang Dominggo, ang matag elders quorum ug Relief Society magtinambagay mahitungod sa lokal nga mga responsibilidad, mga oportunidad, ug mga hagit; magkat-on gikan sa mga ideya ug mga kasinatian sa usag usa; ug magplano og mga paagi sa pagsunod sa mga impresyon nga nadawat gikan sa Espiritu. Kini nga mga diskusyon kinahanglang i-base sa may kalabutan nga mga kasulatan ug sa mga pagtulun-an sa buhing mga propeta.

Dili tanang mga miting sa council magkapareha. Ania ang pipila ka mga giya aron sa pagtabang sa mga kapangulohan sa pagdumala og malam-puson nga council.



Mga Hilisgutan alang sa mga Miting sa Council sa Unang Dominggo

Ang mga ideya alang sa mga hilisgutan sa diskusyon sa mga miting sa council mahimong maggikan sa mga miting sa kapangulohan, mga miting sa ward council, sa plano sa area, mga impresyon nga madawat sa mga lider samtang mangalagad sila sa mga miyembro, ug mga pag-aghat sa Espiritu Santo. Ang mga hilisgutan sa ubos mga sugyot lamang. Ang mga lider mahimong nahibalo og ubang mga panginahanglan nga gibati nila nga angayng hisgutan.

- Unsay atong mahimo aron mangalagad niadtong naglibut kanato? (tan-awa sa Mosiah 23:18).
- Unsaon nato sa paghatag og prayoridad ang atong lain-laing mga responsibilidad?
- Unsaon nato sa pagpaambit sa ebanghelyo sa atong mga higala ug mga silingan? (tan-awa sa Alma 17).
- Unsaon nato sa pagpanalipod sa atong kaugalingon ug sa atong mga pamilya gikan sa dili angay nga media ug pornograpiya?
- Unsay atong buhaton sa pagtudlo ug pagpalig-on sa atong mga bata ug kabatan-onan sa atong ward?
- Unsaon nato nga mas makaapil sa buhat sa family history ug pagsimba sa templo?
- Unsaon nato sa pagdapit sa tabang sa Ginoo samtang magtinguha kita og mga tubag sa atong mga pangutana sa ebanghelyo ug maningkamot og mas lawom nga pagsabut sa ebanghelyo?
- Unsaon nato sa pagpalig-on sa atong mga pagpamatuod sa Ginoo ug sa lyang ebanghelyo ug sa pagtabang sa atong mga pamilya nga mahimong mapanangkamuton sa kaugalingon sa espiiritwal nga paagi?

SA WALA PA ANG MITING SA COUNCIL

BUHATON:

- I-determinar ang lokal nga mga panginahanglan, mga oportunidad, ug mga hagit.
- Pagpili sa mainampoong paagi og usa ka hilisgutan nga hisgutan.
- Dapita ang mga sakop sa korum o mga sister sa Relief Society nga motambong nga andam sa pagpaambit sa ilang mga hunahuna ug mga kasinatian.

DILI BUHATON:

- Moandam og leksyon.
- Moabut nga aduna nay gihunahuna nga pihong solusyon o action plan.

PANAHAON SA MITING SA COUNCIL

BUHATON:

- Modapit sa mga miyembro sa *pagpaambit og mga kasinatian* sa ilang pagsunod sa mga impresyon ug mga plano gikan sa miaging mga miting.
- Mopahibalo sa hilisgutan sa miting ug moawhag sa mga miyembro nga *magtinambagay* mahitungod niini, nga mangita og mga solusyon ug giya gikan sa mga kasulatan, sa mga pulong sa mga propeta, ug sa Espiritu Santo.
- *Moplano sa pagbuhat* sa unsay gihisgutan. Mahimong maglakip kini og mga plano sa grupo o mga plano nga gihimo sa mga indibidwal sa ilang kaugalingon.

DILI BUHATON:

- Modominar sa pag-istoryahanay.
- Maningkamot sa pagkombinsir sa uban sa inyong mga ideya.
- Mohisgot og sensitibo o kompidensyal nga mga isyu.
- Motudlo og leksyon.
- Mopugos ni bisan kinsa sa pag-apil.


HUMAN SA MITING SA COUNCIL

BUHATON:

- Mo-follow up sa mga plano ug mga buluhaton nga gihimo panahon sa miting sa council.
- Mangita og mga paagi sa paglakip niadtong dili makatambong sa miting tungod sa mga calling o ubang mga rason. Mopahibalo kanila sa mga plano nga gihimo.
- Mohatag sa mga miyembro og mga oportunidad sa pagpaambit og mga kasinatian sa umaabut nga mga miting.

“Usa sa nindot nga mga butang kabahin niini nga miting sa council mao nga tinuoray kamong makahimo og action plan sa katapusan sa miting.”

—Sister Jean B. Bingham, Kinatibuk-ang Presidente sa Relief Society



Mga Miting sa

Ikaduha ug Ikatulong Dominggo

Sa ikaduha ug ikatulo nga mga Dominggo sa matag bulan, ang mga elders quorum ug mga Relief Society magkat-on gikan sa mga pagtulun-an sa mga lider sa Simbahan gikan sa pinakabag-o nga kinatibuk-ang komperensya. *Kinahanglang hatagan og gibug-aton ang mga mensahe gikan sa mga sakop sa Unang Kapangulohan ug sa Korum sa Napulog Duha ka mga Apostoles.* Hinoon, base sa lokal nga mga panginahanglan ug inspirasyon gikan sa Espiritu, ang bisan unsa nga mensahe gikan sa pinakabag-o nga komperensya mahimong hisgutan.

Sa kasagaran, ang kapangulohan sa elders quorum o Relief Society mopili og usa ka mensahe sa komperensya nga maoy tun-an base sa mga panginahanglan sa mga miyembro, apan ang bishop o presidente sa stake mahimong mohatag og ideya. Ang mga lider mahimong mopili og mensahe nga may kalabutan sa hilisgutan nga nahisgutan sa bag-o lang nga miting sa council sa unang Dominggo, o mahimo silang mopili og mensahe mahitungod sa lahi nga hilisgutan, base sa inspirasyon sa Espiritu.

Ang mga lider ug mga magtutudlo kinahanglang mangita og mga paagi sa pag-awhag sa mga miyembro nga mobasa sa pinili nga mga mensahe sa wala pa ang klase ug motambong nga andam nga mopaambit og mga kamatuoran sa ebanghelyo ug mga ideya kon unsaon kini sa pagsunod. Ang gisugyot nga mga kalihokan sa pagkat-on nga anaa sa ubos, nga gibase sa mga baruganan sa *Pagtudlo sumala sa Pamaagi sa Manluluwas*, makatabang sa mga miyembro nga makat-on gikan sa mga mensahe sa kinatibuk-ang komperensya.

“Magmabatyagon sa pag-pangita og mga paagi sa paglakip sa [kinatibuk-ang komperensya nga] mga mensahe sa inyong mga family home evening, sa inyong pagtudlo sa ebanghelyo, [ug] sa inyong mga panag-istorya sa pamilya ug sa mga higala.”

Presidente Russell M. Nelson,
“Magpadayon Tang Tanan,” *Liahona*,
Mayo 2018, 118.

M. Russell Ballard, *“Bililhong mga Gasa gikan sa Dios,”* 9–11

Ang mensahe ni Presidente Ballard naghisgut sa lain-laing mga hilisgutan—lakip sa mga propeta, pagtuo diha kang Kristo, ang sakrament, ug pagserbisyo—ug ang mga miyembro sa inyong korum o Relief Society mahimong makakita og lain-laing mga hilisgutan nga makahuluganan kaayo. Dapita ang mga miyembro sa pagpaambit og usa ka butang gikan niini nga mensahe nga nakadasig kanila. Unsa nga mga pagdapit o gisaad nga mga panalangin ang atong makita diha sa mensahe ni Presidente Ballard? Ikonsiderar ang pagdapit sa mga miyembro sa pagpamalandong sulod sa pipila ka minuto kon unsay ilang gibati nga angay nga buhaton isip resulta niini nga diskusyon.

Gary E. Stevenson, *“Ang Kasingkasing sa usa ka Propeta,”* 17–20

Aron sa pagtabang sa mga miyembro nga “makasabut sa gibug-aton” sa pagtawag og usa ka bag-o nga propeta, mahimo ninyong

dapiton ang mga miyembro sa pagsiksik sa mensahe ni Elder Stevenson, nga mangita og mga kamatuoran ug mga ideya nga makatabang kanila nga makasabut sa kaimportante ug kasagrado niining balaan nga proseso. Ikonsiderar ang pagdapit sa mga miyembro sa pagpaambit sa unsay ilang gibati atol sa maligdong nga katiguman diin si Presidente Nelson gipaluyohan isip Presidente sa Simbahan. Mahimo usab kamong modrowing og kasingkasing diha sa pisara ug hangyoon ang mga miyembro sa pagsulat diha niini og mga pulong o hugpong sa mga pulong nga naghulagway sa kasingkasing ug kinaiya ni Presidente Nelson. Unsay iyang gitudlo nga nakapanalangin kanato?

Neil L. Andersen, *“Ang Propeta sa Dios,”* 24–27

Ang paghisgut sa mensahe ni Elder Andersen makalig-on sa pagtuo sa mga miyembro diha sa buhi nga mga propeta. Mahimo usab ninyong silang dapiton sa pagsiksik sa

iyang mensahe alang sa usa ka butang nga makatabang kanila nga makasabut nganong ang Dios adunay mga propeta dinhi sa yuta ug nganong mosunod kita kanila. Sa unsang paagi kita napanalangin tungod kay aduna kitay propeta? Ang mga miyembro mahimong mopaambit kon sa unsang paagi sila naka-angkon og pagpamatuod nga si Presidente Russell M. Nelson mao ang propeta sa Ginoo ug Presidente sa Ang Simbahan ni Jesukristo sa mga Santos sa Ulahing mga Adlaw.

David A. Bednar, *“Maaghup ug Mapaub-sanon sa Kasingkasing,”* 30–33

Aron madasig ang diskusyon kabahin sa mensahe ni Elder Bednar, mahimo ninyong isulat sa pisara ang *Ang kaaghup mao ang . . . ug Ang kaaghup dili mao ang . . .* Ang mga miyembro mahimo dayong magsiksik sa mensahe ni Elder Bednar ug isulat sa pisara ang mga pulong nga ilang makit-an nga mokompleto niini nga mga pamahayag. Unsa ang atong makat-unan gikan niini nga

mensahe nga makadasig kanato nga mahimong mas maaghup? Unsa nga mga ehemplo sa kaaghup ang atong mahunahunaan? Unsaon nato sa paggamit ang tambag ni Elder Bednar nga mahimong mas maaghup?

Bonnie L. Oscarson, “*Young Women nga anaa sa Buhat*,” 36–38

Ang mga pangutana maoy usa ka paagi sa pagdapit og pagpamalandong. Ikonsiderar ang pagsulat sa pisara og pipila ka mga pangutana nga gitubag sa mensahe ni Sister Oscarson, sama sa *Unsaon nato sa pagpaapil sa batan-ong mga babaye diha sa buhat sa Ginoo?* Dapita ang mga miyembro sa pagsiksik sa iyang mensahe alang sa mga tubag niini nga mga pangutana ug hisgutan unsay ilang nakat-unan. Unsa nga mga panalangin ang moabut kon ang batan-ong mga babaye moapil sa pagpangalagad? Tingali ang mga miyembro sa klase mahimong mopaambit og mga kasinatian nila nga nangalagad uban sa batan-ong mga babaye. Base sa atong diskusyon, unsay atong gibati nga angayang buhaton?

Dale G. Renlund, “*Buhat sa Family History ug sa Templo: Pagsilyo ug Pagkaayo*,” 46–49

Si Elder Renlund namulong mahitungod sa panan-awon ni Ezequiel sa usa ka templo nga adunay migula nga tubig gikan niini (tan-awa sa Ezequiel 47:8–9). Tingali usa ka sakop sa korum o Relief Society makadrowing og hulagway niini nga panan-awon diha sa pisara. Sa unsang paagi ang mga panalangin sa buhat sa templo ug family history sama sa tubig diha sa panan-awon ni Ezequiel? Mahimo ninyong dapiton ang mga sakop sa klase sa pagpaambit sa mga panalangin sa buhat sa templo ug family history nga ilang nasinati. Unsay atong mabuhat aron ang family history ug buhat sa templo mahimong mas kanunay nga parte sa atong kinabuhi?

D. Todd Christofferson, “*Ang Korum sa mga Elders [Elders Quorum]*,” 55–58

Diha sa elders quorum, mahimo ninyong dapiton ang mga sakop sa korum sa pagbasa sa seksyon sa mensahe ni Elder Christofferson nga giulohan og “Ang Katuyoan Niining mga Kausaban.” Unsay atong mahimo aron masiguro nga atong makab-ot kini nga mga katuyoan? Sa Relief Society, mahimo kamong mohangyo og usa ka tawo sa pag-summarize sa mga kausaban sa mga korum sa Melchizedek Priesthood nga gihulagway ni Elder Christofferson. Ang mga sister mahimo dayong moila sa mga baruganan nga gipasabut niini nga mga kausaban nga magamit

diha sa buhat sa inyong Relief Society. Sa elders quorum o Relief Society, ang mga miyembro mahimong maghisgot sa unsay ilang nakat-unan gikan sa istorya ni Brother Goates ug sa unsang paagi kini magamit sa ilang mga buhat.

Ronald A. Rasband, “*Tan-awa! Ang Hari-anon nga Kasundalohan*,” 58–61

Tingali ang pagkanta, pagpaminaw, o pagbasa og dungan sa mga pulong sa “Behold! A Royal Army” (*Hymns*, nu. 251) makadasig sa diskusyon mahitungod sa mensahe ni Elder Rasband. Sa unsang paagi ang mga korum sa priesthood ug Relief Society sama sa harianon nga kasundalohan? Ang mga miyembro mahimo usab nga mangita ug maghisgot sa “daghan nga mga panalangin” nga gihisgutan ni Elder Rasband nga moabut gikan sa pag-usab sa mga korum sa priesthood. Unsa ang uban nga mga panalangin nga atong nadawat—o gilauman natong madawat—gikan sa pag-implementar niini nga mga kausaban? Sa unsang paagi ang mga Relief Society mas hingpit usab nga makadawat og mga panalangin sama sa “panaglahi sa mga gasa” ug “paggiya”?

Henry B. Eyring, “*Dinasig nga Pagpangalagad*,” 61–64

Si Presidente Eyring naghisgut kabahin sa duha ka pakigpulong sa sakrament miting mahitungod sa pagpangalagad nga nakapadani kaniya. Tingali mahimo ninyong hangyoon ang katunga sa mga miyembro sa korum o Relief Society sa pagribyu sa mga pulong sa 14 anyos nga batang lalaki ug ang laing katunga sa pagribyu sa istorya mahitungod sa home teacher. Samtang magbasa sila, ang mga miyembro mahimong maghunahuna sa ilang ikatambag sa batan-ong lalaki o batan-ong babaye kinsa bag-o lang gi-assign sa pagpangalagad ngadto sa usa ka tawo. Sa unsang paagi nga “mas magmadasigon kita ug magmanggiloy-on sa atong serbisyo . . . sa pagpangalagad”?

Dallin H. Oaks, “*Ang mga Gahum sa Priesthood*,” 65–68

Aron sa pagsugod og diskusyon, mahimo ninyong isulat ang mga ulohan sa upat ka mga seksyon sa mensahe ni Presidente Oaks diha sa pisara. Dayon dapita ang matag miyembro sa pagbasa og hilum sa usa ka seksyon ug dayon sa pagsulat diha sa pisara og usa ka sentence nga nag-summarize sa kinatibuk-ang mensahe niana nga seksyon. Ang mga miyembro mahimo dayong mopaambit sa unsay ilang gibati nga angay nga buhaton tungod

sa ilang nabasa. Sa unsang paagi molambo ang atong pagserbisyo isip mga naghupot sa priesthood o mga sister sa Relief Society samtang atong gamiton ang mga pagtulun-an sa mensahe ni Presidente Oaks?

Russell M. Nelson, “*Ang Pagpangalagad uban sa Gahum ug Katungod sa Dios*,” 68–75

Si Presidente Nelson nagdapit sa mga naghupot sa priesthood sa “pagbarug” ug paggamit sa priesthood aron sa pagpanalangin sa mga anak sa Langitnong Amahan. Dapita ang mga sakop sa inyong korum o Relief Society sa pagpangita sa mga ehemplo nga iyang gihatag ug sa paghisgot kon sa unsang paagi kini makatabang kanato nga makasabut kon sa unsang paagi ang priesthood mahimong gamiton sa pagpanalangin sa ilang mga pamilya ug sa uban. Unsa nga mga kasinatian ang mahimo natong mapaambit sa dihang napanalangin kita pinaagi sa gahum sa priesthood? Sa unsang paagi kita makatabang sa uban o sa atong kaugalingon nga makaangkon og pagtuo sa paggamit sa priesthood sa Dios aron sa “pagpangalagad diha sa iyang ngalan”?

Reyna I. Aburto, “*Magkahiusa*,” 78–80

Ang mensahe ni Sister Aburto naghatag og oportunidad alang sa inyong korum o Relief Society sa pagtimbang-timbang kon unsa kamo kamaayo nga nagkahiusa sa pagtrabaho sa paghimo sa buhat sa Ginoo. Aron matabangan ang mga miyembro sa pagbuhat niini, mahimo kamong mopakita og mga hulagway sa monarch nga mga alibangbang, sa pagbisita sa Manluluwas ngadto sa mga Nephite (tan-awa sa *Libro sa mga Hulagway sa Ebanghelyo*, 82, 83, 84), ug ang humanitarian nga buhat sa Simbahan (tan-awa sa LDS.org). Ang mga miyembro mahimong mosiksik sa mensahe ug modiskobre kon giunsa paggamit ni Sister Aburto kini nga mga ehemplo sa pagtudlo mahitungod sa mga katuyoan ug mga panalangin sa pagtrabaho nga magkahiusa. Unsa ang atong mahimo aron magtrabaho nga “magkahiusa”?

Henry B. Eyring, “*Ang Iyang Espiritu Magauban Kaninyo*,” 86–89

Aron mapalambo ang atong tinguha ug abilidad sa pagdawat sa Espiritu Santo, si Presidente Eyring mipaambit og pipila ka personal nga mga kasinatian ug mihatag og piho nga direksyon. Human moribyo sa iyang mga kasinatian, unsa nga susama nga mga panumduman ang mahimong mapaambit sa mga sakop sa inyong korum o Relief Society sa dihang ang Espiritu Santo mitandog sa

Usa ka Sumbanan alang sa Atong mga Miting

1. Mopaambit og mga kasinatian

sa pagsunod sa mga impresyon ug mga imbitasyon nga nadawat gikan sa nangaging mga miting sa priesthood o Relief Society (giyahan sa usa ka sakop sa kapangulohan).

2. Dungan nga magkat-on

(giyahan sa usa ka gitawag nga magtutudlo). Kasagarang makatabang ang pagdapit sa mga miyembro nga:

- Mangita og usa ka butang diha sa mensahe sa komperensya (sama sa tubag sa usa ka pangutana, makadasig nga tudling, o ehemplo sa usa ka baruganan).
- Mopaambit ug maghisgut sa unsay ilang makit-an.
- Mokonsiderar kon sa unsang paagi ang mga mensahe magamit sa ilang kinabuhi ug mga kasinatian.

3. Moplano sa paglihok isip mga indibidwal o isip usa ka grupo (giyahan sa usa ka sakop sa kapangulohan).



ilang kasingkasing o mipanghimatuod sa kamatuoran? Tingali ang mga miyembro mahimong mosulat diha sa pisara sa giya nga gipaambit ni Presidente Eyring nga makatabang sa “pag-abli sa atong mga kasingkasing aron madawat ang pag-alagad sa Espiritu.” Sa unsang paagi ang pagsunod sa iyang direksyon makatabang kanato sa atong kaulangong kinabuhi ug sa atong mga pamilya? Sa atong korum o Relief Society?

Dallin H. Oaks, “*Gagmay ug Yano nga mga Butang*,” 89–92

Ang mensahe ni Presidente Oaks naglangkob og mga pasumbingay nga nagtudlo kon sa unsang paagi ang gagmay ug yano nga mga butang adunay kusganon nga epekto alang sa maayo o dautan. Kini nga mga pasumbingay naglakip sa mga gamut sa kahoy, usa ka grupo sa mga magbubugsay, mga hilo sa pisi, ug nagtulo nga tubig. Ang mga miyembro mahimong mobasa niini nga mga pasumbingay ug maghisgot kon unsay gitudlo niini mahitungod sa gahum sa makanunayon nga pagbuhat sa gagmay ug yano nga mga butang. Unsa man ang gagmay ug yano nga mga butang nga makadala sa impluwensya sa Espiritu Santo sa atong kinabuhi? Dapita ang mga miyembro sa pagpamalandong kon unsay ilang gibati nga buhaton sa pagsunod sa tambag ni Presidente Oaks.

Russell M. Nelson, “*Pagpadayag alang sa Simbahan, Pagpadayag alang sa Atong mga Kinabuhi*,” 93–96

Sa iyang mensahe, si Presidente Nelson mihangyo kanato sa pagpalambo sa atong “espirituhanong kapasidad sa pagdawat og pagpadayag.” Aron matabangan ang mga miyembro sa pagsunod sa iyang direksyon, mahimo kamong mosulat og mga pangutana sama sa mosunod diha sa pisara: Nganong nagkinahanglan man kita og pagpadayag? Sa unsang paagi nato mapalambo ang atong kapasidad sa pagdawat og pagpadayag—sa tagsa-tagsa ug samtang magtinambagay kita sa usag usa? Unsa nga mga panalangin ang gisaad ni Presidente Nelson kon magtinguha kita og pagpadayag? I-grupo-grupo ang mga miyembro, ug dapita ang matag grupo sa pagpangita ug pagpaambit og mga tubag sa usa sa mga pangutana.

Gerrit W. Gong, “*Si Kristo ang Ginoo Nabanhaw Karon*,” 97–98

Unsa ang mahimong makat-unan sa mga miyembro sa inyong korum o Relief Society gikan sa mensahe ni Elder Gong mahitungod sa atong mga pakigsaad ug sa Pag-ula ni

Jesukristo? Mahimo ninyong dapiton ang mga miyembro sa pagsiksik sa mensahe, nga mangita sa mga panalangin nga ang Pag-ula sa Manluluwas ug ang atong mga pakigsaad—naghiusa sa pagtrabaho—gitanyag kanato. Dayon ikonsiderar ang pagpangutana og sama sa mosunod mahitungod sa unsay ilang nakit-an: Sa unsang paagi ang atong mga pakigsaad ug ang Pag-ula naghiusa sa pagtrabaho aron “makapaarang ug makapaligdong” kanato? Unsa ang gitabang niini kanato nga atong huptan ug isalikway?

Ulisses Soares, “*Ang mga Propeta Mamulong pinaagi sa Gahum sa Balaang Espiritu*,” 98–99

Ang mensahe ni Elder Soares makadasig kanato sa paglihok diha sa hugot nga pagtuo kon mobati kita og kakulang sa pagbuhat sa kabubut-on sa Ginoo. Sa unsang paagi si Elder Soares nakadawat og kahupayan ug kasiguroan sa dihang nadawat niya ang iyang bag-ong calling isip usa ka Apostol? Unsa ang iyang nakat-unan gikan sa iyang kasinatian nga gitawag isip presidente sa misyon? Unsa ang atong makat-unan gikan sa iyang mga kasinatian? Hatagi ang mga miyembro og panahon sa pagpaambit og mga kasinatian sa dihang mibati sila nga dili sigurado mahitungod sa usa ka butang nga gusto sa Ginoo nga ilang buhaton. Unsa man ang ilang giubuhar aron makakaplag og pagtuo sa pagpadayon?

Jeffrey R. Holland, “*Magpaduol ug Maglig-on Kanila*,” 101–3

Samtang ang mga miyembro sa inyong korum o Relief Society nakakat-on mahitungod sa mga kausaban sa “konsepto sa pagpangalagad sa priesthood ug Relief Society”, unsa nga mga pangutana ang anaa kanila? Ang mensahe ni Elder Holland makahatag og mga tubag. Ang mga miyembro mahimong mangita sa mga baruganan sa ebanghelyo nga gitudlo ni Elder Holland nga mao ang pundasyon niini nga mga kausaban. Unsa nga mga pagdapit ang atong makita sa iyang mensahe? Unsa nga mga panalangin ang gisaad? Sa unsang paagi kining bag-o nga mga paagi sa pagpangalagad makatabang kanato nga mahimong “tinuod nga mga disipulo ni Kristo”?

Jean B. Bingham, “*Pagpangalagad sama sa Gibuhar sa Manluluwas*,” 104–7

Sa iyang mensahe, si Sister Bingham nagdapit kanato sa pagpangutana sa atong kaulangong og mga pangutana nga makagiya sa atong mga paningkamot sa pagpangalagad. Ang mga miyembro mahimong maghisgot

kon sa unsang paagi kini nga mga pangutana makagiya sa ilang mga paningkamot ug dayon mangita og mga tubag sa pangutana ni Sister Bingham, “Busa sama sa unsa man ang [pagpangalagad]?” Mahimo kamong mogahin og oras sa pagribyu sa pipila sa mga ehemplo nga gipaambit ni Sister Bingham sa mga indibidwal nga nangalagad ug dapita ang mga miyembro sa pagpaambit og ilang kaugalingon nga mga ehemplo. Unsay atong makita sa mensahe ni Sister Bingham nga nakadugang sa atong pagsabut sa ngano ug sa unsang paagi kita mangalagad?

Dieter F. Uchtdorf, “*Tan-awa, ania ra ang Tawo!*,” 107–10

Unsaon nato pagtabang og tawo nga makasabut nga ang maulaong sakripisyo ug Pagkabanhaw ni Jesukristo mao ang labing importanting mga panghitabo sa kasaysayan sa kalibutan? Dapita ang mga miyembro sa pagpamalandong niini nga pangutana samtang magbasa sila og mga parte sa mensahe ni Elder Uchtdorf. Unsay ilang nakaplagan nga makatabang sa pagpasabut kon ngano nga kini nga mga panghitabo importante kaayo kanila? Human niini nga diskusyon, ang mga sakop sa klase mahimong maghisgot kon unsay ipasabut kanila sa “tan-awa, ania ra ang tawo.” Sa unsang paagi kita nakat-on sa “[pagtan-aw sa] tawo”?

Quentin L. Cook, “*Pagpangandam sa Pagsugat sa Dios*,” 114–17

Mahimo ninyong sugdan ang inyong diskusyon sa mensahe ni Elder Cook pinaagi sa pagdapit og usa ka miyembro sa pagsummarize sa pagpahiuli sa mga yawe sa priesthood diha sa Templo sa Kirtland. Sumala sa mensahe ni Elder Cook, unsa ang mga responsibilidad nga aduna ang Simbahan nga may kalabutan niini nga mga yawe? Sa unsang paagi kini nga mga responsibilidad napakita sa Simbahan karon? Isulat ang mga pulong nga *pagkamatarung*, *panaghiusa*, ug *kaangayan* diha sa pisara, ug hangyoa ang mga miyembro sa pagpaambit og mga panabut nga ilang naangkon mahitungod sa matag usa niini nga mga baruganan gikan sa mensahe ni Elder Cook. Sa unsang paagi kini nga mga baruganan makatabang kanato sa pagtuman sa sagradong mga responsibilidad sa Simbahan?



Mga Miting sa

Ikaupat nga Dominggo

Sa ikaupat nga Dominggo sa matag bulan, ang mga elders quorum ug mga Relief Society maghisgot og hilisgutan nga gipili sa Unang Kapangulohan ug sa Korum sa Napulog Duha ka mga Apostoles. Ang hilisgutan sa ikaupat nga Dominggo baguhon kada human sa kinatibuk-ang komperensya. Gikan karon hangtud sa sunod nga kinatibuk-ang komperensya, ang hilisgutan mao ang “Pagpangalagad sa Uban.” Matag bulan, ang mga lider o magtutudlo mahimong mopili sa paggiya sa mga diskusyon bahin sa bisan asa sa mosunod nga mga baruganan nga may kalabutan sa pagpangalagad.

Alang sa dugang nga mga kapanguhaan aron sa pagsuporta sa mga diskusyon mahitungod sa pagpangalagad, tan-awa sa ministering.lds.org ug “Mga Baruganan sa Pagpangalagad” nga mga artikulo sa umaabut nga mga isyu sa *Liahona*.

Unsay buot ipasabut sa pagpangalagad?

Unsay gipasabut sa *pagpangalagad* ngadto sa mga miyembro sa inyong ward o branch? Aron sa pagsusi, mahimo ninyong isulat ang *Pagpangalagad* diha sa pisara ug dayon dapita ang mga miyembro sa pagsulat og mga pulong libut niini nga gikonektar nila sa pagpangalagad. Ang mga miyembro makakita og mga pulong o hugpong sa mga pulong nga madugang sa lista gikan sa mga kasulatan sama sa mosunod: Mateo 25:34–40; Lucas 10:25–37;

2 Nephi 25:26; Mosiah 18:8–9; 3 Nephi 18:25; ug Doktrina ug mga Pakigsaad 81:5. Unsa ang atong makat-unan gikan niini nga mga bersikulo mahitungod sa pagpangalagad? Mahimo kamong mohangyo sa mga miyembro sa pagpaambit og mga ehemplo sa pagpangalagad nga ilang nakit-an. Sa unsang paagi ang atong pagpangalagad makatabang sa pagtubag sa espirital ug temporal nga mga panginahanglan sa mga tawo? Sa unsang paagi kini makatabang sa mga tawo nga mas maduol kang Kristo?

Ang Manluluwas maoy atong hingpit nga ehemplo sa pagpangalagad.

Aron makat-on kon unsaon sa pagpangalagad sa epektibong paagi, ang mga miyembro mahimong mopaambit og mga istorya gikan sa mga kasulatan diin ang Manluluwas nangalagad sa uban—ang pipila ka mga ehemplo makita diha sa Juan 4–6 ug Marcos 2:1–12. Ang mga miyembro mahimong mopaambit sa unsay nakadani kanila mahitungod niining mga istorya ug unsa nga mga baruganan ang ilang nakat-unan mahitungod sa pagpangalagad. Sama pananglit, giunsa man sa Manluluwas sa paghimo ng personal sa iyang pagserbisyo sa uban? Giunsa man Niya pagtubag ang espiritwal nga mga panginahanglan ingon man usab ang temporal nga mga panginahanglan sa mga tawo? Ang mga sakop sa klase mahimong mopaambit og mga higayon sa dihang nakakita sila og mga tawo nga migamit niini nga mga baruganan sa ilang pagpangalagad.

Ang pagpangalagad nadasig pinaagi sa Kristohanong gugma.

Aron masuhid ang gahum sa pagpangalagad nga nadasig sa Kristohanong gugma, mahimo ninyong isulat ang mosunod nga mga sentense diha sa pisara ug dapiton ang mga miyembro sa pagsugyot og mga paagi nga isulat diha sa mga blanko: *Kon tinud-anay nakong gihigugma ang mga tawo nga akong serbisuhan, ako _____. Kon moserbisyo ko alang sa ubang mga rason, ako _____.* Unsay atong mabuhar aron sa pagsiguro nga ang atong pagpangalagad sa uban nadasig sa Kristohanong gugma? Unsaon nato sa pagpalambo og Kristohanong gugma alang niadtong gi-assign kita sa pagpangalagad? (tan-awa sa Moroni 7:45–48). Tingali ang mga miyembro makapaambit og mga ehemplo sa pagpangalagad nga nadasig sa Kristohanong gugma.

Gusto sa Dios nga bantayan ug atimanon ang tanan Niyang mga anak.

Si Presidente Russell M. Nelson miingon, “Ang timailhan sa tinuod ug buhi nga Simbahan sa Ginoo kanunay mao ang organisado, gidumala nga paningkamot sa pagpangalagad ngadto sa indibidwal nga mga anak sa Dios ug ilang mga pamilya” (“Ang Pagpangalagad uban sa Gahum ug Awtoridad sa Dios,” *Liahona*, Mayo 2018, 69.). Unsa ang gitudlo ni Presidente Nelson nga pipila sa “organizado, gidumala” nga mga paagi diin ang Simbahan nagtabang kanato nga mas maayong moatiman sa mga indibidwal? Nganong kini nga mga paningkamot usa ka “timailhan sa tinuod ug buhi nga Simbahan sa Ginoo”? (tan-awa sa

Mosiah 18:21–22 ug Moroni 6:4–6 alang sa pipila ka mga ideya). Unsa nga mga panalangin ang miabut sa atong kinabuhi o sa kinabuhi sa uban tungod kay ang mga tawo nangalagad diha sa ilang mga calling o mga buluhaton sa Simbahan?

Ang bili sa kalag mahinungdanon sa panan-aw sa Dios.

Ang mga kasinatian sa mga anak ni Mosiah nagpakita nga ang paagi sa atong pagtan-aw sa mga tawo makaapekto kon unsaon nato sa pagpangalagad kanila. Mahimo ninyong isulat sa pisara ang *Giunsa pagtan-aw sa mga Nephite ang mga Lamanite* ug *Giunsa pagtan-aw sa mga anak ni Mosiah ang mga Lamanite*. Dayon dapita ang mga miyembro sa pagsiksik sa Mosiah 28:1–3 ug Alma 26:23–26 aron mangita og mga pulong nga masulat sa ubos sa matag usa niining mga pamahayag. Unsa ang gitudlo kanato niini nga pagkumpara kon sa unsang paagi ang atong pagtan-aw sa mga tawo makaapekto sa paagi sa atong pagpangalagad kanila? Unsaon nato sa pagkat-on nga mas motan-aw sa mga tawo sama sa pagtan-aw sa Dios kanila? (tan-awa sa D&P 18:10–16).

Ang tinuod nga mga tigpangalagad motutok sa mga panginahanglan sa uban.

Aron matabangan ang mga miyembro nga mas makasabut sa bili sa pagtutok sa mga panginahanglan sa uban samtang mangalagad kita, mahimo ninyong itandi ang pagpangalagad ngadto sa paghatag ug pagdawat og mga gasa. Nakadawat ba kita og makahuluganon nga gasa gikan sa usa ka tawo nga klaro nga nahibalo unsay atong gikinahanglan o gusto? Sa unsang paagi ang pagpangalagad sama sa paghatag og maayong pagkahunahuna nga gasa? Ikonsiderar ang paghisgot og mga istorya gikan sa pinakabag-o nga kinatibuk-ang komperensya nga nagpakita kon sa unsang paagi ang mga tawo nangalagad sumala sa mga panginahanglan sa uban (tan-awa, sama pananglit, ang Jean B. Bingham, “Pagpangalagad sama sa Gibuhar sa Manluluwas,” *Liahona*, Mayo 2018). Ang mga miyembro mahimo usab nga mopaambit og ubang mga istorya nga nagpakita niini nga baruganan.

Unsaon nato pagkahibalo kon unsa ang mga panginahanglan sa uban? Dapita ang matag miyembro sa paghimo og lista sa pipila sa mga tawo nga ilang alagaran. Tupad sa kada ngalan mahimo silang mosulat og tubag sa pangutana “Unsay gikinahanglan niining tawhana aron mas mapaduol ngadto ni Kristo?” Kon mahimo, awhaga ang mga miyembro

sa paglakip sa mga ordinansa nga tingali kinahanglang madawat sa matag tawo. Dapita ang mga miyembro nga magpadayon sa paghunahuna niini nga pangutana ug magtinguha og inspirasyon sa pagtabang kanila nga matubag ang mga panginahanglan sa uban.

Gusto sa Ginoo nga modawat kita og pagpangalagad gikan sa uban.

Si Elder Robert D. Hales miingon: “Ang plano sa ebanghelyo nagkinahanglan og paghatag ug pagdawat. . . . Ang mga indibidwal nga anaa sa kalisud kanunay nga moingon: ‘Ako ra ang mobuhar niini,’ . . . ‘Makahimo ko sa pag-atiman sa akong kaugalingon.’ Ginaingon nga walay usa nga sobra ka adunahan nga wala siya magkinahanglan sa tabang sa uban, walay usa nga sobra ka kabus nga dili mapuslan sa ubang paagi sa iyang isigkatawo. Ang gawi sa pagpangayo og tabang gikan sa ubang tawo uban sa pagsalig, ug ang paghatag niini uban sa pagkamabination, kinahanglang parte gayud sa atong kinaiya” (“We Can’t Do It Alone,” *Ensign*, Nob. 1975, 91, 93). Nganong magpanagana man kita usahay sa pagdawat og tabang gikan sa uban? Sa unsang paagi ang atong kaandam sa pagdawat og tabang mopanalingan niadtong moserbisyo kanato? Hatagi ang mga miyembro og pipila ka gutlo sa pagpamalandong sa mga paagi nga mahimo silang mas bukas sa pagdawat sa pagpangalagad sa uban. Unsa ang gisugyot sa 1 Mga Taga-Corinto 12:13–21 kon nganong nagkinahanglan kita sa usag usa?

Adunay daghang paagi nga makahimo kita sa pagpangalagad sa uban.

Aron matabangan ang mga miyembro sa pagkonsiderar sa daghang mga paagi nga makahimo kita sa pagpangalagad sa usag usa, mahimo ninyo silang dapiton sa pagribyu sa mensahe ni Elder Jeffrey R. Holland nga “Magpaduol ug Maglig-on Kanila” (*Liahona*, Mayo 2018, 101–3; tan-awa usab ang “Mga Baruganan sa Pagpangalagad” sa umaabut nga mga isyu sa *Liahona*). Mahimong bahinon ngadto sa gagmayng mga grupo ang mga miyembro, ug ang matag grupo maghunahuna og pipila ka mga sitwasyon diin ang usa ka tawo mahimong nagkinahanglan og tabang. Mahimo dayon silang maghunahuna og lain-laing mga paagi diin ang mga tawo makapangalagad sa espiritwal ug temporal nga mga panginahanglan sa mga indibidwal diha sa mga sitwasyon. Hangyoo ang mga grupo sa pagpaambit sa ilang mga ideya ug sa pagpamalandong kon aduna bay mga ideya nga gihisgutan nga makapanalangin sa mga tawo nga ilang alagaran. ■



Ang Korum sa Napulog Duha ka mga Apostoles

Naglingkod, gikan sa wala: Presidente M. Russell Ballard, Elder Jeffrey R. Holland, Elder Dieter F. Uchtdorf, Elder David A. Bednar, Elder Quentin L. Cook, Elder Gerrit W. Gong, Elder Ulfisses Soares.

Nagbarang, gikan sa wala: Elder D. Todd Christofferson, Elder Neil L. Andersen, Elder Ronald A. Rasband, Elder Gary E. Stevenson, Elder Dale G. Renlund, Elder Gerrit W. Gong, Elder Ulfisses Soares.



“Ako mopanalangin kaninyo sa pagtino sa mga butang nga inyong ihiklin aron kamo makagahin og dugang panahon sa templo,” miingon si Presidente Russell M. Nelson atol sa panapos nga sesyon sa ika-188 nga tinuig nga Kinatibuk-ang Komperensya sa Simbahan. “Ako mopanalangin kaninyo og mas dakong panag-uyon ug gugma sa inyong panimalay ug mas lawom nga tinguha sa pag-amuma sa inyong mahangturong mga relasyon sa pamilya. Ako mopanalangin kaninyo sa pag-usbaw sa hugot nga pagtuo diha sa Ginoo nga si Jesukristo ug mas dako nga abilidad sa pagsunod Kaniya isip Iyang tinuod nga disipulo.

“Ako mopanalangin kaninyo sa pagpataas sa inyong tingog sa pagpamatuod, sama sa akong gibuhad karon, nga kita naapil diha sa buhat sa Makagagahum nga Dios! Si Jesus mao ang Kristo. Kini mao ang Iyang Simbahan, nga Siya nagmando pinaagi sa Iyang dinihugan nga mga sulugoon.”